# TS'ÔNG-SHÜ KYI. 創世記

NYING=PO T'U=WÔ

寧波土話

GYIU-IAH-SHÜ

FÆN NYING-PO T'U-WÔ

FENG P'IN TANG P'IN.

YIH-PIN<sup>[1]</sup> CÜ SIANG-TE-GO TSIH-TSÔNG.

TS'ÔNG-SHÜ KYI.

DA-ING PENG-KOH TENG WÆ-KOH SING-SHÜ-WE

ING-GO.

1899.

舊約書

翻寧波土話 分篇打篇。 頁邊註相對個節章。 創世記。 大英本國等外國聖書會 印個。 1899° [1] 原書錯印為 YIN-PIN ZÔNG-HÆ ME-WÔ SHÜ-KWUN ING-SHIH. 上海 美華書館

印刷。

## TS'ÔNG-SHÜ KYI. 創世記

### Ts. I.

Kyʻi-tsʻu Jing-ming tsʻông-zao tʻin teng di. <sup>2</sup> Di m-neh soh-go siang-mao, tu z hyü-kʻong-go: ʻong-shü min-teng heh-en: Jing-ming-go Ling yüing-dong læ shü-go min-teng. <sup>3</sup> Jing-ming wô, Kæ yiu liang-kwông; liang-kwông ziu yiu-de: <sup>4</sup> Jing-ming kʻen keh liang-kwông z hao; Jing-ming ziu feng-cʻih liang teng en læ. <sup>5</sup> Jing-ming eo liang z Nyih-li, eo en z Yia-li. Yiu yia-deo, yiu tʻin-nyiang, keh z deo ih-nyih.

起初神明創造天等地。<sup>2</sup> 地嘸得<sup>[1]</sup>啥個相貌,都是虛空個。洪水面頂黑暗。神明個靈運動來水個面頂。<sup>3</sup> 神明話:「該有亮光。」亮光就有了<sup>[2]</sup>。<sup>4</sup> 神明看箇<sup>[3]</sup>亮光是好,神明就分出亮等暗來。<sup>5</sup> 神明謳亮是日裏,謳暗是夜裏。有夜頭,有天亮,箇是頭一日。

- [1] m-neh, 現代寧波話說 mhiq7, 一般作「嘸沒」,本字或為「嘸得」。
  - [2] de, 現代寧波話說 lei2, 通作「了」, 本字或為「著」。
- [3] keh,指示詞。現代寧波話說 kiq7,一般作「該」,本字為「個(箇)」。
- <sup>6</sup> Jing-ming yi wô, Shü cong-nyiang kæ yiu ky'üong-ts'ông, s-teh shü teng shü hao feng-leh-k'æ. <sup>7</sup> Jing-ming ziu zao-c'ih ky'üong-ts'ông, feng-k'æ ky'üong-ts'ông 'ô-deo-go shü teng ky'üong-ts'ông zông-deo-go shü: ziu yiu de. <sup>8</sup> Jing-ming eo ky'üong-ts'ông z T'in. Yiu yia-deo, yiu t'in-nyiang, keh z di-nyi nyih.
- <sup>6</sup> 神明又話:「水中央該有穹蒼,使得水等水好分勒開。」<sup>7</sup> 神明就造出穹蒼,分開穹蒼下頭個水等穹蒼上頭個水。就有了。<sup>8</sup> 神明謳穹蒼是天。有夜頭有天亮,箇是第二日。
- $^9$  Jing-ming yi wô, T'in-'ô-go shü kæ jü-long læ ih-t'ah, s-teh sao-go di-fông hao lu-c'ih-læ: ziu yiu-de.  $^{10}$

Jing-ming eo sao-go di-fông z Di: eo jü-long-tong-go shü z Hæ: Jing-ming k'en-k'en z hao-go. <sup>11</sup> Jing-ming yi wô, Di-yiang kæ sang-c'ih ts'ing-ts'ao teng kyih ts-go su-ts'æ, wa-yiu ko-ts jü, we kyih koh-cong ko-ts læ di min-teng, ko-ts li-hyiang yiu weh: ziu yiu-de. <sup>12</sup> Di-yiang ziu sang-c'ih ts'ing-ts'ao, teng koh-cong kyih ts-go su-ts'æ, wa-yiu koh-cong kyih ko-ts-go jü-moh, ko-ts li-hyiang yiu weh: Jing-ming k'en-k'en z hao-go. <sup>13</sup> Yiu yia-deo, yiu t'in-nyiang, keh z di-sæn nyih.

<sup>9</sup>神明又話:「天下個水該聚攏來一墳,使得燥個地方好露出來。」就有了。<sup>10</sup>神明謳燥個地方是地。謳聚攏東個水是海。神明看看是好個。<sup>11</sup>神明又話:「地垟該生出青草等結籽個蔬菜,還有果子樹,會結各種果子來地面頂,果子裏向有欄。」就有了。<sup>12</sup>地垟就生出青草等各種結籽個蔬菜,還有各種結果子個樹木,果子裏向有欄。神明看看是好個。<sup>13</sup>有夜頭,有天亮,箇是第三日。

<sup>14</sup> Jing-ming yi wô, T'in-k'ong-li kæ yiu sæn kwông hao feng-c'ih nyih yia; yi hao tso z-tsih, nyih-ts nyin-kanggo kyi-'ao; <sup>15</sup> yi hao fah-c'ih kwông læ t'in-k'ong-li tsiao-djoh di-yiang: ziu yiu-de. <sup>16</sup> Jing-ming ziu zao-c'ih lianggo do-do kwông; do-go kwông hao dzih nyih, siao-go kwông hao dzih yia: yi zao-c'ih sing-siu læ. <sup>17</sup> Jing-ming fông gyi læ t'in-k'ong-li hao tsiao-djoh di-yiang; <sup>18</sup> yi hao dzih nyih, dzih yia, feng-c'ih liang teng en: Jing-ming k'en-k'en z hao-go. <sup>19</sup> Yiu yia-deo, yiu t'in-liang, keh z di-s nyih.

<sup>14</sup> 神明又話:「天空裏該有散光好分出日夜。又好做時節,日子年庚個記號。<sup>15</sup> 又好發出光來天空裏照着地垟。」就有了。<sup>16</sup> 神明就造出亮個大大光。大個光好值日,小個光好值夜。又造出星宿來。<sup>17</sup> 神明放其來天空裏好照着地垟。<sup>18</sup> 又好值日,值夜,分出亮等暗。神明看看是好個。<sup>19</sup> 有夜頭,有天亮,箇是第四日。

<sup>20</sup> Jing-ming yi wô, Shü-li kæ sang-c'ih hyü-to weh-go tong-si, tiao yia kæ læ di zông-deo-go t'in-k'ong-li fi-læ-fi-ky'i. <sup>21</sup> Jing-ming ziu ts'ông-zao koh-cong do-do ng, teng shü-li sô sang-c'ih-go hyü-to weh-go tong-si, wa-yiu koh-

cong fi-gying: Jing-ming k'en-k'en z hao-go. <sup>22</sup> Jing-ming coh-foh peh gyi-lah, wô, Ng-lah hao meo-meo-zing-zing to-ky'i-læ, c'ong-mun hæ-li-go shü: fi-gying læ di-li hao to-ky'i-læ. <sup>23</sup> Yiu yia-deo, yiu t'in-nyiang, keh z di-ng nyih.

<sup>20</sup> 神明又話:「水裏該生出許多活個東西,鳥也該來地上頭個天空裏飛來飛去。」<sup>21</sup> 神明就創造各種大大魚等水裏所生出個許多活個東西,還有各種飛禽。神明看看是好個。<sup>22</sup> 神明祝福撥其拉話:「爾拉<sup>[1]</sup>好茂茂盛盛多起來,充滿海裏個水。飛禽來地裏好多起來。」<sup>23</sup> 有夜頭,有天亮,箇是第五日。

[1] ng-lah「爾拉」,第二人稱複數,你們。現代寧波話說 naq8, 寫作「倷」。

<sup>24</sup> Jing-ming yi wô, Di kæ sang-c'ih koh-cong weh-go tong-si, lin pah-yiang sang-k'eo, djong-dzi, yia-siu keh-sing: ziu yiu-de. <sup>25</sup> Jing-ming ziu zao yia-siu keh-le, sang-k'eo keh-le, teng di-yiang-li djong-dzi keh-le: Jing-ming k'en-k'en z hao go.

24 神明又話:「地該生出各種活個東西,連百樣牲口、蟲豸、野獸箇星。」就有了。<sup>25</sup> 神明就造野獸箇類, 牲口箇類,等地垟裏蟲豸箇類。神明看看是好個。

<sup>26</sup> Jing-ming yi wô, Ah-lah hao zao nying, siang-mao ziang ah-lah ka; hao dju hæ-li-go ng, t'in-li-go tiao, lin sang-k'eo, teng 'en-t'in-'ô di-fông, wa-yiu væn-pah diyiang-li bô-go djong-dzi. <sup>27</sup> Jing-ming ziu tsiao Zi-go siangmao ts'ông-zao nying læ; ts'ông-zao ziang Jing-ming-go siang-mao ka; ping-ts'ia ts'ông-zao gyi-lah ih-nen ih-nyü. <sup>28</sup> Jing-ming s foh-ky'i peh gyi-lah; Jing-ming teng gyi-lah wô, Ng-lah hao meo-meo-zing-zing to-ky'i-læ, c'ong-mun di-yiang cü-voh gyi: yia hao djü hæ-li-go ng, t'in-li-go tiao, teng di-zông 'ang-dong ih-ts'ih weh-go tong-si. <sup>29</sup> Jingming yi wô, Ngô s-peh ng pin-di we kyih ts-go su-ts'æ, teng yiu weh-go ko-ts jü: tu k'o-yi tso ng-go ky'üoh-zih. 30 Wa-yiu væn-pah di-yiang-li tseo-siu, t'in-k'ong-li fi-gying, teng di-zông-go djong-dzi, ih-ts'ih weh-go tong-si, Ngô speh gyi-lah ts'ing-ts'ao tso ky'üoh-zih: ziu yiu-de. 31 Jingming k'en-k'en Gyi væn-pah sô zao-go tong-si tu hao-lehkying. Yiu yia-deo, yiu t'in-nyiang, keh z di-loh nyih-de.

26 神明又話:「阿拉好造人,相貌像阿拉介。好治海 裏個魚,天裏個鳥,連牲口,等咸天下地方,還有凡百地 垟裏爬個蟲豸。」<sup>27</sup> 神明就照自個相貌創造人來。創造像 神明個相貌介。並且創造其拉一男一女。28 神明賜福氣撥 其拉。神明等其拉話:「爾拉好茂茂盛盛多起來。充滿地 垟制服其。也好治海裏個魚, 天裏個鳥, 等地上行動一切 活個東西。」29神明又話:「我賜撥爾遍地會結籽個蔬 菜,等有橢個果子樹。都可以做爾個喫食。<sup>30</sup> 還有凡百地 垟裏走獸, 天空裏飛禽, 等地上個蟲豸, 一切活個東西, 我賜撥其拉青草做喫食。」就有了。31神明看看其凡百所 造個東西都好勒緊。有夜頭, 有天亮, 箇是第六日了。

#### Ts. II.

Z-ka-go t'in teng di lin gyi-lah væn-veh tu djün-djün-be-be. <sup>2</sup> Tao di-ts'ih nyih Jing-ming sô zao-go yi-kying wun-kong: sô-yi di-ts'ih nyih long-tsong wun-kong ts-'eo ziu en-sih-de. <sup>3</sup> Jing-ming coh-tsæn di-ts'ih nyih, peh gyi tso tseng-ky'i-go nyih-ts; ing-we keh-ih-nyih væn-veh tu zao-dzing, Jing-ming ziu en-sih-de.

是介個天等地連其拉萬物都全全備備。<sup>2</sup> 到第七日神明 所造個已經完工。所以第七日攏總完工之後就安息了。<sup>3</sup> 神 明祝讚第七日,撥其做尊起個日子。因為箇一日萬物都造 成,神明就安息了。

<sup>4</sup> Ts'ông-zao t'in-di-go læ-lih: Yiæ-'o-wô Jing-ming zao t'in-di keh z-'eo, læ 'ô-veng. <sup>5</sup> Di-t'u wa feh-zing sang-c'ih ts'ao-moh, yia m-neh fah-c'ih su-ts'æ; Yiæ-'o-wô Jing-ming feh-zing loh-yü læ di-yiang-li, kang-cong-go <sup>[2]</sup>nying yia m-neh; tæn-tsih vu-lu dzong di-yiang sing-zông ts-jing pin-di min-teng. <sup>7</sup> Yiæ-'o-wô Jing-ming do-leh di-go hwe-dzing zao <sup>[3]</sup>nying, pô seng-ky'i c'ü-tsing gyi bih-deo-kwun: nying ziu yiu weh-ming go ling-weng.

<sup>4</sup> 創造天地個來歷。耶和華神明造天地箇時候,來下文。<sup>5</sup> 地土還弗曾<sup>[1]</sup>生出草木,也嘸得發出蔬菜。耶和華神明弗曾落雨來地垟裏,耕種個人<sup>[2]</sup>也嘸得。單只霧露從地垟升上滋潤遍地面頂。<sup>7</sup> 耶和華神明馱勒地個灰塵造人<sup>[3]</sup>,把生氣吹進其鼻頭管。人就有活命個靈魂。

#### [1] 不曾

- [2] Peng-veng wô Üô-tông. 本文話亞當。(原註)
- [3] 'Ôh-wô Üô-tông. 或話亞當。(原註)

<sup>8</sup> Yiæ-'o-wô Jing-ming læ Yiæ-din tong-pin cong ih-go yün, ziu pô sô zao-go <sup>[2]</sup>nying fông-læ keh-deo. <sup>9</sup> Yiæ-'o-wô Jing-ming s-teh di-t'u fah-c'ih ih-ts'ih hao-k'en hao-ky'üoh-go jü-moh: yün cong-nyiang yiu ih-cü weh-ming-go jü wa-yiu ih-cü sih-teh jün-ôh-go jü. <sup>10</sup> Yiæ-din di-fông yiu ih-da 'o liu-c'ih-læ hao kyiao keh-go yün: dzong keh-deo feng-k'æ s-ts'ô-sang.

<sup>8</sup> 耶和華神明來<u>埃田</u><sup>[1]</sup>東邊種一個園,就把所造個人<sup>[2]</sup> 放來箇頭。<sup>9</sup> 耶和華神明使得地土發出一切好看好喫個樹 木。園中央有一株活命個樹,還有一株識得善惡個樹。<sup>10</sup> 埃田地方有一埭河流出來好澆箇個園。從箇頭分開四汊 生。

- [1] 現譯爲「伊甸」
- [2] 'Ôh-wô Üô-tông. 或話<u>亞當</u>。(原註)

<sup>11</sup> Deo-ih-da kyiao-leh Pi-seng; dön-ky'ün liu-cün Hafi-lah: keh di-fông c'ih kying-ts. <sup>12</sup> Gyi kying-ts ting hao; yia yiu cü-ts teng pih-nyüoh. <sup>13</sup> Di-nyi kyiao-leh Gyihyüing, dön-ky'ün liu-cün Kwu-jih di-fông. <sup>14</sup> Di-sæn kyiao-leh Hyi-ti-kyih, liu-tao Üô-jih-go tong-pin: di-s kyiao-leh Pah-lah. <sup>15</sup> Yiæ-'o-wô Jing-ming pô keh-go [1]nying fông-læ Yiæ-din yün-li hao kang-cong kwun-siu. <sup>68</sup> Yiæ-'o-wô Jing-ming feng-fu keh-go <sup>[2]</sup>nying, wô, Yün lihyiang-go ko-ts, ng tu hao ze-i ky'üoh: <sup>17</sup> Tsih-yiu sih-teh jün-ôh jü-go ko-ts, ng feh-k'o ky'üoh: ziah-z ky'üoh-ts, keh nyih ng pih-ding we si.

11 頭一埭叫勒<u>比遜</u>。團圈流轉<u>哈腓拉</u>。箇地方出金子。<sup>12</sup> 其金子頂好。也有珠子等碧玉。<sup>13</sup> 第二叫勒<u>其訓</u>,團圈流轉<u>古實</u>地方。<sup>14</sup> 第三叫勒<u>希底結</u>,流到<u>亞述</u>個東邊。第四叫勒伯拉。<sup>15</sup> 耶和華神明把箇個人<sup>[1]</sup>放來<u>埃田</u>園裏好耕種管守。<sup>16</sup> 耶和華神明吩咐箇個人<sup>[2]</sup>,話:「園裏向個果子,爾都好隨意喫。<sup>17</sup> 只有識得善惡樹個果子,爾弗可喫。若是喫仔,箇日爾必定會死。」

- [1] 'Ôh-wô Üô-tông. 或話亞當。(原註)
- [2] 'Ôh-wô Üô-tông. 或話亞當。(原註)

<sup>18</sup> Yiæ-'o-wô Jing-ming yi z-ka wô, <sup>[1]</sup>Nying doh-zi læ-kæn m-neh hao; Ngô we tso ih-go te-siu hao pông-dzu gyi. Yiæ-'o-wô Jing-ming dzong di-t'u zao-c'ih keh-sing din-ligo tseo-siu, t'in-li-go fi-gying, ling-tao Üô-tông min-zin, k'en gyi eo soh-go ming-z: væn-pah weh-go tong-si ming-z tu tsiao Üô-tông sô eo-go. <sup>20</sup> Keh-sing sang-k'eo, fi-gying, yia-siu, Üô-tông tu c'ü gyi ming-z: tsih-yiu Üô-tông wa m-neh te-siu pông-dzu gyi. <sup>21</sup> Yiæ-'o-wô Jing-ming s-teh Üô-tông sah-kao kw'eng-joh: kw'eng-joh z-'eo, Jing-ming do-

c'ih ih-keng leh-ba-kweh, ziu pu-hao gyi-go nyüoh. <sup>22</sup> Yiæ-'o-wô Jing-ming pô sô do-c'ih-go Üô-tông keh-keng leh-ba-kweh, zao ih-go nyü-nying, ling gyi tao Üô-tông difông. <sup>3</sup> Üô-tông wô, Keh z ngô kweh-deo-go kweh-deo, z ngô nyüoh-go nyüoh: ing-we dzong nen-nying-go singzông do-c'ih-go; keh-lah eo gyi Nyü-nying. <sup>24</sup> Sô-yi ih-go nying hao li-k'æ gyi tia-nyiang, ts'ing-gying gyi ts'i-ts: keh liang-go dzing-we ih-t'i. Keh liang fu-ts'i ziu-z dô-kô c'ih-sing-lu-t'i, yia m̆-kao p'ô wông-k'ong.

18 耶和華神明又是介話:「人<sup>[1]</sup>獨自來間嘸得好。我會做一個對手好幫助其。」耶和華神明從地土造出箇星田裏個走獸,天裏個飛禽,領到亞當面前,看其謳啥個名字。凡百活個東西名字都照亞當所謳個。<sup>20</sup> 箇星牲口,飛禽,野獸,亞當都取其名字。只有亞當還嘸得對手幫助其。<sup>21</sup> 耶和華神明使得亞當煞覺睏熟。睏熟時候,神明馱出一根肋排骨,就補好其個肉。<sup>22</sup> 耶和華神明把所馱出個亞當大人,領其到亞當地方。<sup>23</sup> 亞當話:「箇是我骨頭個骨頭,是我肉個肉。因為從男人個身

上馱出個,箇勒謳其女人。」<sup>24</sup> 所以一個人好離開其爹孃,親近其妻子。箇兩個成為一體。<sup>25</sup> 箇兩夫妻<sup>[2]</sup>就是大家出身露體,也嘸告怕惶恐。

- [1] 'Ôh-wô Üô-tông. 或話亞當。(原註)
- [2] 'Ôh-wô Keh liang-go nying, ziu-z Üô-tông teng gyi ts'i-ts dô-kô. 或話, 箇兩個人, 就是亞當等其妻子大家。(原註)

#### Ts. III.

Yiæ-'o-wô Jing-ming sô zao ih-ts'ih weh-veh, z dzô ting diao-bi. Gyi teng nyü-nying wô, Yün li-deo keh-sing jü, næn-dao Jing-ming feng-fu ng-lah tu feh-k'o ky'üoh ma? Keh nyü-nying teng dzô wô, Yün li-deo jü-go ko-ts, ah-lah tu hao ky'üoh: <sup>3</sup> Tsih-yiu yün cong-nyiang keh-cü jü-go ko-ts, Jing-ming wô, Ng-lah feh-k'o ky'üoh gyi, yia feh-k'o moh gyi, sæn-leh we si. <sup>4</sup> Dzô teng nyü-nying wô, Ng vi-pih we si-go. <sup>5</sup> Jing-ming hyiao-teh ng-lah ky'üoh-ts

keh-nyih, ngæn-tsing ziu liang; we ziang Jing-ming ka sihteh jün-ôh.  $^6$  Keh-tsao nyü-nying k'en-k'en keh-cü jü z hao-ky'üoh hao-k'en, yi hao ky'i-mo neng-keo kô-ts'eo ts'ong-ming, ziu tsah-tin ko-ts, ky'üoh-de: yi peh gyi-go dziang-fu; dziang-fu yia dô-kô ky'üoh-de. <sup>7</sup> Keh liang-go nying ngæn-tsing k'æ-de, dzæ-s teh-cü c'ih-sing-lu-t'i, ziu pô vu-hwô-ko yih gao-tæn-long tso gyüing ky'i. <sup>8</sup> Keh nyih lang-ing z-'eo gyi-lah t'ing-meng Yiæ-'o-wô Jing-ming sing-hyiang læ yün li-hyiang tseo-tseo. Üô-tông teng gyi ts'i-ts iu-læ yün-go jü-vong-li, iao bi-ko Yiæ-'o-wô Jingming-go min-zin. <sup>9</sup> Yiæ-'o-wô Jing-ming eo Üô-tông teng gyi wô, Ng læ 'ah-li? <sup>10</sup> Gyi wô, Ngô ih t'ing-meng Ng-go sing-hyiang læ yün-li, p'ô c'ih-sing-lu-t'i, ziu iu-ko-de. 11 Gyi wô, Jü wô ng z c'ih-sing-lu-t'i? Ngô sô kying ng fehhyü ky'üoh-go jü, ng ky'üoh-ko-de ma? 12 Üô-tông wô, Ng p'e-peh ngô-go nyü-nying, gyi coh-tin keh-cü jü-go ko-ts peh ngô; sô-yi ky'üoh-de. <sup>13</sup> Yiæ-'o-wô Jing-ming teng nyü-nying wô, Ng sô tso dza-go yia? Nyü-nying wô, Dzô

yiu-'oh ngô, sô-yi ky'üoh-de. 14 Yiæ-'o-wô Jing-ming ziu teng dzô wô, Ng kyi-jün ka tso, z pi væn-pah-go sang-k'eo yia-siu yü-kô ziu tsiu-mô: ng iao du-bi tseo-lu, ih-sang-ihsi ky'üoh hwe-dzing. <sup>15</sup> Ngô we s-teh nyü-nying teng ng kyih ün-dziu; nyü-nying-go 'eo-dæ teng ng-go 'eo-dæ yia dô-kô kyih ün-dziu, Gyi tsiang-læ we sông ng-go deo: ng tsiang-læ we sông gyi-go kyiah-'eo-keng. <sup>16</sup> Yi teng nyünying wô, Ngô we djong-djong kô-ts'eo ng yiu sing-yüinggo næn-deo: ng sang ng-nô pih-ding ky'üoh-kw'u: ng tsiang-læ we voh dziang-fu kæ-kwun: dziang-fu tsiang-læ we kwun-li ng. <sup>17</sup> Yi teng Üô-tông wô, Ng kyi-jün t'ing ts'its-go shih-wô, ky'üoh Ngô sô kying ng feh-hyü ky'üoh-go jü, keh-lah di-t'u we-leh ng ziu tsiu-mô; ng ky'üoh gyi-go t'u-ts'æn, pih-iao ih-sang-ih-si sing-kw'u. 18 Ts'-bang yiats'ao we fah-c'ih-læ peh ng: ng tsiang-læ iao ky'üoh din-ligo su-ts'æ. <sup>19</sup> Min-k'ong 'en-c'ih-t'ô-liu hao yiu ky'üohzih; teng-tao ng kwe-t'u: ing-we ng z dzong di-t'u c'ih-lægo: ng z-go hwe-dzing; dzing-gyiu iao kwe-tao hwe-dzing kyʻi. <sup>20</sup> Üô-tông cʻü gyi tsʻi-ts ming-z <sup>[3]</sup>Yüô-ӂô, ing-we gyi z væn-pah weh-nying-go ah-nyiang. <sup>21</sup> Yiæ-ʻo-wô Jing-ming tso bi-go i-zông peh Üô-tông teng gyi tsʻi-ts cʻün.

耶和華神明所造一切活物,是蛇頂調皮。其等女人 話:「園裏頭箇星樹,難道神明吩咐爾拉都弗可喫嗎?」<sup>2</sup> 箇女人等蛇話:「園裏頭樹個果子,阿拉都好喫。<sup>3</sup>只有園 中央箇株樹個果子,神明話:『爾拉弗可喫其,也弗可摸 其,省勒會死。』」4蛇等女人話:「爾未必會死個。5神 明曉得爾拉喫仔箇日, 眼睛就亮, 會像神明介識得善 惡。」<sup>6</sup> 箇遭女人看看箇株樹是好喫好看,又好企慕能夠加 湊聰明,就摘點果子, 喫了。又撥其個丈夫。丈夫也大家 喫了。<sup>7</sup> 箇兩個人眼睛開了,纔始得知出身露體,就把無花 果葉絞帶攏做裙去。8箇日冷陰時候,其拉聽聞[1]耶和華神 明聲響來園裏向走走。亞當等其妻子幽來園個樹縫裏,要 避過耶和華神明個面前。9耶和華神明謳亞當等其話:「爾 來何裏[2]?」10 其話: 「我一聽聞爾個聲響來園裏,怕出 身露體,就幽過了。」11 其話: 「誰話爾是出身露體?我 所禁爾弗許喫個樹,爾喫過了嗎?」12 亞當話:「爾配撥

我個女人, 其給點箇株樹個果子撥我, 所以喫了。」<sup>13</sup> 耶 和華神明等女人話:「爾所做咋個耶?」女人話:「蛇誘 惑我,所以喫了。」14 耶和華神明就等蛇話:「爾既然介 做,是比凡百個牲口野獸愈加受咒罵。爾要肚皮走路,一 生一世喫灰塵。15 我會使得女人等爾結怨仇,女人個後代 等爾個後代也大家結怨仇。其將來會傷爾個頭, 爾將來會 傷其個腳後跟。」16 又等女人話: 「我會重重加湊爾有身 孕個難頭,爾生兒囡必定喫苦。爾將來會服丈夫該管,丈 夫將來會管理爾。」17 又等亞當話:「爾既然聽妻子個說 話, 喫我所禁爾弗許喫個樹, 箇勒地土為了爾受咒罵, 爾 喫其個土產,必要一生一世辛苦。<sup>18</sup> 刺棚野草會發出來撥 爾。爾將來要喫田裏個蔬菜。19面孔汗出湯流好有喫食, 等到爾歸土。因為爾是從地土出來個。爾是個灰塵,仍舊 要歸到灰塵去。」20 亞當取其妻子名字夏娃[3],因爲其是 凡百活人個阿孃。21 耶和華神明做皮個衣裳撥亞當等其妻 子穿。

[1] t'ing-meng「聽聞」,現代寧波話說 thin min,一般作「聽明」。

- [2] 'ah-li, 現代寧波話說 aq li, 一般作「阿裏」, 本字為「何裏」。
  - [3] Ziu-z Weh-ming ka-shih. 就是活命解說。(原註)
- Yiæ-'o-wô Jing-ming z-ka wô, Næn-kæn gyi nying z yi-kying ziang ah-lah ka we sih-teh jün-ôh: k'ong-p'ô gyi yin-dzæ sing-c'ih siu, yia tsah keh weh-ming jü-go ko-ts, ky'üoh-ts üong-yün weh: keh-lah Yiæ-'o-wô Jing-ming eo gyi tseo-c'ih Yiæ-din yün, peh gyi kang-cong gyi sô c'ih-læ-go di-t'u. <sup>24</sup> Ziu ken-c'ih keh-go nying: yi læ Yiæ-din yün tong-pin lih-leh Kyi-lu-ping; wa-yiu ho-yin-go pao-kyin yüih-læ yüih-ky'i lah-djü weh-ming jü keh-da lu.
- <sup>22</sup> 耶和華神明是介話:「難間其人是已經像阿拉介會 識得善惡,恐怕其現在伸出手,也摘箇活命樹個果子,喫 仔永遠活。」箇勒耶和華神明謳其走出<u>埃田</u>園,撥其耕種 其所出來個地土。<sup>24</sup> 就趕出箇個人,又來<u>埃田</u>園東邊立了 基路賓,還有火延個寶劍抈來抈去攔住活命樹箇埭路。

#### Ts. IV.

Üô-tông teng gyi ts'i-ts Yüô-wô dong-zông: Yüô-wô yiu sing-yüing, sang [1]Kæ-ing, ziu wô, Næn-kæn ngô yiu ng-ts, ziu-z Yiæ-'o-wô pao-yiu ngô teh-djoh-go, Yi sang gyi ah-di Üô-pah. Üô-pah k'en yiang; Kæ-ing kang din. <sup>3</sup> Tao 'eo-deo Kæ-ing do-leh t'u-ts'æn ky'i hyin peh Yiæ-'o-wô. <sup>4</sup> Üô-pah yia hyin gyi deo-sang-go siao-yiang, lin yiang-yiu. Yiæ-'o-wô k'en cong-i Üô-pah teng gyi tsi-veh; <sup>5</sup> dæn-z feh cong-i Kæ-ing teng gyi-go tsi-veh. Keh-lah Kæ-ing donyiang sang-ky'i, min-k'ong pin-seh. <sup>6</sup> Yiæ-'o-wô teng Kæ-ing wô, Ng dza-we sang-ky'i, min-k'ong pin-seh? <sup>7</sup> Ng ziah-z 'ang-jün, næn-dao feh kyü ng zông ma? Ng ziah-z tsoh-ôh, ze-nyih ziu voh-læ meng-k'eo. Gyi pih-iao voh ng kæ-kwun: ng we djü gyi. 8 'Eo-deo Kæ-ing teng ah-di Üôpah kông-kông: k'eo-k'eo tseo-tao din-li, Kæ-ing ziu lihky'i long-sah gyi ah-di Üô-pah.

亞當等其妻子夏娃同牀,夏娃有身孕,生該隱<sup>[1]</sup>,就話:「難問我有兒子,就是耶和華保佑我得着個。」<sup>2</sup>又生其阿弟亞伯。亞伯看羊,該隱耕田。<sup>3</sup>到後頭該隱馱勒土產去獻撥耶和華。<sup>4</sup>亞伯也獻其頭生個小羊,連羊油。耶和華看中意亞伯等其祭物。<sup>5</sup>但是弗中意該隱等其個祭物。箇勒該隱大樣生氣,面孔變色。<sup>6</sup>耶和華等該隱話:「爾咋會生氣,面孔變色?<sup>7</sup>爾若是行善,難道弗舉爾上嗎?爾若是作惡,罪孽就伏來門口。其必要服爾該管,爾會治其。」<sup>8</sup>後頭該隱等阿弟亞伯講講,扣扣走到田裏,該隱就立起弄煞其阿弟亞伯。

[1] Kæ-ing-go i-s Ziu-z teh-djoh. 該隱個意思就是得着。(原註)

<sup>9</sup> Yiæ-'o-wô teng Kæ-ing wô, Ng ah-di Üô-pah læ 'ah-li? Gyi wô, Feh-hyiao-teh: ngô næn-dao z kwun ah-di go ma? <sup>10</sup> Yi wô, Ng tso soh-go z-ken ko-de? Ng ah-di-go hyüih yiu sing-hyiang dzong di-yiang-li eo Ngô. <sup>11</sup> Næn-kæn di-yiang k'æ-k'eo t'eng-loh ng ah-di-go hyüih, ziu-z ng ts'ing-siu sô liu-c'ih-go: keh-lah ng be di tsiu-mô. <sup>12</sup> Ng kang-din z-'eo, di feh-k'eng teng ng c'ih-lih: ng læ shü-

kæn-zông pih-iao tso lông-dông ts. <sup>13</sup> Kæ-ing teng Yiæ-'o-wô wô, Ngô ying-vah jih-dzæ djong-djong, tông-feh-ky'i. <sup>14</sup> Ng kyih-mih ken ngô c'ih keh di-fông, feh-hyü tsæ kyin Ng-go min: ngô læ shü-kæn-zông kyi-jün tso lông-dông ts, k'ong-p'ô p'ong-djoh-go nying iao long-sah ngô. <sup>15</sup> Yiæ-'o-wô teng gyi wô, Long-sah Kæ-ing go pih-iao kô ts'ih-be ziu ying-vah: z-ka Yiæ-'o-wô s kyi-'ao peh Kæ-ing, sæn-leh p'ong-djoh gyi go long-sah gyi.

9 耶和華等<u>該隱</u>話:「爾阿弟<u>亞伯</u>來何裡?」其話:「弗曉得,我難道是管阿弟個嗎?」<sup>10</sup> 又話:「爾做啥個事幹過了?爾阿弟個血有聲響從地垟裏謳我。<sup>11</sup> 難間地垟開口吞落爾阿弟個血,就是爾親手所流出個。箇勒爾被地咒罵。<sup>12</sup> 爾耕田時候,地弗肯等爾出力。爾來世間上必要做越超子。」<sup>13</sup> 該隱等耶和華話:「我刑罰實在重重,當弗起。<sup>14</sup> 爾今末趕我出箇地方,弗許再見爾個面。我來世間上既然做越超子,恐怕碰着個人要弄煞我。」<sup>15</sup> 耶和華等其話:「弄煞<u>該隱</u>個必要加七倍受刑罰。」是介耶和華賜記號撥該隱,省勒碰着其個弄煞其。

Kæ-ing ziu tseo-c'ih li-k'æ Yiæ-'o-wô min-zin, deng-læ Yiæ-din tong-pin Nô-teh di-fông. <sup>17</sup> Kæ-ing teng ts'i-ts dong-zông, gyi ts'i-ts yiu-sing sang Yi-noh. Gyi zao ih-zo dzing-ts, c'ü gyi di-ming tsiao ng-ts Yi-noh-go mingz. <sup>18</sup> Yi-noh sang Yi-lah: Yi-lah sang Mi-wu-yüô-li: Mi-wuyüô-li sang Mô-t'u-sah-li: Mô-t'u-sah-li sang Lah-mah. 19 Lah-mah dæ liang-go ts'i-ts; ih-go ming-z Üô-da, ih-go ming-z Si-lah. <sup>20</sup> Üô-da sang Yüô-pah, ziu-z deng-læ tsiang-bong-li, k'en sang-k'eo nying go tsu-tsong. <sup>21</sup> Gyi ah-di ming-z Yiu-pah, ziu-z keh-sing dæn-gying c'ü dih-ts nying-go tsu-tsong. <sup>22</sup> Si-lah sang T'u-pah-kæ-ing. ziu-z keh-sing dong-ziang, t'ih-ziang go s-tsu. T'u-pah-kæ-ing tsi-me ming-z Nô-mô. <sup>23</sup> Lah-mah teng gyi liang-go ts'i-ts Üô-da Si-lah wô, Yüong t'ing-meng ngô sing-hyiang, Lahmah go ts'i-ts, yüong liu-sing ngô-go shih-wô: ngô longsah ih-go nying, ing-we gyi tang-sông ngô; ziu-z ih-go 'eosang, ing-we gyi 'æ ngô-go. <sup>24</sup> Ziah-z long-sah Kæ-ing iao kô ts'ih-be ziu ying-vah, ka long-sah Lah-mah, pih-iao kô ts'ih-jih-ts'ih be.

方。17該隱等妻子同牀,其妻子有身生以諾。其造一座城 子,取其地名照兒子以諾個名字。<sup>18</sup>以諾生以拉。以拉生 米戶雅利。米戶雅利生瑪土撒利。瑪土撒利生拉麥。19拉 麥抬兩個妻子,一個名字亞大,一個名字洗拉。<sup>20</sup> 亞大生 雅八,就是庉來帳篷裏,看牲口人個祖宗。21 其阿弟名字 猶八,就是箇星彈琴吹笛子人個祖宗。<sup>22</sup> 洗拉生土八該 隱,就是箇星銅匠、鐵匠個始祖。土八該隱姊妹名字拿 瑪。<sup>23</sup> 拉麥等其兩個妻子亞大、洗拉話: 「用聽聞我聲 響,拉麥個妻子,用留心我個說話。我弄煞一個人,因為 其打傷我,就是一個後生,因爲其害我個。<sup>24</sup> 若是弄煞該 隱要加七倍受刑罰,介弄煞拉麥,必要加七十七倍。」

<sup>25</sup> Üô-tông yi teng gyi ts'i-ts dong-zông sang ng-ts, c'ü gyi ming-z Shih, ing-we gyi wô, Jing-ming tsæ s-peh ngô ng-ts, hao dæ Kæ-ing sô sah-diao-go Üô-pah. <sup>26</sup> Shih yia

sang ng-ts, c'ü gyi ming-z Yi-no-z. Keh-go z-'eo nying ky'ideo æ-gyiu Yiæ-'o-wô-go ming-deo.

25 <u>亞當</u>又等其妻子同牀生兒子,取其名字<u>設</u>,因為其 話神明再賜撥我兒子,好代<u>該隱</u>所殺掉個<u>亞伯</u>。<sup>26</sup> <u>設</u>也生 兒子,取其名字<u>以挪士</u>。箇個時候人起頭哀求耶和華個名 頭。

#### Ts. V.

Üô-tông-go shü-dæ kô-pu læ 'ô-veng. Jing-ming ts'ông-zao nying-go z-'eo, tsiao Jing-ming-go siang-mao ka ts'ông-zao gyi c'ih-læ. <sup>2</sup> Ping-ts'ia ts'ông-zao-ih-nen ih-nyü: wa-yiu ts'ông-zao gyi keh nyih, Jing-ming s foh-ky'i peh gyi-lah, c'ü gyi-lah ming-z <sup>[1]</sup>Üô-tông.

亞當個世代家譜來下文。神明創造人個時候,照神明個相貌介創造其出來。<sup>2</sup>並且創造一男一女,還有創造其箇日,神明賜福氣撥其拉,取其拉名字亞當<sup>[1]</sup>。

<sup>3</sup> Üô-tông nyin-kyi ih-pah sæn-jih shü sang ng-ts tsiao gyi-zi-go siang-mao, c'ü gyi ming-z Shih. <sup>4</sup> Üô-tông sang Shih yi-'eo yiu pah-pah nyin, wa sang ng-ts nön. <sup>5</sup> Üô-tông ziu-shü kyiu-pah sæn-jih shü, si-de.

<sup>3</sup> <u>亞當</u>年紀一百三十歲生兒子照其自個相貌,取其名字 <u>設</u>。<sup>4</sup> <u>亞當</u>生設以後有八百年,還生兒子囡。<sup>5</sup> <u>亞當</u>壽歲九 百三十歲,死了。

<sup>8</sup> Shih nyin-kyi ih-pah ling ng-shü sang Yi-no-z. <sup>7</sup> Shih sang Yi-no-z yi-'eo yiu pah-pah ling-ts'ih nyin, wa sang ng-ts nön. <sup>8</sup> Shih-go ziu-shü kyiu-pah jih-nyi shü, si-de.

<sup>6</sup> 設年紀一百零五歲生<u>以挪士</u>。<sup>7</sup> 設生<u>以挪士</u>以後有八百零七年,還生兒子囡。<sup>8</sup> 設個壽歲九百十二歲,死了。

<sup>9</sup> Yi-no-z nyin-kyi kyiu-jih shü sang Kæ-nen. <sup>10</sup> Yi-no-z sang Kæ-nen yi-'eo yiu pah-pah jih-ng nyin, wa sang ng-ts nön. <sup>11</sup> Yi-no-z ziu-shü kyiu-pah ling ng shü, si-de.

- 9<u>以挪士</u>年紀九十歲生<u>該南。10</u>以挪士生<u>該南</u>以後有八百十五年,還生兒子囡。11以挪士壽歲九百零五歲,死了。
- <sup>12</sup> Kæ-nen nyin-kyi ts'ih-jih shü, sang Mô-leh-lih. <sup>13</sup> Kæ-nen sang Mô-leh-lih yi-'eo yiu pah-pah s-jih nyin, wa sang ng-ts nön. <sup>14</sup> Kæ-nen ziu-shü kyiu-pah ling jih shü, si-de.
- 12 <u>該南</u>年紀七十歲,生<u>瑪勒列</u>。13 <u>該南</u>生<u>瑪勒列</u>以後 有八百四十年,還生兒子囡。<sup>14</sup> <u>該南</u>壽歲九百零十歲,死 了。
- <sup>15</sup> Mô-leh-lih nyin-kyi loh-jih-ng shü, sang Yüô-lih. <sup>16</sup> Mô-leh-lih sang Yüô-lih yi-'eo yiu pah-pah sæn-jih nyin, wa sang ng-ts nön. <sup>17</sup> Mô-leh-lih ziu-shü pah-pah kyiu-jih-ng shü, si-de.
- 15 <u>瑪勒列</u>年紀六十五歲,生<u>雅列</u>。16 <u>瑪勒列</u>生雅列以 後有八百三十年,還生兒子囡。17 <u>瑪勒列</u>壽歲八百九十五 歲,死了。

<sup>18</sup> Yüô-lih nyin-kyi ih-pah loh-jih-nyi shü, sang Yi-noh. <sup>19</sup> Yüô-lih sang Yi-noh yi-'eo yiu pah-pah nyin, wa sang ng-ts nön. <sup>20</sup> Yüô-lih ziu-shü kyiu-pah loh-jih-nyi shü, si-de.

<sup>18</sup> 雅列年紀一百六十二歲,生<u>以諾</u>。<sup>19</sup> 雅列生<u>以諾</u>以 後有八百年,還生兒子囡。<sup>20</sup> 雅列壽歲九百六十二歲,死 了。

<sup>21</sup> Yi-noh nyin-kyi loh-jih-ng shü, sang Mô-t'u-sah-lah. <sup>22</sup> Yi-noh sang Mô-t'u-sah-lah yi-'eo teng Jing-ming læ-wõng yiu sæn-pah nyin, wa sang ng-ts nön. <sup>23</sup> Yi-noh læ shü-kæn-zông sæn-pah loh-jih-ng nyin. <sup>24</sup> Yi-noh teng Jing-ming læ-wõng; 'eo-deo m-neh læ-tong ing-we Jing-ming ta-leh ky'i-de.

21 <u>以諾</u>年紀六十五歲,生<u>瑪土撒拉</u>。22 <u>以諾生瑪土撒</u> 拉以後等神明來往有三百年,還生兒子囡。23 <u>以諾</u>來世間 上三百六十五年。24 <u>以諾</u>等神明來往。後頭嘸得來東,因 爲神明帶勒去了。 <sup>25</sup> Mô-t'u-sah-lah nyin-kyi ih-pah pah-jih-ts'ih shü, sang Lah-mah. <sup>26</sup> Mô-t'u-sah-lah sang Lah-mah yi-'eo yiu tsih-pah pah-jih-nyi nyin, wa sang ng-ts nön. <sup>27</sup> Mô-t'u-sah-lah ziu-shü kyiu-pah loh-jih-kyiu shü, si-de.

25 <u>瑪土撒拉</u>年紀一百八十七歲,生<u>拉麥</u>。26 <u>瑪土撒拉</u>生<u>拉麥</u>以後有七百八十二年,還生兒子囡。27 <u>瑪土撒拉</u>壽歲九百六十九歲,死了。

<sup>28</sup> Lah-mah nyin-kyi ih-pah pah-jih-nyi shü, sang ngts, <sup>29</sup> c'ü gyi ming-z <sup>[1]</sup>Nô-üô, z-ka wô, Ah-lah siu-li-go lao-kw'u, we-leh Yiæ-'o-wô tsiu-mô-go di-t'u, keh-go ng-ts pih-ding we en-we ah-lah. <sup>30</sup> Lah-mah sang Nô-üô yi-'eo yiu ng-pah kyiu-jih-ng nyin, wa sang ng-ts nön. <sup>31</sup> Lah-mah ziu-shü ts'ih-pah ts'ih-jih-ts'ih shü, si-de.

28 拉麥年紀一百八十二歲,生兒子, 29 取其名字<u>挪亞</u>
[1],是介話:「阿拉手裏個勞苦,為了耶和華咒罵個地 土,箇個兒子必定會安慰阿拉。」<sup>30</sup> 拉麥生<u>挪亞</u>以後有五 百九十五年,還生兒子囡。<sup>31</sup> 拉麥壽歲七百七十七歲,死 了。

- [1] Nô-üô i-s Ziu-z en-we. 挪亞意思就是安慰。(原註)
- <sup>32</sup> Nô-üô nyin-kyi ng-pah shü; Nô-üô sang Sin, 'En, Yüô-feh.
  - 32 挪亞年紀五百歲。挪亞生閃、含、雅弗。

#### Ts. VI.

Nying læ shü-kæn-zông to-ky'i-læ z-'eo, yia yiu sang nön-go, <sup>2</sup> Jing-ming-go ng-ts keh-pæn k'en-kyin nying-go nön hao-k'en: tsiao sing-li sô ky'i-mo-go dæ gyi tso ts'i-ts.

人來世間上多起來時候,也有生囡個,<sup>2</sup>神明個兒子箇 班看見人個囡好看,照心裏所企慕個抬其做妻子。

<sup>3</sup> Yiæ-'o-wô wô, Ngô-go Ling feh-we djông-djông teng nying tsang-leng: gyi z-go nyüoh-sing; ts'ia kw'un-'æn-gyi ih-pah-nyiæn nyin.

- <sup>3</sup> 耶和華話:「我個靈弗會常常等人爭論,其是個肉身。且寬限其一百廿年。」
- <sup>4</sup> Keh-go z-'eo yiu dziang-do nying læ shü-kæn-zông: 'eo-deo keh-sing Jing-ming-go ng-ts teng nying-go nön dong-zông, sang-c'ih ng-ts; z hao-lao, ziu-z kwu-z-tsin yiu ming-sing-go nying.
- <sup>4</sup> 箇個時候有長大人來世間上。後頭箇星神明個兒子等 人個囡同牀,生出兒子,是好佬,就是古時節有名聲個 人。
- <sup>5</sup> Yiæ-'o-wô k'en-k'en shü-kæn-zông nying ôh-kwunmun-ying: gyi væn-pah sing-li dzeng-tih-go sing-siang tsih-z tsoh-ôh. <sup>6</sup> Yiæ-'o-wô ao-hwe Zi zao-c'ih nying læ dizông, sing-li iu-meng. <sup>7</sup> Yiæ-'o-wô wô, Ngô sô ts'ông-zaogo nying, iao djü-mih gyi læ di-zông; ziu-z nying, teng tseo-siu, djong-dzi, fi-gying keh-sing; ing-we ts'ông-zaogyi Ngô ao-hwe-de. <sup>8</sup> Tsih-yiu Nô-üô læ Yiæ-'o-wô-go ngæn-zin teh-djoh eng-we.

<sup>5</sup> 耶和華看看世間上人惡貫滿盈,其凡百心裏存的個心想只是作惡。<sup>6</sup> 耶和華懷悔自造出人來地上,心裏憂悶。<sup>7</sup> 耶和華話:「我所創造個人,要除滅其來地上,就是人,等走獸、蟲豸、飛禽箇星。因爲創造其我懊悔了。」<sup>8</sup> 只有挪亞來耶和華個眼前得着恩惠。

<sup>9</sup> Nô-üô 'ang-jih læ 'ô-veng. Nô-üô læ keh shü-dæ tso djün-be nying; kong-yi go nying, Nô-üô teng Jing-ming læwõng. <sup>10</sup> Nô-üô sang sæn-go ng-ts, ziu-z Sin, 'En, Yüô-feh.

<sup>9</sup> <u>挪亞</u>行實來下文。<u>挪亞</u>來箇世代做全備人,公義個人。<u>挪亞</u>等神明來往。<sup>10</sup> <u>挪亞</u>生三個兒子,就是<u>閃、含、</u>雅弗。

<sup>11</sup> 'En shü-kæn-zông læ Jing-ming-go min-zin z pin-wæ-de, tao-c'ü gyiang-wang-pô-dao. <sup>12</sup> Jing-ming k'en-k'en shü-kæn-zông tu pin-wæ de; ing-we 'en-t'in-'ô nying yi-kying pin-diao gyi-go 'ang-we.

11 咸世間上來神明個面前是變壞了,到處強橫霸道。12 神明看看世間上都變壞了。因為咸天下人已經變掉其個

行為。

- <sup>13</sup> Jing-ming teng Nô-üô wô, Væn-pah nyüoh-sing meh-go nyih-ts yi-kying tao Ngô min-zin de, ing-we shü-kæn-zông nying tao-c'ü gyiang-wang-pô-dao; Ngô ziu lin nying lin di, tu iao mih-diao.
- 13 神明等<u>挪亞</u>話: 「凡百肉身末個日子已經到我面前了,因為世間上人到處強橫霸道。我就連人連地,都要滅掉。
- <sup>14</sup> Ng yüong pô song-jü tang ih-tsah jün; jün-li hao feng-k'æ tso vông-kæn, pô song-hyiang li-nga tu nyi-hao.
  <sup>15</sup> Keh-tsah jün ng iao ka tang-fah: jün dziang, sæn-pah [1] ah-ma; kw'eh, ng-jih ah-ma; kao, sæn-jih ah-ma; <sup>16</sup> Jün-li hao k'æ c'ông: zông-deo hao tso ih ah-ma kao; jün bông-pin hao k'æ meng: feng-c'ih zông, cong, 'ô, sæn-zeng sang. <sup>17</sup> Ngô pih-iao s 'ong-shü fæn-tsiang mih-diao læ di-zông, t'in-'ô long-tsong yiu seng-ky'i-go nyüoh-sing: væn-pah læ di-zông-go pih-ding we si. <sup>18</sup> Dæn-z Ngô teng ng lih Ngô-go iah: ng hao teng ts'i-ts, ng-ts, sing-vu, dô-kô

tseo-tsing jün-li. <sup>19</sup> Væn-pah yiu hyüih-ky'i weh-go tong-si me-yiang liang-tsah, ih-ts' ih-yüong, ng pih-iao ta gyi tsing jün; teng ng dô-kô pao-djün sing-ming. <sup>20</sup> Fi-gying keh-le, tseo-siu keh-le, di-zông-go djong-dzi keh-le, me-yiang liang-tsah teng ng dô-kô tseo-tsing, pao-djün sing-ming. <sup>21</sup> Ng yia iao tsih-loh pah-yiang liang-ts'ao, hao kong-ing ng-zi teng gyi-lah-go ky'üoh-zih. <sup>22</sup> Nô-üô ziu i-dzong Jing-ming ih-ts'ih sô feng-fu gyi-go ka tso.

<sup>14</sup>「爾用把松樹打一隻船,船裏好分開做房間,把松香裏外都泥好。<sup>15</sup> 箇隻船爾要介打法:船長三百阿買<sup>[1]</sup>,闊五十阿買,高三十阿買。<sup>16</sup> 船裏好開窗。上頭好做一阿買高。船旁邊好開門,分出上、中、下,三層生。<sup>17</sup> 我必要使洪水氾漲減掉來地上,天下攏總有生氣個肉身,凡百來地上個必定會死。<sup>18</sup> 但是我等爾立我個約,爾好等妻子、兒子、新婦,大家走進船裏。<sup>19</sup> 凡百有血氣活個東西每樣兩隻,一雌一雄,爾必要帶其進船。等爾大家保全性命。<sup>20</sup> 飛禽箇類,走獸箇類,地上個蟲豸箇類,每樣兩隻等爾大家走進,保全性命。<sup>21</sup> 爾也要積落百樣糧草,好供

應爾自等其拉個喫食。」<sup>22</sup> <u>挪亞</u>就依從神明一切所吩咐其個介做。

[1] *Ih ah-ma da-iah* Lu-pæn-ts'ih nyi-ts'ah. 一阿買大約魯班尺二尺。(原註)

#### Ts. VII.

Yiæ-'o-wô teng Nô-üô wô, Ng-zi teng 'o-kô hao tseotsing jün-li; ing-we Ngô k'en keh-go shü-dæ cong-nyiang tsih-yiu ng læ Ngô-go min-zin tso kong-yi nying. <sup>2</sup> Ng yüong ta kyih-zing-go sang-k'eo me-yiang ts'-yüong ts'ihte; feh-kyih-zing-go sang-k'eo, me-yiang ts'-yüong ih-te. <sup>3</sup> Wa-yiu t'in-k'ong-li tiao me-yiang ts'-yüong ts'ih-te, hao pao-djün gyi sing-ming tso cong læ 'en shü-kæn-zông. <sup>4</sup> Ing-we tao di-ts'ih nyih Ngô we loh-yü læ di-yiang-li s-jih nyih, s-jih yia; s-teh Ngô sô zao væn-pah weh-go tong-si tu dzong di-zông djü-mih-diao. <sup>5</sup> Nô-üô ziu tsiao Yiæ-'o-wô

ih-ts'ih-go feng-fu ka-tso. <sup>6</sup> 'Ong shü læ shü-kæn-zông z-'eo, Nô-üô nyin-kyi loh-pah shü.

耶和華等<u>挪亞</u>話:「爾自等和家好走進船裏,因為我看箇個世代中央只有爾來我個面前做公義人。<sup>2</sup>爾用帶潔淨個牲口每樣雌雄七對,弗潔淨個牲口,每樣雌雄一對。<sup>3</sup>還有天空裏鳥每樣雌雄七對,好保全其性命做種來咸世間上。<sup>4</sup>因爲到第七日我會落雨來地垟裏四十日、四十夜,使得我所造凡百活個東西都從地上除滅掉。」<sup>5</sup>挪亞就照耶和華一切個吩咐介做。<sup>6</sup>洪水來世間上時候,<u>挪亞</u>年紀六百歲。

<sup>7</sup> Nô-üô teng ts'i-ts ng-ts, sing-vu, we-leh 'ong-shü dô-kô tseo-tsing jün-li. <sup>8</sup> Kyih-zing-go sang-k'eo teng feh-kyih-zing-go sang-k'eo, fi-gying, lin ih-ts'ih di-zông bô-go djong, <sup>9</sup> ts'-yüong te-tang-te keng-leh Nô-üô tseo-tsing jün-li, tsiao Jing-ming sô feng-fu Nô-üô-go. <sup>10</sup> Ts'ih-nyih yi-'eo 'ong-shü meh-zông di-yiang-li.

<sup>7</sup> <u>挪亞</u>等妻子兒子、新婦,為了洪水大家走進船裏。<sup>8</sup> 潔淨個牲口等弗潔淨個牲口、飛禽、連一切地上爬個蟲,<sup>9</sup>

雌雄對打對跟勒<u>挪亞</u>走進船裏,照神明所吩咐<u>挪亞</u>個。<sup>10</sup> 七日以後洪水沒上地垟裏。

- <sup>11</sup> Nô-üô-go nyin-kyi loh-pah shü, nyi-yüih jih-tsih keh nyih, hæ-yiang-go shü-nyün pong-k'æ, t'in-c'ông p'o-leo.
- 11 <u>挪亞</u>個年紀六百歲,二月十七箇日,海洋個水源崩開,天窗破漏。
- 12 Yü tao-loh di-yiang-li s-jih nyih, s-jih yia. Læ kehnyih Nô-üô teng ng-ts Sin, 'En, Yüô-feh, teng Nô-üô-go ts'i-ts, lin gyi sæn-go sing-vu, tu dô-kô tseo-tsing jün-li-de.

  14 Gyi-lah teng yia-siu keh-le, sang-k'eo keh-le, di-zông bô-go djong-dzi keh-le, pah-yiang tiao, ziu-z ih-ts'ih-go figying keh-le; 15 væn-pah yiu seng-ky'i-go nyüoh-sing, tetang-te keng leh Nô-üô tseo-tsing jün-li. 16 Keh-sing tseo-tsing-go nyüoh-sing, yiu ts' yiu yüong, tsiao Jing-ming-go feng-fu tu tseo-tsing jün-li. Yiæ-'o-wô ziu kwæn gyi tsing.

<sup>17</sup> 'Ong-shü læ shü-kæn-zông s-jih nyih: shü fænzông-læ, s-teh jün vu-ky'i læ di zông-deo. <sup>18</sup> Di-zông-go shü kah-zông-læ gyih-gyi do: jün læ shü min-teng t'englæ t'eng-ky'i. <sup>19</sup> Di-zông-go shü yü-kô fæn-zông-læ s-teh t'in-'ô-go kao-sæn tu be gyi tsing-meh. <sup>20</sup> 'Ong-shü kæzông kao-jü keh-sing ting-kao-go sæn jih-ng ah-ma. <sup>21</sup> Shü-kæn-zông we dong-go nyüoh-sing long-tsong tsingsah, ziu-z fi-gying, sang-k'eo, yia-siu, di-yiang-li bô-go djong-dzi, teng ko-tang-ko-go nying; <sup>22</sup> læ sao-di-li bihdeo-kwun we t'ong seng-ky'i go, tu si-de. <sup>23</sup> 'Ong-shü t'eng-diao shü-kæn-zông ih-ts'ih weh-go tong-si, ziu-z nying, teng sang-k'eo, djong-dzi, fi-gying keh-sing, tu dzong di-zông djü-mih-diao: tsih-yiu Nô-üô teng keh-sing læ jün-li-go dzing-loh-tong. <sup>24</sup> Di-zông-go shü fæn-tsiang ih-pah ng-jih nyih kong-fu.

<sup>17</sup> 洪水來世間上四十日。水氾上來,使得船浮起來地上頭。<sup>18</sup> 地上個水溢上來極其大。船來水面頂汆來汆去。
<sup>19</sup> 地上個水愈加氾上來使得天下個高山都被其浸沒。<sup>20</sup> 洪水蓋上高如箇星頂高個山十五阿買。<sup>21</sup> 世間上會動個肉身攏總浸煞,就是飛禽、牲口、野獸、地垟裏爬個蟲豸,等個打個個人。<sup>22</sup> 來燥地裏鼻頭管回通生氣個,都死了。<sup>23</sup> 洪水吞掉世間上一切活個東西,就是人,等牲口、蟲豸、飛禽箇星,都從地上除滅掉,只有<u>挪亞</u>等箇星來船裏個剩落東。<sup>24</sup> 地上個水氾漲一百五十日工夫。

## Ts. VIII.

Jing-ming kyi-teh Nô-üô teng jün-li dô-kô læ-kæn-go weh-go tong-si, lin cong-sang keh-sing: Jing-ming fahfong c'ü-læ c'ü-ky'i: di-zông-go shü ziu t'e-de; <sup>2</sup> hæ-li-go shü-nyün seh-djü, t'in-c'ông kwæn-hao, t'in yia feh loh-yü-de. <sup>3</sup> Di-zông-go shü dzin-dzin t'e-loh-ky'i; ko-leh ih-pah ng-jih nyih 'eo-deo ky'üih-leh-tin-de. <sup>4</sup> Tao ts'ih-yüih jih-ts'ih keh-nyih, jün deng-loh læ Üô-lah-lah sæn-teng. <sup>5</sup> Shü yi dzin-dzin t'e-loh tao jih-yüih; læ jih-yüih ts'u-ih-go ky'i-deo yiu sæn-ting k'en-kyin-de.

神明記得<u>挪亞</u>等船裏大家來間個活個東西,連衆生箇星。神明發風吹來吹去。地上個水就退了。<sup>2</sup>海裏個水源塞住,天窗關好,天也弗落雨了。<sup>3</sup>地上個水漸漸退落去,過了一百五十日後頭缺勒點了。<sup>4</sup>到七月十七箇日,船底落來<u>亞拉臘</u>山頂。<sup>5</sup>水又漸漸退落到十月,來十月初一個起頭有山頂看見了。

<sup>6</sup> Tsæ ko s-jih nyih, Nô-üô t'e-k'æ jün-li tso-tih-go c'ông-meng. <sup>7</sup> Fông-c'ih ih-tsah lao-ô: gyi fi-læ fi-ky'i, teng di-zông-go shü sao. <sup>8</sup> Yi fông-c'ih ih-tsah beh-keh, iao s-s-k'en di-zông-go shü t'e-leh feh; <sup>9</sup> dæn-z beh-keh zing-feh-djoh ding-kyiah-go di-fông, ing-we pin-di wa-yiu

dzing-loh-go shü; ziu kyü tao jün-li: Nô-üô sing-c'ih siu, tsih gyi tsing jün-li læ. <sup>10</sup> Tsæ ko ts'ih-nyih yi dzong jün-li fông beh-keh c'ih-ky'i; <sup>11</sup> tao yia-kw'a beh-keh kyü-læ, cügyin-li yiu ken-læn jü sing-yih 'en-tih; Nô-üô ziu hyiao-teh di-zông-go shü yi-kying t'e-loh. <sup>12</sup> Tsæ deng ts'ih-nyih, yi fông-c'ih beh-keh, ziu feh tsæ kyü-tao gyi di-fông læ.

<sup>6</sup>再過四十日,<u>挪亞</u>推開船裏做的個窗門。<sup>7</sup>放出一隻老鴉。其飛來飛去,等地上個水燥。<sup>8</sup>又放出一隻鵓鴿,要試試看地上個水退了弗。<sup>9</sup>但是鵓鴿尋弗着停腳個地方,因為逼地還有剩落個水,就歸到船裏。<u>挪亞</u>伸出手,接其進船裏來。<sup>10</sup>再過七日又從船裏放鵓鴿出去。<sup>11</sup>到夜快鵓鴿歸來,嘴鉗<sup>[1]</sup>裏有橄欖樹新葉含的。<u>挪亞</u>就曉得地上個水已經退落。<sup>12</sup>再庫七日,又放出鵓鴿,就弗再歸到其地方來。

[1] 喙

<sup>13</sup> Nô-üô loh-pah ling-ih shü tsing-yüih ts'u-ih, dizông-go shü sao-de: Nô-üô ziu hyiao-k'æ jün-go kæ, ihk'en, k'en-kyin di min-teng sao-de. <sup>14</sup> Tao nyi-yüih nyiæn-ts'ih keh-nyih di-yiang feng-sao.

15 Jing-ming teng Nô-üô z-ka wô, 16 Ng hao teng ts'its, ng-ts, sing-vu, dô-kô dzong jün-li tseo-c'ih. 17 Wa-yiu teng ng dô-kô læ-kæn-go weh-go tong-si, ziu-z fi-gying, sang-k'eo, di-yiang-li bô-go djong-dzi keh-sing, tu hao ling gyi c'ih; s-teh gyi sang-yiang læ shü-kæn-zông, meo-meo-zing-zing to-ky'i-læ. 18 Nô-üô ziu teng ts'i-ts, ng-ts, sing-vu, dô-kô tseo-c'ih; 19 wa-yiu koh-cong tseo-siu, djong-dzi, fi-gying, teng di-zông bô-go tong-si, yiang-tang-yiang tu dzong jün-li tseo-c'ih.

15 神明等<u>挪亞</u>是介話:「<sup>16</sup> 爾好等妻子、兒子、新婦,大家從船裏走出。<sup>17</sup> 還有等爾大家來間個活個東西,就是飛禽、牲口、地垟裏爬個蟲豸箇星,都好領其出。使得其生養來世間上,茂茂盛盛多起來。」<sup>18</sup> 挪亞就等妻

子、兒子、新婦,大家走出。<sup>19</sup> 還有各種走獸、蟲豸、飛 禽、等地上爬個東西,樣打樣都從船裏走出。

Nô-üô ziu we-leh Yiæ-'o-wô zao ih-zo dæn, dzong kyih-zing-go sang-k'eo, teng kyih-zing-go fi-gying lihyiang, do-læ dæn-zông hyin væn-tsi. <sup>21</sup> Yiæ-'o-wô hyüong-djoh gyi hyiang-ky'i, Yiæ-'o-wô sing-li wô, (ing-we nying-go sing-siang dzong siao z ôh-go,) Ngô yi-'eo tsæfeh we-leh nying tsiu-mô di; yia feh-we mih-diao ih-ts'ih weh-go tong-si, ziang zin-deo sô-tso ka. <sup>22</sup> Di wa læ-tong z-'eo, kang-cong teng siu-keh, lang teng nyih, tong teng 'ô, nyih teng yia, pih-ding feh-we hyih.

<sup>20</sup> 挪亞就為了耶和華造一座壇,從潔淨個牲口,等潔淨個飛禽裏向,馱來壇上獻燔祭。<sup>21</sup> 耶和華嗅着其香氣,耶和華心裏話: (因為人個心想從小是惡個,) 我以後再弗為了人咒罵地,也弗會滅掉一切活個東西,像前頭所做介。<sup>22</sup> 地還來東時候,耕種等收割,冷等熱,冬等夏,日等夜,必定弗會歇。

#### Ts. IX.

Jing-ming s foh peh Nô-üô lin gyi-go ng-ts, teng gyilah wô, yüong meo-meo-zing-zing to-ky'i læ, di-yiang deng-mun. <sup>2</sup> Væn-pah di-li-go tseo-siu, t'in-li-go tiao, dizông weh-go tong-si, lin hæ-li-go ng, tu z kao-dæ ng-go siu-li: gyi-lah we do-nyiang p'ô-gyü ng. <sup>3</sup> Væn-pah weh-go tong-si k'o-yi tso ng-go ky'üoh-zih: keh tu z Ngô s-peh ng, tsing-ziang s-peh ng su-ts'æ ka. <sup>4</sup> Dæn-z nyüoh, wa-yiu gyi-go sing-ming, ziu-z gyi hyüih læ-tih, ng feh-k'o ky'üoh. <sup>5</sup> Ng sing-ming-go hyüih, Ngô pih-ding t'ao gyi wæn; feh-leng tseo-siu, feh-leng nying-go siu-li, Ngô yia iao t'ao gyi wæn: væn-pah nying dzong gyi hyüong-di-go siu-li, Ngô pih-iao t'ao gyi-go sing-ming wæn. <sup>6</sup> Liu-c'ih nying hyüih go, nying-kô yia pih-iao liu-c'ih gyi-go hyüih: ing-we Jing-ming z tsiao Gyi zi-go siang-mao zao nying-go. <sup>7</sup> Ng-lah hao meo-meo-zing-zing to-ky'i-læ, s-teh di we sang-mun.

神明賜福撥<u>挪亞</u>連其個兒子,等其拉話:「用茂茂盛盛多起來,地垟底滿。<sup>2</sup>凡百地裏個走獸,天裏個鳥,地上活個東西,連海裏個魚,都是交代爾個手裏。其拉會大樣怕懼爾。<sup>3</sup>凡百活個東西可以做爾個喫食。箇都是我賜撥爾,正像賜撥爾蔬菜介。<sup>4</sup>但是肉,還有其個性命,就是其血來的,爾弗可喫。<sup>5</sup>爾性命個血,我必定討其還。弗論走獸,弗論人個手裏,我也要討其還。凡百人從其兄弟個手裏,我必要討其個性命還。<sup>6</sup>流出人血個,人家也必要流出其個血。因為神明是照其自個相貌造人個。<sup>7</sup>爾拉好茂茂盛盛多起來,使得地會生滿。」

<sup>8</sup> Jing-ming yi teng Nô-üô lin gyi-go ng-ts wô, <sup>9</sup> Ngô teng ng lin ng tsiang-læ-go 'eo-dæ lih Ngô-go iah; <sup>10</sup> wa-yiu teng ng dô-kô læ-tong-go keh-sing weh-go tong-si. ziu-z fi-gying, sang-k'eo, yia-siu, væn-pah dzong jün-li tseo-c'ih-læ-go, lin di-yiang-li-go tseo-siu, lih Ngô-go iah. <sup>11</sup> Ngô teng ng we lih Ngô-go iah, ziu-z, Ngô yi-'eo tsæ-feh s-teh 'ong-shü mih-diao ih-ts'ih yiu nyüoh-sing-go tong-si, yia tsæ-feh s-teh 'ong-shü wæ-diao di-yiang. <sup>12</sup> Jing-ming

yi wô, Ngô teng ng lin dô-kô læ-tong-go keh-sing weh-go tong-si sô lih üong-yün-go iah yiu keh-go kyi-'ao: <sup>13</sup> Ngô pô Ngô-go heo fông-læ yüing-li, tso Ngô teng shü-kænzông lih-iah-go kyi-'ao. <sup>14</sup> Tsiang-læ Ngô s-teh yüing tsôdjü di-yiang-go z-'eo, yüing li-hyiang ziu yin-c'ih heo læ; <sup>15</sup> ka-ni, Ngô we kyi-teh Ngô teng ng lin væn-pah weh-go nyüoh-sing sô lih-go iah: yi-'eo tsæ m-neh 'ong-shü mihdiao ih-ts'ih weh-go tong-si. 16 Heo yin-c'ih læ yüing-li; Ngô k'en-ts we kyi-teh keh üong-yün-go iah, ziu-z Jingming teng shü-kæn-zông væn-pah weh-go nyüoh-sing sô shih-lih-go. <sup>17</sup> Jing-ming teng Nô-üô wô, Ngô teng shükæn-zông weh-go tong-si sô lih-go iah, kyi-'ao ziu-z kehgo.

<sup>8</sup> 神明又等<u>挪亞</u>連其個兒子話:「<sup>9</sup> 我等爾連爾將來個後代立我個約。<sup>10</sup> 還有等爾大家來東個箇星活個東西。就是飛禽、牲口、野獸、凡百從船裏走出來個,連地垟裏個走獸、立我個約。<sup>11</sup> 我等爾會立我個約,就是,我以後再弗使得洪水滅掉一切有肉身個東西,也再弗使得洪水壞掉

地垟。」<sup>12</sup> 神明又話:「我等爾連大家來東個箇星活個東西所立永遠個約有箇個記號。<sup>13</sup> 我把我個鱟放來雲裏,做我等世間上立約個記號。<sup>14</sup> 將來我使得雲遮住地垟個時候,雲裏向就現出鱟來。<sup>15</sup> 介呢,我會記得我等爾連凡百活個內身所立個約。以後再嘸得洪水滅掉一切活個東西。<sup>16</sup> 鱟現出來雲裏,我看仔會記得箇永遠個約,就是神明等世間上凡百活個內身所設立個。」<sup>17</sup> 神明等<u>挪亞</u>話:「我等世間上活個東西所立個約,記號就是箇個。」

<sup>18</sup> Nô-üô-go ng-ts dzong jün-li ka tseo-c'ih-go z Sin, 'En, Yüô-feh. 'En z Kyüô-nen-go ah-tia. <sup>19</sup> Keh ziu-z Nô-üô sæn-go ng-ts: gyi-lah-go 'eo-dæ sæn-k'æ, deng-læ pint'in-'ô.

Nô-üô tso cong-din-nying, cong ih-go bu-dao yün.
<sup>21</sup> Gyi ky'üoh bu-dao tsiu ky'üoh-tse, læ tsiang-bong-li kyi-sing c'ih-kæn. Kyüô-nen-go ah-tia 'En, k'en-kyin ah-

tia c'ih-sing-lu-t'i, tseo-c'ih nga-deo, t'ong-cü liang-go hyüong-di. <sup>23</sup> Sin teng Yüô-feh do-leh i-zông dô-kô pe læ kyin-kah-deo, tao-t'e-bu tseo-ky'i, kæ ah-tia-go kyi-sing: gyi-lah min-k'ong feh nyin-cün, m-neh k'en-kyin ah-tia c'ih-sing-lu-t'i.

<sup>20</sup> 挪亞做種田人,種一個葡萄園。<sup>21</sup> 其喫葡萄酒喫醉,來帳篷裏肌身出間。<sup>22</sup> 迦南個阿爹含,看見阿爹出身露體,走出外頭,通知兩個兄弟。<sup>23</sup> 閃等雅弗馱勒衣裳大家揹來肩胛頭,倒退步走起,蓋阿爹個肌身。其拉面孔弗扭轉,嘸得看見阿爹出身露體。

Nô-üô tsiu sing-cün-læ, fông-dzæ hyiao-teh siao ng-ts hyiang gyi sô tso-go z-ken; <sup>25</sup> ziu wô, Kyüô-nen kæ ziu tsiu-mô: gyi we tso nu-boh-go nu-boh voh-z hyüong-di. <sup>26</sup> Yi wô, Coh-zia Yiæ-'o-wô, Sin-go Jing-ming! Kyüô-nen we tso gyi-go nu-boh. <sup>27</sup> Jing-ming we s-teh Yüô-feh hying-wông; gyi we deng-læ Sin-go tsiang-bong-li; Kyüô-nen yia we tso gyi-go nu-boh.

- 24 <u>挪亞</u>酒醒轉來,方才曉得小兒子向其所做個事幹。 25 就話: 「<u>迦南</u>該受咒罵。其會做奴僕個奴僕服侍兄弟。」<sup>26</sup> 又話: 「祝謝耶和華,<u>閃</u>個神明!<u>迦南</u>會做其個奴僕。<sup>27</sup> 神明會使得<u>雅弗</u>興旺,其會応來<u>閃</u>個帳篷裏。<u>迦</u>南也會做其個奴僕。」
- <sup>28</sup> 'Ong-shü yi-'eo Nô-üô yi ko-leh sæn-pah ng-jih nyin. <sup>29</sup> Nô-üô-go ziu-shü kyiu-pah ng-jih shü, si-de.
- <sup>28</sup> 洪水以後,<u>挪亚</u>又過了三百五十年。<sup>29</sup> <u>挪亚</u>個壽歲 九百五十歲,死了。

# Ts. X.

Nô-üô-go ng-ts, Sin, 'En, Yüô-feh-go kô-pu læ 'ô-veng. Gyi-lah 'ong-shü yi-'eo sang ng-ts: <sup>2</sup> Yüô-feh-go ng-ts; Ko-mih, Mô-keh, Mô-dæ, Yüô-fæn, T'u-pah, Mi-shih, Di-lah. <sup>3</sup> Ko-mih-go ng-ts; Üô-jih-kyi-nô, Li-fah, Do-kyüô-mô. <sup>4</sup> Yüô-fæn-go ng-ts; Yi-li-sô, Da-shih, Kyi-ti, To-tæn. <sup>5</sup> Gyi-

lah 'eo-deo feng-k'æ, deng-læ gying hæ-go, koh-tang-kohgo di-fông; koh-nying tsiao zi-go k'eo-ing, dzoh-cong, vông-veng keh-sing.

挪亞個兒子,<u>閃、含、雅弗</u>個家譜來下文。其拉洪水 以後生兒子: <sup>2</sup> 雅弗個兒子,<u>歌篾、瑪葛、瑪代、雅番、土</u> 八、米設、提拉。 <sup>3</sup> 歌篾個兒子,亞實基拿、利法、陀迦 瑪。 <sup>4</sup> 雅番個兒子,<u>以利沙、大失、基帝</u>、多單。 <sup>5</sup> 其拉後 頭分開,咸來近海個,各打各個地方,各人照自個口音、 族種、房分箇星。

<sup>6</sup> 'En-go ng-ts; Kwu-jih, Mah-si, Feh, Kyüô-nen. <sup>7</sup> Kwu-jih-go ng-ts; Si-pô, Ha-fi-lah, Sah-da, Lah-mô, Sah-di-kyüô. Lah-mô-go ng-ts; Z-pô, Ti-dæn. <sup>8</sup> Kwu-jih yi sang Nying-loh; shü-kæn-zông tso hao-lao z gyi ky'i-deo. <sup>9</sup> Læ Yiæ-'o-wô-go min-zin gyi tso üong-üong tang-liah-go. Dzoh-wô z-ka wô, Ziang Nying-loh læ Yiæ-'o-wô-go min-zin tso üong-üong tang-liah-go nying. <sup>10</sup> Gyi k'æ-koh læ Z-nô di-fông-go Pô-bih, Yi-lih, Üô-kyiah, Kyiah-nyi. <sup>11</sup> Dzong keh di-fông c'ih-ky'i tao Üô-jih, zao Nyi-nyi-vi, Li-'o-pah

dzing-ts, teng Kyüô-lah, <sup>12</sup> wa-yiu Nyi-nyi-vi Kyüô-lah cong-nyiang-go do dzing-ts, ziu-z Li-sin. <sup>13</sup> Mah-si sang Lu-ting, En-nen, Li-ha, Neh-t'u, <sup>14</sup> Pah-lu, Kyiah-lu, Keh-t'oh, keh-sing dzoh-veng. Kyiah-lu sang Fi-li-z keh ih-dzoh.

6 含個兒子, 古實、麥西、弗、迦南。 7 古實個兒子, 西巴、哈腓拉、撒大、拉瑪、撒提迦。拉瑪個兒子, 示巴、底但。 8 古實又生寧錄, 世間上做好佬是其起頭。 9 來耶和華個面前其做勇勇打獵個。俗話是介話:「像寧錄來耶和華個面前做勇勇打獵個人。」 10 其開國來土拿地方個巴別、以力、亞甲、甲尼。 11 從箇地方出去到亞述, 造尼尼微, 利河伯城子, 等迦拉, 12 還有尼尼微迦拉中央個大城子, 就是利鮮。 13 麥西生路丁、安南、利哈、納土、 14 伯魯、甲路、葛托, 箇星族份。甲路生非利士箇一族。

<sup>15</sup> Kyüô-nen sang do ng-ts Si-teng, yia sang Heh: <sup>16</sup> teng Yiæ-pu-z, Üô-mo-li, Keh-kyüô-seh, <sup>17</sup> Hyi-vi, Üô-kyi, Si-nyi, <sup>18</sup> Üô-wô-ti, Si-mô-li, Ha-meh keh-sing ts-p'a. 'Eo-deo Kyüô-nen keh-sing dzoh-veng yin-k'æ-ky'i. <sup>19</sup> Kyüô-

nen-go di-ka dzong Si-teng hyiang Gyi-lah ka kyʻi, Gyi-lah tao Kyüô-sah; wa-yiu hyiang Sô-to-mô Ngo-mo-lah, Lah-mô, Si-pin, ka kyʻi tao Lah-sô. <sup>20</sup> Keh-sing z ʻEn-go ts-seng, tu tsiao gyi-lah-go dzoh-cong, kʻeo-ing, læ gyi-go di-fông teng koh-veng.

15 迦南生大兒子西頓,也生赫, 16 等耶布士、亞摩利、革迦撒、17 希未、亞基、西尼、18 亞華底、西瑪利、哈默箇星支派。後頭迦南箇星族份延開去。19 迦南個地界從西頓向其臘介去,其臘到迦薩,還有向所多瑪、蛾摩拉、拉瑪、洗扁介去到拉沙。20 箇星是含個子孫,都照其拉個族種,口音,來其個地方等國份。

Yüô-feh-go ah-ko Sin, ziu-z Hyi-pah keh-dzoh-go tsu-tsong, yia sang ng-ts. <sup>22</sup> Sin-go ng-ts; Yi-læn, Üô-jih, Üô-fah-sah, Lu-teh, Üô-læn. <sup>23</sup> üô-læn-go ng-ts U-z, Wu-leh, Gyi-t'iah, Mô-jih. <sup>24</sup> Üô-fah-sah sang Sah-lah; Sah-lah sang Hyi-pah. <sup>25</sup> Hyi-pah sang liang-go ng-ts, ih-go ming-z <sup>[1]</sup>Fah-leh, ing-we læ gyi-go z-'eo koh-veng feng-sæn-de; gyi ah-di ming-z Iah-tæn. <sup>26</sup> Iah-tæn sang Üô-mo-t'ah, Sô-

lih, Ha-sah-mô-fi, Yiæ-lah, <sup>27</sup> Ha-to-læn, U-sah, Deh-lah, <sup>28</sup> O-pah, Üô-pi-mô-li, Z-pô, <sup>29</sup> O-fi, Ha-fi-lah, Iah-pah; keh tu z Iah-tæn-go ng-ts. <sup>30</sup> Gyi-lah sô deng-go di-fông dzong Mi-sô tao tong-pin Si-fah keh-zo sæn. <sup>31</sup> Keh-sing z Sin-go ts-seng, tu tsiao gyi-lah-go dzoh-cong k'eo-ing, læ gyi-go di-fông teng koh-veng.

21 雅弗個阿哥<u>閃</u>,就是<u>希伯</u>箇族個祖宗,也生兒子。
22 <u>閃</u>個兒子,以攔、亞述、亞法撒、路德、亞蘭。23 亞蘭個兒子<u>烏士、戶勒、其帖、瑪實</u>。24 亞法撒生撒拉,撒拉生希伯。25 希伯生兩個兒子,一個名字法勒<sup>[1]</sup>,因為來其個時候國份分散了。其阿弟名字約丹。26 約丹生亞摩塔、沙列、哈薩瑪非、耶拉、27 哈多蘭、烏薩、特拉、28 倭柏、亞比瑪利、<u>示巴、29 倭非、哈腓拉、約伯</u>,箇都是約丹個兒子。30 其拉所庉個地方從<u>米沙</u>到東邊西發箇座山。31 箇星是閃個子孫,都照其拉個族種口音,來其個地方等國份。

[1] Fah-leh i-s ziu-z Feng-k'æ. 法勒意思就是分開。(原註)

<sup>32</sup> Zông-veng tu z Nô-üô ng-ts-go ts-p'a, tsiao gyi-lah-go kô-pu teng koh-veng. 'Ong-shü yi-'eo, shü-kæn-zông-go koh-veng dzong gyi-lah ka feng-k'æ læ.

32 上文都是<u>挪亞</u>兒子個支派,照其拉個家譜等國份。 洪水以後,世間上個國份從其拉介分開來。

## Ts. XI.

'En-t'in-'ô tu z ih-yiang-go k'eo-ing, ih-yiang-go shih-wô. <sup>2</sup> Dzong tong-pin pun-ko-ky'i z-'eo, læ Z-nô di-fông p'ong-djoh bing-yiang, ziu deng-loh. <sup>3</sup> Gyi-lah dô-kô siang-liang wô, Læ, ah-lah hao tso cün-deo, yüong ho siao gyi c'ih-læ. Gyi-lah ziu yiu cün-deo tông zah-deo yüong, wa-yiu zah-yiu tông zah-hwe yüong. <sup>4</sup> Gyi-lah yi wô, Læ, ah-lah hao zao dzing-ts, teng ih-zo t'ah, iao gyi ting bang-djoh t'in, yi hao yiang ah-lah-go ming-sing; sæn-leh sæn-k'æ læ tao-c'ü di min-teng. <sup>5</sup> Yiæ-'o-wô kông-loh-læ iao

k'en keh-sing nying sô zao-go dzing-ts teng-t'ah. <sup>6</sup> Yiæ-'owô wô, Pah-sing z ih-yiang-go, gyi-lah shih-wô yia z ihyiang-go; næn-kæn ky'i-deo tso keh-go z-ken, 'eo-deo gyilah iao-siang tso soh-go, m-kao hao ky'i kying-djü gyi. <sup>7</sup> Læ, Ah-lah hao kông-loh-ky'i, weng-dzeh gyi-go k'eo-ing, s-teh gyi-lah shih-wô feh siang-t'ong. <sup>8</sup> Yiæ-'o-wô ziu dzong keh-deo sæn-k'æ cong-nying læ tao-c'ü di minteng: gyi-lah zao dzing-ts-go z-ken ziu hyih-de. <sup>9</sup> Sô-yi keh di-ming kyiao-leh <sup>[1]</sup>Pô-bih; ing-we læ keh-deo Yiæ-'o-wô weng-dzeh 'en-t'in-'ô nying-go k'eo-ing: ping-ts'ia Yiæ-'owô dzong keh-deo sæn-k'æ gyi-lah læ tao-c'ü di min-teng.

咸天下都是一樣個口音,一樣個說話。<sup>2</sup> 從東邊搬過去時候,來<u>士拿</u>地方碰着平垟,就底落。<sup>3</sup> 其拉大家商量話:「來,阿拉好做磚頭,用火燒其出來。」其拉就有磚頭當石頭用,還有石油當石灰用。<sup>4</sup> 其拉又話:「來,阿拉好造城子,等一座塔,要其頂碰着天,又好揚阿拉個名聲,省勒散開來到處地面頂。」<sup>5</sup> 耶和華降落來要看箇星人所造個城子等塔。<sup>6</sup> 耶和華話:「百姓是一樣個,其拉說話也是一

樣個。難問起頭做箇個事幹,後頭其拉要想做啥個,嘸告好去禁除其。<sup>7</sup>來,阿拉好降落去,混雜其個口音,使得其拉說話弗相通。」<sup>8</sup>耶和華就從箇頭散開衆人來到處地面頂。其拉造城子個事幹就歇了。<sup>9</sup>所以箇地名叫勒巴别<sup>[1]</sup>,因為來箇頭耶和華混雜咸天下人個口音,並且耶和華從箇頭散開其拉來到處地面頂。

- [1] Pô-bih i-s ziu-z Weng-dzeh. 巴別意思就是混雜。(原註)
- <sup>10</sup> Sin-go shü-dæ læ 'ô-veng. 'Ong-shü yi-'eo liangnyin, Sin yi-kying ih-pah shü sang Üô-fah-sah. <sup>11</sup> Sin sang Üô-fah-sah yi-'eo, yiu ng-pah nyin, wa sang ng-ts nön.
- 10 <u>閃</u>個世代來下文。洪水以後兩年,<u>閃</u>已經一百歲生 <u>亞法撒</u>。<sup>11</sup> <u>閃</u>生<u>亞法撒</u>以後,又五百年,還生兒子囡。
- <sup>12</sup> Üô-fah-sah sæn-jih-ng shü sang Sah-lah. <sup>13</sup> Üô-fah-sah sang Sah-lah yi-'eo yiu s-pah ling sæn nyin, wa sang ng-ts nön.
- <sup>12</sup> <u>亞法撒</u>三十五歲生<u>撒拉</u>。<sup>13</sup> <u>亞法撒</u>生<u>撒拉</u>以後又四百零三年,還生兒子囡。

- <sup>14</sup> Sah-lah sæn-jih shü sang Hyi-pah. <sup>15</sup> Sah-lah sang Hyi-pah yi-'eo yiu s-pah ling sæn nyin, wa sang ng-ts nön.
- 14 <u>撒拉</u>三十歲生<u>希伯</u>。15 <u>撒拉</u>生<u>希伯</u>以後又四百零三年,還生兒子囡。
- <sup>16</sup> Hyi-pah sæn-jih-s shü sang Fah-leh. <sup>17</sup> Hyi-pah sang Fah-leh yi-'eo yiu s-pah sæn-jih nyin, wa sang ng-ts nön.
- 16 <u>希伯</u>三十四歲生<u>法勒</u>。17 <u>希伯</u>生<u>法勒</u>以後又四百三十年,還生兒子囡。
- <sup>18</sup> Fah-leh sæn-jih shü sang Lah-keo. <sup>19</sup> Fah-leh sang Lah-keo yi-'eo yiu nyi-pah ling kyiu nyin, wa sang ng-ts nön.
- <sup>18</sup> <u>法勒</u>三十歲生<u>拉構</u>。<sup>19</sup> <u>法勒</u>生<u>拉構</u>以後又二百零九年,還生兒子囡。
- <sup>20</sup> Lah-keo sæn-jih-nyi shü, sang Sah-loh, <sup>21</sup> Lah-keo sang Sah-loh yi-'eo yiu nyi-pah ling ts'ih nyin, wa sang ng-ts nön.

- <sup>20</sup> 拉構三十二歲生<u>撒鹿</u>。<sup>21</sup> 拉構生<u>撒鹿</u>以後又二百零七年,還生兒子囡。
- <sup>22</sup> Sah-loh sæn-jih shü sang Nô-ngoh. <sup>23</sup> Sah-loh sang Nô-ngoh yi-'eo yiu nyi-pah nyin, wa sang ng-ts nön.
- <sup>22</sup> 撒鹿三十歲生<u>拿鶴</u>。<sup>23</sup> 撒鹿生<u>拿鶴</u>以後又二百年,還生兒子囡。
- <sup>24</sup> Nô-ngoh nyiæn-kyiu shü sang T'a-lah. <sup>25</sup> Nô-ngoh sang T'a-lah yi-'eo yiu ih-pah jih-kyiu nyin, wa sang ng-ts nön.
- 24<u>拿鶴</u>廿九歲生<u>他拉</u>。25<u>拿鶴</u>生<u>他拉</u>以後又一百十九年,還生兒子囡。
- <sup>26</sup> T'a-lah ts'ih-jih shü sang Üô-pah-læn, Nô-ngoh, Ha-læn.
  - 26 他拉七十歲生亞伯蘭、拿鶴、哈蘭。
- <sup>27</sup> T'a-lah shü-dæ læ 'ô-veng. T'a-lah sang Üô-pah-læn, Nô-ngoh, Ha-læn; Ha-læn sang Lo-teh. <sup>28</sup> Ha-læn pi gyi ah-tia sin si læ peng di-fông, ziu-z Kyüô-lah-ti koh, R-

go dzing-li. <sup>29</sup> Üô-pah-læn teng Nô-ngoh tu dæ ts'i-ts. Üô-pah-læn-go ts'i-ts ming-z Sah-læ, Nô-ngoh-go ts'i-ts ming-z Mih-kyüô. Mih-kyüô teng Yi-z-kyüô tu z Ha-læn-go nön. <sup>30</sup> Sah-læ feh-we sang, m-neh ng-ts. <sup>31</sup> T'a-lah ling-leh ng-ts Üô-pah-læn, teng gyi seng-ts Lo-teh, (ziu-z Ha-læn-go ng-ts,) teng gyi sing-vu Sah-læ, (ziu-z Üô-pah-læn-go ts'i-ts,) dô-kô tseo-c'ih Kyüô-lah-ti koh, R-go dzing-li, iao tao Kyüô-nen di-fông ky'i; tao-leh Ha-læn ziu deng-loh. <sup>32</sup> T'a-lah ziu-shü nyi-pah ling ng shü. T'a-lah læ Ha-læn di-fông si-de.

27 他拉世代來下文。他拉生亞伯蘭、拿鶴、哈蘭,哈蘭生羅得。28 哈蘭比其阿爹先死來本地方,就是迦勒底國,珥個城裏。29 亞伯蘭等拿鶴都抬妻子。亞伯蘭個妻子名字撒萊,拿鶴個妻子名字密迦。密迦等以士迦都是哈蘭個囡。30 撒萊弗會生,嘸得兒子。31 他拉領勒兒子亞伯蘭,等其孫子羅得(就是哈蘭個兒子),等其新婦撒萊(就是亞伯蘭個妻子),大家走出迦勒底國,珥個城裏,

要到<u>迦南</u>地方去,到了<u>哈蘭</u>就 底落。<sup>32</sup> 他拉壽歲二百零五歲。他拉來哈蘭地方死了。

### Ts. XII.

Yiæ-'o-wô teng Üô-pah-læn wô, Ng yüong tseo-c'ih peng-koh, li-k'æ ts'ing-kyün teng ah-tia oh-li, tao Ngô sô ts-tin peh ng-go di-fông. 2 Ngô we s-teh ng tso do kohveng, s-foh peh ng, yiang ng-go ming-sing; ping-ts'ia ng we tso foh-ky'i-go keng-deo. 3 Keh-sing coh-foh ng-go, Ngô yia we s-foh peh gyi; tsiu-mô ng go Ngô yia we tsiumô gyi: wa-yiu t'in-'ô keh-sing dzoh-veng tu we dzong ng ka teh-djoh foh-ky'i. <sup>4</sup> Üô-pah-læn i Yiæ-'o-wô-go feng-fu ka c'ih-meng-ky'i; Lo-teh teng gyi dong-de ky'i: Üô-pahlæn li-k'æ Ha-læn-go z-'eo nyin-kyi yiu ts'ih-jih-ng shü. <sup>5</sup> Üô-pah-læn ta-leh gyi ts'i-ts Sah-læ, teng gyi dzih-ts Loteh; wa-yiu læ Ha-læn sô tsih-loh-go kô-kyi, sô teh-djoh-go

nying: tu tseo-c'ih iao tao Kyüô-nen ka ky'i; ziu tao Kyüônen di-fông.

<sup>6</sup> Üô-pah-læn tseo-ko keh-go di-fông tao Jü-kyin, ziu-z tao Mo-li-go ziang-jü: ka z-'eo Kyüô-nen nying deng-læ keh-deo. <sup>7</sup> Yiæ-'o-wô yin-c'ih-læ; teng Üô-pah-læn wô, Ngô we pô keh-go di-fông s-peh ng-go 'eo-dæ. Gyi ziu læ keh-deo teng yin-c'ih-læ-go Yiæ-'o-wô zao ih-zo dæn. <sup>8</sup> 'Eo-deo pun-tao Pah-deh-li tong-pin-go ih-zo sæn-li, tah tsiang-bong; si-pin z Pah-deh-li, tong-pin z 'Æ: ping-ts'ia

læ keh-deo teng Yiæ-'o-wô zao ih-zo dæn, gyiu-k'eng Yiæ-'o-wô-go ming-deo. <sup>9</sup> Üô-pah-læn yi dong-sing hyiang nen-pin di-fông ka pun-ko-ky'i.

<sup>6</sup> 亞伯蘭走過箇個地方到<u>敘</u>劍,就是到<u>摩利</u>個橡樹。介時候<u>迦南</u>人 底來箇頭。<sup>7</sup> 耶和華現出來,等<u>亞伯蘭</u>話:「我會把箇個地方賜撥爾個後代。其就來箇頭等現出來個耶和華造一座壇。<sup>8</sup> 後頭搬到<u>伯特利</u>東邊個一座山裏,搭帳篷,西邊是<u>伯特利</u>,東邊是<u>亥</u>。並且來箇頭等耶和華造一座壇,求懇耶和華個名頭。<sup>9</sup> 亞伯蘭又動身向南邊地方介搬過去。

<sup>10</sup> Keh-deo yiu hwông-nyin: ing-we keh hwông-nyin li-'æ, sô-yi Üô-pah-læn tseo-loh Yiæ-gyih koh ky'i deng. <sup>11</sup> Kw'a tseo-tao Yiæ-gyih-go z-'eo, teng ts'i-ts Sah-læ wô, Ngô hyiao-teh ng z siang-mao hao-k'en-go nyü-nying: <sup>12</sup> næn-kæn keh-sing Yiæ-gyih nying k'en-kyin ng we wô, Keh z gyi ts'i-ts: gyi-lah ziu we sah ngô, pao-djün ng-go sing-ming. <sup>13</sup> Ka-ni ng hao wô z ngô-go ah-me; s-teh ngô

we-leh ng teh-djoh en-tæn, yia we-leh ng neng-keo paodjün sing-ming.

10 箇頭有荒年,因為箇荒年厲害,所以<u>亞伯蘭</u>走落<u>埃</u>及國去底。<sup>11</sup> 快走到<u>埃及</u>個時候,等妻子<u>撒萊</u>話:「我曉得爾是相貌好看個女人,<sup>12</sup> 難問箇星<u>埃及</u>人看見爾會話:『箇是其妻子』,其拉就會殺我,保全爾個性命。<sup>13</sup> 介呢爾好話是我個阿妹,使得我為了爾得着安耽,也為了爾能夠保全性命。」

<sup>14</sup> Üô-pah-læn tao-leh Yiæ-gyih, Yiæ-gyih nying k'en-kyin keh nyü-nying z ting hao-k'en. <sup>15</sup> Fah-lao-go da-dzing yia k'en-kyin gyi, læ Fah-lao min-zin ts'ing-tsæn gyi. Fah-lao ziu tsih keh-go nyü-nying tao wông-kong-li. <sup>16</sup> We-leh gyi Fah-lao kah-nga dæ Üô-pah-læn; Üô-pah-læn yiu ngeo, yiang, loh-do, ts'-yüong li-ts, teng nu-boh, ô-deo keh-sing. <sup>17</sup> Dæn-z Yiæ-'o-wô, we-leh Üô-pah-læn ts'i-ts Sah-læ-go yün-kwu, kông do-do tsæ-næn vah Fah-lao teng gyi ih-kô-go nying. <sup>18</sup> Fah-lao ziu eo Üô-pah-læn, wô, Ng dza-we z-ka dæ ngô? Gyi z ng ts'i-ts, dza feh wô-hyiang

ngô dao? <sup>19</sup> Dza-we ts'ing-hwu gyi ah-me, s-teh ngô kyi-wu dæ gyi tso ts'i-ts? Næn-kæn ng-go ts'i-ts, hao ta-leh-ky'i. <sup>20</sup> Fah-lao we-leh gyi feng-fu pah-sing: Üô-pah-læn teng ts'i-ts, lin væn-pah sô-yiu-go, tu song gyi c'ih-ky'i.

14 亞伯蘭到了埃及,埃及人看見箇女人是頂好看。15 法老個大臣也看見其,來法老面前稱讚其。法老就接箇個女人到王宮裏。16 為了其,法老格外待亞伯蘭,亞伯蘭有牛、羊、駱駝、雌雄驢子等奴僕、丫頭箇星。17 但是耶和華為了亞伯蘭妻子撒萊個緣故,降大大災難罰法老等其一家個人。18 法老就謳亞伯蘭,話:「爾咋會是介待我?其是爾妻子,咋弗話向我道?19 咋會稱呼其阿妹,使得我幾乎抬其做妻子?難間爾個妻子,好帶勒去。」20 法老為了其吩咐百姓,亞伯蘭等妻子,連凡百所有個,都送其出去。

## Ts. XIII.

Üô-pah-læn teng gyi ts'i-ts lin væn-pah sô-yiu-go, wa-yiu Lo-teh, dô-kô tseo-c'ih Yiæ-gyih tao Nen-di ky'i. <sup>2</sup> Üô-pah-læn yiu sang-k'eo, nying-ts, kying-ts, keh-sing ting futsoh. <sup>3</sup> Dzong Nen-di pun-tao Pah-deh-li, ziu-z zin-deo tah tsiang-bong zao tsi-dæn di-fông, læ Pah-deh-li teng 'Æ-go cong-nyiang: <sup>4</sup> Üô-pah-læn læ keh-deo gyiu-k'eng Yiæ-'o-wô-go ming-deo.

亞伯蘭等其妻子連凡百所有個,還有<u>羅得</u>,大家走出 <u>埃及到南地</u>去。<sup>2</sup> 亞伯蘭有牲口、銀子、金子箇星頂富足。 <sup>3</sup> 從南地搬到伯特利,就是前頭搭帳篷造祭壇地方,來伯特 利等亥個中央。<sup>4</sup> 亞伯蘭來箇頭求懇耶和華個名頭。

<sup>5</sup> Teng Üô-pah-læn dong-de go Lo-teh yia yiu ngeo, yiang, tsiang-bong. <sup>6</sup> Keh di-fông feh-neng-keo peh gyi dô-kô deng, ing-we kô-kyi to-leh-kying, sô-yi dô-kô dengfeh-ko. <sup>7</sup> Ping-ts'ia Üô-pah-læn k'en sang-k'eo-go nying teng Lo-teh k'en sang-k'eo-go nying dô-kô tsang-zao. Ka z-'eo Kyüô-nen teng Pi-li-si nying wa deng-læ keh-deo. <sup>8</sup> Üô-pah-læn teng Lo-teh wô, Næn-kæn ngô teng ng m-neh

hao tsang-zao, ngô k'en sang-k'eo-go nying teng ng k'en sang-k'eo-go nying yia m-neh hao tsang-zao, ing-we ahlah z zi-go nying. <sup>9</sup> Djün-ko di ky'i-feh-z læ ng-go min-zin ma? Ts'ing ng teng ngô feng-k'æ: ng iao tsia-siu-pin ky'i, ngô hao tao jing-siu-pin ky'i; 'ôh-tsia ng iao jing-siu-pin ky'i, ngô hao tao tsia-siu-pin ky'i. 10 Lo-teh ngæn-tsing dæ-ky'i, k'en-k'en Iah-dæn 'o bing-yiang tao So-r keh-da lu, tao-c'ü di-t'u ts-ts-jing-jing, tsing-ziang Yiæ-'o-wô-go hwô-yün, yia ziang Yiæ-gyih di-fông ka: keh z Yiæ-'o-wô feh-zing mih-diao Sô-to-mô teng Ngo-mo-lah z-'eo. 11 Loteh ziu kæn-djoh Iah-dæn 'o djün-ko bing-yiang; Lo-teh ziu hyiang tong-pin ka pun-ko-ky'i: keh liang-go nying dôkô feng-k'æ. <sup>12</sup> Üô-pah-læn deng-læ Kyüô-nen di-fông, Lo-teh deng-læ bing-yiang-go dzing-ts-li, pô tsiang-bong dzin-dzin pun-ko-ky'i tao Sô-to-mô. <sup>13</sup> Keh-sing Sô-to-mô nying tsoh-ôh, væn do ze læ Yiæ-'o-wô-go min-zin.

<sup>5</sup>等<u>亞伯蘭</u>同隊個<u>羅得</u>也有牛、羊、帳篷。<sup>6</sup> 箇地方弗 能夠撥其大家庉,因爲家計多勒緊,所以大家庉弗過。<sup>7</sup>並

且亞伯蘭看牲口個人等羅得看牲口個人大家爭造。介時候 迦南等比利洗人還庉來箇頭。8 亞伯蘭等羅得話: 「難間我 等爾嘸得好爭造,我看牲口個人等爾看牲口個人也嘸得好 爭造,因爲阿拉是自個人。<sup>9</sup>全個地豈弗是來爾個面前嗎? 請爾等我分開。爾要借手邊去, 我好到順手邊去; 或者爾 要順手邊去,我好到借手邊去。」10 羅得眼睛抬起,看看 約但河平垟到瑣珥箇埭路, 到處地土滋滋潤潤, 正像耶和 華個花園, 也像埃及地方介。箇是耶和華弗曾滅掉所多瑪 等蛾摩拉時候。11 羅得就揀着約但河全個平垟。羅得就向 東邊介搬過去。箇兩個人大家分開。12 亞伯蘭 底來迦南地 方,羅得庉來平垟個城子裏,把帳篷漸漸搬過去到所多 瑪。<sup>13</sup> 箇星所多瑪人作惡, 犯大罪來耶和華個面前。

<sup>14</sup> Lo-teh teng Üô-pah-læn feng-k'æ ts-'eo, Yiæ-'o-wô teng Üô-pah-læn wô, Ng ngæn-tsing dæ-ky'i-læ, dzong ng læ-tong-go di-fông k'en tong, nen, si, poh: <sup>15</sup> Ng ih-ts'ih sô k'en-kyin-go di-fông, Ngô we üong-yün s-peh ng, teng ng-go 'eo-dæ. <sup>16</sup> Ngô we s-teh ng-go 'eo-dæ ziang di-yiang-li hwe-dzing ka to: ziah-z di-yiang-li-go hwe-dzing, nying

neng-keo su-leh-pin, ka-ni ng-go 'eo-dæ yia hao su-leh-c'ih. <sup>17</sup> Ng bô-ky'i, yüong tseo-cün keh di-fông-go dziang teng kw'eh; ing-we Ngô pih-ding we s-peh ng. <sup>18</sup> Üô-pah-læn ziu pun tsiang-bong tao Hyi-pah-leng, deng-læ Mæn-li-go ziang-jü bông-pin: læ keh-deo teng Yiæ-'o-wô zao ih-zo dæn.

14 <u>羅得等亞伯蘭</u>分開之後,耶和華等<u>亞伯蘭</u>話:「爾眼睛抬起來,從爾來東個地方看東、南、西、北。<sup>15</sup> 爾一切所看見個地方,我會永遠賜撥爾,等爾個後代。<sup>16</sup> 我會使得爾個後代像地垟裏灰塵介多。若是地垟裏個灰塵,人能夠數勒遍,介呢爾個後代也好數勒出。<sup>17</sup> 爾爬起,用走轉箇地方個長等闊,因爲我必定會賜撥爾。」<sup>18</sup> 亞伯蘭就搬帳篷到<u>希伯崙</u>,底來<u>幔利</u>個橡樹旁邊,來箇頭等耶和華造一座壇。

#### Ts. XIV.

Ka z-'eo En-lah-fi tso Z-nô wông, Üô-liah tso Yi-lahsah wông, Kyi-da-lao-mô tso Yi-læn wông, Di-dah tso Lihpông wông: <sup>2</sup> dô-kô ky'i tsing-vah Sô-to-mô wông Pi-lah, Ngo-mo-lah wông Pi-sô, Iah-mô wông Z-neh, Si-pin wông Z-mi-bih, teng Pi-lah wông. (Pi-lah ziu-z So-r.) <sup>3</sup> Keh-sing ng wông jü-long læ Si-ding sæn-ao, ziu-z Yin hæ. <sup>4</sup> Gyi-lah voh-z Kyi-da-lao-mô jih-nyi nyin, tao jih-sæn nyin be-bun gyi de. <sup>5</sup> Tao-leh jih-s nyin, Kyi-da-lao-mô teng gyi kyihtông-go koh-wông læ tang-ba Li-vah-ing nying læ Üô-dilih-kyüô nying di-fông, teng Su-si nying læ Ha-mah difông. Yi-mi nying læ Sô-vi-kyi-lih-ding di-fông, 6 'O-li nying læ gyi-lah-go Si-r sæn, dzih-tao kw'ông-iæ sianggying-go R-pô-læn. <sup>7</sup> Keh s-go wông tseo-kyü tao En-mihpah, ziu-z Kyüô-t'ih, p'o-tsing Üô-mô-leh nying-go 'en difông, teng deng-læ Ha-si-seng-da-mô-go Üô-mo-li nying.

<sup>1</sup>介時候,<u>暗拉非做士拿</u>王,亞略做以拉撒王,基大老 瑪做以攔王,提達做列邦王。<sup>2</sup>大家去征伐所多瑪王比拉、 蛾摩拉王比沙、押瑪王士納、洗扁王士米別等比拉王。 (<u>比拉</u>就是<u>瑣珥</u>。)<sup>3</sup> 箇星五王聚攏來<u>西定</u>山坳,就是鹽海。<sup>4</sup> 其拉服侍<u>基大老瑪</u>十二年,到十三年背叛其了。<sup>5</sup> 到了十四年,<u>基大老瑪</u>等其結黨個國王來打敗<u>利乏音</u>人來亞 提律迦人地方,等蘇西人來哈麥地方。以米人來沙微基列 亭地方,<sup>6</sup> 何利人來其拉個西珥山,直到曠野相近個珥巴 蘭。<sup>7</sup> 箇四個王走歸到<u>安密巴</u>,就是<u>迦鐵</u>,破進亞瑪勒人個 咸地方,等底來哈洗遜大瑪個亞摩利人。

<sup>8</sup> Keh-tsao Sô-to-mô wông, Ngo-mo-lah wông, Iah-mô wông, Si-pin wông, Pi-lah wông, (Pi-lah ziu-z So-r,) tu tseo-c'ih læ Si-ding sæn-ao, teng gyi-lah tang-tsiang: <sup>9</sup> ziu-z teng Yi-læn wông Kyi-da-lao-mô, Lih-pông wông Di-dah, Z-nô wông En-lah-fi, Yi-lah-sah wông Üô-liah: keh s-go wông teng ng-go wông tang-tsiang.

8 箇遭所多瑪王、蛾摩拉王、押瑪王、洗扁王、比拉王 (<u>比拉就是瑣珥</u>)都走出來西定山坳,等其拉打仗。<sup>9</sup>就是 等<u>以攔王基大老瑪、列邦王提達、士拿王暗拉非、以拉撒</u> 王亞略: 箇四個王等五個王打仗。

<sup>10</sup> Si-ding sæn-ao yiu hyü-to zah-yiu-go di-k'ang: Sôto-mô teng Ngo-mo-lah koh-wông dao-tseo, læ keh-deo tang-ba: yü-to dao-tao sæn-li-de. 11 Gyi-lah ziu pô Sô-tomô Ngo-mo-lah keh-sing dzæ-veh liang-ts'ao, tu lo-liah-ts tseo-kyü-ky'i. <sup>12</sup> Üô-pah-læn-go dzih-ts Lo-teh deng-læ Sôto-mô: gyi nying lin dzæ-veh yia be lo-liah-ky'i. <sup>13</sup> Yiu ihgo dao-tseo-go nying læ t'ong-cü Hyi-pah-læ nying Üôpah-læn. Üô-pah-læn deng-læ Üô-mo-li nying Mæn-li-go ziang-jü di-fông. Mæn-li z Yi-jih-koh teng Üô-næ-go hyüong-di: keh sæn hyüong-di tu teng Üô-pah-læn lih-iahko-liao-go. <sup>14</sup> Üô-pah-læn t'ing-meng dzih-ts be lo-liahky'i, ziu ling-leh gyi-zi oh-li sô iang-tong jih-lin-ko-liao-go nu-boh sæn-pah jih-pah-go nying, ken-tao Dæn-go difông. <sup>15</sup> Lin-yia feng-k'æ nu-boh, tang-ba gyi-lah, ken-tao Da-mô-seh tsia-siu-pin-go 'O-pô. 16 Gyi deh-cün ih-ts'ihgo dzæ-veh, yi ling-leh dzih-ts Lo-teh teng gyi-go tong-si, lin nyü-nying lin pah-sing, dô-kô kyü-læ.

10 西定山坳有許多石油個地坑: 所多瑪等蛾摩拉國王 逃走,來箇頭打敗。餘多逃到山裏了。11 其拉就把所多 瑪、蛾摩拉箇星財物糧草,都擄掠仔走歸去。<sup>12</sup> 亞伯蘭個 姪子羅得庉來所多瑪: 其人連財物也被擄掠去。13 有一個 逃走個人來通知希伯來人亞伯蘭。亞伯蘭庉來亞摩利人幔 利個橡樹地方。幔利是以實各等亞乃個兄弟。箇三兄弟都 等亞伯蘭立約過了個。14亞伯蘭聽聞姪子被擄掠去,就領 勒其自屋裏所養東, 習練過了個奴僕三百十八個人, 趕到 但個地方。15 連夜分開奴僕,打敗其拉,趕到大馬色借手 邊個何把。16 其奪轉一切個財物,又領勒姪子羅得等其個 東西, 連女人連百姓, 大家歸來。

<sup>17</sup> Üô-pah-læn sah-ba-leh Kyi-da-lao-mô lin gyi kyih-tông-go koh-wông kyü-læ z-'eo, Sô-to-mô wông tseo-c'ih tao Sô-vi sæn-ao, ziu-z wông-go sæn-ao, ky'i nying-tsih gyi. <sup>18</sup> Keh z-'eo Sah-leng wông Mah-kyi-si-teh, z tso ting kao Jing-ming-go tsi-s, ta-leh ping teng tsiu c'ih-læ; <sup>19</sup> coh-foh gyi wô, Dæn-nyün keh-we t'in-di-go Cü-tsæ, ting kao Jing-ming s foh-ky'i peh Üô-pah-læn! <sup>20</sup> Coh-zia ting

kao Jing-ming, pô ng-go dziu-dih kao-dæ ng-go siu-li! Üôpah-læn pô sô teh-djoh-go, jih-kwu-teh-ih song-peh Mahkyi-si-teh.

17 <u>亚伯蘭</u>殺敗了<u>基大老瑪</u>連其結黨個國王歸來時候, <u>所多瑪</u>王走出到沙微山坳,就是王個山坳,去迎接其。<sup>18</sup> 箇時候<u>撒冷王麥基洗德</u>,是做頂高神明個祭司,帶勒餅等 酒出來,<sup>19</sup> 祝福其話:「但願箇位天地個主宰,頂高神明 賜福氣撥<u>亞伯蘭</u>!<sup>20</sup> 祝謝頂高神明,把爾個仇敵交代爾個 手裏!」亞伯蘭把所得着個,十股得一送撥麥基洗德。

<sup>21</sup> Sô-to-mô wông teng Üô-pah-læn wô, Nying ni, kwe-peh ngô; tong-si ni, ng-zi do-leh-ky'i. <sup>22</sup> Üô-pah-læn teng Sô-to-mô wông wô, Ngô yi-kying ts-tin ting kao Jing-ming Yiæ-'o-wô, keh-we t'in-di-go Cü-tsæ, vah-tsiu, <sup>23</sup> ih-kwang sin, ih-kwang 'a-ta, z ng-go tong-si, ngô tu feh do, sæn-leh ng wô, Ngô s-teh Üô-pah-læn yiu-lao. <sup>24</sup> Djü-leh 'eo-sang sô ky'üoh ts-nga, wa-yiu teng ngô dong-de Üô-næ, Yi-jih-koh, Mæn-li sô ing-tông teh-djoh-go; hao peh gyi-lah tsiao meng-veng do-leh-ky'i.

21 <u>所多瑪</u>王等亞伯蘭話: 人呢, 歸撥我, 東西呢, 爾自馱勒去。22 <u>亞伯蘭等所多瑪</u>王話: 我已經指點頂高神明耶和華, 箇位天地個主宰, 罰咒, <sup>23</sup> 一梗線, 一梗鞋帶, 是爾個東西, 我都弗馱, 省勒爾話: 「我使得<u>亞伯蘭</u>有佬。」<sup>24</sup> 除勒後生所喫之外, 還有等我同隊<u>亞乃、以實</u>各、<u>幔利</u>所應當得着個, 好撥其拉照門份馱勒去。

# Ts. XV.

Keh-sing z-ken 'eo-deo Yiæ-'o-wô hyin-ling peh Üô-pah-læn, teng gyi wô, Üô-pah-læn, hao-vong p'ô, Ngô tso ng-go deng-ba, tso ng do-do eng-sông. <sup>2</sup> Üô-pah-læn wô, Cü Yiæ-'o-wô, Ng pô soh-si s-peh ngô, ing-we ngô m-neh ng-ts, tso ngô cong-kwun-go z keh-go Da-mô-seh nying Yi-li-üô-sah. <sup>3</sup> Üô-pah-læn yi wô, Ng m-neh ng-ts s-peh ngô; ka-ni sang-læ ngô oh-li-go nying we tsih ngô-go dæ. <sup>4</sup> Yiæ-'o-wô yi teng gyi wô, Keh-go nying feh-we tsih ng-go dæ; pih-ding dzong ng-zi sang-c'ih-læ-go hao tsih ng-go dæ. <sup>5</sup>

Ziu ling gyi tseo-c'ih nga-deo, wô, Deo dæ-ky'i k'en t'in! Keh-sing sing-siu ng neng-keo su-leh-pin feh? Yi teng gyi wô, Ng-go 'eo-dæ pih-ding z-ka. <sup>6</sup> Üô-pah-læn siang-sing Yiæ-'o-wô; Yiæ-'o-wô sön keh z gyi go kong-yi. <sup>7</sup> Yi teng Üô-pah-læn wô, Ngô Yiæ-'o-wô, ziu-z ling ng c'ih Kyüôleh-ti koh, R-go dzing-li, iao pô dông-deo di-fông s-peh ng tso ts'æn-nyih. <sup>8</sup> Gyi wô, Cü Yiæ-'o-wô, ngô dza hao hyiaoteh pih-ding teh-djoh keh-go ts'æn-nyih? 9 Yiæ-'o-wô, teng gyi wô, Ng yüong teng Ngô do sæn-nyin-go ts'-ngeo, sæn-nyin-go ts' sæn-ylang, sæn-nyin-go yüong wu-yiang, teng ih-tsah pæn-kyiu, ih-tsah siao beh-keh. <sup>10</sup> Ziu longtsong do-læ, te p'o-k'æ pun-pin kah-ky'i te-deo pa-tong: tsih-yiu tiao feh p'o-k'æ. <sup>11</sup> Yiu yia-tiao fi-loh-læ ding-leh keh-sing sang-k'eo-li, Üô-pah-læn ken gyi ky'i. 12 Nyihdeo kw'a loh-sæn z-'eo, Üô-pah-læn sah-kao kw'eng-joh, hweh-jün teh-cü moh-ts'eh-di-en, ziu p'ô-de. <sup>13</sup> Yiæ-'o-wô ziu teng Üô-pah-læn wô, Ng hao ih-ding hyiao-teh ng-go ts-seng we tso c'ih-meng nying læ bih-koh, voh-z gyi-lah; be bao-nyiah s-pah nyin kong-fu. <sup>14</sup> Gyi-lah sô voh-z keh-koh-go nying, Ngô tsong-iao p'un-tön gyi; 'eo-deo ng-go 'eo-dæ we do-leh hyü-to dzæ-veh tseo-c'ih-læ. <sup>15</sup> Ng we en-en-weng-weng kyü tsu-tsong di-fông ky'i, teh-djoh dziang-dziang ziu-shü en-tsông-hao. <sup>16</sup> Tao di-s dæ gyi-lah we tseo-cün tao ts'-di læ, ing-we Üô-mo-li nying-go ze wa m-neh mun-tsoh.

箇星事幹後頭,耶和華顯靈撥亞伯蘭,等其話: 亚 伯蘭,好甮怕,我做爾個盾牌,做爾大大恩賞。」2亞伯蘭 話:「主耶和華,爾把啥西賜撥我,因爲我嘸得兒子,做 我總管個是箇個大馬色人以利亞撒。」3亞伯蘭又話:「爾 嘸得兒子賜撥我,介呢生來我屋裏個人會接我個代。」<sup>4</sup>耶 和華又等其話:「箇個人弗會接爾個代,必定從爾自生出 來個好接爾個代。」5就領其走出外頭,話:「頭抬起看 天! 箇星星宿爾能夠數勒遍弗?」又等其話: 「爾個後代 必定是介。」6亞伯蘭相信耶和華。耶和華算箇是其個公 義。7又等亞伯蘭話:「我耶和華,就是領爾出迦勒底國, 珥個城裏,要把蕩頭地方賜撥爾做產業。」8其話:「主耶

和華,我咋好曉得必定得着箇個產業?」9耶和華等其話:

「爾用等我馱三年個雌牛,三年個雌山羊,三年個雄湖 羊,等一隻斑鳩,一隻小鵓鴿。」<sup>10</sup> 就攏總馱來,對破開 半邊夾起對頭擺東,只有鳥弗破開。11 有野鳥飛落來停勒 箇星牲口裏, 亞伯蘭趕其去。<sup>12</sup> 日頭快落山時候, 亞伯蘭 煞覺睏熟,忽然得知墨漆地暗,就怕了。<sup>13</sup> 耶和華就等亞 伯蘭話:「爾好一定曉得爾個子孫會做出門人來別國,服 侍其拉。被暴虐四百年工夫。」<sup>14</sup> 其拉所服侍箇國個人, 我總要判斷其。後頭爾個後代會馱勒許多財物走出來。15 爾會安安穩穩歸祖宗地方去,得着長長壽歲安葬好。16到 第四代其拉會走轉到此地來, 因為亞摩利人個罪還嘸得滿 足。」

<sup>17</sup> Nyih-deo yi-kying loh-sæn heh-en z-'eo, yiu c'ih-in-go ho-lu teng mang-mang ho-pô læ pa-k'æ-tih nyüoh-go cong-nyiang tseo-ko. <sup>18</sup> Keh-nyih Yiæ-'o-wô teng Üô-pah-læn lih-iah wô, Dzong Yiæ-gyih 'o tao Pah-lah keh-da do-'o, Ngô pô keh-go di-fông s-peh ng-go 'eo-dæ; <sup>19</sup> ziu-z Kyi-nyi, Kyi-nyi-si, Kyiah-mo-nyi, <sup>20</sup> Heh, Pi-li-si, Li-vah-

ing, <sup>21</sup> Üô-mo-li, Kyüô-nen, Keh-kyüô-sah, Yiæ-pu-si, kehsing dzoh-veng-go di-fông.

17 日頭已經落山,黑暗時候,有出煙個火爐等猛猛火把來擺開的肉個中央走過。18 箇日耶和華等亞伯蘭立約話:「從埃及河到伯拉箇埭大河,我把箇個地方賜撥爾個後代。19 就是基尼、基尼洗、甲摩尼、20 赫、比利洗、利乏音、21 亞摩利、迦南、革迦撒、耶布西,箇星族份個地方。」

#### Ts. XVI.

Üô-pah-læn-go ts'i-ts Sah-læ m-teh sang-yiang: gyi yiu ih-go ô-deo, z Yiæ-gyih-go nyü-nying, ming-z kyiao-leh Yüô-kyiah. <sup>2</sup> Sah-læ teng Üô-pah-læn wô, Yiæ-'o-wô feh-peh ngô sang-yiang: ng ts'ia teng ngô ô-deo dong-zông, ngô 'ôh-tsia hao k'ao-djoh gyi teh-djoh ng-nô. Üô-pah-læn ziu t'ing Sah-læ shih-wô. <sup>3</sup> Ka z-'eo Üô-pah-læn

deng-læ Kyüô-nen di-fông yi-kying jih nyin-de: gyi ts'i-ts Sah-læ pô Yiæ-gyih-go ô-deo Yüô-kyiah peh gyi dziang-fu Üô-pah-læn tso ah-yi.

<sup>1</sup> 亞伯蘭個妻子撒萊 無得生養。其有一個丫頭,是<u>埃及</u>個女人,名字叫勒夏甲。<sup>2</sup> 撒萊等亞伯蘭話:「耶和華弗撥我生養,爾且等我丫頭同牀,我或者好靠着其得着兒囡。」亞伯蘭就聽撒萊說話。<sup>3</sup> 介時候亞伯蘭 底來 迦南地方已經十年了。其妻子撒萊把埃及個丫頭夏甲撥其丈夫亞伯蘭做阿姨。

<sup>4</sup> Üô-pah-læn teng Yüô-kyiah dong-zông, Yüô-kyiah ziu yiu sing-yüing: gyi teh-cü zi yiu-sing, ziu k'en-ky'ing gyi cü-meo. <sup>5</sup> Sah-læ teng Üô-pah-læn wô, Ngô-go kô-ky'i z ng-go yün-kwu: ngô fông ô-deo læ ng-go gwa-li, gyi teh-cü zi yiu-sing ziu k'en-ky'ing ngô. Dæn-nyün Yiæ-'o-wô læ ng teng ngô cong-nyiang p'un-tön. <sup>6</sup> Üô-pah-læn teng Sah-læ wô, Ô-deo z læ ng-go siu-'ô: hao ze ng dza dæ gyi. Sah-læ pih-næn gyi; Yüô-kyiah ziu li-k'æ gyi min-zin, dao-tseo-de.

<sup>4</sup> 亞伯蘭等夏甲同牀,夏甲就有身孕。其得知自有身,就看輕其主母。<sup>5</sup> 撒萊等亞伯蘭話:「我個加氣是爾個緣故。我放丫頭來爾個懷裏,其得知自有身就看輕我。但願耶和華來爾等我中央判斷。」<sup>6</sup> 亞伯蘭等撒萊話:「丫頭是來爾個手下,好隨爾咋待其。」撒萊逼難其,夏甲就離開其面前,逃走了。

<sup>7</sup> Yiæ-'o-wô-go t'in-s p'ong-djoh gyi læ kw'ông-iæ difông, teng shü-nyün siang-gying: (keh-go shü-nyün z læ Shü-r keh-da lu-zông.) <sup>8</sup> Gyi wô, Sah-læ-go ô-deo Yüôkyiah, dzong 'ah-li læ? iao tao 'ah-li ky'i? Gyi wô, Ngô tobi cü-meo Sah-læ-go min-zin. <sup>9</sup> Yiæ-'o-wô-go t'in-s teng gyi wô, Ng yüong kyü-tao cü-meo di-fông ky'i, hao voh gyi kæ-kwun. 10 Yiæ-'o-wô-go t'in-s yi teng gyi wô, Ngô we kô-ts'eo ng-go 'eo-dæ zing-hyü-to, su tu su-feh-pin. 11 Yiæ-'o-wô-go t'in-s yi teng gyi wô, Næn-kæn ng yiu singyüing, we sang ng-ts; hao c'ü gyi ming-z Yi-jih-mô-li; ingwe Yiæ-'o-wô t'ing-meng ng-go kw'u-ts'u. <sup>12</sup> Gyi we ziang yia li-ts læ nying cong-nyiang: gyi-go siu we ti-dih congnying; cong-nying-go siu yia we ti-dih gyi: gyi we deng-læ cong hyüong-di-go min-zin. <sup>13</sup> Teng gyi sô kông-go Yiæ-'o-wô, Yüô-kyiah ts'ing-hwu gyi ming-deo, Ng Jing-ming z k'en ngô tong; ing-we gyi wô, ngô soh-feh-z læ dông-deo kyin-ko Keh-we k'en ngô tong-go ma? <sup>14</sup> Sô-yi keh-k'eo tsing kyiao-leh <sup>[1]</sup>Bih-lah-hæ-læ; ziu-z Kyüô-t'ih Pi-lih cong-nyiang.

7 耶和華個天使碰着其來曠野地方,等水源相近。(箇 個水源是來書珥箇埭路上。) 8 其話: 「撒萊個丫頭夏甲, 從何裏來?要到何裏去?」其話:「我躲避主母撒萊個面 前。」9耶和華個天使等其話:「爾用歸到主母地方去,好 服其該管。」10 耶和華個天使又等其話: 「我會加湊爾個 後代甚許多,數都數弗逼。」 11 耶和華個天使又等其話: 「難間爾有身孕,會生兒子,好取其名字以實瑪利,因為 耶和華聽聞爾個苦楚。」12 其會像野驢子來人中央,其個 手會抵敵衆人,衆人個手也會抵敵其。其會底來衆兄弟個 面前。」13 等其所講個耶和華,夏甲稱呼其名頭: 「爾神 明是看我東。」因為其話:「我啥弗是來蕩頭見過箇位看

我東個嗎?」<sup>14</sup> 所以箇口井叫勒<u>別拉海萊<sup>[1]</sup></u>,就是<u>迦鐵比</u>列中央。

[1] *Ziu-z* Keh-we weh-go, we-k<sup>'</sup>en-kyin-go Jing-ming go tsing. 就是箇位活個、會看見個神明個井。(原註)

<sup>15</sup> 'Eo-deo Yüô-kyiah teng Üô-pah-læn sang ng-ts. Üô-pah-læn c'ü Yüô-kyiah sô sang-go ng-ts ming-z kyiao-leh Yi-jih-mô-li.

15 後頭<u>夏甲等亞伯蘭</u>生兒子。<u>亞伯蘭取夏甲</u>所生個兒子名字叫勒以實瑪利。

<sup>16</sup> Yüô-kyiah teng Üô-pah-læn sang Yi-jih-mô-li z-ʿeo, Üô-pah-læn nyin-kyi pah-jih-loh shü de.

16 <u>夏甲等亞伯蘭生以實瑪利</u>時候,<u>亞伯蘭</u>年紀八十六歲了。

#### Ts. XVII.

Üô-pah-læn kyiu-jih-kyiu shü go z-'eo, Yiæ-'o-wô yinc'ih peh Üô-pah-læn, teng gyi wô, Ngô z djün-neng-go Jing-ming: ng læ Ngô-go min-zin hao tso-nying yia yüong djün-be. <sup>2</sup> Ngô we teng ng lih Ngô-go iah, we s-teh ng 'eodæ meo-meo-zing-zing to-ky'i-læ. <sup>3</sup> Üô-pah-læn ziu bohtao: Jing-ming yi teng gyi kông, z-ka wô, <sup>4</sup> Ngô teng ng shih-lih Ngô-go iah, s-teh ng we tso lih-koh-go tsu-tsong. <sup>5</sup> Næn-kæn feh tsæ eo ng ming-z Üô-pah-læn, z c'ü ng [1]Üô-pah-lah-hen, ing-we Ngô s-teh ng tso lih-koh-go tsutsong. <sup>6</sup> Ngô we s-teh ng do-nyiang hying-wông, dzing-we hyü-to koh-veng: kyüing-wông keh-sing dzong ng ka c'ihlæ. <sup>7</sup> Ng teng ng lin ng lih-dæ-go ts-seng pih-ding shih-lih Ngô-go iah, tso üong-yün-go iah: Ngô we tso ng lin ng 'eodæ-go Jing-ming. <sup>8</sup> Ngô we pô ng yin-dzæ deng-tih-go difông, ziu-z 'en Kyüô-nen di-fông, tu s-peh ng lin ng-go 'eo-dæ, tso üong-yün-go ts'æn-nyih: Ngô yia we tso gyilah-go Jing-ming.

亞伯蘭九十九歲個時候, 耶和華現出撥亞伯蘭, 等其 「我是全能個神明。爾來我個面前好做人也用全備。2 話: 我會等爾立我個約,會使得爾後代茂茂盛盛多起來。」3亞 伯蘭就伏倒。神明又等其講,是介話: 4「我等爾設立我個 約,使得爾會做列國個祖宗。5難間弗再謳爾名字亞伯蘭, 是取爾亞伯拉罕[1],因爲我使得爾做列國個祖宗。6我會使 得爾大樣興旺,成為許多國份,君王箇星從爾介出來。7爾 等爾連爾歷代個子孫必定設立我個約,做永遠個約。我會 做爾連爾後代個神明。8 我會把爾現在庉的個地方,就是咸 迦南地方, 都賜撥爾連爾個後代, 做永遠個產業, 我也會 做其拉個神明。」

[1] Ziu z Hyü-to nying-go tsu-tsong. 就是許多人個祖宗。(原 註)

<sup>9</sup> Jing-ming yi teng Üô-pah-lah-hen wô, Ng lin ng lih-dæ-go ts-seng tsong-iao pao-siu Ngô-go iah. <sup>10</sup> Ngô sô shih-lih peh ng lin ng-go 'eo-dæ, keh iao pao-siu-go iah z-ka-go: ng-go cong-nyiang væn-pah nen tu iao ziu tsiu-keh-li. <sup>11</sup> Ng pih-iao 'ang tsiu-keh-li tso Ngô teng ng lih-iah-go

kyi-'ao. <sup>12</sup> Ng lih-dæ-go ts-seng long-tsong sang-c'ih pah-nyih-go nen w̃en, 'ôh-tsia sang-læ oh-li-go, 'ôh-tsia feh-z ng 'eo-dæ, z yüong nying-ts dzong bih-koh ma-læ-go, tu iao ziu tsiu-keh-li. <sup>13</sup> Feh-leng ng oh-li sang-c'ih-go, 'ôh-tsia ng nying-ts ma-læ-go, tu pih-iao ziu tsiu-keh-li: ka-ni Ngô-go iah læ ng-go kyi-sing hao tso üong-yün-go iah. <sup>14</sup> Feh ziu tsiu-keh-li-go nen, tsong-iao dön-djih gyi læ pah-sing cong-nyiang, ing-we gyi z we-be Ngô-go iah.

<sup>9</sup>神明又等<u>亞伯拉罕</u>話:「爾連爾歷代個子孫總要保守 我個約。<sup>10</sup> 我所設立撥爾連爾個後代,箇要保守個約是介 個:爾個中央凡百男都要受周割禮<sup>[1]</sup>。<sup>11</sup> 爾必要行周割禮 做我等爾立約個記號。<sup>12</sup> 爾歷代個子孫攏總生出八日個男 娃,或者生來屋裏個,或者弗是爾後代,是用銀子從別國 買來個,都要受周割禮。<sup>13</sup> 弗論爾屋裏生出個,或者爾銀 子買來個,都必要受周割禮,介呢我個約來爾個肌身好做 永遠個約。<sup>14</sup> 弗受周割禮個男,總要斷絕其來百姓中央, 因為其是違背我個約。」

<sup>15</sup> Jing-ming yi teng Üô-pah-lah-hen wô, Ng-go ts'i-ts Sah-læ ni, feh-k'o tsæ eo gyi ming-z Sah-læ, z hao c'ü gyi [1]Sah-lah. 16 Ngô yia we s foh peh gyi, dzong gyi ka s ih-go ng-ts peh ng. Ngô tsong we s foh peh gyi, s-teh gyi tso lihkoh-go ah-nyiang: pah-sing-go kyüing-wông yia dzong gyi ka læ. <sup>17</sup> Üô-pah-lah-hen boh-tao, siao ih-siao, sing-li wô, Ih-pah shü go nying dza neng-keo sang ng-ts ni? hwôngts'ia Sah-lah yi-kying kyiu-jih shü. næn-dao wa we sang ma? 18 Üô-pah-lah-hen teng Jing-ming wô, Dæn-nyün Yijih-mô-li weh læ Ng-go min-zin! 19 Jing-ming wô, Feh-zka, ng ts'i-ts Sah-lah ih-ding we sang ng-ts; ng hao c'ü gyi ming-z <sup>[2]</sup>Yi-sah; Ngô teng gyi lin gyi-go 'eo-dæ we shihlih Ngô-go iah tso üong-yün go iah. <sup>20</sup> Kông-tao Yi-jih-môli, Ngô yi-kying t'ing ng-go tao-kao de; Ngô yi-kying s foh peh gyi, we s-teh gyi 'eo-dæ meo-meo-zing-zing to-ky'ilæ. Gyi we sang jih-nyi-go moh-pah; Ngô peh gyi tso do-do koh-veng. <sup>21</sup> Dæn-z Ngô teng Yi-sah we shih-lih Ngô-go iah, ziu-z ming-nyin keh-go z-'eo Sah-lah we teng ng sang go. <sup>22</sup> Kông-hao ts-'eo Jing-ming li-k'æ Üô-pah-lah-hen sing-zông-ky'i.

15 神明又等亞伯拉罕話:「爾個妻子撒萊呢,弗可再 謳其名字撒萊,是好取其撒拉<sup>[1]</sup>。<sup>16</sup> 我也會賜福撥其,從 其介賜一個兒子撥爾。我總會賜福撥其,使得其做列國個 阿孃,百姓個君王也從其介來。」17 亞伯拉罕伏倒,笑一 笑,心裏話:「一百歲個人咋能夠生兒子呢?況且撒拉已 經九十歲。難道還會生嗎?」18 亞伯拉罕等神明話:「但 願以實瑪利活來爾個面前!」19神明話:「弗是介,爾妻 子撒拉一定會生兒子。爾好取其名字以撒[2]。我等其連其 個後代會設立我個約做永遠個約。20 講到以實瑪利,我已 經聽爾個禱告了。我已經賜福撥其,會使得其後代茂茂盛 盛多起來。其會生十二個牧伯。我撥其做大大國份。21但 是我等以撒會設立我個約, 就是明年箇個時候撒拉會等爾 生個。」22 講好之後,神明離開亞伯拉罕升上去。

- [1] Sah-lah i-s ziu-z Kong-cü. 撒拉意思就是公主。(原註)
- [2] Ziu-z Fah-siao, k'en <sup>17</sup> ts'ih. 就是發笑,看 <sup>17</sup> 七。(原註)

<sup>23</sup> Keh-nyih Üô-pah-lah-hen tsiao Jing-ming-go feng-fu pô ng-ts Yi-jih-mô-li, teng keh-sing oh-li sang-tong-go, nying-ts ma-læ-go, væn-pah læ Üô-pah-lah-hen oh-li-go nen, long-tsong teng gyi-lah 'ang tsiu-keh-li. <sup>24</sup> Üô-pah-lah-hen ziu tsiu-keh-li z-'eo, nyin-kyi kyiu-jih-kyiu shü-de. <sup>25</sup> Gyi ng-ts Yi-jih-mô-li ziu tsiu-keh-li z-'eo, nyin-kyi jih-sæn shü-de, <sup>26</sup> Keh-nyih Üô-pah-lah-hen teng ng-ts Yi-jih-mô-li dô-kô ziu tsiu-keh-li. <sup>27</sup> Wa-yiu gyi keh ih-kô-go nying, 'ôh-tsia sang-læ oh-li-go, 'ôh-tsia yüong nying-ts dzong bih-koh ma-læ-go, yia tu ziu tsiu-keh-li.

<sup>23</sup> 箇日亞伯拉罕照神明個吩咐,把兒子<u>以實瑪利</u>,等 箇星屋裏生東個、銀子買來個,凡百來<u>亞伯拉罕</u>屋裏個 男,攏總等其拉行周割禮。<sup>24</sup> <u>亞伯拉罕</u>受周割禮時候,年 紀九十九歲了。<sup>25</sup> 其兒子<u>以實瑪利</u>受周割禮時候,年紀十 三歲了。<sup>26</sup> 箇日<u>亞伯拉罕</u>等兒子<u>以實瑪利</u>大家受周割禮。 <sup>27</sup> 還有其箇一家個人,或者生來屋裏個,或者用銀子從別 國買來個,也都受周割禮。

### Ts. XVIII.

Yiæ-'o-wô læ Mæn-li ziang jü di-fông yin-c'ih-læ peh Üô-pah-lah-hen. Nyih-deo tông tsiu-ko z-'eo Üô-pah-lahhen zo-læ tsiang-bong meng-k'eo: 2 gyi ngæn-tsing dæky'i k'en-kyin sæn-go nying lih-læ gyi min-zin: ih-k'enkyin, ziu dzong tsiang-bong meng-k'eo peng-zông-ky'i nying-tsih gyi, boh-tao di-yiang-li, <sup>3</sup> wô, Cü, ziah-z tehdjoh ng-go eng-we, ts'ing ng m-nao li-k'æ ng-go nu-boh tseo-k'æ-ky'i. <sup>4</sup> Hao siao-shü do-tin shü gyiang-gyiang nggo kyiah: ng ts'ia læ jü ti-'ô tsiang-sih ih-zông. <sup>5</sup> Ngô we do-tin ky'üoh-zih hao peh ng-lah tsih-tsih lih, 'eo-deo tsæ dong-sing; ing-we ng tao ng nu-boh-go di-fông læ ing-tông z-ka. Gyi-lah wô, Ng hao tsiao ng-go shih-wô ka tso. <sup>6</sup> Üôpah-lah-hen ziu kw'a-kw'a tseo-tsing tsiang-bong-li, teng Sah-lah wô, Yüong zông-kying be-bæn sæn <sup>[2]</sup>si-ah si-si-go min-feng, nyüoh-tæn-hao, p'ang gyi tso ping. 7 Üô-pahlah-hen yi peng-tao ngeo-gyin-li, do ih-tsah công-công

hao-hao-go siao-ngeo kao-dæ nu-boh: gyi ziu kw'a-kw'a be-bæn hao. <sup>8</sup> Yi do-leh na teng na-yiu, lin be-bæn hao-go siao-ngeo, pa-læ nying-k'ah min-zin, zi lih-læ gyi-lah bông-pin jü ti-'ô, teng-dæ gyi-lah ky'üoh.

耶和華來幔利橡樹地方現出來撥亞伯拉罕。日頭當畫 過時候亞伯拉罕坐來帳篷門口。2 其眼睛抬起看見三個人立 來其面前。一看見,就從帳篷門口奔上去迎接其,伏倒地 垟裏,<sup>3</sup>話:「主,若是得着爾個恩惠,請爾嘸得好<sup>[1]</sup>離開 爾個奴僕走開去。4好稍勢馱點水滰滰爾個腳。爾且來樹底 下將息一晌。5 我會馱點喫食好撥爾拉接接力,後頭再動 身。因為爾到爾奴僕個地方來應當是介。」其拉話:「爾 好照爾個說話介做。」6亞伯拉罕就快快走進帳篷裏,等撒 拉話: 「用上緊備辦三細阿[2]細細個麪粉, 捆帶好, 烹其 做餅。」7亞伯拉罕又奔到牛圈裏,馱一隻壯壯好好個小牛 交代奴僕。其就快快備辦好。<sup>8</sup> 又馱勒奶等奶油,連備辦好 個小牛, 擺來人客面前, 自立來其拉旁邊樹底下, 等待其 拉喫。

[1] m-nao, 現代寧波話說 mau6、mhau5, 寫作「莫」, 本字或 爲「嘸得好」。

#### [2] Ih si-ah da-iah ih teo. 一細阿大約一斗。(原註)

<sup>9</sup> Gyi-lah teng Üô-pah-lah-hen wô, Ng-go ts'i-ts Sahlah læ 'ah-li? Gyi wô, Læ tsiang-bong-li. 10 Ih-go wô, tao yüih-veng tsoh-go z-'eo, Ngô we tseo-cün ng-go di-fông læ, ng-go ts'i-ts Sah-lah we sang ng-ts. Sah-lah læ Gyi 'eope tsiang-bong meng-k'eo t'ing-meng. <sup>11</sup> Næn-kæn Üôpah-lah-hen teng Sah-lah nyin-kyi tu z lao-lao; Sah-lah-go yüih-kying yi-kying dön-de. <sup>12</sup> Sô-yi Sah-lah zi siao ih-siao, wô, Ngô yi-kying lao-de, cü-nying-kô yia lao-de, ngô nændao neng-keo yiu keh-go hyi-z ma? 13 Yiæ-'o-wô teng Üôpah-lah-hen wô, Sah-lah dza-we siao, wô, Z ngô nyin-kyi lao-de, wa neng-keo ih-ding sang ng-ts ma? 14 Yiæ-'o-wô yiu soh-go tso-feh-læ ma? Tao ding-kwe-go nyih-ts, ziu-z yüih-veng tsoh-go z-'eo, Ngô tsong we tseo-cün ng-go difông læ, Sah-lah we sang ng-ts. <sup>15</sup> Sah-lah ky'ih-hoh, ziu la-de, wô, Ngô m-neh siao. Gyi wô; Feh-z: ng jih-dzæ siaoko-de.

9 其拉等亞伯拉罕話:「爾個妻子撒拉來何裏?」其 話:「來帳篷裏。」10一個話:「到月分足個時候,我會 走轉爾個地方來, 爾個妻子撒拉會生兒子。」 撒拉來其後 背帳篷門口聽聞。11 難間亞伯拉罕等撒拉年紀都是老老。 撒拉個月經已經斷了。12 所以撒拉自笑一笑,話:「我已 經老了,主人家也老了,我難道能夠有箇個喜事嗎?」13 耶和華等亞伯拉罕話:「撒拉咋會笑,話:『是我年紀老 了,還能夠一定生兒子嗎?』<sup>14</sup> 耶和華有啥個做弗來嗎? 到定規個日子,就是月分足個時候,我總會走轉爾個地方 來,撒拉會生兒子。」15撒拉喫惟,就賴了,話:「我嘸 得笑。」其話:「弗是,爾實在笑過了。」

<sup>16</sup> Keh-sing nying ziu dzong keh-deo dong-sing, hyiang-djoh Sô-to-mô ka ky'i. Üô-pah-lah-hen song gyilah dô-kô ky'i. <sup>17</sup> Yiæ-'o-wô wô, Ngô sô iao tso-go z-ken, næn-dao ing-mun Üô-pah-lah-hen ma? <sup>18</sup> Ing-we Üô-pah-lah-hen pih-ding we tso yiu neng-ken-go do koh-veng:

t'in-'ô væn-koh tu dzong gyi teh-djoh foh-ky'i. <sup>19</sup> Ing-we Ngô hyiao-teh gyi, sô-yi gyi we feng-fu gyi ng-ts teng zi ihkô nying, s-teh gyi-lah z-djông pao-siu Yiæ-'o-wô-go daoli, tso-nying kong-yi tsing-dzih: Yiæ-'o-wô ziu we tsiao Gyi ing-hyü-go shih-wô s-peh Üô-pah-lah-hen. <sup>20</sup> Yiæ-'o-wô ziu wô, Sô-to-mô Ngo-mo-lah ôh-kwun mun-ying, yiu dodo sing-hyiang eo Ngô ka; <sup>21</sup> Næn-kæn Ngô loh-ky'i k'en gyi-go 'ang-we-ko-jün z ziang Ngô sô t'ing-meng-go singhyiang feh: feh-z, Ngô yia we hyiao-teh. <sup>22</sup> Liang-go nying ziu nyin-cün hyiang-djoh Sô-to-mô ka ky'i: Üô-pah-lahhen wa lih-læ Yiæ-'o-wô-go min-zin.

大大聲響謳我介。<sup>21</sup> 難間我落去看其個行為果然是像我所聽聞個聲響弗。弗是,我也會曉得。」<sup>22</sup> 兩個人就扭轉<sup>[1]</sup> 向着所多瑪介去。亞伯拉罕還立來耶和華個面前。

[1] nyin-cün, 現代寧波話說 gnieu tsoe 或 gniu tsoe, 寫作「扭轉」, 首字本字不明。

<sup>23</sup> Üô-pah-lah-hen gying-long, wô, Kong-yi nying teng ôh-nying, Ng we ih-kæ mih-diao gyi ma? <sup>24</sup> Dzing-li ziah yiu ng-jih-go kong-yi nying, næn-dao hao long-tsong mihdiao, feh we-leh keh ng-jih-go kong-yi nying kw'un-shü keh di-fông ma? <sup>25</sup> Kong-yi nying teng ôh-nying ih-kæ sah-diao, keh z Ng feh tso-go: dæ kong-yi nying teng ôhnying ih-yiang, Ng yia feh tso-go. P'un-tön t'in-'ô-go Cü næn-dao feh-z tso-leh kong-bing ma? <sup>26</sup> Yiæ-'o-wô wô, Sôto-mô dzing-li ziah-z p'ong-djoh ng-jih-go kong-yi nying, Ngô we-leh gyi pih-ding kw'un-shü keh long-tsong difông. <sup>27</sup> Üô-pah-lah-hen we-teh, z-ka wô, Ngô se-tsih z bong-dzing teng hwe, yia ken gyiu-k'eng Yiæ-'o-wô. Jü-ko ng-jih-go kong-yi nying ky'üih ng-go, næn-dao we-leh

ky'üih ng-go, ziu mih-diao keh 'en dzing-li ma? Gyi wô, Ngô ziah-z læ keh-deo p'ong-djoh s-jih-ng-go kong-yi nying, yia feh mih-diao gyi. <sup>29</sup> Üô-pah-lah-hen tsæ teng Gyi wô, Jü-ko læ keh-deo p'ong-djoh s-jih nying, dza-go? Gyi wô, we-leh s-jih nying, Ngô yia feh ka tso. 30 Gyi wô, Dæn-nyün Ng Cü m-nao ô-wông, ngô wa iao tsæ kông. Jüko læ keh-deo p'ong-djoh sæn-jih nying, dza-go? Gyi wô, Ngô ziah-z læ keh-deo p'ong-djoh sæn-jih nying, yia feh ka tso. <sup>31</sup> Gyi wô, Ngô tsæ ken gyiu-k'eng Yiæ-'o-wô. Jü-ko læ keh-deo p'ong-djoh nyiæn-go, dza-go? Gyi wô, We-leh nyiæn-go nying, Ngô yia feh mih-diao gyi. <sup>32</sup> Üô-pah-lahhen wô, Dæn-nyün Ng Cü m-nao ô-wông, ngô tsih tsæ kông ih-kyü shih-wô. Jü-ko læ keh-deo p'ong-djoh jih-go, dza-go? Gyi wô, We-leh jih-go nying Ngô yia feh mih-diao gyi. 33 Yiæ-'o-wô teng Üô-pah-lah-hen kông-hao, ziu ky'ide. Üô-pah-lah-hen yia tseo-kyü zi-go di-fông.

<sup>&</sup>lt;sup>23</sup> <u>亞伯拉罕</u>近攏,話:「公義人等惡人,爾會一概滅 掉其嗎?<sup>24</sup> 城裏若有五十個公義人,難道好攏總滅掉,弗

為了箇五十個公義人寬恕箇地方嗎?<sup>25</sup> 公義人等惡人一概 殺掉,箇是爾弗做個。待公義人等惡人一樣,爾也弗做 個。判斷天下個主難道弗是做勒公平嗎?」<sup>26</sup> 耶和華話:

「所多瑪城裏若是碰着五十個公義人,我為了其必定寬恕 箇攏總地方。」<sup>27</sup> 亞伯拉罕回答,是介話:「我雖即是塳 塵等灰,也敢求懇耶和華。如果五十個公義人缺五個,難 道為了缺五個,就滅掉箇咸城裏嗎?」其話:「我若是來 箇頭碰着四十五個公義人,也弗滅掉其。」<sup>29</sup> 亞伯拉罕再 等其話:「如果來箇頭碰着四十人,咋個?」其話:「為 了四十人,我也弗介做。」<sup>30</sup> 其話:「但願爾主嘸得好啞 喤<sup>[1]</sup>,我還要再講。如果來箇頭碰着三十人,咋個?」其 話:「我若是來箇頭碰着三十人,也弗介做。」<sup>31</sup> 其話:

「我再敢求懇耶和華。如果來箇頭碰着廿個,咋個?」其話:「為了廿個人,我也弗滅掉其。」<sup>32</sup> 亞伯拉罕話:

「但願爾主嘸得好啞喤,我只再講一句說話。如果來箇頭碰着十個,咋個?」其話:「為了十個人我也弗滅掉其。」<sup>33</sup> 耶和華等亞伯拉罕講好,就去了。亞伯拉罕也走歸自個地方。

## Ts. XIX.

Kwʻa-yia z-ʻeo liang-go tʻin-s tao Sô-to-mô: Lo-teh kʻeo-kʻeo zo-læ dzing-meng-kʻeo; ih-kʻen-kyin ziu lih-kyʻi-læ nying-tsih gyi-lah, boh-tao di-yiang-li, <sup>2</sup> wô, Ngôgo Cü, tsʻing ng-lah tseo-tsing ng nu-boh-go oh-li, gyiang-gyiang kyiah, soh-ko yia: tsao tʻin-nyiang bô-kyʻi, tsæ dong-sing. Gyi-lah wô, Feh-z-ka; ah-lah tang-tsiang soh læ lu-ka-li. <sup>3</sup> Lo-teh sah-kʻeo liu gyi-lah: gyi-lah ziu tseo-cün tao gyi oh-li. Lo-teh teng gyi bæn ih-zih tsiu, pʻang m-kao-shü-go ping; gyi-lah kyʻüoh-de.

快夜時候,兩個天使到<u>所多瑪。羅得</u>扣扣坐來城門口,一看見就立起來迎接其拉,伏倒地垟裏,<sup>2</sup>話:「我個主,請爾拉走進爾奴僕個屋裏,灠灠腳,宿過夜。早天亮爬起,再動身。」其拉話:「弗是介。阿拉打賬宿來路街

裏。」<sup>3</sup> <u>羅得</u>煞扣留其拉。其拉就走轉到其屋裏。<u>羅得</u>等其 辦一席酒,烹嘸酵水個餅,其拉喫了。

<sup>4</sup> Wa feh-zing kw'eng-go z-'eo, Sô-to-mô dzing-li sdeh-lön-ky'ün pah-sing lao-lao siao-siao tu we-djü gyi ohli; <sup>5</sup> eo Lo-teh, teng gyi wô, Kyih-mih yia-tao tao ng difông-go nying læ 'ah-li? Ng ta gyi c'ih-læ, kao-dæ ah-lah hao nying-teh gyi. 6 Lo-teh tseo-c'ih tao cong-nying difông, ziu pô meng kwæn-hao, <sup>7</sup> wô, Hyüong-di, ts'ing nglah m-nao ka tsoh-ôh. <sup>8</sup> Ngô yiu liang-go nön, feh-zing kô nying-go: peh ngô ta gyi c'ih-læ, ze ng-lah dza dæ gyi: dæn-z ih-ngæn m-nao næn-we keh-sing nying, ing-we gyi we-leh ka tseo-tsing ngô oh li-hyiang. <sup>9</sup> Gyi-lah wô, Ng tseo-ko: yi wô, Keh-go nying tæn-koh læ dông-deo, iao p'un-tön ah-lah soh-go? næn-kæn ah-lah 'æ ng pi gyi-lah wa li-'æ. Ziu üong-tsi Lo-teh kw'a iao p'o-k'æ gyi-go meng. 10 Keh liang-go nying sing-c'ih siu læ Ĭa Lo-teh tsing oh-li, ziu kwæn-meng. <sup>11</sup> Ping-ts'ia s-teh meng-ngago nying lao-lao siao-siao ngæn-tsing tu hah-de: gyi-lah ky'ih-ky'ih lih-lih zing meng zing-feh-djoh.

4 還弗曾睏個時候,所多瑪城裏四凸亂圈百姓老老少少 都圍住其屋裏, 5 謳羅得, 等其話: 「今末夜到到爾地方個 人來何裏?爾帶其出來,交代阿拉好認得其。」<sup>6</sup>羅得走出 到衆人地方,就把門關好,<sup>7</sup>話:「兄弟,請爾拉嘸得好介 作惡。8 我有兩個囡,弗曾嫁人個,撥我帶其出來,隨爾拉 咋待其, 但是一眼嘸得好難為箇星人, 因為其為了介走進 我屋裏向。」9其拉話:「爾走過。」又話:「箇個人耽擱 來蕩頭, 要判斷阿拉啥個?難間阿拉害爾比其拉還厲 害。」就擁擠羅得快要破開其個門。<sup>10</sup> 箇兩個人伸出手來 拉羅得進屋裏,就關門。11並且使得門外個人老老少少眼 睛都瞎了。其拉喫喫力力尋門尋弗着。

<sup>12</sup> Keh liang-go nying teng Lo-teh wô, Ng dông-deo wa-yiu jü læ-tong feh? 'ôh-tsia nyü-si, 'ôh-tsia ng-ts nön, teng væn-pah dzing-li sô yiu-go, tu ta-gyi-c'ih keh-go di-fông. <sup>13</sup> Ah-lah iao mih-diao keh-go di-fông, ing-we gyi-lah sing-hyiang læ Yiæ-'o-wô-go min-zin do-do go: keh-

leh Yiæ-'o-wô ts'a ah-lah mih-diao gyi. <sup>14</sup> Lo-teh ziu tseo-c'ih, teng ding gyi nön-go nyü-si wô, Ng-lah yüong ky'i-sing, tseo-c'ih keh-go di-fông; ing-we Yiæ-'o-wô iao mih-diao keh-go dzing-li: dæn-z nyü-si sön z hyiah-yin.

12 箇兩個人等<u>羅得</u>話:「爾蕩頭還有誰來東弗?或者 女婿,或者兒子囡,等凡百城裏所有個,都帶其出箇個地 方。<sup>13</sup> 阿拉要滅掉箇個地方,因為其拉聲響來耶和華個面 前大大個,箇勒耶和華差阿拉滅掉其。」<sup>14</sup> <u>羅得</u>就走出, 等定其囡個女婿話:「爾拉用起身,走出箇個地方,因為 耶和華要滅掉箇個城裏。」但是女婿算是謔言。

<sup>15</sup> T'in liang-ky'i z-'eo, t'in-s ts'e Lo-teh, wô, Ng ky'i-sing, ng ts'i-ts-teng dông-deo læ-tong liang-go nön, hao ta gyi c'ih-ky'i: k'ong-p'ô ng teng dzing-li-go ôh-nyih dô-kô mih-diao. <sup>16</sup> Lo-teh wa nga-nga-ts'i-ts'i, keh-sing nying we-leh Yiæ-'o-wô æ-lin gyi, Ĭa-leh gyi-go siu, teng gyi ts'i-ts lin liang nön-go siu, ling gyi c'ih, en gyi læ dzing-nga.

15 天亮起時候,天使催<u>羅得</u>,話:「爾起身,爾妻子等蕩頭來東兩個囡,好帶其出去,恐怕爾等城裏個惡逆大

家滅掉。」<sup>16</sup> <u>羅得</u>還捱捱瞭瞭,箇星人為了耶和華哀憐 其,拉勒其個手,等其妻子連兩囡個手,領其出,安其來 城外。

Kyi-kying ling gyi-lah c'ih nga-deo, ziu wô, Ng yüong dao-tseo hao pao-djün sing-ming: deo m-nao nyincün k'en, ih-ngæn m-nao deng-leh bing-yiang-li: iao daotao sæn-li, sæn-leh ng we me-diao. <sup>18</sup> Lo-teh teng gyi-lah wô, Dæn-nyün ngô Cü feh z-ka. <sup>19</sup> Næn-kæn Ng nu-boh læ Ng min-zin teh-djoh eng-we, Ng yi-kying fah-c'ih da-dz da-pe peh ngô pao-djün sing-ming: ngô feh neng-keo daotao sæn-li, k'ong-p'ô tsao-djoh tsæ-næn, iao si. 20 Nænkæn keh-go dzing-ts, yi siao yi gying. yüong-yi dao-leh tao, (ky'i-feh-z siao dzing-ts ma?) 'o-feh peh ngô dao-tao keh-deo pao-djün sing-ming. <sup>21</sup> Gyi teng Lo-teh wô, Kehgo z-ken Ngô yia ing-hyü ng; feh we djü-mih ng sô wô go dzing-ts. <sup>22</sup> Ng yüong kw'a-kw'a dao-tao keh-deo: ing-we ng feh-zing tseo-tao, Ngô tso z-ken feh-læ: sô-yi keh-go dzing-ts ming-z kyiao-leh [1]So-r.

17 既經領其拉出外頭,就話:「爾用逃走好保全性命。頭嘸得好扭轉看,一眼嘸得好応勒平垟裏。要逃到山裏,省勒爾會焜掉。」<sup>18</sup> 羅得等其拉話:「但願我主弗是介。<sup>19</sup> 難間爾奴僕來爾面前得着恩惠,爾已經發出大慈大悲撥我保全性命。我弗能夠逃到山裏,恐怕遭着災難,要死。<sup>20</sup> 難間箇個城子,又小又近,容易逃勒到。(豈弗是小城子嗎?)何弗撥我逃到箇頭保全性命。<sup>21</sup> 其等<u>羅得</u>話:「箇個事幹我也應許爾,弗會除滅爾所話個城子。<sup>22</sup> 爾用快快逃到箇頭,因為爾弗曾走到,我做事幹弗來。所以箇個城子名字叫勒瑣珥<sup>[1]</sup>。」

[1]Ziu-z Siao-go, k'en <sup>20</sup> ts'ih. 就是小個,看 <sup>20</sup> 七。

<sup>23</sup> Lo-teh tseo-tsing So-r z-'eo, nyih-deo c'ih-ky'i tsiao-djoh di-yiang. <sup>24</sup> Keh-tsao Yiæ-'o-wô loh liu-wông teng ho læ Sô-to-mô teng Ngo-mo-lah, z Yiæ-'o-wô dzong t'in-li kông-loh-læ-go. <sup>25</sup> Keh-sing dzing-ts, tao-c'ü bing-yiang, dzing-li sô deng-go pah-sing, lin di-t'u-go c'ih-ts'æn long-tsong djü-mih-de.

- 23 <u>羅得</u>走進<u>瑣珥</u>時候,日頭出起照着地垟。<sup>24</sup> 箇遭耶和華落硫磺等火來<u>所多瑪等蛾摩拉</u>,是耶和華從天裏降落來個。<sup>25</sup> 箇星城子,到處平垟,城裏所咸個百姓,連地土個出產攏總除滅了。
- <sup>26</sup> Lo-teh-go ts'i-ts deo nyin-cün ih-k'en, ziu pin-leh yin-go djü-ts.
  - 26 羅得個妻子頭扭轉一看,就變勒鹽個柱子。
- <sup>27</sup> Üô-pah-lah-hen tsao t'in-nyiang lih-ky'i, tao gyi zin-deo lih-læ Yiæ-'o-wô min-zin-go di-fông. <sup>28</sup> Dziao-leh Sô-to-mô Ngo-mo-lah tao-c'ü bing-yiang ih-k'en, k'en-kyin di-yiang-li yiu in c'ong-zông ziang ho-lu-li in ka.
- <sup>27</sup> 亞伯拉罕早天亮立起,到其前頭立來耶和華面前個地方。<sup>28</sup> 朝勒<u>所多瑪 蛾摩拉</u>到處平垟一看,看見地垟裏有煙衝上,像火盧裏煙介。
- <sup>29</sup> Jing-ming mih-diao bing-yiang-li keh-sing dzing-ts z-'eo, kyi-teh Üô-pah-lah-hen: keh-lah se-tsih djü-mih Lo-

teh sô deng-go dzing-ts, yia kyiu Lo-teh c'ih mih-vông-go cong-nyiang.

<sup>29</sup> 神明滅掉平垟裏箇星城子時候,記得<u>亞伯拉罕</u>。箇 勒雖即除滅羅得所咸個城子,也救羅得出滅亡個中央。

<sup>30</sup> Lo-teh dzong So-r tseo-c'ih, teng gyi liang-go nön deng læ sæn-li, ing-we gyi p'ô deng læ So-r; keh-lah teng liang-go nön dô-kô deng læ sæn-ngæn-li. 31 Do-nön teng siao-nön wô, Ah-lah ah-tia yi-kying lao-de, 'en-t'in-'ô yia m-nying teng ah-lah dong-zông tsiao shü-kæn-zông hyiang-fông. <sup>32</sup> Læ, ah-lah we s-teh ah-tia ky'üoh-tsiu, 'eo-deo teng gyi dô-kô kw'eng, hao dzong ah-tia djüncong-tsih-dæ. <sup>33</sup> Keh yia gyi-lah s-teh ah-tia ky'üoh-tsiu: do-nön tseo-tsing teng ah-tia kw'eng: dæn-z gyi z soh-go z-'eo kw'eng, soh-go z-'eo bô-ky'i, ah-tia tu feh teh-cü. 34 Di-nyi nyih do-nön teng siao-nön wô, Ngô zô-nyih yia-tao teng ah-tia kw'eng: læ, kyih-mih yia-tao ah-lah we s-teh gyi tsæ ky'üoh-tsiu: ng yia tseo-tsing teng gyi kw'eng, hao dzong ah-tia djün-cong-tsih-dæ. 35 Keh yia gyi-lah tsæ steh ah-tia kyʻüoh-tsiu: siao-nön yia teng gyi kwʻeng: dænz gyi soh-go z-ʻeo kwʻeng, soh-go z-ʻeo bô-kyʻi, ah-tia tu feh teh-cü. <sup>36</sup> Z-ka Lo-teh liang-go nön dzong ah-tia yiu sing-yüing. <sup>37</sup> Do-nön sang ng-ts, cʻü gyi ming-z Mo-iah, ziu-z næn-kæn Mo-iah keh-dzoh-go tsu-tsong. <sup>38</sup> Siao-nön yia sang ng-ts, cʻü gyi ming-z Bin-üô-mi: ziu-z, næn-kæn Üô-meng keh-dzoh-go tsu-tsong.

30 羅得從瑣珥走出,等其兩個囡庉來山裏,因爲其怕 底來瑣珥。箇勒等兩個囡大家底來山岩裏。<sup>31</sup> 大囡等小囡 「阿拉阿爹已經老了,咸天下也嘸人等阿拉同牀。照 話: 世間上鄉方。32來,阿拉會使得阿爹喫酒,後頭等其大家 睏,好從阿爹傳宗接代。」<sup>33</sup> 箇夜其拉使得阿爹喫酒。大 囡走進等阿爹睏。但是其是啥個時候睏,啥個時候爬起, 阿爹都弗得知。34 第二日大囡等小囡話: 「我昨日夜到等 阿爹睏。來,今末夜到阿拉會使得其再喫酒。爾也走進等 其睏,好從阿爹傳宗接代。」<sup>35</sup> 箇夜其拉再使得阿爹喫 酒。小囡也等其睏。但是其啥個時候睏,啥個時候爬起, 阿爹都弗得知。36是介羅得兩個囡從阿爹有身孕。37大囡

生兒子,取其名字<u>摩押</u>,就是難問<u>摩押</u>箇族個祖宗。<sup>38</sup> 小 囡也生兒子,取其名字<u>便亞米</u>,就是難問<u>亞捫</u>箇族個祖 宗。

### Ts. XX.

Üô-pah-lah-hen dzong keh-deo pun-tao Nen di, denglæ Kyüô-t'ih Shü-r-go cong-nyiang; tæn-koh læ Gyi-lah. <sup>2</sup> Üô-pah-lah-hen ts'ing-hwu gyi ts'i-ts Sah-lah z ah-me: keh-lah Gyi-lah wông Üô-pi-mi-lih ts'a nying ky'i c'ü Sahlah. <sup>3</sup> Üô-pi-mi-lih mong-li, Jing-ming ling-djoh gyi, teng gyi wô, Ng we-leh sô c'ü-go nyü-nying iao si: ing-we gyi z nying-kô ts'i-ts. <sup>4</sup> Dæn-z Üô-pi-mi-lih wa feh-zing teng gyi gying-sing, ziu wô, Cü, Ng yia we mih-diao tsing-dzih-go koh-veng ma? <sup>5</sup> Gyi soh feh-z teng ngô wô z ah-me ma? Nyü-nying yia zi wô, Z ngô-go ah-ko. Ngô tso keh-go z-ken sing jih-dzæ tön-tsing, siu yia kyih-zing-go. <sup>6</sup> Jing-ming læ mong-li teng gyi wô, Z-go, Ngô hyiao-teh ng tso keh-go ng sing z tön-tsing-go; Ngô yia tsu-djü ng sæn-leh ng teh-ze Ngô; keh-lah feh-hyü ng teng keh-go nyü-nying gyingsing. <sup>7</sup> Næn-kæn ng yüong kwe-wæn keh nying go ts'i-ts: gyi z-go sin-cü-nying, we teng ng tao-kao s-teh ng paodjün sing-ming: ziah feh wæn gyi, hao hyiao-teh ng teng væn-pah z ng-go nying tu pih-ding we si. <sup>8</sup> Üô-pi-mi-lih tsao t'in-nyiang ky'i-læ, ziu eo-long gyi-go dzing-ts, pô keh-sing z-ken kông peh gyi-lah t'ing: gyi-lah tu long-do ky'ih-hoh. <sup>9</sup> Üô-pi-mi-lih eo Üô-pah-lah-hen, teng gyi wô, Ng dza-we z-ka tao ah-lah? Ngô yiu soh-go teh-ze ng? Ng do djong-djong ze læ 'æ ngô teng ngô-go ih-koh. Ng z tso feh ing-kæ tso-go z-ken dæ ngô. <sup>10</sup> Üô-pi-mi-lih yi teng Üô-pah-lah-hen wô, Ng yiu soh-go kyin-kyiu tso keh-go zken ni? <sup>11</sup> Üô-pah-lah-hen wô, Ngô ts'eng-ts'eng dông-deo di-fông m-neh p'ô-gyü Jing-ming: k'ong-p'ô we-leh ngô ts'i-ts iao sah-diao ngô. <sup>12</sup> Ing-we gyi jih-dzæ z ngô ah-me; tso ah-tia, koh ah-nyiang; 'eo-deo tso ngô-go ts'i-ts. <sup>13</sup> Jing-ming eo ngô li-k'æ ah-tia oh-li pun-læ-pun-ky'i-go z'eo, ngô teng gyi wô, Ah-lah tsiang-læ ze-bin tseo-tao sohgo di-fông ng hao ts'ing-hwu ngô ah-ko; keh z ng s eng-we tao ngô. <sup>14</sup> Üô-pi-mi-lih pô yiang teng ngeo, nu-boh ô-deo keh-sing song-peh Üô-pah-lah-hen; ping-ts'ia wæn gyi-go ts'i-ts Sah-lah. <sup>15</sup> Üô-pi-mi-lih wô, Næn-kæn ngô-go difông læ ng min-zin: hao ze ng-go sing-siang ky'i deng. <sup>16</sup> Yi teng Sah-lah wô, Ngô do ih-ts'in kw'e nying-ts song ng-go ah-ko; hao peh ng lin ng dong-de-go nying tsô ngæntsing læ cong-nying min-zin, Ka kông, z tsah-vah gyi.

亞伯拉罕從箇頭搬到南地,底來迦鐵、書珥個中央, 耽擱來其臘。<sup>2</sup> 亞伯拉罕稱呼其妻子撒拉是阿妹。箇勒其臘 王亞比米力差人去聚撒拉。<sup>3</sup> 亞比米力夢裏,神明領着其, 等其話:「爾為了所取個女人要死,因為其是人家妻 子。」<sup>4</sup>但是亞比米力還弗曾等其近身,就話:「主,爾也 會滅掉正直個國份嗎?<sup>5</sup> 其啥弗是等我話是阿妹嗎?女人也 自話:『是我個阿哥。』我做箇個事幹心實在端正,手也 潔淨個。」<sup>6</sup> 神明來夢裏等其話:「是個,我曉得爾做箇 個,爾心是端正個。我也阻住爾省勒爾得罪我。箇勒弗許

爾等箇個女人近身。7難間爾用歸還箇人個妻子。其是個先 知人, 會等爾禱告使得爾保全性命。若弗還其, 好曉得爾 等凡百是爾個人,都必定會死。」8亞比米力早天亮起來, 就謳攏其個臣子, 把箇星事幹講撥其拉聽。其拉都弄大喫 惟。<sup>9</sup> 亞比米力謳亞伯拉罕,等其話:「爾咋會是介到阿 拉?我有啥個得罪爾?爾馱重重罪來害我等我個一國。爾 是做弗應該做個事幹待我。」10 亞比米力又等亞伯拉罕 話:「爾有啥個見究做箇個事幹呢?<sup>11</sup> 亞伯拉罕話:「我 付付蕩頭地方嘸得怕懼神明,恐怕為了我妻子要殺掉我。<sup>12</sup> 因為其實在是我阿妹,做阿爹,各阿孃。後頭做我個妻 子。13 神明謳我離開阿爹屋裏搬來搬去個時候,我等其 話: 『阿拉將來隨便走到啥個地方,爾好稱呼我阿哥。箇 是爾賜恩惠到我。』」14 亞比米力把羊等牛,奴僕丫頭箇 星送撥亞伯拉罕,並且還其個妻子撒拉。<sup>15</sup> 亞比米力話: 「難間我個地方來爾面前,好隨爾個心想去底。<sup>16</sup> 又等撒 拉話: 「我馱一千塊銀子送爾個阿哥,好撥爾連爾同隊個

拉話: | 我馱一干塊銀子送爾個阿哥,好撥爾連爾區人遮眼睛來衆人面前,介講,是責罰其。]

<sup>17</sup> Üô-pah-lah-hen ziu tao-kao Jing-ming: Jing-ming i-hao Üô-pi-mi-lih, teng gyi ts'i-ts, lin gyi ô-deo, s-teh gyi-lah we sang-yiang. <sup>18</sup> Ing-we Yiæ-'o-wô we-leh Üô-pah-lah-hen ts'i-ts Sah-lah-go yün-kwu? yi-kying s-teh Üô-pi-mi-lih ih-kô nying feh sang yiang-de.

17 <u>亞伯拉罕</u>就禱告神明。神明醫好<u>亞比米力</u>,等其妻子,連其丫頭,使得其拉會生養。<sup>18</sup> 因為耶和華為了<u>亞伯</u> 拉罕妻子撒拉個緣故,已經使得亞比米力一家人弗生養了。

# Ts. XXI.

Yiæ-'o-wô i gyi-go shih-wô tsiao-kwu Sah-lah, ziu-z tsiao Gyi sô ing-hyü-go tso peh Sah-lah. <sup>2</sup> Ing-we Üô-pah-lah-hen nyin-kyi lao-de, Sah-lah yiu-sing, teng gyi sang ng-ts, tsiao Jing-ming sô ding-go z-'eo. <sup>3</sup> Üô-pah-lah-hen c'ü Sah-lah teng gyi sang-go ng-ts ming-z kyiao-leh Yi-sah.

<sup>4</sup> Sang-loh di-pah nyih Üô-pah-lah-hen i Jing-ming-go feng-fu, teng ng-ts Yi-sah 'ang tsiu-keh-li. <sup>5</sup> Gyi ng-ts Yi-sah sang-go z-'eo Üô-pah-lah-hen nyin-kyi ih-pah shü-de.

耶和華依其個說話照顧<u>撒拉</u>,就是照其所應許個做撥 <u>撒拉</u>。<sup>2</sup> 因為<u>亞伯拉罕</u>年紀老了,<u>撒拉</u>有身,等其生兒子, 照神明所定個時候。<sup>3</sup> <u>亞伯拉罕</u>取<u>撒拉</u>等其生個兒子名字叫 勒<u>以撒</u>。<sup>4</sup> 生落第八日<u>亞伯拉罕</u>依神明個吩咐,等兒子<u>以撒</u> 行周割禮。<sup>5</sup> 其兒子以撒生個時候亞伯拉罕年紀一百歲了。

<sup>6</sup> Sah-lah wô, Jing-ming yi-kying s-teh ngô fah-sio; væn-pah t'ing-meng-go tu we teng ngô dô-kô siao. <sup>7</sup> Yi wô, Jü neng-keo teng Üô-pah-lah-hen wô, Sah-lah we peh ng-ts ky'üoh na ma? Ing-we Üô-pah-lah-hen nyin-kyi lao, ngô we teng gyi sang ng-ts. <sup>8</sup> Keh na-hwun do-ky'i-læ tsah-na-de: Yi-sah tsah-na-go nyih-ts Üô-pah-lah-hen bæn do-ts'æ.

<sup>6</sup> 撒拉話:「神明已經使得我發笑,凡百聽聞個都會等我大家笑。」<sup>7</sup> 又話:「誰能夠等<u>亞伯拉罕</u>話,撒拉會撥兒子喫奶嗎?因為<u>亞伯拉罕</u>年紀老,我會等其生兒子。」<sup>8</sup> 箇奶花大起來摘奶了。以撒摘奶個日子亞伯拉罕辦大餐。

<sup>9</sup> Yiæ-gyih nyü-nying Yüô-kyiah teng Üô-pah-lah-hen sang-go ng-ts hyi-siao gyi: Sah-lah k'en-kyin; <sup>10</sup> ziu teng Üô-pah-lah-hen wô, Ken-c'ih keh-go ô-deo teng gyi ng-ts; ing-we keh ô-deo-go ng-ts pih-ding feh-k'o teng ngô-go ng-ts Yi-sah dô-kô tsih-dæ. <sup>11</sup> Dæn-z Üô-pah-lah-hen weleh ng-ts yün-kwu do-nyiang iu-meng keh-go z-ken.

9 <u>埃及女人夏甲等亞伯拉罕</u>生個兒子嬉笑其。<u>撒拉</u>看見,<sup>10</sup> 就等<u>亞伯拉罕</u>話:「趕出箇個丫頭等其兒子,因為 箇丫頭個兒子必定弗可等我個兒子以<u>撒大</u>家接代。」<sup>11</sup> 但 是亞伯拉罕為了兒子緣故大樣憂悶箇個事幹。

12 Jing-ming teng Üô-pah-lah-hen wô, Ng hao-vong we-leh ng-ts teng ô-deo-go z-ken iu-meng: Sah-lah teng ng sô wô-go, long-tsong hao t'ing gyi: ing-we dzong Yi-sah ka læ-go hao sön ng-go 'eo-dæ. <sup>13</sup> Wa-yiu ô-deo-go ng-ts, ing-we gyi z ng-go 'eo-dæ, Ngô yia we s-teh gyi tso ih-go kohveng. <sup>14</sup> Üô-pah-lah-hen tsao t'in-nyiang lih-ky'i, do-leh ping teng ih bi-dæ shü kao-fu Yüô-kyiah, pe læ kyin-kahdeo, eo gyi ling-leh ng-ts ky'i; Yüô-kyiah ziu dong-sing

tseo-læ-tseo-ky'i læ Bih-z-pô kw'ông-iæ-li. <sup>15</sup> Dæ-li-go shü yüong-wun-de, gyi fông siao-nying læ jü ti-'ô: 16 gyi-zi tseo-ko-ky'i ts'ô ih-tsin lu ka siang-mao, te-deo zo-tænloh, wô, Ngô feh-sô-teh k'en-kyin siao-nying si. Ziu te-deo zo-leh hyiang-hyiang k'oh-ky'i-læ-de. <sup>17</sup> Jing-ming t'ingmeng siao-nying-go sing-hyiang: Jing-ming-go t'in-s dzong t'in-li eo Yüô-kyiah, wô, Yüô-kyiah, ng dza-we z-ka? hao-vong p'ô, ing-we ng-go ng-ts læ keh-deo, gyi singhyiang Jing-ming yi-kying t'ing-meng-de. <sup>18</sup> Ng lih-ky'ilæ, siu tông-leh keh siao-nying; Ngô we s-teh gyi tso do-do koh-veng. 19 Jing-ming k'æ-k'æ Yüô-kyiah ngæn-tsing, k'en-kyin ih-k'eo yiu shü-go tsing, ziu ky'i tsi-mun bi-dæ, peh siao-nying ky'üoh. 20 Jing-ming pao-yiu keh siaonying: gyi do-ky'i-læ, deng-læ kw'ông-iæ di-fông, tso zihtsin go nying. <sup>21</sup> Gyi deng-læ Pô-læn kw'ông-iæ-li: gyi ahnyiang dæ Yiæ-gyih-go nyü-nying peh gyi tso ts'i-ts.

12 神明等<u>亚伯拉罕</u>話:「爾好留為了兒子等丫頭個事 幹憂悶:<u>撒拉</u>等爾所話個,攏總好聽其,因為從<u>以撒</u>介來 個好算爾個後代。<sup>13</sup> 還有丫頭個兒子,因為其是爾個後 代,我也會使得其做一個國份。」14 亞伯拉罕早天亮立 起, 馱勒餅等一皮袋水交付夏甲, 揹來肩胛頭, 謳其領勒 兒子去。夏甲就動身走來走去來別是巴曠野裏。<sup>15</sup> 袋裏個 水用完了,其放小人來樹底下,<sup>16</sup> 其自走過去差一箭路介 相貌, 對頭坐帶落, 話: 「我弗捨得看見小人死。」就對 頭坐勒響響哭起來了。17神明聽聞小人個聲響。神明個天 使從天裏謳夏甲,話:「夏甲,爾咋會是介?好甮怕,因 為爾個兒子來箇頭,其聲響神明已經聽聞了。<sup>18</sup> 爾立起 來,手擋勒箇小人,我會使得其做大大國份。」<sup>19</sup>神明開 開夏甲眼睛,看見一口有水個井,就去齒滿皮袋,撥小人 箭個人。<sup>21</sup> 其 庫來 巴 蘭曠野 裏, 其 阿 孃 抬 埃 及 個 女 人 撥 其 做妻子。

<sup>22</sup> Ka z-'eo Üô-pi-mi-lih teng gyi tsiang-kyüing Fi-koh læ, teng Üô-pah-lah-hen wô, Ng væn-pah sô tso-go z-ken Jing-ming pao-yiu ng. <sup>23</sup> Næn-kæn ts'ing ng dziao Jing-ming vah-tsiu m-nao ky'i-dæ ngô, teng ngô ng-ts seng-ts:

tsih-yiu tsiao ngô ka-go hao-hao dæ ng, ng yia z-ka dæ ngô, teng ng sô tæn-koh-go di-fông. <sup>24</sup> Üô-pah-lah-hen wô, Ngô we vah-tsiu. <sup>25</sup> Üô-pah-lah-hen p'i-bing Üô-pi-mi-lih we-leh tsing-shü-go z-ken, ziu-z Üô-pi-mi-lih-go nu-boh pô-tsin gyi. <sup>26</sup> Üô-pi-mi-lih wô, Jü tso keh-go z-ken, ngô feh teh-cü: ng feh-zing wô hyiang ngô dao: dzih teng-tao kyih-mih ngô wa tsih t'ing-meng. <sup>27</sup> Üô-pah-lah-hen pô yiang teng ngeo song-peh Üô-pi-mi-lih: liang-'ô dô-kô lihiah. <sup>28</sup> Üô-pah-lah-hen do ts'ih-tsah ts'-go siao-yiang fôngleh ih-t'ah di-fông. <sup>29</sup> Üô-pi-mi-lih teng Üô-pah-lah-hen wô, Ng dza-we fông keh ts'ih-tsah ts'-go siao-yiang læ iht'ah di-fông? <sup>30</sup> Gyi wô, Ng dzong ngô-go siu-li tsih-ziu keh ts'ih-tsah ts'-go siao-yiang hao tso te-tsing z ngô gyüih keh-k'eo tsing-go. <sup>31</sup> Sô-yi eo keh di-ming <sup>[1]</sup> Bih-z-pô, ingwe liang-go nying læ keh-deo vah-tsiu ko-de. <sup>32</sup> Z-ka gyilah læ Bih-z-pô lih-iah: Üô-pi-mi-lih teng gyi tsiangkyüing Fi-koh ziu dong-sing kyü Fi-li-z di-fông.

22 介時候亞比米力等其將軍非各來,等亞伯拉罕話: 「爾凡百所做個事幹神明保佑爾。23 難間請爾朝神明罰咒 嘸得好欺待我,等我兒子孫子。只有照我介個好好待爾, 爾也是介待我,等爾所耽擱個地方。」24 亞伯拉罕話: 「我會罰咒。」<sup>25</sup> 亞伯拉罕批評亞比米力為了井水個事 幹,就是亞比米力個奴僕霸佔其。26亞比米力話:「誰做 箇個事幹, 我弗得知。爾弗曾話向我道, 直等到今末我還 只聽聞。」<sup>27</sup> 亞伯拉罕把羊等牛送撥亞比米力。兩下大家 立約。<sup>28</sup> 亞伯拉罕馱七隻雌個小羊放勒一墳地方。<sup>29</sup> 亞比 米力等亞伯拉罕話:「爾咋會放箇七隻雌個小羊來一墳地 方?」30 其話:「爾從我個手裏接受箇七隻雌個小羊好做 對證是我掘箇口井個。」31 所以謳箇地名別是巴[1],因爲 兩個人來箇頭罰咒過了。32是介,其拉來別是巴立約。亞 比米力等其將軍非各就動身歸非利士地方。

- [1] Ziu-z Vah-tsiu-go tsing. 就是罰咒個井。(原註)
- <sup>3</sup> Üô-pah-lah-hen cong jü-moh læ Bih-z-pô, læ kehdeo gyiu-k'eng Yiæ-'o-wô-go ming-deo, keh-we üong-

weh-go Jing-ming. <sup>34</sup> Üô-pah-lah-hen hyü-to nyih-ts tænkoh læ Fi-li-z di-fông.

33 <u>亞伯拉罕</u>種樹木來<u>別是巴</u>,來箇頭求懇耶和華個名頭,箇位永活個神明。<sup>34</sup> <u>亞伯拉罕</u>許多日子耽擱來<u>非利士</u>地方。

### Ts. XXII.

Keh-sing z-ken 'eo-deo Jing-ming s-s Üô-pah-lah-hen, eo gyi wô, Üô-pah-lah-hen! Gyi wô, Ngô læ-tong. <sup>2</sup> Jing-ming wô, Ta-leh ng-go ng-ts, ziu-z ng dzih-din-go doh-yiang ng-ts Yi-sah, tseo-tao Mo-li di-fông ky'i: keh-deo læ Ngô sô ts-tin ng-go sæn, yüong hyin gyi tso væn-tsi.

箇星事幹後頭,神明試試<u>亞伯拉罕</u>,謳其話:「<u>亞伯</u> <u>拉罕</u>!」其話:「我來東。」<sup>2</sup>神明話:「帶勒爾個兒子, 就是爾值鈿個獨養兒子<u>以撒</u>,走到<u>摩利</u>地方去。箇頭來我 所指點爾個山,用獻其做燔祭。」

<sup>3</sup> Üô-pah-lah-hen tsao-t'in-nyiang ky'i-sing, ky'in-leh li-ts, ta liang-go nu-boh teng gyi ng-ts Yi-sah, p'ih-leh hyin-tsi-go za, dong-sing tao Jing-ming ts-tin gyi-go difông ky'i. <sup>4</sup> Tao di-sæn nyih Üô-pah-lah-hen ngæn-tsing dæ-ky'i yün-yün k'en-kyin keh di-fông. <sup>5</sup> Üô-pah-lah-hen teng nu-boh wô, Ng teng li-ts læ dông-deo teng-tong, ngô teng siao-nying iao tao keh-deo ky'i pa-pa, ziu kyü-tao nglah di-fông læ. <sup>6</sup> Üô-pah-lah-hen ziu peh ng-ts Yi-sah peleh hyin-tsi-go za: gyi-zi siu-li do-leh ho teng tao: keh liang-go dô-kô ky'i. <sup>7</sup> Yi-sah teng ah-tia Üô-pah-lah-hen wô, Ngô ah-tia! Gyi wô, Ng-ts, ngô læ-tong. Gyi yi wô, Yiu ho teng za, dæn-z hyin-tsi-go siao-yiang læ 'ah-li? <sup>8</sup> Üôpah-lah-hen wô, Ngô-go ng-ts. Jing-ming we Zi be-bæn siao-yiang hao tso tsi-veh: keh liang-go nying ziu-z-ka dôkô ky'i-de. <sup>9</sup> Tseo-tao Jing-ming sô ts-tin-go di-fông, Üôpah-lah-hen læ keh-deo zao ih-zo dæn, pô za diah-hao-ts, bo-leh ng-ts Yi-sah en-læ dæn-li-go za zông-teng. 10 Üôpah-lah-hen sing-c'ih siu læ, do-leh tao iao sah gyi-go ngts. 11 K'eo-k'eo Yiæ-'o-wô-go t'in-s dzong t'in-li eo gyi, wô, Üô-pah-lah-hen, Üô-pah-lah-hen! Gyi wô, Ngô lætong. <sup>12</sup> Yi wô, M-nao en siu læ siao-nying-go sing-zông, yia m-nao sông-'æ gyi: næn-kæn Ngô hyiao-teh ng z p'ôgyü Jing-ming, ing-we ng-go ng-ts, ziu-z ng doh-yiang ngts, ng yia m-neh feh-sô-teh peh Ngô. <sup>13</sup> Üô-pah-lah-hen ngæn-tsing dæ-ky'i ih-k'en, k'en-kyin 'eo-pe yiu ih-tsah yüong-yiang, gyi-go koh læ jü-vong-li gah-djü-tih: Üô-pahlah-hen tseo-ky'i, k'ô-leh keh-tsah yiang, dæ gyi-go ng-ts hyin-zông tso væn-tsi. <sup>14</sup> Üô-pah-lah-hen ts'ing-hwu keh di-fông [1] "Yiæ-'o-wô yih-læ": tao jü-kying wa wô, Læ Yiæ-'o-wô-go sæn-li k'eo-k'eo yiu be-hao-liao-go.

<sup>3</sup> <u>亚伯拉罕</u>早天亮起身,牽勒驢子,帶兩個奴僕等其兒子<u>以撒</u>,劈勒獻祭個柴,動身到神明指點其個地方去。<sup>4</sup> 到第三日<u>亚伯拉罕</u>眼睛抬起遠遠看見箇地方。<sup>5</sup> <u>亚伯拉罕</u>等奴僕話:「爾等驢子來蕩頭等東,我等小人要到箇頭去拜拜,就歸到爾拉地方來。」<sup>6</sup> <u>亞伯拉罕</u>就撥兒子<u>以撒</u>揹勒獻祭個柴,其自手裏馱勒火等刀,箇兩個大家去。<sup>7</sup> 以撒等阿

爹亞伯拉罕話:「我阿爹!」其話:「兒子,我來東。」 其又話:「有火等柴,但是獻祭個小羊來何裏?」8亞伯拉 罕話:「我個兒子,神明會自備辦小羊好做祭物。」箇兩 個人就是介大家去了。9 走到神明所指點個地方, 亞伯拉罕 來箇頭造一座壇, 把柴疊好仔, 縛勒兒子以撒安來壇裏個 柴上頂。<sup>10</sup> 亞伯拉罕伸出手來, 馱勒刀要殺其個兒子。<sup>11</sup> 扣扣耶和華個天使從天裏謳其,話:「亞伯拉罕,亞伯拉 罕!」其話:「我來東。」12 又話:「嘸得好安手來小人 個身上, 也嘸得好傷害其。難間我曉得爾是怕懼神明, 因 為爾個兒子,就是爾獨養兒子,爾也嘸得弗捨得撥我。」13 亞伯拉罕眼睛抬起一看,看見後背有一隻雄羊,其個角來 樹縫裏軋住的。 亞伯拉罕走去, 抲勒箇隻羊, 代其個兒子 獻上做燔祭。14 亞伯拉罕稱呼箇地方「耶和華葉徠[1]」。 到如今還話:「來耶和華個山裏扣扣有備好料個。」

[1] Ôh-wô Yiæ-'o-wô we yü-be. 或話耶和華會預備。(原註)

<sup>15</sup> Yiæ-'o-wô-go t'in-s di-nyi tsao dzong t'in-li eo Üôpah-lah-hen, <sup>16</sup> wô, Ing-we ng tso keh-go z-ken, m-neh feh-sô-teh ng-go ng-ts, ziu-z ng doh-yiang ng-ts, keh-lah Yiæ-'o-wô wô, Ngô ts-tin Ngô-zi vah-tsiu, <sup>17</sup> Pih-ding we do-nyiang s-foh peh ng, peh ng-go 'eo-dæ meo-meo-zing-zing to-ky'i-læ, ziang t'in-li-go sing-siu, ziang hæ-du-go sô-nyi; ping-ts'ia ng-go 'eo-dæ we teh-djoh ng dziu-dih-go dzing-meng. <sup>18</sup> Wa-yiu t'in-'ô væn-koh we dzong ng-go 'eo-dæ teh-djoh foh-ky'i: ing-we ng yi-kying i Ngô-go 'ao-ling. <sup>19</sup> Keh-tsao Üô-pah-lah-hen cün-læ tao gyi nu-boh di-fông; gyi-lah ziu dô-kô dong-sing tseo-kyü Bih-z-pô: Üô-pah-lah-hen læ Bih-z-pô deng-loh.

15 耶和華個天使第二遭從天裏謳<u>亞伯拉罕</u>, 16 話: 「因為爾做箇個事幹,嘸得弗捨得爾個兒子,就是爾獨養 兒子,箇勒耶和華話:『我指點我自罰咒,<sup>17</sup> 必定會大樣 賜福撥爾,撥爾個後代茂茂盛盛多起來,像天裏個星宿, 像海塗個沙泥。並且爾個後代會得着爾仇敵個城門。<sup>18</sup> 還 有天下萬國會從爾個後代得着福氣,因為爾已經依我個號 令。』」<sup>19</sup> 箇遭亞伯拉罕轉來到其奴僕地方,其拉就大家 動身走歸別是巴。亞伯拉罕來別是巴庵落。 <sup>20</sup> Keh-sing z-ken 'eo-deo yiu nying t'ong-cü Üô-pah-lah-hen wô, Mih-kyüô teng ng ah-ko Nô-ngoh sang ng-ts.
<sup>21</sup> Do ng-ts Wu-s, teng gyi ah-di Pu-s, teng Kyi-meo-li, ziu-z Üô-læn-go ah-tia; <sup>22</sup> Kyi-sih, Ha-so, Pih-dah, Ih-lah, Pe-t'u-li. <sup>23</sup> Pe-t'u-li sang nön Li-pah-kyüô. Keh pah-go ng-ts, tu z Mih-kyüô teng Üô-pah-lah-hen ah-ko Nô-ngoh sô sang-go. <sup>24</sup> Nô-ngoh-go ah-yi, ming-z Liu-mô, yia sang ng-ts, ziu-z Di-pah, Kyüô-'en, Da-'eh, Mô-kyüô.

20 箇星事幹後頭有人通知<u>亞伯拉罕</u>話:「密迦等爾阿哥拿鶴生兒子。<sup>21</sup> 大兒子<u>戶斯</u>,等其阿弟<u>布斯</u>,等基母利,就是亞蘭個阿爹。<sup>22</sup> 基薛、哈瑣、必達、益拉、彼土利。<sup>23</sup> 彼土利生囡利百加。箇八個兒子,都是密迦等亞伯拉罕阿哥拿鶴所生個。<sup>24</sup> 拿鶴個阿姨,名字流瑪,也生兒子,就是提八、迦含、大轄、瑪迦。」

# Ts. XXIII.

Sah-lah go nyin-kyi ih-pah nyiæn-ts'ih shü: keh ziu-z Sah-lah weh-tong-go ziu-shü. <sup>2</sup> Sah-lah si-læ Kyi-lih-üô-pô ziu-z Kyüô-nen di-fông-go Hyi-pah-leng. Üô-pah-lah-hen ziu læ, we-leh Sah-lah æ-t'ong di-k'oh.

<u>撒拉</u>個年紀一百廿七歲,箇就是<u>撒拉</u>活東個壽歲。<sup>2</sup> <u>撒</u> <u>拉死來基列亞巴,就是迦南</u>地方個<u>希伯崙。亞伯拉罕</u>就 來,爲了撒拉哀慟啼哭。

<sup>3</sup> Üô-pah-lah-hen læ gyi si-nying-go min-zin bô-ky'i, teng Heh nying wô, <sup>4</sup> Ngô tæn-koh ng-lah cong-nyiang tso c'ih-meng nying: ts'ing ng peh ngô tso-veng-go di-kyi læ ng-go di-fông, hao tsông ngô-go si-nying, sæn-leh ngô k'en-kyin. <sup>5</sup> Heh nying we-teh Üô-pah-lah-hen teng gyi wô, <sup>6</sup> Ah-lah-go Cü, ts'ing t'ing, Ng læ ah-lah cong-nyiang tso tsing-djong go moh-pah; ng hao læ ah-lah veng-di lihyiang kæn-dzeh ting hao-go, ky'i tsông ng-go si-nying: z ah-lah-go veng-mo, m-nying we kying-djü ng, peh ng hao tsông ng-go si-nying. <sup>7</sup> Üô-pah-lah-hen lih-ky'i-læ, dziaoleh keh di-fông-go pah-sing, ziu-z Heh nying keh-dzoh,

kyi-sing eo-tæn-tao. <sup>8</sup> Teng gyi-lah siang-liang, wô, Ziah-z ng-go i-s k'eng peh ngô tsông si-nying, sæn-leh ngô k'enkyin, ka-ni ts'ing ng t'ing ngô, teng ngô gyiu-k'eng So-'ehgo ng-ts Yi-feh-leng, <sup>9</sup> s-peh ngô gyi din-koh-li Mah-pi-lahgo yüih; tsoh-tsoh t'ing gyi kô-din, peh ngô tso ts'æn-nyih læ ng-go cong-nyiang tso veng-go di. <sup>10</sup> Yi-feh-leng læ Heh nying cong-nyiang zo-tih. Heh-nying keh-dzoh teng vænpah tseo-tsing dzing-meng go tu t'ing-tong. Heh nying Yifeh-leng we-teh Üô-pah-lah-hen wô, <sup>11</sup> Ngô-go Cü, haovong: ts'ing t'ing ng: ngô song ng keh-go din, yia song ng din-li-go yüih; læ ngô pah-sing min-zin song ng: ka-ni, ng hao tsông ng-go si-nying. <sup>12</sup> Üô-pah-lah-hen dziao-leh keh di-fông-go pah-sing kyi-sing eo-tæn-tao. 13 Læ keh pahsing min-zin teng Yi-feh-leng wô, Ng k'eng-go shih-wô, ts'ing t'ing ngô: ngô we peh ng din-kô: ng tsih-ziu-ts, ngô hao læ keh-deo tsông ngô-go si-nying. 14 Yi-feh-leng weteh Üô-pah-lah-hen, wô, <sup>15</sup> Ngô-go Cü, ng ts'ing t'ing: keh-go din dzih s-pah z-k'ah nying-ts: dæn-z ngô teng ng

yiu soh-go kyi-leng ni? ng hao ky'i tsông ng-go si-nying. <sup>16</sup> Üô-pah-lah-hen t'ing Yi-feh-leng; ziu tsiao Yi-feh-leng læ Heh nying min-zin sô wô-go, do-leh k'ah-shông t'ong-'ang-go nying-ts s-pah z-k'ah tsing hao peh gyi.

<sup>3</sup> 亞伯拉罕來其死人個面前爬起,等赫人話: <sup>4</sup>「我耽 擱爾拉中央做出門人。請爾撥我做墳個地基來爾個地方, 好葬我個死人,省勒我看見。」5赫人回答亞伯拉罕,等其 話: 6 「阿拉個主,請聽,爾來阿拉中央做珍重個牧伯,爾 好來阿拉墳地裏向揀擇頂好個,去葬爾個死人。是阿拉個 墳墓, 嘸人會禁除爾, 撥爾好葬爾個死人。」 7 亞伯拉罕立 起來,朝勒箇地方個百姓,就是赫人箇族,肌身傴帶倒。8 等其拉商量,話:「若是爾個意思肯撥我葬死人,省勒我 看見,介呢請爾聽我,等我求懇瑣轄個兒子以弗崙,9賜撥 我其田角裏麥比拉個穴, 足足聽其價鈿, 撥我做產業來爾 個中央做墳個地。」10以弗崙來赫人中央坐的。赫人箇族 等凡百走進城門個都聽從。赫人以弗崙回答亞伯拉罕話: 「我個主,好留。請聽爾,我送爾箇個田,也送爾田裏個 穴,來我百姓面前送爾。介呢,爾好葬爾個死人。」<sup>12</sup> 亞 伯拉罕朝勒箇地方個百姓肌身傴帶倒。<sup>13</sup> 來箇百姓面前等 以弗崙話:「爾肯個說話,請聽我。我會撥爾田價。爾接 受仔,我好來箇頭葬我個死人。」<sup>14</sup> 以弗崙回答亞伯拉 罕,話: <sup>15</sup> 「我個主,爾請聽。箇個田值四百隄喀<sup>[1]</sup>銀子。 但是我等爾有啥個計論呢?爾好去葬爾個死人。」<sup>16</sup> 亞伯 拉罕聽以弗崙,就照以弗崙來赫人面前所話個,馱勒客商 通行個銀子四百隄喀整好撥其。

[1] shekel, 古希伯來重量單位,約 11.25 克

<sup>17</sup> Yi-feh-leng-go din læ Mah-pi-lah, z Mæn-li-go temin, gyi din lin yüih, teng din-li dön-ky'ün-go jü-moh, <sup>18</sup> tu ding-peh Üô-pah-lah-hen tso kyi-nyih, ziu-z Heh nying teng long-tsong tseo-tsing dzing-meng-go nying dô-kô tso te-tsing. <sup>19</sup> Keh-tsao Üô-pah-lah-hen tsông gyi ts'i-ts Sahlah læ Mæn-li te-min, Mah-pi-lah din-li-go yüih. Mæn-li ziu-z Kyüô-nen di-fông-go Hyi-pah-leng. <sup>20</sup> Z-ka Heh nying ding keh-go din lin gyi-go yüih peh Üô-pah-lah-hen tso veng-di-go kyi-nyih.

17 <u>以弗崙</u>個田來<u>麥比拉</u>,是<u>幔利</u>個對面,其田連穴,等田裏團圈個樹木,<sup>18</sup> 都定撥<u>亞伯拉罕</u>做基業,就是<u>赫</u>人等攏總走進城門個人大家做對證。<sup>19</sup> 箇遭<u>亞伯拉罕</u>葬其妻子<u>撒拉來幔利</u>對面,<u>麥比拉</u>田裏個穴。<u>幔利</u>就是<u>迦南</u>地方個<u>希伯崙。<sup>20</sup> 是介赫</u>人定箇個田連其個穴撥<u>亞伯拉罕</u>做墳地個基業。

### Ts. XXIV.

Üô-pah-lah-hen ziu-shü dziang, nyin-kyi lao-de: Yiæ'o-wô yiang-yiang z-ken yi-kying s-foh peh gyi. <sup>2</sup> Üô-pahlah-hen teng gyi oh-li tso tsong-kwun-go lao kô-nying wô,
Ng hao en ng-go siu læ ngô do-t'e-'ô. <sup>3</sup> Ngô s-teh ng ts-tin
keh-we t'in-zông-go Jing-ming, di-'ô-go Jing-ming, Yiæ-'owô, vah-tsiu, ngô deng-læ Kyüô-nen nying cong-nyiang,
gyi-go nön ng feh-k'o we-leh ngô ng-ts dæ gyi tso ts'i-ts. <sup>4</sup>
Ng pih-iao tseo-kyü ngô peng-koh, læ ngô ts'ing-kyün
cong-nyiang teng ngô ng-ts Yi-sah dæ ts'i-ts. <sup>5</sup> Keh kô-

nying teng gyi wô, K'ong-p'ô nyü-nying feh-k'eng keng ngô dông-deo læ; ngô hao ling ng-go ng-ts kyü-tao ng sô tseo-c'ih-go di-fông feh? <sup>6</sup> Üô-pah-lah-hen wô, Ts'in-ding ng m-nao ling ngô ng-ts tsæ kyü keh-deo ky'i. <sup>7</sup> T'in-zônggo Jing-ming Yiæ-'o-wô ziu-z ling ngô c'ih ah-tia oh-li ts'ing-kyün-go di-fông, teng ngô kông, yi teng ngô vahtsiu, wô, Ngô we pô keh-go di-fông s-peh ng-go 'eo-dæ Gyi we ts'a Gyi t'in-s læ ng min-zin ky'i, s-teh ng hao dzong keh-deo teng ngô ng-ts dæ ts'i-ts. <sup>8</sup> Ziah-z nyü-nying fehk'eng keng ng læ, ka-ni ngô eo ng vah-go tsiu feh-yü ng siang-ken; tsih-z m-nao ling ngô ng-ts tsæ kyü keh-deo kyʻi. <sup>9</sup> Keh kô-nying en siu læ gyi cü-nying-kô Üô-pah-lahhen do-t'e-'ô, tsiao gyi-go shih-wô teng gyi vah-tsiu.

亞伯拉罕壽歲長,年紀老了。耶和華樣樣事幹已經賜福撥其。<sup>2</sup> 亞伯拉罕等其屋裏做總管個老家人話:「爾好安爾個手來我大腿下。<sup>3</sup> 我使得爾指點箇位天上個神明,地下個神明,耶和華,罰咒,我底來<u>迦南</u>人中央,其個囡,爾弗可為了我兒子抬其做妻子。<sup>4</sup> 爾必要走歸我本國,來我親

卷中央等我兒子<u>以撒</u>抬妻子。」<sup>5</sup> 箇家人等其話:「恐怕女人弗肯跟我蕩頭來,我好領爾個兒子歸到爾所走出個地方弗?」<sup>6</sup> 亞伯拉罕話:「千定爾嘸得好領我兒子再歸箇頭去。<sup>7</sup> 天上個神明耶和華,就是領我出阿爹屋裏,親眷個地方,等我講,又等我罰咒,話:『我會把箇個地方賜撥爾個後代。其會差其天使來爾面前去,使得爾好從箇頭等我兒子抬妻子。』<sup>8</sup> 若是女人弗肯跟爾來,介呢我謳爾罰個咒弗與爾相干,只是嘸得好領我兒子再歸箇頭去。」<sup>9</sup> 箇家人安手來其主人家亞伯拉罕大腿下,照其個說話等其罰咒。

<sup>10</sup> Keh kô-nying su-djông cong-kwun cü-nying-kô-go kô-kyi, ziu dzong cü-nying-kô-go loh-do li-hyiang kæn jihtsah loh-do ky'i, dong-sing tao Mi-sô-po-da-mi, Nô-ngohgo dzing-li. <sup>11</sup> Yia-kw'a, nyü-nying tseo-c'ih tang-shü-go z'eo, kô-nying peh keh-sing loh-do gyü-leh dzing-nga, ih-k'eo tsing pin-yin. <sup>12</sup> Gyi wô, Yiæ-'o-wô ngô cü-nying-kô Üô-pah-lah-hen-go Jing-ming, gyiu Ng kyih-mih tô-hwô ngô z-ken dzing-kong, s eng-we peh ngô cü-nying-kô Üô-pah-lah-hen. <sup>13</sup> Ngô yin-dzæ lih-læ tsing pin-yin, dzing-li

nying-go nön tseo-c'ih-læ tang-shü. <sup>14</sup> Ngô ziah teng ih-go do-kwu-nyiang wô, Ts'ing ng, fông-leh bing peh ngô ky'üoh: gyi ziah wô, Ng-zi hao ky'üoh, ngô yia we tang-shü peh ng loh-do ky'üoh, ka-ni gyi z Ng zin-deo ding-hao peh Ng nu-boh Yi-sah-go: ngô ziu hao hyiao-teh Ng s eng-we peh ngô cü-nying-kô de.

10 箇家人素常總管主人家個家計,就從主人家個駱駝 裏向揀十隻駱駝去,動身到<u>米所波大米</u>,拿鶴個城裏。<sup>11</sup> 夜快,女人走出打水個時候,家人撥箇星駱駝跪勒城外, 一口井邊沿。<sup>12</sup> 其話:「耶和華我主人家<u>亞伯拉罕</u>個神明,求爾今末朵化<sup>[1]</sup>我事幹成功,賜恩惠撥我主人家<u>亞伯拉罕</u>。 13 我現在立來井邊沿,城裏人個囡走出來打水。<sup>14</sup> 我若等一個大姑娘話:『請爾,放勒瓶撥我喫。』其若話:『爾自好喫,我也會打水撥爾駱駝喫。』介呢其是爾前頭定好撥爾奴僕<u>以撒</u>個。我就好曉得爾賜恩惠撥我主人家了。」

[1] 賜福; 保佑

<sup>15</sup> Shih-wô feh-zing kông-hao, k'eo-k'eo Li-pah-kyüô, kyin-kah-deo pe-leh bing tseo-c'ih-læ: gyi z Üô-pah-lahhen ah-ko Nô-ngoh-go ts'i-ts Mih-kyüô-go ng-ts Pe-t'u-li sô sang-go nön. 16 Gyi siang-mao ting hao-k'en, wa z dong-nyü, m-neh kô nying-ko: gyi tseo-loh tsing-li, bing tang-mun-ts tseo-zông-læ. <sup>17</sup> Kô-nying peng-long-ky'i nying-tsih gyi, wô, Ts'ing ng do-tin bing-li-go shü peh ngô ky'üoh. 18 Gyi wô, Ngô-go cü, ng ts'ing ky'üoh: ziu kw'a kw'a fông-leh bing læ siu-li peh gyi ky'üoh. 19 Peh gyi ky'üoh-hao-ts, do-kwu-nyiang yi wô, Ngô yia we tang-shü peh ng loh-do ky'üoh, teng-tao gyi-lah ky'üoh shôngkw'a. <sup>20</sup> Gyi ziu kw'a-kw'a pô bing-li-go shü tao-læ zao-li, yi peng-tao tsing-li tang-shü, z we-leh keh-sing loh-do tang-go. <sup>21</sup> Keh-go nying ts'ing-ting k'en gyi, feh-sing fehhyiang, iao hyiao-teh Yiæ-'o-wô ko-jün s-peh gyi ih-lu jing-liu feh. <sup>22</sup> Keh-dziao loh-do ky'üoh-hao-ts, keh-go nying do-leh kying-ts bih-ky'ün ih-tsah, djong pun z-k'ah, wa-yiu kying-ts siu-gyüoh ih-te, djong jih-go z-k'ah, <sup>23</sup> wô,

Ng z jü-go nön, ts'ing ng wô hyiang ngô dao: ng ah-tia ohli yiu k'ong-oh hao peh ah-lah deng-soh feh? <sup>24</sup> Dong-nyü teng gyi wô, Ngô z Mih-kyüô sang-peh Nô-ngoh-go ng-ts Pe-t'u-li-go nön. <sup>25</sup> Yi teng gyi wô, Ah-lah oh-li ts'ao-liao tu yiu, yia yiu deng-soh-go di-fông. <sup>26</sup> Keh-go nying ziu deo eo-tæn-tao pa-pa Yiæ-'o-wô, <sup>27</sup> Z-ka wô, To-zia Yiæ-'owô, ngô cü-nying-kô Üô-pah-lah-hen-go Jing-ming, feh-we ts'o-loh Gyi-go eng-we dzing-jih tao ngô cü-nying-kô: ng læ lu-zông Yiæ-'o-wô ling ngô tao ngô cü-nying-kô hyüong-di-go oh-li. <sup>28</sup> Keh-go dong-nyü peng-ky'i, pô kehsing z-ken, t'ong-cü ah-nyiang oh-li-go nying.

15 說話弗曾講好,扣扣<u>利百加</u>,肩胛頭揹勒瓶走出來。其是<u>亞伯拉罕阿哥拿鶴</u>個妻子密迦個兒子彼土利所生個囡。<sup>16</sup> 其相貌頂好看,還是童女,嘸得嫁人過。其走落井裏,瓶打滿仔走上來。<sup>17</sup> 家人奔攏去迎接其,話:「請爾馱點瓶裏個水撥我喫。」<sup>18</sup> 其話:「我個主,爾請喫。」就快快放勒瓶來手裏撥其喫。<sup>19</sup> 撥其喫好仔,大姑娘又話:「我也會打水撥爾駱駝喫,等到其拉喫爽快。」<sup>20</sup>

其就快快把瓶裏個水倒來槽裏,又奔到井裏打水,是為了 箇星駱駝打個。<sup>21</sup> 箇個人清盯看其,弗聲弗響,要曉得耶 和華果然賜撥其一路順流弗。22 箇潮駱駝喫好仔, 箇個人 馱勒金子鼻圈一隻,重半堤喀,還有金子手鐲一對,重十 個是喀,23話:「爾是誰個囡,請爾話向我道。爾阿爹屋 裏有空屋好撥阿拉庉宿弗?」24 童女等其話: 「我是密迦 生撥拿鶴個兒子彼土利個囡。」25 又等其話: 「阿拉屋裏 草料都有,也有庉宿個地方。」26 箇個人就頭傴帶倒拜拜 耶和華, 27 是介話:「多謝耶和華,我主人家亞伯拉罕個 神明, 弗會錯落其個恩惠誠實到我主人家。爾來路上耶和 華領我到我主人家兄弟個屋裏。」28 箇個童女奔起,把箇 星事幹, 通知阿孃屋裏個人。

<sup>29</sup> Li-pah-kyüô yiu ih-go hyüong-di ming-z kyiao-leh Lah-pæn: Lah-pæn peng-ky'i tao keh-go nying sô læ-kængo tsing pin-yin. <sup>30</sup> Gyi k'en-kyin bih-ky'ün, teng gyüoh-ts læ gyi tsi-me-go siu-li, yia t'ing-meng tsi-me Li-pah-kyüô wô, Keh-go nying z-ka wô hyiang ngô dao, gyi ziu tseo-tao keh-go nying di-fông ky'i, p'ong-djoh gyi wa læ tsing pin-

yin, teng loh-do dô-kô lih-kæn. <sup>31</sup> Lah-pæn wô, Yiæ-'o-wô sô s-foh-go nying, ts'ing tseo-tsing-læ; dza-we lih-læ nga-deo ni? Ngô yi-kying be-bæn oh-lô teng loh-do deng-go difông.

<sup>29</sup> 利百加有一個兄弟名字叫勒拉班。拉班奔起到箇個人所來間個井邊沿。<sup>30</sup> 其看見鼻圈,等鐲子來其姊妹個手裏,也聽聞姊妹<u>利百加</u>話:「箇個人是介話向我道。」其就走到箇個人地方去,碰着其還來井邊沿,等駱駝大家立間。<sup>31</sup> 拉班話:「耶和華所賜福個人,請走進來,咋會立來外頭呢?我已經備辦屋落等駱駝庉個地方。」

<sup>32</sup> Keh-go nying ziu tseo-tsing oh-li. Lah-pæn ka-leh loh-do pe-go tong-si, do ts'ao-liao ü loh-do, yi do-leh shü gyiang keh nying-go kyiah teng keng-dzong nying-go kyiah. <sup>33</sup> Yi pa ky'üoh-zih læ gyi min-zin peh gyi ky'üoh: dæn-z gyi wô, Ngô feh-zing kông zi-go læ-i, feh we ky'üoh. Lah-pæn wô, Ng ts'ing kông. <sup>34</sup> Gyi wô, Ngô z Üô-pah-lah-hen-go kô-nying. <sup>35</sup> Yiæ-'o-wô yi-kying do-nyiang tô-hwô ngô cü-nying-kô, s-teh gyi we hying-wông, yi s-peh gyi

ngeo, yiang, kying-ts, nying-ts, nu-boh, ô-deo, loh-do, lits, keh-sing. <sup>36</sup> Ngô cü-nying-kô-go ts'i-ts Sah-lah nyin-kyi lao-lao sang ng-ts peh ngô cü-nying-kô: cü-nying-kô vænpah sô yiu-go, tu z kao-fu gyi. <sup>37</sup> Ngô cü-nying-kô eo ngô vah-tsiu, wô, Ngô deng-tong Kyüô-nen di-fông nying-go nön ng feh-k'o teng ngô ng-ts dæ gyi tso ts'i-ts. 38 Ng pihiao tseo-kyü ngô ah-tia oh-li, læ ngô zi-kô-nying congnyiang teng ngô ng-ts dæ ts'i-ts. 39 Ngô teng cü-nying-kô wô, K'ong-p'ô nyü-nying feh-k'eng keng ngô læ? 40 Gyi teng ngô wô, Ngô sô voh-z-go Yiæ-'o-wô we ts'a Gyi-go t'in-s dong-de ky'i, s-teh ng lu-zông jing-liu; ng pih ding dzong ng ah-tia oh-li zi-kô-nying cong-nyiang teng ngô ngts dæ ts'i-ts. 41 Ziah-z ng tao-leh ngô zi-kô-nying di-fông, ka-ni ngô eo ng vah-go tsiu feh-yü ng siang-ken: ziah-z gyi-lah feh-k'eng peh ng, ka-ni ngô eo ng vah-go tsiu fehyü ng siang-ken. <sup>42</sup> Ngô kyih-mih-ts tao-leh tsing pin-yin, zi wô, Yiæ-'o-wô, Ngô cü-nying-kô Üô-pah-lah-hen-go Jing-ming! Ng ziah yin-dzæ s-teh ngô tseo-go lu jing-liu: <sup>43</sup> ngô lih-læ tsing pin-yin p'ong-djoh do-kwu-nyiang læ tang-shü; ngô we teng gyi wô, Ts'ing ng do-tin bing-li-go shü peh ngô ky'üoh; 44 ziah-z gyi teng ngô wô, Ng-zi hao ky'üoh, ngô yia we tang-shü peh ng loh-do ky'üoh; keh-go nyü-nying ziu-z Yiæ-'o-wô zin-deo sô ding-hao peh ngô cü-nying-kô ng-ts-go. <sup>45</sup> Ngô sing-li wa feh-zing kông-wun, k'eo-k'eo Li-pah-kyüô kyin-kah-deo pe-leh bing c'ih-læ: tseo-loh tao tsing-pin tang-shü: ngô teng gyi wô, Ts'ing ng peh ngô ky'üoh. 46 Gyi ziu kw'a-kw'a kyin-kah-deo-go bing fông-loh, wô, Ts'ing ky'üoh; ngô yia we peh ng lohdo ky'üoh: ngô ziu ky'üoh-de: gyi yia peh loh-do ky'üohde. 47 Ngô meng gyi wô, Ng z jü-go nön? Gyi wô, Ngô z Mih-kyüô sang-peh Nô-ngoh-go ng-ts Pe-t'u-li-go nön: ngô ziu pô ky'ün fông læ gyi bih-deo-kwun, gyüoh-ts læ gyi siu-li. <sup>48</sup> Ngô deo eo-tæn-tao, pa-pa Yiæ-'o-wô; coh-tsæn ngô cü-nying-kô Üô-pah-lah-hen-go Jing-ming Yiæ-'o-wô, we ying-dao ngô tsing-lu, hao dæ cü-nying-kô hyüong-digo nön peh gyi-go ng-ts. <sup>49</sup> Næn-kæn Ng ziah-z hao-hao tsing-sing tao ngô cü-nying-kô, ka-ni wô hyiang ngô dao; feh z-ka, yia wô hyiang ngô dao, s-teh ngô k'o-yi jing-siu-pin ky'i, 'ôh-tsia tsia-siu-pin ky'i.

32 箇個人就走進屋裏。拉班解勒駱駝揹個東西, 馱草 料餵駱駝,又馱勒水滰箇人個腳等跟從人個腳。33又擺喫 食來其面前撥其喫。但是其話:「我弗曾講自個來意,弗 會喫。」拉班話:「爾請講。」34 其話:「我是亞伯拉罕 個家人。35 耶和華已經大樣朵化我主人家, 使得其會興 旺, 又賜撥其牛、羊、金子、銀子、奴僕、丫頭、駱駝、 驢子箇星。36 我主人家個妻子撒拉年紀老老生,兒子撥我 主人家。主人家凡百所有個,都是交付其。37 我主人家謳 我罰咒,話:『我 庫 迦南地方人個囡,爾弗可等我兒子 抬其做妻子。<sup>38</sup> 爾必要走歸我阿爹屋裏,來我自家人中央 等我兒子抬妻子。39 我等主人家話: 「恐怕女人弗肯跟我 來?」40 其等我話:「我所服侍個耶和華會差其個天使同 隊去, 使得爾路上順流, 爾必定從爾阿爹屋裏自家人中央 等我兒子抬妻子。41 若是爾到了我自家人地方,介呢,我 謳爾罰個咒弗與爾相干, 若是其拉弗肯撥爾, 介呢, 我謳

爾罰個咒弗與爾相干。42 我今末仔到了井邊沿,自話: 『耶和華,我主人家亞伯拉罕個神明!爾若現在使得我走 個路順流。<sup>43</sup> 我立來并邊沿碰着大姑娘來打水,我會等其 話:「請爾馱點瓶裏個水撥我喫」,44 若是其等我話: 「爾自好喫,我也會打水撥爾駱駝喫。」 箇個女人就是耶 和華前頭所定好撥我主人家兒子個。』45 我心裏還弗曾講 完, 扣扣利百加肩胛頭揹勒瓶出來。走落到井邊打水。我 等其話:『請爾撥我喫。』46 其就快快肩胛頭個瓶放落, 話: 『請喫,我也會撥爾駱駝喫。』我就喫了,其也撥駱 駝喫了。<sup>47</sup> 我問其話: 『爾是誰個囡?』其話: 『我是密 迦生撥拿鶴個兒子彼土利個囡。』我就把圈放來其鼻頭 管, 鐲子來其手裏。48 我頭傴帶倒, 拜拜耶和華, 祝讚我 主人家亞伯拉罕個神明耶和華,會引導我正路,好抬主人 家兄弟個囡撥其個兒子。<sup>49</sup> 難間爾若是好好眞心到我主人 家,介呢話向我道,弗是介,也話向我道,使得我可以順 手邊去,或者借手邊去。」

<sup>50</sup> Lah-pæn teng Pe-t'u-li we-teh, z-ka wô, Keh-go zken dzong Yiæ-'o-wô ka læ: ah-lah feh neng-keo wô z teng feh-z. <sup>51</sup> Ng k'en, Li-pah-kyüô læ ng min-zin: hao ta-leh gyi ky'i, peh ng cü-nying-kô ng-ts tso ts'i-ts, tsiao Yiæ-'owô-go feng-fu. <sup>52</sup> Üô-pah-lah-hen-go kô-nying t'ing-meng gyi-lah shih-wô, ziu boh-tao di-yiang-li, pa-pa Yiæ-'o-wô. Kô-nying do-c'ih kying-nying-go siu-sih teng i-zông keh-sing, song-peh Li-pah-kyüô; wa-yiu pao-pe tong-si song gyi hyüong-di teng ah-nyiang. <sup>54</sup> Gyi teng keng gyigo nying ky'üoh-ky'üoh hah-hah, soh-ko yia; t'in-nyiang bô-ky'i, gyi ziu wô, Hao peh ngô kyü cü-nying-kô di-fông ky'i <sup>55</sup> Li-pah-kyüô hyüong-di teng ah-nyiang wô, Hao peh do-kwu-nyiang teng ah-lah læ-tong kyi-nyih, ting siao jihnyih; 'eo-deo hao ky'i z-de. <sup>56</sup> Gyi z-ka wô, M-nao tsu-djü ngô, ing-we Yiæ-'o-wô s-teh ngô lu-zông ka jing-liu: ts'ing ng, peh ngô kyü cü-nying-kô di-fông ky'i. <sup>57</sup> Gyi-lah wô, Ah-lah we eo do-kwu-nyiang læ, meng-meng gyi k'en. <sup>58</sup> Ziu eo Li-pah-kyüô, teng gyi wô, Ng dzing-nyün teng kehgo nying dô-kô ky'i feh? Gyi wô, Dzing-nyün-go. <sup>59</sup> Gyi-lah ziu song tsi-me Li-pah-kyüô lin gyi ah-bu, wa-yiu Üô-pahlah-hen-go kô-nying, teng keng gyi-go nying dô-kô ky'i. <sup>60</sup> Yi coh-foh peh Li-pah-kyüô, z-ka wô, Ng z ah-lah go tsi-me; dæn-nyün ng tso ts'in-væn nying-go ah-nyiang ng-go 'eo-dæ teh-djoh dziu-dih-go dzing-meng.

50 拉班等彼土利回答,是介話:「箇個事幹從耶和華 介來,阿拉弗能夠話是等弗是。<sup>51</sup> 爾看,利百加來爾面 前。好帶勒其去, 撥爾主人家兒子做妻子, 照耶和華個吩 咐。」<sup>52</sup> 亞伯拉罕個家人聽聞其拉說話,就伏倒地垟裏, 拜拜耶和華。53家人馱出金銀個首飾等衣裳箇星,送撥利 百加,還有寶貝東西送其兄弟等阿孃。54 其等跟其個人喫 喫喝喝, 宿過夜。天亮爬起, 其就話: 「好撥我歸主人家 地方去。」55 利百加兄弟等阿孃話:「好撥大姑娘等阿拉 來東幾日,頂少十日,後頭好去是了。」56 其是介話: 「 無得好阻住我, 因為耶和華使得我路上介順流。請爾, 撥我歸主人家地方去。」<sup>57</sup> 其拉話: 「阿拉會謳大姑娘 來,問問其看。」58就謳利百加,等其話:「爾情願等箇 個人大家去弗?」其話:「情願個。」59 其拉就送姊妹利 百加連其阿哺, 還有亞伯拉罕個家人, 等跟其個人大家 去。<sup>60</sup> 又祝福撥<u>利百加</u>,是介話:「爾是阿拉個姊妹,但 願爾做千萬人個阿孃,爾個後代得着仇敵個城門。」

<sup>61</sup> Li-pah-kyüô teng keh-sing Ô-deo dong-sing, gyi-leh loh-do, keng-leh kô-nying: kô-nying ziu ling-leh Li-pahkyüô ky'i. 62 Yi-sah deng-læ Nen-pin di-fông; dzong Bihlah-hæ-læ keh-da lu ka læ. <sup>63</sup> Yia-kw'a Yi-sah tseo-c'ih tao din-li, [1]iao s-ts'eng, k'eo-k'eo ngæn-tsing dæ-ky'i, k'enkyin keh-sing loh-do læ-de. <sup>64</sup> Li-pah-kyüô ngæn-tsing dæ-ky'i, k'en-kyin Yi-sah, ziu t'iao-loh loh-do. <sup>65</sup> Gyi meng kô-nying, wô, Din-li læ-kæn tseo, læ nying-tsih ahlah-go, keh-go nying z jü? Kô-nying wô, Z ngô cü-nying-kô. Li-pah-kyüô ziu do-leh siu-p'ao tsô zi-go min-k'ong. 66 Kônying pô gyi sô tso-go z-ken tu t'ong-cü Yi-sah. <sup>67</sup> Yi-sah ling-leh Li-pah-kyüô tseo-tsing ah-nyiang Sah-lah-go tsiang-bong-li, dæ gyi tso ts'i-ts; ping-ts'ia æ-sih gyi: dzong ah-nyiang si ts-'eo Yi-sah keh-tsao teh-djoh en-wede.

[1] Ôh-wô, tao-kao. 或話禱告。(原註)

### Ts. XXV.

Üô-pah-lah-hen yi dæ ih-go ts'i-ts, ming-z kyiao-leh Kyi-tu-lah. <sup>2</sup> Gyi teng Üô-pah-lah-hen sang Sing-læn, Iah-sæn, Mi-dæn, Mi-din, Ih-pah, Shü-üô. <sup>3</sup> Iah-sæn sang Z-pô

teng Ti-dæn. Ti-dæn-go ng-ts Üô-shü-li, Li-tu-z, Li-u-mi. <sup>4</sup> Mi-din-go ng-ts Yi-fah, Yi-feh, Ha-noh, Üô-pi-da, Yi-lah-da. Keh tu z Kyi-tu-lah-go ts-seng.

亞伯拉罕又抬一個妻子,名字叫勒<u>基都拉</u>。<sup>2</sup> 其等<u>亞伯</u> 拉罕生心蘭、約珊、米但、米甸、盆八、書亞。<sup>3</sup> 約珊生示 巴等底但。底但個兒子亞書利、利都是、利烏米。<sup>4</sup> 米甸個 兒子以法、以弗、哈諾、亞比大、以拉大。箇都是<u>基都拉</u> 個子孫。

<sup>5</sup> Üô-pah-lah-hen pô gyi sô yiu-go long-tsong peh Yisah. Dæn-z Üô-pah-lah-hen weh-tong-go z-'eo, gyi yia pô tong-si peh keh-sing ah-yi-go ng-ts, ts'a gyi-lah li-k'æ ng-ts Yi-sah tong-pun-pin ka ky'i, tao tong-pin-go di-fông. <sup>7</sup> Üô-pah-lah-hen weh-tong-go nyih-ts, gyi nyin-kyi ih-pah ts'ih-jih-ng shü. <sup>8</sup> Üô-pah-lah-hen yiu-foh yiu-ziu, nyin-kyi lao dön-ky'i si-de, kyü gyi-zi-go dzoh-veng. <sup>9</sup> Gyi-go ng-ts Yi-sah teng Yi-jih-mô-li tsông gyi læ Mæn-li te-min, Mah-pi-lah-go yüih, ziu-z Heh nying So-'eh-go ng-ts Yi-feh-leng-go din-li; <sup>10</sup> Z Üô-pah-lah-hen hyiang Heh nying ma-

go din læ keh-deo Üô-pah-lah-hen teng gyi ts'i-ts Sah-lah tsông-kæn.

<sup>5</sup> 亞伯拉罕把其所有個攏總撥以撒。但是亞伯拉罕活東個時候,其也把東西撥箇星阿姨個兒子,差其拉離開兒子以撒東半邊介去,到東邊個地方。<sup>7</sup> 亞伯拉罕活東個日子,其年紀一百七十五歲。<sup>8</sup> 亞伯拉罕有福有壽,年紀老斷氣死了,歸其自個族份。<sup>9</sup> 其個兒子以撒等以實瑪利葬其來幔利對面,<u>麥比拉</u>個穴,就是<u>赫人</u>瑣轄個兒子以弗崙個田裏,<sup>10</sup> 是亞伯拉罕向赫人買個田來箇頭,亞伯拉罕等其妻子撒拉葬間。

- <sup>11</sup> Üô-pah-lah-hen si ts-'eo Jing-ming s-foh peh gyi ng-ts Yi-sah; Yi-sah deng-læ Bih-lah-hæ-læ siang-gying.
- 11 <u>亞伯拉罕</u>死之後,神明賜福撥其兒子<u>以撒</u>,<u>以撒</u>庵 來別拉海萊相近。
- <sup>12</sup> Sah-lah-go ô-deo, Yiæ-gyih nyü-nying Yüô-kyiah sang-peh Üô-pah-lah-hen-go ng-ts Yi-jih-mô-li, gyi shü-dæ læ 'ô-veng. <sup>13</sup> Yi-jih-mô-li keh-sing ng-ts-go ming-z tsiao

gyi-lah ming-z, i gyi-lah-go shü-dæ ziu-z: Yi-jih-mô-li do ng-ts Nyi-bæ-yiah, wa-yiu Kyi-dah, Iah-bih, Mih-sæn, <sup>14</sup> Mih-nô, T'u-m, Mô-sah, <sup>15</sup> Ha-dah, Di-mô, Ih-toh, Nô-fi-jih, Gyi-ti-mô. <sup>16</sup> Keh-sing z Yi-jih-mô-li-go ng-ts, z gyi-lah-go ming-z, tsiao gyi-go hyiang-ts'eng, gyi-go za-kyi, tso gyi koh-kô jih-nyi-go moh-pah. <sup>17</sup> Yi-jih-mô-li-go ziu-shü ih-pah sæn-jih-ts'ih shü, dön-ky'i si-de, kyü gyi-zi-go dzoh-cong. <sup>18</sup> Gyi-lah deng-go di-fông dzong Ha-fi-lah tao Yiæ-gyih siang-gying-go Shü-r, tao Üô-jih ky'i keh-da lu: keh-go di-fông læ gyi cong hyüong-di-go min-zin.

12 撒拉個丫頭, 埃及女人夏甲生撥亞伯拉罕個兒子以 實瑪利, 其世代來下文。<sup>13</sup> 以實瑪利箇星兒子個名字照其 拉名字, 依其拉個世代就是: 以實瑪利大兒子尼徘藥, 還 有基達、押別、密衫、<sup>14</sup> 密挪、土姆、瑪撒、<sup>15</sup> 哈達、提 瑪、益督、拿非實、其底瑪。<sup>16</sup> 箇星是以實瑪利個兒子, 是其拉個名字, 照其個鄉村, 其個寨基, 做其國家十二個 牧伯。<sup>17</sup> 以實瑪利個壽歲一百三十七歲, 斷氣死了, 歸其 自個族種。<sup>18</sup> 其拉庉個地方從<u>哈腓拉到埃及</u>相近個<u>書珥</u>,到亞述去箇埭路。箇個地方來其衆兄弟個面前。

<sup>19</sup> Üô-pah-lah-hen ng-ts Yi-sah shü-dæ læ 'ô-veng. Üô-pah-lah-hen sang Yi-sah. <sup>20</sup> Yi-sah s-jih shü dæ Li-pahkyüô, z Pô-t'æn-üô-læn di-fông Üô-læn nying Pe-t'u-li-go nön, Üô-læn nying Lah-pæn-go tsi-me. <sup>21</sup> Yi-sah we-leh ts'i-ts feh sang, dæ gyi tao-kao Yiæ-'o-wô: Yiæ-'o-wô cing gyi-go tao-kao, peh gyi ts'i-ts Li-pah-kyüô ziu-t'æ. <sup>22</sup> T'æ li-hyiang-go ng-ts tsang-zao: ah-nyiang wô, Keh z-ken, ngô dza-we z-ka? ziu ky'i meng Yiæ-'o-wô. 23 Yiæ-'o-wô teng gyi wô, Yiu liang-go koh-veng læ ng t'æ-li; yiu liang-yiang pah-sing we dzong ng du-bi feng-c'ih-læ: keh-go pah-sing we gyiang-jü keh ih-go pah-sing: do-go we voh-z gyi siaogo.

19 <u>亞伯拉罕</u>兒子<u>以撒</u>世代來下文。<u>亞伯拉罕</u>生<u>以撒</u>。 20 <u>以撒</u>四十歲抬<u>利百加</u>,是<u>巴坦亞蘭</u>地方,<u>亞蘭人彼土利</u> 個囡,<u>亞蘭人拉班</u>個姊妹。<sup>21</sup> <u>以撒</u>為了妻子弗生,代其禱 告耶和華。耶和華准其個禱告,撥其妻子<u>利百加</u>受胎。<sup>22</sup> 胎裏向個兒子爭造,阿孃話:「箇事幹,我咋會是介?」 就去問耶和華。<sup>23</sup> 耶和華等其話:「有兩個國份來爾胎 裏,有兩樣百姓會從爾肚皮分出來。箇個百姓會強如箇一 個百姓,大個會服侍其小個。」

<sup>24</sup> Teng sang-ts'æn nyih-ts tao, gyi-go t'æ-li z shông-sang. <sup>25</sup> Deo ih-go sang-c'ih 'en-kyi-sing 'ong-'ong-go, ziang yiu bi-ao c'ün-tih ka: gyi-lah c'ü gyi ming-z <sup>[1]</sup>Yi-sao. <sup>26</sup> 'Eo-deo gyi ah-di sang-c'ih, siu nyiah-leh Yi-sao-go kyiah-'eo-keng, ziu c'ü gyi ming-z <sup>[2]</sup>Yüô-koh: gyi sang-go z-'eo Yi-sah nyin-kyi loh-jih shü. <sup>27</sup> Keh liang-go siao-nying do-ky'i-læ: Yi-sao ting we tang din-liah, z din-li-go nying: Yüô-koh deng-læ tsiang-bong-li, tso-nying p'oh-jih. <sup>28</sup> Yi-sah æ-sih Yi-sao, ing-we hwun-hyi ky'üoh gyi loh go nyüoh; Li-pah-kyüô æ-sih Yüô-koh.

<sup>24</sup> 等生產日子到,其個胎裏是雙生。<sup>25</sup> 頭一個生出咸 肌身紅紅個,像有皮襖穿的介。其拉取其名字<u>以掃</u><sup>[1]</sup>。<sup>26</sup> 後頭其阿弟生出,手捏勒<u>以掃</u>個腳後跟,就取其名字<u>雅各</u> <sup>[2]</sup>。其生個時候以撒年紀六十歲。<sup>27</sup> 箇兩個小人大起來。 

- [1] Ziu-z 'Ong go. 就是紅個。(原註)
- [2] Ziu-z S-en-shün. 就是使安選。(原註)

<sup>29</sup> Yiu ih-tsao Yüô-koh ts kang: Yi-sao k'eo-k'eo dzong din-li kyü-læ, ky'ih-lih-de. Yi-sao teng Yüô-koh wô, Ngô ky'ih-lih-de, ts'ing ng pô keh 'ong-go kang peh ngô ky'üoh: keh-lah yi eo gyi ming-z [1]Yi-tong. 31 Yüô-koh wô, Kyih-mih ng pô tsiang-ts-go ts'æn-nyih ma-peh ngô. <sup>32</sup> Yisao wô, Ngô kw'a si-de: keh tsiang-ts-go ts'æn-nyih yü ngô yiu soh-go ih-c'ü ni? <sup>33</sup> Yüô-koh wô, Ng kyih-mih vah-tsiu peh ngô. Yi-sao ziu te gyi vah-tsiu, pô tsiang-ts-go ts'ænnyih ma-peh Yüô-koh. 34 Yüô-koh do-leh ping teng 'ongdeo-kang peh Yi-sao: Yi-sao ky'üoh-ky'üoh hah-hah, dong-sing ky'i-de. Z-ka Yi-sao ky'ing-k'en keh tsiang-ts-go ts'æn-nyih.

29 有一遭雅各煮羹:以掃扣扣從田裏歸來,喫力了。 以掃等雅各話:「我喫力了,請爾把箇紅個羹撥我喫。箇 勒又謳其名字以東<sup>[1]</sup>。<sup>31</sup> 雅各話:「今末爾把長子個產業 賣撥我。」<sup>32</sup> 以掃話:「我快死了,箇長子個產業於我有 啥個益處呢?」<sup>33</sup> 雅各話:「爾今末罰咒撥我。」以掃就 對其罰咒,把長子個產業賣撥雅各。<sup>34</sup> 雅各,馱勒餅等紅豆 羹撥以掃。以掃,喫喫喝喝,動身去了。是介以掃輕看箇長 子個產業。

[1] Ziu-z 'Ong go. 就是紅個。(原註)

# Ts. XXVI.

Üô-pah-lah-hen z-'eo yiu hwông-nyin; 'eo-deo keh difông yi yiu hwông-nyin; keh-lah Yi-sah tao Gyi-lah, Fi-li-z wông Üô-pi-mi-lih di-fông ky'i. <sup>2</sup> Yiæ-'o-wô yin-c'ih peh Yi-sah k'en, teng gyi wô, M-nao tseo-loh Yiæ-gyih ky'i: hao deng-læ Ngô sô ts-tin ng-go di-fông. <sup>3</sup> Ng hao tæn-koh læ ts'-di, Ngô we teng ng dô-kô læ-tong, s-foh peh ng: we pô keh-sing koh-veng tu s-peh ng lin ng-go 'eo-dæ. Ngô zin-deo vah-tsiu peh ng ah-tia Üô-pah-lah-hen-go, keh-go shih-wô pih-ding we tso-dzing; <sup>4</sup> Ngô we kô-ts'eo ng-go 'eo-dæ ziang t'in-li-go sing-siu ka to, pô keh-sing koh-veng long-tsong s-peh ng-go 'eo-dæ: ping-ts'ia t'in-'ô væn-koh we dzong ng-go 'eo-dæ teh-djoh foh-ky'i. <sup>5</sup> Ing-we Üô-pah-lah-hen i Ngô-go shih-wô, siu Ngô-go cü-du, 'ao-ling, lih-li teng lih-fah.

亚伯拉罕時候有荒年,後頭箇地方又有荒年,箇勒以 撒到其臘,非利士王亞比米力地方去。<sup>2</sup> 耶和華現出撥以撒 看,等其話:「嘸得好走落<u>埃及</u>去,好庉來我所指點爾個 地方。」<sup>3</sup> 爾好耽擱來此地,我會等爾大家來東,賜福撥 爾。會把箇星國份都賜撥爾連爾個後代。我前頭罰咒撥爾 阿爹亞伯拉罕個,箇個說話必定會做成。<sup>4</sup> 我會加湊爾個後 代像天裏個星宿介多,把箇星國份攏總賜撥爾個後代,並 且天下萬國會從爾個後代得着福氣。<sup>5</sup> 因為亞伯拉罕依我個 說話,守我個制度,號令、律例等律法。

<sup>6</sup> Yi-sah deng-læ Gyi-lah. <sup>7</sup> Keh di-fông pah-sing meng-ky'i gyi ts'i-ts. Gyi wô, z ngô-go tsi-me: ing-we siang-mao hao-k'en, keh-lah feh-ken wô z gyi ts'i-ts, k'ong-p'ô keh di-fông-go nying we-leh Li-pah-kyüô iao sah gyi. <sup>8</sup> Keh-deo deng-leh dziang-kyiu, k'eo-k'eo Fi-li-z wông Üô-pi-mi-lih dzong k'æn-deo mông-c'ih-ky'i, k'enkyin Yi-sah teng gyi ts'i-ts Li-pah-kyüô læ-tih hyi-hyi. <sup>9</sup> Üô-pi-mi-lih eo Yi-sah, wô, Gyi jih-dzæ z ng ts'i-ts; ng dza wô z ng-go tsi-me? Yi-sah teng gyi wô, Ngô ts'eng-ts'eng k'ong-p'ô we-leh gyi sông-ming. <sup>10</sup> Üô-pi-mi-lih wô, Ng dza-we z-ka tao ah-lah? Ziah-yiu ih-go nying m-kwe m-kyü teng ng ts'i-ts dong-zông, z ng 'æ ah-lah væn-ze. 11 Üô-pimi-lih ziu feng-fu cong pah-sing wô, Væn-pah væn-djoh keh-go nying teng gyi ts'i-ts-go, pih-iao si.  $^{12}$  Yi-sah læ keh di-fông kang-cong, tông-nyin siu-keh ih-pah be: Yiæ-'owô s-foh peh gyi. 13 Gyi tsing-nyih hying-wông, djoh-tsih kô-ts'eo, tso-leh do yiu-lao-de. 14 Gyi yiu hyü-to de-su ngeo-yiang, zing-to-siao yüong-nying. Fi-li-z nying ky'i gyi

feh-ko. <sup>15</sup> Gyi ah-tia Üô-pah-lah-hen z-'eo nu-boh sô gyüih-kæn-go tsing, Fi-li-z nying long-tsong seh-seh, s nanyi din-mun. <sup>16</sup> Üô-pi-mi-lih teng Yi-sah wô, Ng hao li-k'æ ah-lah ky'i, ing-we ng do-jü ah-lah.

<sup>6</sup> 以撒庉來其臘。<sup>7</sup> 箇地方百姓問起其妻子,其話: 「是我個姊妹」,因為相貌好看,箇勒弗敢話是其妻子, 恐怕箇地方個人爲了利百加要殺其。8箇頭庉勒長久,扣扣 非利士王亞比米力從檻頭望出去,看見以撒等其妻子利百 加來的嬉戲。9亞比米力謳以撒,話:「其實在是爾妻子, 爾咋話是爾個姊妹?」以撒等其話:「我忖忖恐怕為了其 喪命。」<sup>10</sup> 亞比米力話:「爾咋會是介到阿拉?若有一個 人嘸規嘸矩等爾妻子同牀,是爾害阿拉犯罪。」11 亞比米 力就吩咐衆百姓話:「凡百犯着箇個人等其妻子個,必要 死。」12以撒來箇地方耕種,當年收割一百倍。耶和華賜 福撥其。13 其整日興旺,逐節加湊,做勒大有佬了。14 其 有許多隊數牛羊、盛多少傭人。非利士人氣其弗過。15 其 阿爹亞伯拉罕時候奴僕所掘間個井, 非利士人攏總塞塞,

使淖泥填滿。<sup>16</sup> <u>亞比米力</u>等<u>以撒</u>話:「爾好離開阿拉去, 因為爾大如阿拉。」

<sup>17</sup> Yi-sah ziu li-k'æ keh-deo, tah tsiang-bong læ Gyilah-go sæn-ao-li deng-loh. <sup>18</sup> Gyi ah-tia Üô-pah-lah-hen z-'eo gyüih-kæn-go tsing, ziu-z Üô-pah-lah-hen si ts-'eo, Fili-z nying sô seh-seh-go, Yi-sah tsæ gyüih gyi, dzing-gyiu tsiao ah-tia sô eo-go ming-z c'ü gyi ming-z. <sup>19</sup> Yi-sah-go nu-boh tao sæn-ao-li ky'i gyüih: læ keh-deo teh-djoh weh shü go tsing. <sup>20</sup> Gyi-lah k'en-yiang-go nying teng Yi-sah k'en-yiang-go nying tsang-zao, wô, Keh-go shü z ah-lahgo. Ing-we teng gyi tsang-zao, keh-lah Yi-sah eo keh-k'eo tsing kyiao-leh [1]Yiæ-seh. 21 Tsæ gyüih ih-k'eo tsing, yi teng gyi tsang-zao: keh-lah eo gyi <sup>[2]</sup>Sih-nô. <sup>22</sup> Yi-sah lik'æ keh-deo, tsæ gyüih ih-k'eo tsing: keh-tsao m-neh tsæ tsang-zao: keh-lah eo gyi [3]Li-'o-pah, wô, Yiæ-'o-wô nænkæn s-teh ah-lah kw'un-k'ong; ah-lah we læ ts'-di hyingwông-ky'i-læ. <sup>23</sup> Yi-sah li-k'æ keh-deo, tao Bih-z-pô ky'i. <sup>24</sup> Keh-yia Yiæ-'o-wô yin-c'ih peh gyi k'en, teng gyi wô, Ngô z ng ah-tia Üô-pah-lah-hen Jing-ming; ng feh-yüong p'ô, Ngô z teng ng dô-kô læ-tong: we-leh Ngô-go nu-boh Üô-pah-lah-hen, we s-foh peh ng, kô-ts'eo ng-go 'eo-dæ. <sup>25</sup> Yi-sah læ keh-deo zao ih-zo dæn, tao-kao Yiæ-'o-wô-go ming-deo, tah tsiang-bong; wa-yiu gyi-go nu-boh gyüih tsing.

17 以撒就離開箇頭,搭帳篷來其臘個山坳裏庉落。 其阿爹亞伯拉罕時候掘間個井, 就是亞伯拉罕死之後, 非 利士人所塞塞個,以撒再掘其,仍舊照阿爹所謳個名字取 其名字。<sup>19</sup> 以撒個奴僕到山坳裏去掘,來箇頭得着活水個 井。20 其拉看羊個人等以撒看羊個人爭造,話:「箇個水 是阿拉個。」因為等其爭造, 箇勒以撒謳箇口井叫勒埃色 [1]。<sup>21</sup> 再掘一口井, 又等其爭造, 箇勒謳其薛拿<sup>[2]</sup>。<sup>22</sup> 以 撒離開箇頭,再掘一口井。箇遭嘸得再爭造, 箇勒謳其利 河伯[3], 話:「耶和華難間使得阿拉寬空,阿拉會來此地 興旺起來。」<sup>23</sup>以撒離開箇頭,到別是巴去。<sup>24</sup> 箇夜耶和 華現出撥其看,等其話:「我是爾阿爹亞伯拉罕神明,爾 弗用怕,我是等爾大家來東。為了我個奴僕亞伯拉罕,會 賜福撥爾,加湊爾個後代。」<sup>25</sup> <u>以撒</u>來箇頭造一座壇,禱 告耶和華個名頭,搭帳篷,還有其個奴僕掘井。

- [1] Ziu-z Tsang-zao. 就是爭造。(原註)
- [2] Ziu-z Ün-ky'i. 就是怨氣。(原註)
- [3] Ziu-z Kw'un-k'ong. 就是寬空。(原註)

<sup>26</sup> Üô-pi-mi-lih teng gyi beng-yiu Üô-wu-sah, teng tsiang-kyüing Fi-koh dzong Gyi-lah læ kyin Yi-sah. <sup>27</sup> Yisah teng gyi-lah wô, Ng-lah ün-'eng ngô, ts'a ngô li-k'æleh ng-lah ky'i; næn-kæn dza-we tao ngô di-fông læ? 28 Gyi-lah wô, Ah-lah k'en-kyin Yiæ-'o-wô jih-dzæ teng ng dô-kô læ-tong, keh-lah ah-lah wô, Næn-kæn ah-lah teng ng hao vah-tsiu: wa-yiu ng teng ah-lah hao lih-iah. <sup>29</sup> Ng m-nao 'æ ah-lah, ziang ah-lah ka feh-zing væn-djoh ng, tæn-tsih hao-hao dæ ng, song ng en-en-tæn-tæn c'ih-ky'i: næn-kæn ng z dzong Yiæ-'o-wô teh-djoh foh-ky'i-de. 30 Yisah we-leh keh-sing nying bæn-tsiu, gyi-lah ziu ky'üohky'üoh hah-hah. <sup>31</sup> Di-nyi t'in-nyiang tsao bô-ky'i, dô-kô

vah-tsiu: Yi-sah song gyi-lah en-en-tæn-tæn kyü-kyʻi. <sup>32</sup> Keh-nyih Yi-sah-go nu-boh læ tʻong-pao gyi gyüih-tsing-go z-ken; teng gyi wô, Ah-lah yi-kying teh-djoh shü-de. <sup>33</sup> Ziu eo gyi <sup>[1]</sup>Z-pô: keh-lah tao jü-kying keh dzing-li diming kyiao-leh <sup>[2]</sup>Bih-z-pô.

26 亞比米力等其朋友亞戶撒,等將軍非各從其臘來見 以撒。27以撒等其拉話:「爾拉怨恨我,差我離開了爾拉 去,難間咋會到我地方來?」28 其拉話:「阿拉看見耶和 華實在等爾大家來東, 箇勒阿拉話: 『難間阿拉等爾好罰 咒,還有爾等阿拉好立約。』<sup>29</sup> 爾嘸得好害阿拉,像阿拉 介弗曾犯着爾, 單只好好待爾, 送爾安安耽耽出去。難問 爾是從耶和華得着福氣了。」30以撒爲了箇星人辦酒,其 拉就喫喫喝喝。31 第二天亮早爬起,大家罰咒。以撒送其 拉安安耽耽歸去。32 箇日以撒個奴僕來通報其掘井個事 幹,等其話:「阿拉已經得着水了。」33 就謳其示巴[1]。 箇勒到如今箇城裏地名叫勒別是巴<sup>[2]</sup>。

- [1] Ziu-z Vah-tsiu. 就是罰咒。(原註)
- [2] Ziu-z Vah-tsiu go tsing. 就是罰咒個井。(原註)

<sup>34</sup> Yi-sao nyin-kyi s-jih shü dæ Heh nying Bih-li-go nön Yiu-tih, teng Heh nying Yi-leng-go nön Pô-z-meh tso ts'i-ts. <sup>35</sup> Keh liang-go sing-vu s-teh Yi-sah teng Li-pahkyüô sing-li iu-meng.

34<u>以掃</u>年紀四十歲抬<u>赫人別利</u>個<u>國猶滴</u>,等<u>赫人以倫</u>個<u>因</u>巴是抹做妻子。35 箇兩個新婦使得<u>以撒</u>等<u>利百加</u>心裏憂悶。

## Ts. XXVII.

Yi-sah nyin-kyi lao z-'eo, ngæn-tsing hwô-de m-neh k'en-kyin, eo do ng-ts Yi-sao, teng gyi wô, Ngô-go ng-ts! Gyi wô, Ngô læ-tong. <sup>2</sup> Yi-sah wô, Ngô lao-de, feh hyiao-teh kyi-z we si <sup>3</sup> Næn-kæn ng hao do kong tsin keh-sing tong-si tao din-li ky'i, teng ngô ky'i k'ô loh. <sup>4</sup> Tso ngô sô hwun-hyi ky'üoh-go mi-dao do-læ peh ngô ky'üoh; s-teh ngô feh-zing si yi-zin, sing-li hao coh-foh ng. <sup>5</sup> Yi-sah teng

ng-ts Yi-sao wô-go z-'eo, Li-pah-kyüô t'ing-meng-de: 'eo-deo Yi-sao tao din-li ky'i, iao k'ô-leh loh læ.

以撒年紀老時候,眼睛花了,嘸得看見,謳大兒子<u>以</u> 掃,等其話:「我個兒子!」其話:「我來東。」<sup>2</sup> 以撒 話:「我老了,弗曉得幾時會死。<sup>3</sup> 難間爾好馱弓箭箇星東 西到田裏去,等我去抲鹿。<sup>4</sup> 做我所歡喜喫個味道馱來撥我 喫,使得我弗曾死以前,心裏好祝福爾。」<sup>5</sup> 以撒等兒子以 掃話個時候,<u>利百加</u>聽聞了。後頭<u>以掃</u>到田裏去,要抲勒 鹿來。

<sup>6</sup> Li-pah-kyüô teng ng-ts Yüô-koh wô, Ngô t'ing-meng ng ah-tia teng ng ah-ko Yi-sao wô, <sup>7</sup> Teng ngô ky'i do loh tso hao-ky'üoh-go mi-dao peh ngô ky'üoh-ts; s-teh ngô feh-zing si yi-zin, hao læ Yiæ-'o-wô-go min-zin coh-foh ng. <sup>8</sup> Næn-kæn ngô ng-ts, ng t'ing ngô-go shih-wô, tsiao ngô-go feng-fu. <sup>9</sup> Ng tao yiang-de-li ky'i, do liang-tsah hao-hao-go siao sæn-yiang; ngô we teng ng ah-tia tso gyi sô hwun-hyi ky'üoh-go mi-dao. <sup>10</sup> Ng do-ky'i peh ng ah-tia ky'üoh-ts, s-teh gyi feh-zing si yi-zin hao coh-foh ng. <sup>11</sup>

Yüô-koh teng ah-nyiang Li-pah-kyüô wô, Ng k'en, ngô-go ah-ko Yi-sao kyi-sing z c'ih-mao-go, ngô-go kyi-sing z kwông-wah-go. <sup>12</sup> K'ong-p'ô ah-tia we moh-moh ngô, sön ngô z p'in-nying-go: ka-ni feh-neng-keo teh-djoh coh-foh, fæn-cün ziu tsiu-mô. <sup>13</sup> Ah-nyiang teng gyi wô, Ngô ng-ts, ng ziu tsiu-mô kwe-peh ngô-go sing-zông: tæn-tsih t'ing ngô shih-wô, teng ngô ky'i do-leh-læ. <sup>14</sup> Gyi ziu ky'i do-læ, kao-fu ah-nyiang: gyi ah-nyiang tso gyi ah-tia sô hwun-hyi ky'üoh-go mi-dao. <sup>15</sup> Li-pah-kyüô do gyi do ng-ts Yi-sao oh-li læ-tong-go hao-hao i-zông peh siao ng-ts Yüô-koh c'ün. <sup>16</sup> Yi do siao sæn-yiang-go bi, kæ-leh Yüô-koh-go siu, teng deo-kying kwông-wah-go di-fông. <sup>17</sup> Do-leh sô be-bæn hao ky'üoh-go mi-dao teng ping, kao-fu ng-ts Yüôkoh-go siu-li.

<sup>6</sup> 利百加等兒子雅各話:「我聽聞爾阿爹等爾阿哥<u>以掃</u>話:<sup>7</sup> 『等我去馱鹿做好喫個味道撥我喫仔,使得我弗曾死以前,好來耶和華個面前祝福爾。』<sup>8</sup> 難間我兒子,爾聽我個說話,照我個吩咐。<sup>9</sup> 爾到羊隊裏去,馱兩隻好好個小山

羊,我會等爾阿爹做其所歡喜喫個味道。<sup>10</sup> 爾馱去撥爾阿 爹喫仔, 使得其弗曾死以前好祝福爾。」<sup>11</sup> 雅各等阿孃利 百加話:「爾看,我個阿哥以掃肌身是出毛個,我個肌身 是光滑個。12 恐怕阿爹會摸摸我,算我是騙人個,介呢弗 能夠得着祝福,反轉就咒罵。」<sup>13</sup> 阿孃等其話: 「我兒 子,爾受咒罵歸撥我個身上。單只聽我說話,等我去馱勒 來。」<sup>14</sup> 其就去馱來, 交付阿孃。其阿孃做其阿爹所歡喜 喫個味道。<sup>15</sup> 利百加馱其大兒子以掃屋裏來東個好好衣裳 撥小兒子雅各穿。16 又馱小山羊個皮,蓋勒雅各個手,等 頭頸光滑個地方。<sup>17</sup> 馱勒所備辦好喫個味道等餅, 交付兒 子雅各個手裏。

<sup>18</sup> Yüô-koh tseo-tao ah-tia di-fông, wô, Ngô ah-tia! Gyi wô, Ngô læ-tong: ngô ng-ts, ng z jü? <sup>19</sup> Yüô-koh teng ah-tia wô, Ngô z ng do ng-ts Yi-sao; ing feng-fu ka tso: ts'ing ng bô-tæn-ky'i zo-ts, ky'üoh ngô loh-go nyüoh, s-teh ng sing-li hao coh-foh ngô. <sup>20</sup> Yi-sah teng ng-ts wô, Ngô ng-ts, Ng dza-we p'ong-djoh-leh ka kw'a? Gyi wô, Ing-we ng-go Jing-ming Yiæ-'o-wô s-peh ngô jing-liu. <sup>21</sup> Yi-sah teng

Yüô-koh wô, Ngô ng-ts, ng tseo-long-læ, peh ngô mohmoh ng k'en, ng jih-dzæ z ngô ng-ts Yi-sao feh. <sup>22</sup> Yüô-koh tseo-long tao ah-tia di-fông: Yi-sah moh-moh gyi, wô, Sing-ing z Yüô-koh-go sing-ing; siu z Yi-sao-go siu. <sup>23</sup> Weleh gyi siu yiu mao ziang ah-ko Yi-sao-go siu, keh-lah binfeh-ts'ing-t'ong, ziu coh-foh gyi. <sup>24</sup> Gyi wô, Ng jih-dzæ z ngô ng-ts Yi-sao feh? Yüô-koh wô, Z-go. <sup>25</sup> Yi-sah yi wô, Do gyi long-læ peh ngô ky'üoh ng-ts-go loh nyüoh, s-teh ngô sing-li hao coh-foh ng. Yüô-koh ziu do-long peh ah-tia, ahtia ky'üoh-de: yi do tsiu peh ah-tia, ah-tia hah-de. <sup>26</sup> Gyi ah-tia Yi-sah teng gyi wô, Ngô ng-ts tseo-long-læ, ts'ingts'ing ngô cü. <sup>27</sup> Yüô-koh ziu tseo-long ts'ing-ts'ing ah-tia cü: ah-tia hyüong-djoh gyi i-zông-go hyiang-ky'i, coh-foh gyi, wô, Ngô ng-ts-go hyiang-ky'i ziang Yiæ-'o-wô sô s-foh go din-li hyiang-ky'i. <sup>28</sup> Dæn-nyün Jing-ming s-peh ng t'in-li-go lu-shü, di-t'u-go 'eo-jih, koh teng tsiu fong-fong tsoh-tsoh. <sup>29</sup> Dæn-nyün pah-sing voh-z ng; lih-koh tu bohtao pa ng: hyüong-di li-hyiang ng tso cü; dong meo-go ngts yia boh-tao pa ng: væn-pah tsiu-mô ng-go we ziu tsiumô; coh-foh ng-go yia we ziu foh-ky'i.

18 雅各走到阿爹地方, 話:「我阿爹!」其話:「我 來東。我兒子,爾是誰?」<sup>19</sup>雅各等阿爹話:「我是爾大 兒子以掃。應吩咐介做。請爾爬帶起坐仔, 喫我鹿個肉, 使得爾心裏好祝福我。」20以撒等兒子話:「我兒子,爾 咋會碰着勒介快?」其話: 「因為爾個神明耶和華賜撥我 順流。」21 以撒等雅各話:「我兒子,爾走攏來,撥我摸 摸爾看,爾實在是我兒子以掃弗。」<sup>22</sup>雅各走攏到阿爹地 方。以撒摸摸其,話:「聲音是雅各個聲音,手是以掃個 手。」23 為了其手有毛像阿哥以掃個手, 箇勒辨弗淸通, 就祝福其。24 其話:「爾實在是我兒子以掃弗?」雅各 話:「是個。」<sup>25</sup> 以撒又話:「馱其攏來撥我喫兒子個鹿 肉, 使得我心裏好祝福爾。」雅各就馱攏撥阿爹, 阿爹喫 了,又馱酒撥阿爹,阿爹喝了。<sup>26</sup> 其阿爹以撒等其話: 「我兒子走攏來,親親我嘴。」<sup>27</sup>雅各就走攏親親阿爹 嘴。阿爹嗅着其衣裳個香氣,祝福其,話:「我兒子個香 氣像耶和華所賜福個田裏香氣。」<sup>28</sup> 但願神明賜撥爾天裏

個露水,地土個厚實,穀等酒豐豐足足。<sup>29</sup> 但願百姓服侍爾,列國都伏倒拜爾,兄弟裏向爾做主,同母個兒子也伏倒拜爾。凡百咒罵爾個會受咒罵,祝福爾個也會受福氣。

<sup>30</sup> Yi-sah coh-foh Yüô-koh hao-de, Yüô-koh kông-kông li-k'æ ah-tia Yi-sah tseo-c'ih, k'eo-k'eo gyi ah-ko Yi-sao tang din-liah kyü-læ: 31 yia be-bæn-leh hao-ky'üoh-go midao do-læ peh ah-tia: teng gyi ah-tia wô, Ts'ing ah-tia ky'ilæ, ky'üoh ng-ts-go loh nyüoh, s-teh ng sing-li hao coh-foh ngô. <sup>32</sup> Gyi ah-tia Yi-sah teng gyi wô, Ng z jü? Gyi wô, Ngô z ng-go ng-ts, ng do ng-ts Yi-sao. <sup>33</sup> Yi-sah do-nyiang gwah-gwah-teo, wô, Jü ni? Ng feh-zing læ-go zin-deo, yikying do-leh loh nyüoh peh ngô, ngô long-tsong ky'üoh-ts coh-foh gyi-go, keh-go nying læ 'ah-li? Gyi pih-ding we teh-djoh foh-ky'i. 34 Yi-sao t'ing-meng ah-tia shih-wô, 'aoli-da-k'oh, teng ah-tia wô, Gyiu ng coh-foh peh ngô. Ngô ah-tia 'ô! yia hao coh-foh peh ngô! <sup>35</sup> Yi-sah wô, Ng ah-di t'eo-bun læ pô ng-go foh-ky'i deh-leh-ky'i-de. <sup>36</sup> Yi-sao wô, C'ü gyi go ming-z [1]Yüô-koh jih-dzæ z-go: gyi yiu liang-tsao tsin ngô we; zin-deo deh ngô tsiang-ts-go ts'ænnyih, næn-kæn pô ngô-go foh-ky'i, yi deh-leh-ky'i-de. Gyi yi wô, Næn-dao m-kao hao tsæ coh-foh ngô ma? <sup>37</sup> Yi-sah we-teh Yi-sao, wô, Ngô yi-kying lih Yüô-koh tso ng-go cü, s-teh cong hyüong-di tu voh-z gyi; ngô yi do-leh koh teng tsiu iang gyi; ngô-go ng-ts, næn-kæn ngô do soh-si peh ng ni. 38 Yi-sao teng ah-tia wô, Ngô ah-tia, ng næn-dao tsihyiu ka ih-tsao hao coh-foh ma? Ngô ah-tia 'ô! yia hao cohfoh peh ngô. Gyiu ng coh-foh peh ngô. Yi-sao hyianghyiang k'oh-ky'i-læ-de. <sup>39</sup> Gyi ah-tia Yi-sah we-teh gyi, wô, Ng sô deng-go di-fông hao teh-djoh di-t'u-go 'eo-jih, teng t'in-zông kông-loh-læ-go lu-shü. <sup>40</sup> Ng k'ao zi-go pao-kyin hao ko nyih-ts, yia we voh-z ng-go ah-di: teng-tao ng cônggyün-go z-'eo t'eh-diao gyi-go ah li-k'æ ng-go deo-kying.

30 <u>以撒祝福雅各</u>好了,<u>雅各</u>剛剛離開阿爹<u>以撒</u>走出, 扣扣其阿哥<u>以掃</u>打田獵歸來。<sup>31</sup> 也備辦了好喫個味道馱來 撥阿爹,等其阿爹話:「請阿爹起來,喫兒子個鹿肉,使 得爾心裏好祝福我。」<sup>32</sup> 其阿爹以撒等其話:「爾是 誰?」其話:「我是爾個兒子,爾大兒子以掃。」<sup>33</sup>以撒 大樣刮刮抖,話:「誰呢?爾弗曾來個前頭,已經馱勒鹿 肉撥我,我攏總喫仔祝福其個,箇個人來何裏?其必定會 得着福氣。」34以掃聽聞阿爹說話,號淚大哭,等阿爹 話:「求爾祝福撥我。我阿爹嗄!也好祝福撥我!」<sup>35</sup>以 撒話:「爾阿弟偷伴來把爾個福氣奪了去了。」36 以掃 話:「取其個名字雅各[1]實在是個。其有兩遭佔我位。前 頭奪我長子個產業, 難間把我個福氣, 又奪了去了。」 其 又話:「難道嘸告好再祝福我嗎?」<sup>37</sup> 以撒回答以掃, 話:「我已經立雅各做爾個主,使得衆兄弟都服侍其。我 又馱勒穀等酒養其。我個兒子,難間我馱啥西撥爾呢?」38 以掃等阿爹話:「我阿爹,爾難道只有介一遭好祝福嗎? 我阿爹嗄!也好祝福撥我。求爾祝福撥我。」以掃響響哭 起來了。39 其阿爹以撒回答其,話:「爾所庉個地方好得 着地土個厚實,等天上降落來個露水。40 爾靠自個寶劍好 過日子,也會服侍爾個阿弟。等到爾掌權個時候,脫掉其 個軛離開爾個頭頸。

[1] Ziu-z Tsin-we-ts-go. 就是佔位子個。(原註)

<sup>41</sup> Yi-sao, we-leh ah-tia coh-foh-go z-ken, ün-'eng Yüô-koh: gyi sing-li wô, Ah-tia sông-z-go nyih-ts gying-de; ka z-'eo ngô pih-ding sah-diao ah-di Yüô-koh. 42 Do ng-ts Yi-sao keh-sing shih-wô, yiu nying t'ong-cü Li-pah-kyüô; gyi ziu ts'a nying eo siao ng-ts Yüô-koh, teng gyi wô, Ng ah-ko Yi-sao iao sah-diao ng, c'ih gyi-go ky'i: <sup>43</sup> ka-ni ngô ng-ts, yüong i ngô-go shih-wô, dong-sing dao-tao Ha-læn, ngô hyüong-di Lah-pæn-go di-fông ky'i: 44 læ keh-deo deng kyi-nyih, teng ng ah-ko ky'i ko-deo-ts. 45 Ziu-z gyi 'eng ng-go ky'i bing-loh-de, mông-kyi ng sô tao gyi-go zken; ngô ziu we ts'a nying læ eo ng dzong keh-deo kyü-læ. Ngô dza-hao ih-nyih sông-diao ng liang-go nying ma? 46 Li-pah-kyüô teng Yi-sah wô, We-leh Heh nying-go nön ngô tso-nying tu in-væn-de: ziah-z Yüô-koh yia dæ Heh nyinggo nön tso ts'i-ts, ziang ts'-di-go nyü-nying ka, ngô tsonying yiu soh-go hao-c'ü ni?

41 <u>以掃</u>為了阿爹祝福個事幹,怨恨<u>雅各</u>。其心裏話:「阿爹喪事個日子近了,介時候我必定殺掉阿弟雅各。」<sup>42</sup>

大兒子<u>以掃</u>箇星說話,有人通知<u>利百加</u>。其就差人謳小兒子雅各,等其話:「爾阿哥<u>以掃</u>要殺掉爾,出其個氣。<sup>43</sup>介呢我兒子,用依我個說話,動身逃到<u>哈蘭</u>,我兄弟<u>拉班</u>個地方去。<sup>44</sup>來箇頭庉幾日,等爾阿哥氣過頭仔。<sup>45</sup>就是其恨爾個氣平落了,忘記爾所到其個事幹,我就會差人來謳爾從箇頭歸來。我咋好一日喪掉爾兩個人嗎?」<sup>46</sup> 利百加等以撒話:「爲了赫人個囡我做人都厭煩了。若是雅各也抬赫人個囡做妻子,像此地個女人介,我做人有啥個好處呢?」

### Ts. XXVIII.

Yi-sah eo Yüô-koh, coh-foh gyi, yi feng-fu gyi, wô, Ng m-nao dæ Kyüô-nen nying-go nön tso ts'i-ts. <sup>2</sup> Hao dongsing tao Pô-t'æn-üô-læn ky'i tao ng nga-kong Pe-t'u-li-go oh-li; læ keh-deo dzong ng nyiang-gyiu Lah-pæn-go nön cong-nyiang c'ü ih-go ts'i-ts. <sup>3</sup> Dæn-nyün djün-neng-go Jing-ming s foh-ky'i peh ng, s-teh ng 'eo-dæ meo-meo-

zing-zing to-ky'i-læ, tso leng-ts'in-leng-væn-go pah-sing. <sup>4</sup> Wa-yiu pô Üô-pah-lah-hen-go foh-ky'i s-peh ng lin ng-go 'eo-dæ, hao tsih-ziu Jing-ming sô s-peh Üô-pah-lah-hen-go di-fông, ziu-z ng yin-dzæ tæn-koh-tong-go di-fông. <sup>5</sup> Yi-sah ts'a Yüô-koh ky'i; gyi ziu tseo-tao Pô-t'æn-üô-læn, ky'i kyin Üô-læn nying Pe-t'u-li-go ng-ts Lah-pæn; ziu-z Yi-sao teng Yüô-koh ah-nyiang Li-pah-kyüô-go hyüong-di.

以撒謳雅各,祝福其,又吩咐其,話:「爾嘸得好抬 迦南人個囡做妻子。<sup>2</sup>好動身到巴坦亞蘭去,到爾外公<u>彼土</u> 利個屋裏;來箇頭從爾孃舅<u>拉班</u>個囡中央娶一個妻子。<sup>3</sup>但 顧全能個神明賜福氣撥爾,使得爾後代茂茂盛盛多起來, 做論千論萬個百姓。<sup>4</sup>還有把亞伯拉罕個福氣賜撥爾連爾個 後代,好接受神明所賜撥亞伯拉罕個地方,就是爾現在耽 擱東個地方。」<sup>5</sup>以撒差雅各去,其就走到巴坦亞蘭,去見 亞蘭人彼土利個兒子拉班,就是以掃等雅各阿孃利百加個 兄弟。

<sup>6</sup> Yi-sao k'en-kyin Yi-sah coh-foh Yüô-koh, ts'a gyi tao Pô-t'æn-üô-læn ky'i, iao læ keh-deo dæ ts'i-ts; ping-ts'ia coh-foh-go z-'eo feng-fu gyi, wô, Ng m-nao dæ Kyüô-nen nying-go nön tso ts'i-ts: <sup>7</sup> k'en-kyin Yüô-koh i-leh tianyiang tao Pô-t'æn-üô-læn ky'i-de; <sup>8</sup> Yi-sao ziu hyiao-teh Kyüô-nen nying-go nön z ah-tia Yi-sah feh-hwun-hyi-go: keh-lah Yi-sao tao Yi-jih-mô-li-go oh-li, ü gyi sô yiu-go ts'i-ts ts-nga, yi dæ Mô-ha-lah tso ts'i-ts: ziu-z Üô-pah-lah-hen ng-ts Yi-jih-mô-li-go nön, Nyi-bæ-yiah-go tsi-me.

6以掃看見以撒祝福雅各,差其到巴坦亞蘭去,要來箇頭抬妻子,並且祝福個時候吩咐其,話:「爾嘸得好抬迦南人個囡做妻子。」<sup>7</sup>看見雅各依了爹孃到巴坦亞蘭去了。 8以掃就曉得迦南人個囡是阿爹以撒弗歡喜個。箇勒以掃到以實瑪利個屋裏,於其所有個妻子之外,又抬瑪哈拉做妻子,就是亞伯拉罕兒子以實瑪利個囡,尼徘藥個姊妹。

Yüô-koh li-k'æ Bih-z-pô, dziao-leh Ha-læn ka ky'i.
<sup>11</sup> Tseo-tao ih-t'ah di-fông, nyih-deo yi-kying loh-sæn, ziu soh-ko yia, pô keh di-fông-go zah-deo tông tsing-deo, læ keh-deo kw'eng-joh-de. Gyi tso mông, k'en-kyin yiu lu-t'æ fông-læ di-yiang-li, zông-deo bang-djoh t'in, Jing-ming-go

t'in-s læ-tih tseo-zông tseo-loh <sup>13</sup> Yiæ-'o-wô lih-læ gyi zông-deo, wô, Ngô z Yiæ-'o-wô, ng tsu-tsong Üô-pah-lahhen-go Jing-ming, teng Yi-sah-go Jing-ming; yin-dzæ ng sô kw'eng-go di-fông, Ngô we s-peh ng teng ng-go 'eo-dæ. <sup>14</sup> Ng-go 'eo-dæ we ziang di-yiang-li-go hwe-dzing: ng we vin-k'æ tao tong-nen-si-poh: ping-ts'ia t'in-'ô keh-sing dzoh-veng tu we dzong ng, teng ng-go 'eo-dæ teh-djoh foh-ky'i. 15 Ngô z teng ng dô-kô læ-tong, ng sô tao-go difông we pao-yiu ng, tsæ ling ng cün keh di-fông læ; Ngô feh-we ky'i-diao ng teng-tao Ngô teng ng sô wô-go tu tso dzing-kong.

10 雅各離開別是巴,朝勒哈蘭介去。<sup>11</sup> 走到一埭地方,日頭已經落山,就宿過夜,把箇地方個石頭當枕頭,來箇頭睏熟了。<sup>12</sup> 其做夢,看見有路梯放來地垟裏,上頭碰着天,神明個天使來的走上走落。<sup>13</sup> 耶和華立來其上頭,話:「我是耶和華,爾祖宗亞伯拉罕個神明,等以撒個神明。現在爾所睏個地方,我會賜撥爾等爾個後代。<sup>14</sup> 爾個後代會像地垟裏個灰塵。爾會延開到東南西北,並且

天下箇星族份都會從爾,等爾個後代得着福氣。<sup>15</sup> 我是等爾大家來東,爾所到個地方會保佑爾,再領爾轉箇地方來,我弗會棄掉爾等到我等爾所話個都做成功。」

<sup>16</sup> Yüô-koh diao-kao-cün-læ wô, Yiæ-'o-wô jih-dzæ læ dông-deo, ngô tao feh hyiao-teh. <sup>17</sup> Ziu p'ô-gyü, wô, Kehgo di-fông dza p'ô ni! Keh ky'i feh-z Jing-ming-go oh, t'ingo meng ma? 18 Yüô-koh tsao-t'in-nyiang bô-ky'i, do-leh tông tsing-deo-go zah-deo lih-ky'i tso djü-ts, pô yiu kyiaolæ gyi zông-deo. <sup>19</sup> Ziu c'ü gyi di-ming <sup>[1]</sup>Pah-deh-li: keh dzing-li peng-læ z kyiao-leh Lu-s. 20 Yüô-koh hyü nyünsing wô, Jing-ming ziah teng ngô dô-kô læ-tong, pao-yiu ngô sô tseo-go lu, peh ngô ky'üoh-zih i-c'ün, 21 s-teh ngô en-en-weng-weng kyü ah-tia-go oh-li, ka-ni Yiæ-'o-wô pihding tso ngô-go Jing-ming. 22 Ngô sô lih-go djü-ts, kehkw'e zah-deo, tsiang-læ hao tso Jing-ming-go oh: væn-pah Ng s-peh ngô-go, ngô pih-ding jih-kwu teh-ih hyin-peh Ng.

16 雅各調覺轉來話:「耶和華實在來蕩頭,我倒弗曉得。」<sup>17</sup> 就怕懼,話:「箇個地方咋怕呢! 箇豈弗是神明

個屋,天個門嗎?」<sup>18</sup> 雅各早天亮爬起,馱勒當枕頭個石頭立起做柱子,把油澆來其上頭。<sup>19</sup> 就取其地名<u>伯特利</u>[1],箇城裏本來是叫勒<u>路斯</u>。<sup>20</sup> 雅各許願心話:「神明若等我大家來東,保佑我所走個路,撥我喫食衣穿,<sup>21</sup> 使得我安安穩穩歸阿爹個屋裏,介呢耶和華必定做我個神明。<sup>22</sup> 我所立個柱子,箇塊石頭,將來好做神明個屋。凡百爾賜撥我個,我必定十股得一獻撥爾。」

[1] Ziu-z Jing-ming go oh. 就是神明個屋。(原註)

#### Ts. XXIX.

Yüô-koh ziu dong-sing tao tong-pin nying-go di-fông.

<sup>2</sup> K'en-kyin din-li ih-k'eo tsing, yiu sæn-de yiang keh-deo kw'eng-kæn: ing-we su-djông keh-sing yiang z dzong keh-k'eo tsing ky'üoh-shü: kæ tsing-k'eo-go zah-deo z do-go.

Teng-tao long-tsong yiang-de jü-long-læ-de, ziu fah-ko tsing-k'eo-li-go zah-deo peh yiang ky'üoh-shü: 'eo-deo

tsing-k'eo dzing-gyiu yüong zah-deo kæ-hao. <sup>4</sup> Yüô-koh teng gyi-lah wô, Hyüong-di, ng dzong 'ah-li læ-go? Gyi-lah wô, Ah-lah dzong Ha-læn læ-go. <sup>5</sup> Yi teng gyi-lah wô, Ng nying-teh Nô-ngoh-go ng-ts Lah-pæn feh? Gyi-lah wô, Nying-teh go. <sup>6</sup> Yüô-koh teng gyi-lah wô, Gyi hao feh? Gyilah wô, Hao-go: ng k'en, gyi nön Lah-kyih ken-leh yiang læ-de. <sup>7</sup> Yüô-koh wô, Nyih-deo wa kao-kao-go, feh-z congsang jü-long z-'eo: 'o-feh peh yiang ky'üoh-leh shü, tsæ ky'i ü-ü gyi. <sup>8</sup> Gyi-lah wô, Long-feh-læ-go; iao teng-tao long-tsong yiang-de tu jü-long, hao fah-ko tsing-k'eo-li-go zah-deo, peh yiang ky'üoh shü.

雅各就動身到東邊人個地方。<sup>2</sup> 看見田裏一口井,有三隊羊箇頭睏間,因為素常箇星羊是從箇口井喫水。蓋井口個石頭是大個。<sup>3</sup> 等到攏總羊隊聚攏來了,就發過井口裏個石頭撥羊喫水,後頭井口仍舊用石頭蓋好。<sup>4</sup> 雅各等其拉話:「兄弟,爾從何裏來個?」其拉話:「阿拉從哈蘭來個。」<sup>5</sup> 又等其拉話:「爾認得<u>拿鶴</u>個兒子拉班弗?」其拉話:「認得個。」<sup>6</sup> 雅各等其拉話:「其好弗?」其拉話:

「好個。爾看,其囡<u>拉結</u>趕勒羊來了。」<sup>7</sup>雅各話:「日頭還高高個,弗是衆牲聚攏時候,何弗撥羊喫了水,再去餵餵其。」<sup>8</sup>其拉話:「弄弗來個,要等到攏總羊隊都聚攏,好發過井口裏個石頭,撥羊喫水。」

<sup>9</sup> Teng gyi-lah kông-go z-'eo, k'eo-k'eo Lah-kyih kenleh ah-tia yiang læ-de; ing-we ah-tia yiang z gyi sô kwungo. <sup>10</sup> Yüô-koh k'en-kyin nyiang-gyiu Lah-pæn-go nön Lah-kyih, teng nyiang-gyiu Lah-pæn-go yiang, ziu tseolong-ky'i, fah-ko tsing-k'eo-li-go zah-deo, peh nyiang-gyiu Lah-pæn-go yiang ky'üoh shü. <sup>11</sup> Yüô-koh teng Lah-kyih ts'ing-cü, hyiang-hyiang k'oh-ky'i-læ-de. 12 Yüô-koh wô hyiang Lah-kyih dao, zi z gyi ah-tia-go nga-sang, Li-pahkyüô-go ng-ts: Lah-kyih ziu peng-ky'i t'ong-cü ah-tia. <sup>13</sup> Lah-pæn t'ing-meng nga-sang Yüô-koh læ-de, ziu pengc'ih nying-tsih gyi, bao-leh gyi, ts'ing-cü, ling gyi tseotsing oh-li: Yüô-koh pô keh-sing z-ken tu kao-su Lah-pæn. <sup>14</sup> Lah-pæn teng gyi wô, Ng jih-dzæ z ngô kweh-deo, ngôgo nyüoh: ziu teng gyi dô-kô deng-leh ih-ko yüih.

<sup>9</sup>等其拉講個時候,扣扣拉結趕勒阿爹羊來了,因為阿 爹羊是其所管個。<sup>10</sup> 雅各看見孃舅拉班個囡拉結,等孃舅 拉班個羊,就走攏去,發過井口裏個石頭,撥孃舅拉班個 羊喫水。<sup>11</sup> 雅各等拉結親嘴,響響哭起來了。<sup>12</sup> 雅各話向 拉結道,自是其阿爹個外甥,利百加個兒子,拉結就奔去 通知阿爹。<sup>13</sup> 拉班聽聞外甥雅各來了,就奔出迎接其,抱 勒其,親嘴,領其走進屋裏。雅各把箇星事幹都告訴拉 班。<sup>14</sup> 拉班等其話:「爾實在是我骨頭,我個肉。」就等 其大家庵勒一個月。

<sup>15</sup> Lah-pæn teng Yüô-koh wô, Ng se-tsih z ngô-go ngasang, næn-dao hao bah-bah teng ngô tso z-ken ma? Ng wô hyiang ngô dao, ng kong-din dza-go? <sup>16</sup> Lah-pæn yiu lianggo nön: do-nön ming-z Li-üô, siao-nön ming-z Lah-kyih. <sup>17</sup> Li-üô ngæn-tsing yiu mao-bing, Lah-kyih siang-mao hao-k'en tsông-mun. <sup>18</sup> Yüô-koh æ-sih Lah-kyih: keh-lah wô, Ngô we-leh ng siao-nön Lah-kyih dzing-nyün voh-z ng ts'ih-nyin kong-fu. <sup>19</sup> Lah-pæn wô, Pô nön hyü-peh bih-nying, feh-jü hyü-peh ng: ka-ni ng hao ngô dô-kô deng-

tong. <sup>20</sup> Yüô-koh we-leh Lah-kyih voh-z ts'ih-nyin: ing-we ting æ-sih gyi, keh-lah k'en ts'ih nyin ziang kyi-nyih kong-fu ka.

15 拉班等雅各話:「爾雖即是我個外甥,難道好白白等我做事幹嗎?爾話向我道,爾工鈿咋個?」<sup>16</sup> 拉班有兩個因:大囡名字<u>利亞</u>,小囡名字<u>拉結</u>。<sup>17</sup> <u>利亞</u>眼睛有毛病,拉結相貌好看裝滿。<sup>18</sup> 雅各愛惜拉結,箇勒話:「我為了爾小囡拉結情願服侍爾七年工夫。」<sup>19</sup> 拉班話:「把囡許撥別人,弗如許撥爾,介呢爾好我大家庉東。」<sup>20</sup> 雅各為了拉結服侍七年,因為頂愛惜其,箇勒看七年像幾日工夫介。

<sup>21</sup> Yüô-koh teng Lah-pæn wô, Ngô-go nyih-ts yi-kying mun-de; ts'ing ng, pô ts'i-ts peh ngô, s-teh ngô hao teng gyi dong-zông. <sup>22</sup> Lah-pæn ziu jü-long keh di-fông-go cong-nying, bæn tsiu. <sup>23</sup> Yia-tao pô gyi do-nön Li-üô ling-ky'i peh Yüô-koh: Yüô-koh teng gyi dong-zông. <sup>24</sup> Lah-pæn yi pô ô-deo Sih-p'ô peh gyi nön Li-üô tso ô-deo. <sup>25</sup> Dinyi t'in-nyiang Yüô-koh k'en-kyin z Li-üô, teng Lah-pæn

wô, Ng dza-we z-ka dæ ngô? Ngô ky'i-feh-z we-leh Lahkyih voh-z ng-go ma? Dza-we hong-p'in ngô? <sup>26</sup> Lah-pæn wô, Feh-zing kô do-go, sin kô siao-go, læ ah-lah di-fông keh z tso-feh-læ-go. <sup>27</sup> Ng hao mun gyi ts'ih-nyih-go nyihts, ah-lah yia we pô Lah-kyih peh ng tso ng-go kong-din, ng tsæ voh-z ngô ts'ih-nyin. <sup>28</sup> Yüô-koh i gyi ka tso, mun gyi ts'ih-nyin-go nyih-ts: Lah-pæn yi pô nön Lah-kyih peh gyi tso ts'i-ts. <sup>29</sup> Ping-ts'ia Lah-pæn pô ô-deo Pih-lah peh gyi nön Lah-kyih tso ô-deo. <sup>30</sup> Yüô-koh teng Lah-kyih dong-zông, æ-sih Lah-kyih ko-jü Li-üô; 'eo-deo tsæ voh-z Lah-pæn ts'ih-nyin.

21 雅各等拉班話:「我個日子已經滿了,請爾把妻子 撥我,使得我好等其同牀。」<sup>22</sup> 拉班就聚攏箇地方個衆 人,辦酒。<sup>23</sup> 夜到把其大囡利亞領去撥雅各。雅各等其同 牀。<sup>24</sup> 拉班又把丫頭悉怕撥其囡利亞做丫頭。<sup>25</sup> 第二天亮 雅各看見是利亞,等拉班話:「爾咋會是介待我?我豈弗 是為了拉結服侍爾個嗎?咋會哄騙我?」<sup>26</sup> 拉班話:「弗 曾嫁大個,先嫁小個,來阿拉地方箇是做弗來個。<sup>27</sup> 爾好 滿其七日個日子,阿拉也會把<u>拉結</u>撥爾做爾個工鈿,爾再服侍我七年。」<sup>28</sup> 雅各依其介做,滿其七年個日子。<u>拉班</u>又把囡<u>拉結</u>撥其做妻子。<sup>29</sup> 並且<u>拉班</u>把丫頭<u>辟拉</u>撥其囡拉 結做丫頭。<sup>30</sup> 雅各等拉結同牀,愛惜拉結過如利亞,後頭再服侍拉班七年。

<sup>31</sup> Yiæ-'o-wô hyiao-teh Li-üô ziu we-ky'üoh, peh gyi sang-yiang, dæn-z Lah-kyih feh we sang. <sup>32</sup> Li-üô yiu singvüing sang ng-ts, c'ü gyi ming-z [1]Liu-bin; ing-we wô, Yiæ-'o-wô jih-dzæ z kyi-nyiæn ngô-go kw'u-ts'u; keh-tsao dziang-fu pih-ding we æ-sih ngô. 33 Tsæ yiu-sing sang ngts, wô, Yiæ-'o-wô t'ing-meng ngô ziu we-ky'üoh, keh-lah tsæ s-peh ngô ng-ts; ziu c'ü gyi ming-z <sup>[2]</sup>Si-min. <sup>34</sup> Yi yiusing sang ng-ts, wô, Keh-tsao dziang-fu tsong-we teng ngô yiu kao-nyin, ing-we ngô yi-kying sang sæn-go ng-ts peh gyi: ziu c'ü gyi ming-z [3]Li-vi. 35 Tsæ yiu-sing sang ng-ts, wô, Næn-kæn ngô we tsæn-me Yiæ-'o-wô, ziu c'ü gyi ming-z [4] Yiu-da: 'eo-deo feh sang-de.

31 耶和華曉得<u>利亞</u>受委屈,撥其生養,但是<u>拉結</u>弗會生。32 <u>利亞</u>有身孕生兒子,取其名字<u>流便</u>[1],因爲話:

「耶和華實在是記念我個苦楚,箇遭丈夫必定會愛惜我。」<sup>33</sup> 再有身生兒子,話:「耶和華聽聞我受委屈,箇勒再賜撥我兒子。」就取其名字<u>西緬<sup>[2]</sup>。<sup>34</sup> 又有身生兒子,話:「箇遭丈夫總會等我有膠黏,因爲我已經生三個兒子撥其。」就取其名字<u>利未<sup>[3]</sup>。<sup>35</sup> 再有身生兒子,話:「難間我會讚美耶和華。」就取其名字猶大<sup>[4]</sup>。後頭弗生了。</u></u>

- [1] Ziu-z K'en 'ô, ih-go ng-ts. 就是看下, 一個兒子。(原註)
- [2] Ziu-z T'ing-meng. 就是聽聞。(原註)
- [3] Ziu-z Yiu-kao-nyin. 就是有膠黏。(原註)
- [4] Ziu-z Tsæn-me. 就是讚美。(原註)

#### Ts. XXX.

Lah-kyih zi kyüoh-teh m-neh teng Yüô-koh sang ngts, ziu ky'i ah-tsi feh-ko, teng Yüô-koh wô, Peh ngô sang ng-ts: feh z-ka ngô iao si-de <sup>2</sup> Yüô-koh fah-ông, teng Lahkyih wô, Ngô næn-dao t'i Jing-ming kying-djü ng sangyiang ma? <sup>3</sup> Lah-kyih wô, Ngô-go ô-deo Pih-lah, ng hao teng gyi dong-zông, s-teh gyi sang ng-ts læ ngô kyiah-k'odeo; ka-ni ngô k'o-yi dzong gyi djün-cong tsih-dæ. <sup>4</sup> Lahkyih pô ô-deo Pih-lah peh gyi tso ah-yi; Yüô-koh teng gyi dong-zông. <sup>5</sup> Pih-lah yiu-sing, teng Yüô-koh sang ng-ts. <sup>6</sup> Lah-kyih wô, Jing-ming z [1]k'en-kwu ngô, t'ing ngô go sing-ing, s ng-ts peh ngô; ziu c'ü gyi ming-z <sup>[2]</sup>Dæn. <sup>7</sup> Lahkyih-go ô-deo Pih-lah tsæ yiu-sing, teng Yüô-koh sang dinyi ng-ts. <sup>8</sup> Lah-kyih wô, Ngô teng ah-tsi 'eo-ky'i-lih tsang, teh-sing-de; ziu c'ü gyi ming-z <sup>[3]</sup>Neh-da-li. <sup>9</sup> Li-üô k'enkyin zi feh sang-de, pô gyi ô-deo Sih-p'ô peh Yüô-koh tso ah-yi. <sup>10</sup> Li-üô-go ô-deo Sih-p'ô teng Yüô-koh sang ng-ts. <sup>11</sup> Li-üô wô, Yiu hyü-to læ-de: ziu c'ü gyi ming-z <sup>[4]</sup>Kyüôteh. <sup>12</sup> Li-üô-go ô-deo Sih-p'ô teng Yüô-koh sang di-nyi ngts. <sup>13</sup> Li-üô wô, Ngô yiu foh-ky'i; cong nyü-nying tsiang-læ yia we wô ngô yiu foh-ky'i; ziu c'ü gyi ming-z <sup>[5]</sup>Üô-shih.

拉結自覺得嘸得等雅各生兒子,就氣阿姊弗過,等雅 各話:「撥我生兒子, 弗是介我要死了。」<sup>2</sup> 雅各發快, 等 拉結話: 「我難道替神明禁除爾生養嗎?」 3 拉結話: 「我 個丫頭辟拉,爾好等其同牀,使得其生兒子來我腳쮜頭, 介呢我可以從其傳宗接代。」4拉結把丫頭辟拉撥其做阿 姨,雅各等其同床。5 辟拉有身,等雅各生兒子。6 拉結 話:「神明是看顧[1]我,聽我個聲音,賜兒子撥我。」就 取其名字但[2]。7拉結個丫頭辟拉再有身,等雅各生第二兒 子。8拉結話:「我等阿姊候氣力爭,得勝了。」就取其名 字納大利[3]。9利亞看見自弗生了,把其丫頭悉怕撥雅各做 阿姨。10 利亞個丫頭悉怕等雅各生兒子。11 利亞話: 「有 許多來了。」就取其名字迦得[4]。12 利亞個丫頭悉怕等雅 各生第二兒子。13 利亞話:「我有福氣,衆女人將來也會 話我有福氣。」就取其名字亞設[5]。

- [1] Ôh-wô, P'un-tön. 或話, 判斷。(原註)
- [2] Ziu-z P'un-tön. 就是判斷。(原註)

- [3] Ziu-z 'Eo-ky'i-lih. 就是候氣力。(原註)
- [4] Ziu-z Hyü-to. 就是許多。(原註)
- [5] Ziu-z Foh-ky'i. 就是福氣。(原註)

<sup>14</sup> Keh mah-go z-'eo Liu-bin tao din-li ky'i, p'ongdjoh hyün-ts'ao do læ peh ah-nyiang Li-üô; Lah-kyih teng Li-üô wô, Ng-go ng-ts hyün-ts'ao ts'ing ng feng-tin peh ngô. <sup>15</sup> Li-üô teng gyi wô, Ng tsin-djü-leh ngô dziang-fu, næn-dao z siao z-ken? næn-kæn wa iao do ngô ng-ts-go hyün-ts'ao ma? Lah-kyih wô, Ka-ni we-leh ng-go ng-ts hyün-ts'ao gyi kyih-mih hao teng ng soh-ko yia. <sup>16</sup> Yiakw'a Yüô-koh dzong din-li kyü-læ, Li-üô tseo-c'ih nyingtsih gyi, wô, Ng iao tao ngô di-fông læ, ing-we ngô z pô ngts-go hyün-ts'ao tso ding-din kwu ng. Keh yia Yüô-koh teng gyi dong-zông. <sup>17</sup> Jing-ming t'ing Li-üô, gyi yiu-sing, teng Yüô-koh sang di-ng-go ng-ts. <sup>18</sup> Li-üô wô, Ing-we ngô pô ô-deo peh dziang-fu, Jing-ming t'ing ngô-go kô-din: ziu c'ü gyi ming-z <sup>[1]</sup>Yi-sah-kyüô. <sup>19</sup> Li-üô yi yiu-sing, teng Yüô-koh sang di-loh-go ng-ts. <sup>20</sup> Li-üô wô, Jing-ming z pô

hao-hao kô-tsông s-peh ngô: keh-tsao dziang-fu tsong-we teng ngô dô-kô deng, ing-we ngô yi-kying teng gyi sang loh-go ng-ts: ziu c'ü gyi ming-z <sup>[2]</sup>Si-pu-leng. <sup>21</sup> 'Eo-deo sang ih-go nön, c'ü gyi ming-z <sup>[3]</sup>Ti-nô.

14 割麥個時候流便到田裏去,碰着萱草馱來撥阿孃利 亞。拉結等利亞話:「爾個兒子萱草請爾分點撥我。」15 利亞等其話:「爾佔住勒我丈夫,難道是小事幹?難間還 要馱我兒子個萱草嗎?」拉結話:「介呢為了爾個兒子萱 草,其今末好等爾宿過夜。」16 夜快雅各從田裏歸來,利 亞走出迎接其,話:「爾要到我地方來,因爲我是把兒子 個萱草做定鈿僱爾。」箇夜雅各等其同床。17神明聽利 亞, 其有身, 等雅各生第五個兒子。18 利亞話: 「因為我 把丫頭撥丈夫,神明聽我個價鈿。」就取其名字以薩迦 [1]。19 利亞又有身,等雅各生第六個兒子。20 利亞話: 「神明是把好好嫁妝賜撥我, 箇遭丈夫總會等我大家底, 因爲我已經等其生六個兒子。」就取其名字西布倫[2]。21 後頭生一個囡,取其名字底拿[3]。

[1] Ziu-z Kong-din. 就是工鈿。(原註)

- [2] Ziu-z Deng-leh. 就是庉勒。(原註)
- [3] Ziu-z P'un-tön. 就是判斷。(原註)
- <sup>22</sup> Jing-ming kyi-nyiæn Lah-kyih; Jing-ming yi t'ing gyi gyiu, s-teh gyi we sang-yiang. <sup>23</sup> Lah-kyih yiu sing-yüing, sang ng-ts, wô, Jing-ming yi-kying k'a-diao ngô-go wông-k'ong: <sup>24</sup> Ziu c'ü gyi ming-z <sup>[1]</sup>Iah-seh, wô, Yiæ-'o-wô we tsæ kô ih-go ng-ts peh ngô ts'eo.
- 22 神明記念<u>拉結</u>。神明又聽其求,使得其會生養。<sup>23</sup> <u>拉結</u>有身孕,生兒子,話:「神明已經揩掉我個惶恐。」<sup>24</sup> 就取其名字<u>約瑟</u><sup>[1]</sup>,話:「耶和華會再加一個兒子撥我湊。」
  - [1] Ziu-z Kô-ts'eo. 就是加湊。(原註)
- <sup>25</sup> Lah-kyih sang Iah-seh ts-'eo, Yüô-koh teng Lahpæn wô, Ts'ing ng, peh ngô kyü peng di-fông, zi oh-li ky'i. <sup>26</sup> Ngô we-leh voh-z ng sô teh-djoh-go ts'i-ts ng-nô, ts'ing ng kwe-peh ngô, fông ngô kyü-ky'i; ing-we ng hyiao-teh, ngô sô-yi voh-z ng-go dzing-tsih. <sup>27</sup> Lah-pæn teng gyi wô,

Ng hyiao-teh Yiæ-'o-wô z we-leh ng su-djông s-foh peh ngô: ziah-z ngô læ ng-go ngæn-zin teh-djoh eng-we, ts'ing ng teng ngô dô-kô deng. <sup>28</sup> Yi wô, Ts'ing ng ding ng-go kong-din, ngô hao peh ng. <sup>29</sup> Yüô-koh teng gyi wô, Ngô dza-go voh-z ng, dza-go kwun ng sang-k'eo, ng tu hyiaoteh-go. <sup>30</sup> Ngô feh-zing læ z-'eo, ng sô yiu-go z feh-to; yindzæ hying-wông z ngô læ ts-'eo Yiæ-'o-wô s-foh peh nggo: dæn-z ngô ni, soh-go z-'eo hao dzing-kô-lih-nyih? 31 Lah-pæn wô, Ka-ni, ngô hao peh ng soh-go tong-si? Yüôkoh wô, Hao-vong peh ngô soh-go tong-si; tæn-tsih keh-go z-ken ng ziah k'eng tso, ngô dzing-gyiu we teng ng ü yiang, k'en yiang. <sup>32</sup> Kyih-mih-ts ngô we tseo-cün ng-go sang-k'eo li-hyiang, pô væn-pah yiu tin-ts, yiu pæn-pô-go sang-k'eo, feng gyi c'ih; wa-yiu cong-seh-go wu-yiang, teng yiu pæn-pô yiu tin-ts-go sæn-yiang; keh-sing hao tso ngô-go kong-din. <sup>33</sup> Z-ka 'ô-tsao ngô kong-din læ ng minzin: væn-pah m-tin-ts m-pæn-pô-go sæn-yiang, feh-z cong-seh-go wu-yiang, ziu hao sön z ngô t'eo ng go: ngôgo kong-yi keh hao tso te-tsing. <sup>34</sup> Lah-pæn wô, Ngô dzing-nyün tsiao ng-go shih-wô ka tso. <sup>35</sup> Keh-nyih Lah-pæn pô yiu veng-lu yiu pæn-pô-go yüong sæn-yiang, væn-pah yiu tin-ts yiu pæn-pô, teng hwô-bah-go ts'-sæn-yiang, wa-yiu cong-seh-go wu-yiang, tu feng gyi c'ih, kao-fu zi ng-ts siu-li. <sup>36</sup> Teng Yüô-koh li-k'æ sæn-nyih-go lu-dzing: Yüô-koh-dzing-gyiu ü Lah-pæn dzing-loh-tong-go yiang-de.

25 拉結生約瑟之後,雅各等拉班話:「請爾,撥我歸本地方,自屋裏去。26 我為了服侍爾所得着個妻子兒囡,請爾歸撥我,放我歸去,因為爾曉得,我所以服侍爾個情節。」27 拉班等其話:「爾曉得耶和華是為了爾素常賜福撥我,若是我來爾個眼前得着恩惠,請爾等我大家底。」28 又話:「請爾定爾個工鈿,我好撥爾。」29 雅各等其話:「我咋個服侍爾,咋個管爾牲口,爾都曉得個。30 我弗曾來時候,爾所有個是弗多,現在興旺是我來之後耶和華賜福撥爾個。但是我呢,啥個時候好成家立業?」31 拉班話:「介呢,我好撥爾啥個東西?」雅各話:「好甮撥我

啥個東西,單只箇個事幹爾若肯做,我仍舊會等爾餵羊,看羊。<sup>32</sup> 今末仔我會走轉爾個牲口裏向,把凡百有點子、有瘢疤個牲口,分其出,還有棕色個湖羊,等有瘢疤有點子個山羊,箇星好做我個工鈿。<sup>33</sup> 是介下遭我工鈿來爾面前。凡百嘸點子嘸瘢疤個山羊,弗是棕色個湖羊,就好算是我偷爾個,我個公義箇好做對證。」<sup>34</sup> 拉班話: 「我情願照爾個說話介做。」<sup>35</sup> 箇日拉班把有紋路有瘢疤個雄山羊,凡百有點子有瘢疤,等花白個雌山羊,還有棕色個湖羊,和分其出,交付自兒子手裏。<sup>36</sup> 等雅各離開三日個路程。雅各仍舊餵拉班剩落東個羊隊。

<sup>37</sup> Yüô-koh do yiang-liu jü, fong-jü, 'ang-jü-go neng ô-ts, poh-diao gyi bi, tso-leh veng-lu, s-teh ô-ts li-hyiang-go bah lu-c'ih-læ. <sup>38</sup> Gyi læ sang-k'eo ky'üoh-shü-go z-'eo, pô poh-bi-go ô-ts, fông-læ shü-keo-li teng shü-zao-li gyi-lah-go min-zin: s-teh gyi-lah ky'üoh-shü-go z-'eo hao ziu-t'æ. <sup>39</sup> Keh-sing yiang dziao-leh ô-ts ziu-t'æ; sô sang-c'ih-læ-go sang-k'eo yiu veng-lu, yiu tin-ts, yiu pæn-pô. <sup>40</sup> Yüô-koh feng-k'æ siao-yiang, pô yiang-go min-k'ong dziao-leh

Lah-pæn de-li yiu veng-lu, teng cong-seh-go: dæn-z gyi-zi-go yiang ling-nga fông-læ ih-t'ah di-fông, feh teng Lah-pæn-go sang-k'eo kah-dzeh. <sup>41</sup> P'ong-djoh tsah-công-go sang-k'eo ziu-t'æ-go z-'eo, Yüô-koh fông ô-ts læ shü-zao-li teng shü-keo-li, dziao keh-sing sang-k'eo-go min-zin, s-teh gyi-lah læ ô-ts-go di-fông hao ziu-t'æ. <sup>42</sup> P'ong-djoh feh tsah-công-go sang-k'eo, ziu feh fông ô-ts; ka-ni, feh tsah-công-go kwe-peh Lah-pæn: tsah-công-go kwe-peh Yüô-koh-de. <sup>43</sup> Gyi ziu hying-wông ky'i-læ: yiu hyü-to sang-k'eo, ô-deo, nu-boh, loh-do, li-ts keh-sing.

37 雅各馱楊柳樹、楓樹、杏樹個嫩椏枝,剝掉其皮,做勒紋路,使得椏枝裏向個白露出來。38 其來牲口喫水個時候,把剝皮個椏枝,放來水溝裏等水槽裏其拉個面前,使得其拉喫水個時候好受胎。39 箇星羊朝勒椏枝受胎,所生出來個牲口有紋路,有點子,有瘢疤。40 雅各分開小羊,把羊個面孔朝勒拉班隊裏有紋路,等棕色個。但是其自個羊另外放來一埭地方,弗等拉班個牲口夾雜。41 碰着扎壯個牲口受胎個時候,雅各放椏枝來水槽裏等水溝裏,

朝箇星牲口個面前,使得其拉來椏枝個地方好受胎。<sup>42</sup> 碰着弗扎壯個牲口,就弗放椏枝。介呢,弗扎壯個歸撥<u>拉</u>班,扎壯個歸撥<u>雅各</u>了。<sup>43</sup> 其就興旺起來,有許多牲口、 丫頭、奴僕、駱駝、驢子箇星。

## Ts. XXXI.

Yüô-koh t'ing-meng Lah-pæn ng-ts wô, Ah-lah ah-tiago kô-kyi, Yüô-koh long-tsong deh-leh-ky'i-de: gyi dzong ah-lah ah-tia sô yiu-go teh-djoh keh-go dzæ-veh. <sup>2</sup> Yüô-koh k'en-kyin Lah-pæn-go min-seh dæ gyi feh ziang zin-deo ka. <sup>3</sup> Yiæ-'o-wô teng Yüô-koh wô, Ng kyü ah-tia di-fông teng ng-zi-go dzoh-cong ky'i; Ngô pih-ding teng ng dongde. <sup>4</sup> Yüô-koh ts'a nying eo Lah-kyih teng Li-üô tseo-c'ih tao din-deo, yiang-de-go di-fông; <sup>5</sup> teng gyi-lah wô, Ngô k'en ng ah-tia min-seh dæ ngô feh ziang zin-deo ka: dænz ngô ah-tia-go Jing-ming su-djông teng ngô dô-kô lætong. <sup>6</sup> Ngô 'eo-ky'i-lih voh-z ng-go ah-tia, z ng-lah hyiaoteh-go. <sup>7</sup> Ng ah-tia yi-kying p'in ngô, jih-tsao diao ngô kong-din: dæn-z Jing-ming m-neh peh gyi 'æ ngô. <sup>8</sup> Gyi ziah-z wô, Yiu tin-ts-go tso ng kong-din, sang-k'eo tu sangc'ih yiu tin-ts-go: ziah-z wô, Yiu veng-lu-go tso ng kongdin, sang-k'eo tu sang-c'ih yiu veng-lu-go. <sup>9</sup> Ka-ni, z Jingming do ng ah-tia sang-k'eo, s-peh ngô-go. <sup>10</sup> P'ong-djoh sang-k'eo ziu-t'æ z-'eo, ngô ngæn-tsing dæ-ky'i mông-li k'en-kyin boh læ ts'-yiang zông-teng-go yüong-yiang, tu z yiu veng-lu yiu tin-ts, teng hwô-bah-go. <sup>11</sup> Jing-ming-go t'in-s mông li-hyiang teng ngô wô, Yüô-koh! Ngô wô, Ngô læ-tong. 12 Gyi wô, Ng ngæn-tsing dæ-ky'i k'en boh læ ts'yiang zông-teng-go yüong-yiang, tu z yiu veng-lu, yiu tints, teng hwô-bah-go: ing-we Lah-pæn tao ng-go z-ken, Ngô yi-kying k'en-kyin-de. <sup>13</sup> Ngô z Pah-deh-li-go Jing-ming, ziu-z ng pô yiu fu djü-ts, teng Ngô hyü nyün-sing-go difông: ng næn-kæn ky'i-læ, tseo-c'ih dông-deo di-fông, kyü ng-zi dzoh-cong-go di-fông ky'i. <sup>14</sup> Lah-kyih teng Li-üô we-teh gyi wô, Læ ah-tia-go oh-li næn-dao wa-yiu fengk'æ-go kô-kyi, yi-loh-go ts'æn-nyih peh ah-lah ma? <sup>15</sup> Gyi soh feh-z sön ah-lah z nga-deo nying ma? Ing-we gyi yi-kying ma-diao ah-lah, yi ky'üoh-meh ah-lah-go nying-ts. <sup>16</sup> Næn-kæn Jing-ming do ah-lah ah-tia-go dzæ-veh, tu joh-ü ah-lah teng sah-lah ng-ts: ka-ni væn-pah Jing-ming sô feng-fu ng-go, ng hao i-leh Gyi tso.

雅各聽聞拉班兒子話:「阿拉阿爹個家計,雅各攏總 奪了去了。其從阿拉阿爹所有個得着箇個財物。」2雅各看 見拉班個面色待其弗像前頭介。3 耶和華等雅各話: 「爾歸 阿爹地方等爾自個族種去,我必定等爾同隊。」4雅各差人 謳拉結等利亞走出到田頭,羊隊個地方,<sup>5</sup>等其拉話:「我 看爾阿爹面色待我弗像前頭介, 但是我阿爹個神明素常等 我大家來東。<sup>6</sup> 我候氣力服侍爾個阿爹,是爾拉曉得個。<sup>7</sup> 爾阿爹已經騙我,十遭調我工鈿,但是神明嘸得撥其害 我。8 其若是話: 『有點子個做爾工鈿, 牲口都生出有點子 個。』若是話:『有紋路個做爾工鈿,牲口都生出有紋路 個。』<sup>9</sup>介呢,是神明馱爾阿爹牲口,賜撥我個。<sup>10</sup> 碰着牲 口受胎時候, 我眼睛抬起夢裏看見伏來雌羊上頂個雄羊,

都是有紋路有點子,等花白個。11 神明個天使夢裏向等我 『雅各!』我話:『我來東。』12 其話:『爾眼睛抬 話: 起看伏來雌羊上頂個雄羊,都是有紋路有點子,等花白 個。因為拉班到爾個事幹,我已經看見了。13 我是伯特利 個神明,就是爾把油傳[1]柱子,等我許願心個地方。爾難 間起來,走出蕩頭地方,歸爾自族種個地方去。』」14拉 結等利亞回答其話:「來阿爹個屋裏難道還有分開個家 計,遺落個產業撥阿拉嗎?<sup>15</sup> 其啥弗是算阿拉是外頭人 嗎?因爲其已經賣掉阿拉,又喫沒阿拉個銀子。<sup>16</sup> 難間神 明馱阿拉阿爹個財物,都屬於阿拉等撒拉兒子。介呢凡百 神明所吩咐爾個,爾好依勒其做。」

#### [1] 傅油: 塗油。

<sup>17</sup> Yüô-koh ziu dong-sing, peh ng-ts ts'i-ts gyi-leh lohdo. <sup>18</sup> Yi ta-leh gyi long-tsong sang-k'eo, teng gyi sô yiu-go dzæ-veh, gyi-go sang-k'eo ziu-z læ Pô-t'æn-üô-læn sô tehdjoh-go, iao kyü-tao Kyüô-nen di-fông, ah-tia Yi-sah di-fông ky'i. <sup>19</sup> Ka z-'eo Lah-pæn z c'ih-meng ky'i tsin yiangmao: Lah-kyih t'eo-lah gyi ah-tia sô yiu-go ngeo-ziang. <sup>20</sup>

Yüô-koh t'eo-bun dao-tseo; gyi dong-sing ky'i, feh t'ong-cü Üô-læn nying Lah-pæn. <sup>21</sup> Ziu ta-leh ih-ts'ih sô yiu-go dao-tseo, dong-sing du-ko <sup>[1]</sup>'O, hyiang-djoh Kyi-lih sæn ka ky'i. <sup>22</sup> Tao di-sæn-nyih yiu nying pô Yüô-koh dao-tseo t'ong-cü Lah-pæn. <sup>23</sup> Lah-pæn ziu ling-leh gyi hyüong-di ken-zông-ky'i: tseo-leh ts'ih-nyih-go lu-dzing læ Kyi-lih sæn ken-djoh-de. <sup>24</sup> Yia-tao mông-li Jing-ming ling-djoh Üô-læn nying Lah-pæn, teng gyi wô, Ng yüong siao-sing, hao wô wa wô tu feh iao teng Yüô-koh kông.

17 雅各就動身,撥兒子妻子騎勒駱駝。18 又帶勒其攏總牲口,等其所有個財物,其個牲口就是來巴坦亞蘭所得着個,要歸到<u>迦南</u>地方,阿爹<u>以撒</u>地方去。19 介時候<u>拉班</u>是出門去剪羊毛。拉結偷勒其阿爹所有個偶像。20 雅各偷伴逃走,其動身去,弗通知亞蘭人拉班。21 就帶勒一切所有個逃走,動身渡過河[1],向着<u>基列</u>山介去。22 到第三日有人把雅各逃走通知拉班。23 拉班就領勒其兄弟趕上去,走勒七日個路程來基列山趕着了。24 夜到夢裏神明臨着亞

蘭人<u>拉班</u>,等其話:「爾用小心,好話壞話都弗要等<u>雅各</u> 講。」

[1] Ziu-z Pah-lah-'o. 就是伯拉河。(原註)

<sup>25</sup> Lah-pæn ken-djoh Yüô-koh. Yüô-koh yi-kying tah tsiang-bong læ sæn-li; Lah-pæn gyi hyüong-di yia læ Kyilih sæn tah tsiang-bong. <sup>26</sup> Lah-pæn teng Yüô-koh wô, Ng dza tso fah, t'eo-bun dao-tseo, ta-leh ngô-go nön, tsingziang do pao-kyin lo-liah ka-go? <sup>27</sup> Ng dza-we s-'ô daotseo, li-k'æ ngô t'eo-bun ky'i, yia feh wô hyiang ngô dao, s-teh ngô hao c'ü-tang dæn-ts'ông hwun-hwun-hyi-hyi song ng ky'i? <sup>28</sup> Yia m-neh peh ngô ts'ing ng-ts nön-go cü? ng tso-go z-ken jih-dzæ tso-leh yia-ky'i-go. 29 'Æ ng-go gyün-ping læ ngô siu-li; dæn-z ng ah-tia-go Jing-ming zônyih yia-tao teng ngô wô, Ng yüong siao-sing hao wô wa wô tu feh-iao teng Yüô-koh kông. <sup>30</sup> Næn-kæn ng se-tsih ting kyi-kwô ah-tia oh-li pih-ding iao kyü-ky'i, dza-we t'eo ngô-go jing-ziang? 31 Yüô-koh we-teh Lah-pæn, wô, Ingwe ngô p'ô ng; ngô i-s k'ong-p'ô ng we ngang liu ng-go

nön li-k'æ ngô; <sup>32</sup> kông-tao ng-go jing-ziang, ng læ jü-go di-fông zing-djoh, hao-vong peh gyi weh: læ ah-lah hyüong-di min-zin, ts'ing k'en 'ah-li ih-yiang z ng-go tong-si, ng-zi hao do-leh ky'i. Ing-we Yüô-koh feh-hyiaoteh Lah-kyih yi-kying t'eo-tih-de. <sup>33</sup> Lah-pæn ziu tseotsing Yüô-koh-go tsiang-bong, Li-üô-go tsiang-bong, teng liang-go ô-deo tsiang-bong, tu zing-feh-djoh: 'eo-deo tseoc'ih Li-üô-go tsiang-bong, tseo-tsing Lah-kyih-go tsiangbong. <sup>34</sup> Lah-kyih z yi-kying pô ngeo-ziang k'ông-leh lohdo-go en-ts 'ô; zi zo-læ zông-deo. Lah-pæn en tsiang-bong ky'i zing, tu zing feh-djoh. <sup>35</sup> Lah-kyih teng ah-tia wô, Ngô yiu yüih-kying læ ngô kyi-sing-li, feh-neng-keo bô-ky'i nying-tsih ng: dæn-nyün ng cü m-nao ô-wông. Keh-tsao Lah-pæn zing ngeo-ziang zing-feh-djoh.

<sup>25</sup> 拉班趕着雅各。雅各已經搭帳篷來山裏,拉班其兄弟也來基列山搭帳篷。<sup>26</sup> 拉班等雅各話:「爾咋做法,偷伴逃走,帶勒我個囡,正像馱寶劍擄掠介個?<sup>27</sup> 爾咋會私下逃走,離開我偷伴去,也弗話向我道,使得我好吹打彈

唱, 歡歡喜喜送爾去?28 也嘸得撥我親兒子囡個嘴?爾做 個事幹實在做勒野氣個。29害爾個權柄來我手裏。但是爾 阿爹個神明昨日夜到等我話:『爾用小心好話壞話都弗要 等雅各講。』30難間爾雖即頂記掛阿爹屋裏必定要歸去, 咋會偷我個神像?」<sup>31</sup>雅各回答拉班,話:「因為我怕 爾,我意思恐怕爾會硬留爾個囡離開我。32講到爾個神 像,爾來誰個地方尋着,好甮撥其活。來阿拉兄弟面前, 請看何裏一樣是爾個東西,爾自好馱勒去。」 因為雅各弗 曉得拉結已經偷的了。<sup>33</sup> 拉班就走進雅各個帳篷,利亞個 帳篷, 等兩個丫頭帳篷, 都尋弗着。後頭走出利亞個帳 篷,走進拉結個帳篷。<sup>34</sup>拉結是已經把偶像囥勒駱駝個鞍 子下,自坐來上頭。拉班按帳篷去尋,都尋弗着。<sup>35</sup>拉結 等阿爹話:「我有月經來我肌身裏,弗能夠爬起迎接爾。 但願爾嘴嘸得好啞喤。」箇遭拉班尋偶像尋弗着。

<sup>36</sup> Keh-tsao Yüô-koh fah-ông, p'i-bing Lah-pæn, ziu teng Lah-pæn z-ka wô, Ngô yiu soh-go ts'o-c'ü, yiu soh-go ze-ky'in, ng we ka ho-soh ken-zông læ? <sup>37</sup> Ng dzæ-s seo ngô-go tong-si, z ng oh-li-go yiu soh-si zing-djoh ma? Hao

fông-læ ngô hyüong-di teng ng hyüong-di-go min-zin, peh gyi-lah læ ng ngô-cong-nyiang p'un-tön. <sup>38</sup> Keh nyiænnyin li-hyiang ngô teng ng dô-kô deng-kæn: ng-go ts' wuyiang sæn-yiang m-yiu sông-diao gyi-go t'æ: ng-go yüongyiang ngô yia m-teh ky'üoh-ko. <sup>39</sup> Sông-'æ-go ngô feh kwe-peh ng, ngô-zi pu-tsoh: feh-leng nyih-li yia-li t'eo-dao ky'i-go, ng hyiang ngô-go siu-li t'ao-wæn. 40 Keh-cong-ka nyih-li t'in-'en ngô iao sa-sah; yia-tao loh-sông, ngô iao tong-sah; s-teh ngæn-tsing feh-da-li pi-long kw'eng-joh. 41 Z-ka ngô læ ng-go oh-li voh-z ng nyiæn-nyin; we-leh ng liang-go nön jih-s nyin, we-leh ng-go sang-k'eo yi-z lohnyin, dæn-z ng jih-tsao diao ngô-go kong-din. 42 Ngô ahtia-go Jing-ming ziu-z Üô-pah-lah-hen-go Jing-ming, Yisah-go P'ô-gyü, ziah feh teng ngô dô-kô læ-tong, ng nænkæn pih-ding ts'a ngô k'ong-siu kyü-ky'i: ky'ü-leh Jingming k'en-kwu ngô-go sing-kw'u, teng ngô siu-li-go laoloh, keh-lah zô-nyih yia-tao tsah-vah ng.

36 窗遭雅各發快,批評拉班,就等拉班是介話:「我 有啥個錯處,有啥個罪愆,爾會介火速趕上來?37爾纔始 搜我個東西, 是爾屋裏個有啥西尋着嗎?好放來我兄弟等 爾兄弟個面前,撥其拉來爾我中央判斷。38 箇廿年裏向我 等爾大家 底間。 爾個雌湖羊山羊 嘸有 喪掉 其個胎, 爾個雄 羊我也嘸得喫過。<sup>39</sup> 傷害個我弗歸撥爾,我自補足。弗論 日裏夜裏偷盜去個,爾向我個手裏討還。40 箇種介日裏天 旱我要曬煞; 夜到落霜, 我要凍煞, 使得眼睛弗大裏閉攏 睏熟。<sup>41</sup> 是介我來爾個屋裏服侍爾廿年,爲了爾兩個囡十 四年,為了爾個牲口又是六年,但是爾十遭調我個工鈿。42 我阿爹個神明就是亞伯拉罕個神明,以撒個怕懼,若弗等 我大家來東, 爾難間必定差我空手歸去。虧勒神明看顧我 個辛苦,等我手裏個勞碌,箇勒昨日夜到責罰爾。」

<sup>43</sup> Lah-pæn we-teh Yüô-koh wô, Keh-sing nön tu z ngô-go nön, keh-sing ng-nô tu z ngô-go ng-nô: keh-sing sang-k'eo tu z ngô-go sang-k'eo: væn-pah ng k'en-kyin-go tu z ngô-go: kyih-mih teng ngô-go nön lin gyi-lah sang-go ng-ts ngô hao dza tso ni? <sup>44</sup> Ka-ni læ, ah-lah hao dô-kô lih-

iah ziu hao tso ng teng ngô-go te-tsing. 45 Yüô-koh do ihkw'e zah-deo, lih-ky'i tso djü-ts. 46 Yi teng cong hyüong-di wô, Ng-lah hao jü-long zah-deo: gyi-lah ziu do zah-deo tso ih-go kao-sæn-te; læ kao-sæn-te-li ky'üoh-zih. <sup>47</sup> Lah-pæn c'ü keh kao-sæn-te ming-z <sup>[1]</sup>Yih-kyiah-sah-ha-t'u-da; Yüô-koh c'ü gyi ming-z <sup>[2]</sup>Kyüô-lih. <sup>48</sup> Lah-pæn wô, Kehgo te læ ng ngô cong-nyiang hao tso te-tsing: keh-lah c'ü gyi ming-z <sup>[3]</sup>Kyüô-lih. <sup>49</sup> Yia kyiao-leh <sup>[4]</sup>Mih-z-pô, wô, Ah-lah bih-k'æ-go ts-'eo, læ ng ngô cong-nyiang dænnyün Yiæ-'o-wô k'en-tong. <sup>50</sup> Ng ziah-z we-ky'üoh ngô-go nön, læ ngô nön ts-nga ling-nga dæ ts'i-ts, se-tsih ah-lah m-nying dô-kô læ-kæn, dæn-z Jing-ming we læ ng ngô cong-nyiang tso te-tsing. <sup>51</sup> Lah-pæn yi teng Yüô-koh wô, K'en keh-go kao-sæn-te, k'en keh-go djü-ts, ziu-z ngô sô en læ ng ngô cong-nyiang-go. <sup>52</sup> Keh-go kao-sæn-te tso tetsing, keh-go djü-ts tso te-tsing, ngô pih-ding feh tseo-ko keh-go kao-sæn-te ky'i 'æ ng; ng yia pih-ding feh tseo-ko keh-go kao-sæn-te keh-go djü-ts læ 'æ ngô. <sup>53</sup> Dæn-nyün Üô-pah-lah-hen-go Jing-ming, Nô-ngoh-go Jing-ming, ziu-z gyi-lah ah-tia-go Jing-ming læ ng ngô go cong-nyiang hao p'un-tön. Yüô-koh ts-tin gyi ah-tia Yi-sah-go P'ô-gyü vah-tsiu. <sup>54</sup> Yüô-koh læ sæn-li hyin-tsi, ts'ing cong hyüong-di ky'üoh-ping: gyi-lah ziu ky'üoh-ts læ sæn-li soh-ko-yia. <sup>55</sup> Di-nyi nyih, Lah-pæn tsao t'in-nyiang bô-ky'i, ts'ing-ts'ing ng-ts nön go cü, coh-foh gyi-lah: 'eo-deo Lah-pæn kyü gyi-zi-go peng di-fông ky'i.

43 拉班回答雅各話:「箇星囡都是我個囡,箇星兒囡都是我個兒囡,箇星牲口都是我個牲口。凡百爾看見個都是我個,今末等我個囡連其拉生個兒子我好咋做呢?44 介呢,來,阿拉好大家立約就好做爾等我個對證。」45 雅各馱一塊石頭,立起做柱子。46 又等衆兄弟話:「爾拉好聚攏石頭。」其拉就馱石頭做一個高山堆,來高山堆裏喫食。47 拉班取箇高山堆名字亦甲撒哈土大[1],雅各取其名字迦列[2]。48 拉班話:「箇個堆來爾我中央好做對證。箇勒取其名字迦列[3]。」49 也叫勒蜜是巴[4],話:「阿拉別開個之後,來爾我中央但願耶和華看東。50 爾若是委曲我

個囡,來我囡之外另外抬妻子,雖即阿拉嘸人大家來問,但是神明會來爾我中央做對證。」<sup>51</sup> 拉班又等雅各話:「看箇個高山堆,看箇個柱子,就是我所安來爾我中央個。<sup>52</sup> 箇個高山堆做對證,箇個柱子做對證,我必定弗走過箇個高山堆去害爾。爾也必定弗走過箇個高山堆箇個柱子來害我。<sup>53</sup> 但願亞伯拉罕個神明,拿鶴個神明,就是其拉阿爹個神明來爾我個中央好判斷。」<u>雅各</u>指點其阿爹<u>以</u>撒個怕懼罰咒。<sup>54</sup> 雅各來山裏獻祭,請衆兄弟喫餅。其拉就喫仔來山裏宿過夜。<sup>55</sup> 第二日,拉班早天亮爬起,親親兒子囡個嘴,祝福其拉。後頭拉班歸其自個本地方去。

## Ts. XXXII.

Yüô-koh yi dong-sing ky'i, Jing-ming-go t'in-s p'ong-djoh gyi. <sup>2</sup> Yüô-koh k'en-kyin gyi-lah, wô, Keh z Jing-ming-go ping-tsiang; ziu c'ü gyi di-ming <sup>[1]</sup>Mô-ha-nyiæn. <sup>3</sup> Yüô-koh ts'a nying sin tao Si-r, ziu-z Yi-tong-go di-fông, ky'i kyin gyi ah-ko Yi-sao; <sup>4</sup> feng-fu gyi-lah, wô, Ng hao

teng ngô cũ Yi-sao wô, Ng-go nu-boh Yüô-koh wô, Ngô z tæn-koh læ Lah-pæn di-fông ih-dzih tao næn-kæn. <sup>5</sup> Ngô yiu ngeo yiang li-ts teng nu-boh ô-deo keh-sing; deh-we ts'a læ wô hyiang cü dao, iao teh-djoh eng-we læ ng-go ngæn-zin.

雅各又動身去,神明個天使碰着其。<sup>2</sup> 雅各看見其拉,話:「箇是神明個兵將。」就取其地名<sup>[1]</sup> 瑪哈念。<sup>3</sup> 雅各差 人先到西珥,就是以東個地方,去見其阿哥以掃。<sup>4</sup> 吩咐其拉,話:「爾好等我主以掃話:『爾個奴僕雅各話:我是 耽擱來拉班地方一直到難間。<sup>5</sup> 我有牛羊驢子等奴僕丫頭箇星,特為差來話向主道,要得着恩惠來爾個眼前。』」

[1] Ziu-z Ping-de. 就是兵隊。(原註)

<sup>6</sup> Ts'a-ky'i-go nying kyü-læ t'ong-cü Yüô-koh, wô, Ahlah tao keh-deo k'en-kyin ng ah-ko Yi-sao: gyi næn-kæn ta-leh s-pah-go nying læ nying-tsih ng-de. <sup>7</sup> Yüô-koh p'ô-gyü hwông-hwông mông-mông pô keng gyi-go nying teng ngeo yiang loh-do keh-sing, feng tso liang de. <sup>8</sup> Gyi wô,

Ziah-z Yi-sao læ tang keh ih-de, ka dzing-loh-tong keh ihde hao bi-ko.

<sup>6</sup> 差去個人歸來通知雅各,話:「阿拉到箇頭看見爾阿哥以掃。其難間帶勒四百個人來迎接爾了。」<sup>7</sup> 雅各怕懼,慌慌忙忙把跟其個人等牛羊駱駝箇星,分做兩隊。<sup>8</sup> 其話:「若是以掃來打箇一隊,介剩落東箇一隊好避過。」

<sup>9</sup> Yüô-koh wô, ngô yia-yia Üô-pah-lah-hen-go Jingming, ngô ah-tia Yi-sah-go Jing-ming, Yiæ-'o-wô, Ng teng ngô wô-ko, Hao kyü ng peng di-fông, teng ng-zi-go dzohcong ky'i, Ngô pih-ding s eng-we peh ng. <sup>10</sup> Ng ih-ts'ih sô s-peh Ng nu-boh-go dzing-jih eng-c'ong, ziu-z ih-ngænngæn ngô tu tông-feh-ky'i; ing-we ngô zin-deo do-leh ihkwang kweng-ts ko keh-go Iah-dæn 'o, næn-kæn z yiu keh-liang de. <sup>11</sup> Gyiu Ng, kyiu ngô c'ih ah-ko-go siu-li, ziuz Yi-sao-go siu-li: ing-we ngô p'ô gyi, k'ong-p'ô gyi læ sah ngô, lin ng-ts teng gyi ah-nyiang. <sup>12</sup> Ng zin-deo wô, Ngô pih-ding s eng-we peh ng, yi s-teh ng-go 'eo-dæ ziang hæli-go sô-nyi ka to, su tu su-feh pin.

9<u>雅各</u>話:「我爺爺<u>亞伯拉罕</u>個神明、我阿爹<u>以撒</u>個神明,耶和華,爾等我話過,『好歸爾本地方,等爾自個族種去,我必定賜恩惠撥爾。』<sup>10</sup>爾一切所賜撥爾奴僕個誠實恩寵,就是一眼眼我都當弗起,因為我前頭馱勒一梗棍子過箇個<u>約但</u>河,難間是有箇兩隊。<sup>11</sup> 求爾,救我出阿哥個手裏,就是<u>以掃</u>個手裏。因為我怕其,恐怕其來殺我,連兒子等其阿孃。<sup>12</sup>爾前頭話,我必定賜恩惠撥爾,又使得爾個後代像海裏個沙泥介多,數都數弗遍。」

Yüô-koh læ keh-deo soh-ko yia; ziu pô gyi siu-li sô yiu-go tso li-veh ky'i song gyi ah-ko Yi-sao. <sup>14</sup> Ziu-z ts'-sæn-yiang nyi-pah tsah, yüong-sæn-yiang nyiæn-tsah, ts'-wu-yiang nyi-pah tsah, yüong-wu-yiang nyiæn-tsah. <sup>15</sup> Yiu na-go loh-do sæn-jih tsah, lin gyi siao loh-do, ts'-ngeo s-jih tsah, yüong-ngeo jih-tsah, ts'-li-ts nyiæn-tsah, siao li-ts jih-tsah. <sup>16</sup> Sô feng-go keh-sing de-su yiang-tang-yiang, kao-fu nu-boh siu-li, teng gyi-lah wô, Ng tseo-læ ngô-go zin-deo, s-teh de-tang-de cong-nyiang k'ong ih-t'ön. <sup>17</sup> Gyi feng-fu zông-zin-go nying wô, Ziah-z ngô ah-ko Yi-sao

p'ong-djoh ng, meng ng wô, Ng z jü? iao tao 'ah-li ky'i? ng zin-deo keh-sing sang-k'eo z jü-go? ng hao wô, Keh z nggo nu-boh Yüô-koh tso li-veh song ngô cü Yi-sao-go: gyi yia læ ah-lah-go 'eo-pe. 19 Yi feng-fu di-nyi-go, di-sæn-go, teng væn-pah keng-leh de-tang-de 'eo-deo go, wô, Ng-lah p'ong-djoh Yi-sao hao z-ka wô hyiang gyi dao. <sup>20</sup> Ng yi hao wô, Ng-go nu-boh Yüô-koh læ ah-lah-go 'eo-pe. Ing-we Yüô-koh wô, Ngô pô li-veh sin song-ky'i teng Yi-sao kông-'o, 'eo-deo tsæ teng gyi kyin-min: ka-ni iao-bông gyi k'eng tsih-ziu ngô. <sup>21</sup> Li-veh ziu sin song-ky'i; keh yia Yüôkoh soh læ cong-nying li-hyiang. <sup>22</sup> Yia-tao bô-ky'i, lingleh liang-go ts'i-ts, liang-go ô-deo, teng jih-ih-go ng-ts, tu liao-ko Yüô-boh du. <sup>23</sup> Yüô-koh peh gyi-lah liao-ko keh-go ky'i-k'ang, lin gyi sô yiu-go yia s-teh gyi liao ko-ky'i.

<sup>13</sup> 雅各來箇頭宿過夜,就把其手裏所有個做禮物去送 其阿哥<u>以掃</u>。<sup>14</sup> 就是雌山羊二百隻,雄山羊廿只,雌湖羊 二百隻,雄湖羊廿只。<sup>15</sup> 有奶個駱駝三十隻,連其小駱 駝,雌牛四十隻,雄牛十隻,雌驢子廿只,小驢子十隻。<sup>16</sup> 所分個箇星隊數樣打樣,交付奴僕手裏,等其拉話:「爾 走來我個前頭, 使得隊打隊中央空一象。」<sup>17</sup> 其吩咐上前 「若是我阿哥以掃碰着爾,問爾話:『爾是誰? 個人話: 要到何裏去?爾前頭箇星牲口是誰個?』爾好話: 『箇是 爾個奴僕雅各做禮物送我主以掃個。其也來阿拉個後 背。』」<sup>19</sup> 又吩咐第二個、第三個,等凡百跟勒隊打隊後 頭個,話:「爾拉碰着以掃好是介話向其道。20爾又好 話:『爾個奴僕雅各來阿拉個後背。』」因為雅各話: 「我把禮物先送去等以掃講和,後頭再等其見面,介呢要 防其肯接受我。」21 禮物就先送去。箇夜雅各宿來衆人裏 向。<sup>22</sup> 夜到爬起,領勒兩個妻子,兩個丫頭,等十一個兒 子,都蹽過雅泊渡。<sup>23</sup>雅各撥其拉蹽過箇個溪坑,連其所 有個也使得其蹽過去。

<sup>24</sup> Yüô-koh doh-zi dzing-loh-tong, yiu ih-go nying teng gyi pi-vu ih-dzih tao t'in kw'a-liang. <sup>25</sup> Keh-go nying k'en-kyin tang gyi feh ko, ziu nyiah gyi do-t'e-go gao-kwu, keh-lah pi-vu-go z-'eo, Yüô-koh do-t'e gao-kwu t'eh-yüih. <sup>26</sup> Keh-go nying wô, T'in kw'a liang-de; hao fông ng ky'i.

Yüô-koh wô, Ng ziah-z feh coh-foh peh ngô, ngô feh-k'eng fông ng ky'i. <sup>27</sup> Gyi z-ka wô, Ng soh-go ming-z? Gyi wô, Yüô-koh. <sup>28</sup> Gyi yi wô, Keh-tsao feh tsæ eo ng-go ming-z Yüô-koh, z hao eo [1]Yi-seh-lih: ing-we-ng teng Jing-ming teng nying pi vu, yi-kying teh-sing-de. <sup>29</sup> Yüô-koh meng Gyi, wô, Ts'ing Ng wô hyiang ngô dao Ng-go ming-z. Gyi wô, Dza-we meng Ngô-go ming-z? Ziu læ keh-deo coh-foh peh gyi. <sup>30</sup> Yüô-koh eo keh-go di-ming <sup>[2]</sup>Bin-yi-li, wô, Ngô yi-kying te-min k'en-kyin Jing-ming, ngô sing-ming paodjün-de. <sup>31</sup> Yüô-koh tseo-ko Bin-yi-li z-'eo, k'eo-k'eo nyihdeo c'ih-ky'i, gyi-go do-t'e z kwa-kyiah-go. <sup>32</sup> Ing-we Gyi nyiah Yüô-koh do-t'e gao-kwu-li-go kying, keh-lah Yi-sehlih ts-seng tao næn-kæn feh ky'üoh do-t'e gao-kwu-li-go kying.

24 雅各獨自剩落東,有一個人等其比武一直到天快 亮。<sup>25</sup> 箇個人看見打其弗過,就捏其大腿個絞股,箇勒比 武個時候,雅各大腿絞股脫穴。<sup>26</sup> 箇個人話:「天快亮 了,好放爾去。」雅各話:「爾若是弗祝福撥我,我弗肯 放爾去。」<sup>27</sup> 其是介話:「爾啥個名字?」其話:「雅 各。」<sup>28</sup> 其又話:「箇遭弗再謳爾個名字雅各,是好謳<sup>[1]</sup> 以色列。因為爾等神明等人比武,已經得勝了。」<sup>29</sup> 雅各 問其,話:「請爾話向我道爾個名字。」其話:「咋會問 我個名字?」就來箇頭祝福撥其。<sup>30</sup> 雅各謳箇個地名<sup>[2]</sup>便 以利,話:「我已經對面看見神明,我性命保全了。」<sup>31</sup> 雅各走過便以利時候,扣扣日頭出去,其個大腿是拐腳 個。<sup>32</sup> 因為其捏雅各大腿絞股裏個筋,箇勒以色列子孫到 難間弗喫大腿絞股裏個筋。

- [1] *Ziu-z* Teng Jing-ming pi-wu-go. 'Ôh-tsia Jing-ming pi-vu. 就是等神明比武個。或者神明比武。
  - [2] Ziu-z Jing-ming go min. 就是神明個面。

# Ts. XXXIII.

Yüô-koh ngæn-tsing dæ-ky'i k'en-kyin Yi-sao teng spah-go nying dô-kô læ; ziu feng-k'æ ng-nô, kao-fu peh Liüô, Lah-kyih, teng liang-go ô-deo. <sup>2</sup> Peh ô-deo teng gyi ngnô læ zin-deo, Li-üô teng gyi ng-nô læ 'eo-deo, Lah-kyih teng Iah-seh læ kyih-sah. <sup>3</sup> Gyi-zi sin ky'i, boh-tao læ diyiang-li ts'ih-tsao, teng-tao gyi-go ah-ko siang-gying. <sup>4</sup> Yisao peng-long-læ nying-tsih gyi, bao-leh gyi, o-leh gyi deo-kying, ts'ing gyi cü: ziu dô-kô ngæn-li c'ih-de. <sup>5</sup> Yi-sao ngæn-tsing dæ-ky'i k'en-kyin nyü-nying teng siao-nying, meng gyi wô, Keh-sing teng ng dô-kô læ-tong-go z Jü? Gyi wô, Keh-sing ng-nô z Jing-ming eng-we s-peh ng nu-bohgo. <sup>6</sup> Keh-tsao liang-go ô-deo teng gyi ng-nô tseo-long-læ boh-tæn-tao. <sup>7</sup> Li-üô teng gyi ng-nô yia tseo-long-læ bohtæn-tao: 'eo-deo Iah-seh teng Lah-kyih tseo-long-læ bohtæn-tao. <sup>8</sup> Yi-sao wô, Ngô sô p'ong-djoh-go keh-sing de-su, ng z dza-go i-s? Gyi wô, Z iao teh-djoh eng-we læ ngô cü-go min-zin. <sup>9</sup> Yi-sao wô, Ngô ah-di, ngô sô yiu-go yi-kying keo-de: ng sô yiu-go hao kwe-peh ng-zi. 10 Yüô-koh wô, Ts'ing ng feh iao z-ka; ngô ziah-z teh-djoh eng-we læ nggo min-zin, ka-ni ng dzong ngô-go siu-li siu ngô-go li-veh:

ing-we ngô k'en-kyin ng-go min-k'ong ziang k'en-kyin Jing-ming min-k'ong, ng yia hwun-hyi ngô. <sup>11</sup> Jing-ming kyi-jün s eng-we peh ngô, ngô yi-kying yiu-yü; keh-lah ts'ing ng siu ngô song ng-go li-veh. Yüô-koh ts'e gyi; gyi ziu siu-de. <sup>12</sup> Yi-sao wô, Ah-lah hao dong-sing ky'i; ngô we ying-dao ng. <sup>13</sup> Yüô-koh teng gyi wô, Ngô-go cü, ng hyiaoteh keh-sing ng-nô tæn-boh, wa-yiu ziu-t'æ-go ngeo teng yiang keng ngô tong: ziah ih-nyih kong-fu kw'a-kw'a ken gyi, ih-do-de tu we si. <sup>14</sup> Ts'ing ngô cü pi ng nu-boh sin ky'i: ngô mæn-mæn ling gyi-lah: z-ka læ ngô zin-deo-go sang-k'eo teng keh-sing ng-nô tsiao gyi-lah sô neng-keo tseo-go kyiah-bu, tao ngô cü-go Si-r di-fông. <sup>15</sup> Yi-sao wô, Ka-ni ngô dong-de-go nying, hao liu kyi-go peh ng. Gyi wô, 'O yüong ni? Ts'ing ng peh ngô teh-djoh eng-we læ ngô cü-go min-zin z-de.

雅各眼睛抬起,看見<u>以掃</u>等四百個人大家來,就分開 兒囡,交付撥<u>利亞、拉結</u>,等兩個丫頭。<sup>2</sup> 撥丫頭等其兒囡 來前頭,<u>利亞</u>等其兒囡來後頭,<u>拉結</u>等約瑟來結煞。<sup>3</sup> 其自 先去, 伏倒來地垟裏七遭, 等到其個阿哥相近。<sup>4</sup> 以掃奔攏 來迎接其,抱勒其,捼勒其頭頸,親其嘴。就大家眼淚出 了。5以掃眼睛抬起看見女人等小人,問其話:「箇星等爾 大家來東個是誰?」其話:「箇星兒囡是神明恩惠賜撥爾 奴僕個。」6箇遭兩個丫頭等其兒囡走攏來伏帶倒。7利亞 等其兒囡也走攏來伏帶倒。後頭約瑟等拉結走攏來伏帶 倒。8以掃話:「我所碰着個箇星隊數,爾是咋個意思?」 其話:「是要得着恩惠來我主個面前。」<sup>9</sup>以掃話:「我阿 弟,我所有個已經夠了,爾所有個好歸撥爾自。」<sup>10</sup>雅各 話:「請爾弗要是介,我若是得着恩惠來爾個面前,介 呢,爾從我個手裏收我個禮物。因為我看見爾個面孔像看 見神明面孔,爾也歡喜我。<sup>11</sup> 神明既然賜恩惠撥我,我已 經有餘, 箇勒請爾收我送爾個禮物。」雅各催其, 其就收 了。<sup>12</sup> 以掃話: 「阿拉好動身去,我會引導爾。」<sup>13</sup> 雅各 等其話:「我個主,爾曉得箇星兒囡單薄,還有受胎個牛 等羊跟我東。若一日工夫快快趕其,一大隊都會死。14請 我主比爾奴僕先去。我慢慢領其拉,是介來我前頭個牲口 等箇星兒囡照其拉所能夠走個腳步, 到我主個西珥地

方。」<sup>15</sup>以掃話:「介呢我同隊個人,好留幾個撥爾。」 其話:「何用呢?請爾撥我得着恩惠來我主個面前是 了。」

<sup>16</sup> Keh-nyih Yi-sao kyü Si-r keh-da lu, <sup>17</sup> Yüô-koh tseotao Su-keh di-fông, teng gyi-zi ky'i oh, teng sang-k'eo tahbang: keh-lah keh-go di-ming kyiao-leh <sup>[1]</sup>Su-keh.

<sup>16</sup> 箇日<u>以掃</u>歸西珥 箇埭路,<sup>17</sup> 雅各走到<u>疏割</u>地方,等 其自起屋,等牲口搭棚。箇勒箇個地名叫勒疏割<sup>[1]</sup>。

[1] Ziu-z Bang. 就是棚。(原註)

<sup>18</sup> Yüô-koh dzong Pô-t'æn-üô-læn en-en-tæn-tæn tao Kyüô-nen di-fông Z-kyin-go dzing-ts: læ dzing-ts min-zin tah tsiang-bong. <sup>19</sup> Do ih-pah kw'e nying-ts, hyiang Z-kyin-go ah-tia Ha-meh keh-dzoh-go nying, ma ih-ky'iu din, ziu-z tah tsiang-bong-go di-fông. <sup>20</sup> Læ keh-deo zao ih-zo dæn; c'ü gyi ming-z <sup>[1]</sup>Yi-li-lo-hyi Yi-seh-lih.

<sup>18</sup> 雅各從巴坦亞蘭安安耽耽到<u>迦南</u>地方<u>示劍</u>個城子, 來城子面前搭帳篷。<sup>19</sup> 馱一百塊銀子,向<u>示劍</u>個阿爹哈抹 箇族個人,買一丘田,就是搭帳篷個地方。<sup>20</sup> 來箇頭造一座壇,取其名字以利羅熙以色列<sup>[1]</sup>。

[1] Ziu-z Jing-ming, z Yi-seh-lih-go Jing-ming. 就是神明,是<u>以色</u>列個神明。(原註)

# Ts. XXXIV.

Li-üô sô sang-peh Yüô-koh-go nön Ti-nô tseo-c'ih ky'i k'en keh di-fông-go nyü-nying. <sup>2</sup> Keh di-fông moh-pah Hyi-vi nying Ha-meh-go ng-ts Z-kyin ih k'en-kyin ziu ying-yiu gyi ky'i, teng gyi dong-zông, u-we gyi. <sup>3</sup> Sing-li teng Yüô-koh-go nön Ti-nô lin-lin-peh-shæ æ-sih keh-go do-kwu-nyiang, teng gyi kông en-we-go shih-wô. <sup>4</sup> Z-kyin teng ah-tia Ha-meh wô, Ts'ing ng dæ keh-go do-kwu-nyiang peh ngô tso ts'i-ts. <sup>5</sup> Yüô-koh t'ing-meng gyi yi-kying u-we gyi-go nön Ti-nô: gyi-go ng-ts læ din-li k'en

sang-k'eo; Yüô-koh pi-k'eo vu-yin, teng-tao gyi-lah kyülæ.

利亞所生撥雅各個囡底拿走出去看箇地方個女人。<sup>2</sup> 箇地方牧伯希未人哈抹個兒子示劍一看見就引誘其去,等其同牀,污穢其。<sup>3</sup>心裏等雅各個囡底拿戀戀不捨,愛惜箇個大姑娘,等其講安慰個說話。<sup>4</sup>示劍等阿爹哈抹話:「請爾抬箇個大姑娘撥我做妻子。」<sup>5</sup>雅各聽聞其已經污穢其個囡底拿。其個兒子來田裏看牲口,雅各閉口無言,等到其拉歸來。

<sup>6</sup> Z-kyin-go ah-tia Ha-meh tseo-c'ih teng Yüô-koh siang-liang. <sup>7</sup> Yüô-koh-go ng-ts t'ing-meng-ts ziu dzong din-li kyü-læ: keh-sing nying iu-meng, do-nyiang fah-ông; ing-we Z-kyin teng Yüô-koh-go nön dong-zông, z læ Yiseh-lih cong-nyiang lön-tso: keh z feh kæ tso-go z-ken. <sup>8</sup> Ha-meh teng gyi-lah siang-liang, wô, Ngô ng-ts Z-kyin sing-li ky'i-mo ng-go nön: ts'ing ng peh gyi tso ts'i-ts. <sup>9</sup> Ah-lah teng ng-lah hao dô-kô c'ü-tsing kô-c'ih: ng-go nön hao hyü-peh ah-lah, ng yia hao dæ ah-lah-go nön. <sup>10</sup> Ng-

lah teng ah-lah dô-kô deng-tong: keh di-fông læ ng-go min-zin, hao deng-ts, tso sang-i teh-djoh ts'æn-nyih.  $^{11}$  Zkyin teng Ti-nô-go ah-tia hyüong-di wô, Dæn-nyün ng s eng-we peh ngô, ng sô-wô-go ngô ziu we peh ng.  $^{12}$  Ze ng iao dza djong-go p'ing-kying li-veh, ngô we tsiao ng-go shih-wô peh ng: tæn-tsih pô keh-go do-kwu-nyiang peh ngô tso ts'i-ts. <sup>13</sup> Yüô-koh-go ng-ts, ing-we Z-kyin yi-kying u-we gyi-lah ah-me Ti-nô, keh-lah yüong diao-bi shih-wô we-teh gyi teng gyi ah-tia Ha-meh, <sup>14</sup> z-ka wô, Ah-lah pô ah-me hyü-peh m-tsiu-keh-li-go nying tso-feh-læ-go; ingwe keh z ah-lah tao-me z-ken. <sup>15</sup> Ziah-z ng-lah ziang ahlah ka, keh-sing nen tu ziu tsiu-keh-li, ka-ni ziu hao inghyü ng-lah. <sup>16</sup> Keh-tsao ah-lah pô nön kô-peh ng, ah-lah yia dæ ng-go nön, ziu dô-kô djü-tong, tso ih-dzoh pahsing. <sup>17</sup> Ng-lah ziah-z feh-k'eng t'ing ah-lah ziu tsiu-keh-li, ah-lah ziu ling-leh ah-me ky'i-de. <sup>18</sup> Ha-meh teng gyi ng-ts Z-kyin hwun-hyi keh-kyü shih-wô. <sup>19</sup> Keh 'eo-sang ing-we æ-sih Yüô-koh-go nön, keh-lah læ-feh-gyi tso keh-go zken: gyi læ ah-tia oh-li z ting kwe-djong-go.

<sup>6</sup>示劍個阿爹哈抹走出等雅各商量。<sup>7</sup>雅各個兒子聽聞 仔就從田裏歸來。 箇星人憂悶, 大樣發快, 因為示劍等雅 各個囡同床,是來以色列中央亂做。箇是弗該做個事幹。8 哈抹等其拉商量,話:「我兒子示劍心裏企慕爾個囡,請 爾撥其做妻子。9阿拉等爾拉好大家娶進嫁出,爾個囡好許 撥阿拉,爾也好抬阿拉個囡。<sup>10</sup>爾拉等阿拉大家 庫東, 箇 地方來爾個面前,好庵仔,做生意得着產業。」11 示劍等 底拿個阿爹兄弟話:「但願爾賜恩惠撥我,爾所話個我就 會撥爾。12 隨爾要咋重個聘金禮物,我會照爾個說話撥 爾。單只把箇個大姑娘撥我做妻子。」13 雅各個兒子,因 為示劍已經污穢其拉阿妹底拿, 箇勒用調皮說話回答其等 其阿爹哈抹, 14 是介話: 「阿拉把阿妹許撥嘸周割禮個人 做弗來個,因為箇是阿拉倒黴事幹。<sup>15</sup> 若是爾拉像阿拉 介, 箇星男都受周割禮, 介呢就好應許爾拉。」<sup>16</sup> 箇遭阿 拉把囡嫁撥爾,阿拉也抬爾個囡,就大家住東,做一族百 姓。17爾拉若是弗肯聽阿拉,受周割禮,阿拉就領勒阿妹 去了。」<sup>18</sup> <u>哈抹等其兒子示劍</u>歡喜箇句說話。<sup>19</sup> 箇後生因 爲愛惜<u>雅各</u>個囡,箇勒來得及做箇個事幹。其來阿爹屋裏 是頂貴重個。

<sup>20</sup> Ha-meh teng ng-ts Z-kyin ziu tseo-tao dzing-mengk'eo, teng dzing-li-go nying siang-liang, wô, <sup>21</sup> Keh-sing nying teng ah-lah 'o-moh, ping-ts'ia di-fông kwông-kw'eh peh gyi-lah deng-leh-ko, 'o-feh ing-hyü gyi deng-læ dôngdeo tso sang-i; ah-lah ziu hao dæ gyi-go nön tso ts'i-ts, yia pô ah-lah-go nön hyü-peh gyi. <sup>22</sup> Tsih-yiu ah-lah congnyiang-go nen tu ziu tsiu-keh-li, ziang gyi-lah ziu tsiu-kehli ka, keh-sing nying ziu k'eng teng ah-lah deng-tong tso ih-dzoh-go pah-sing. <sup>23</sup> Z-ka gyi-lah ngeo-yiang, kô-kyi, teng ih-ts'ih-go sang-k'eo, ky'i-feh tu kwe-peh ah-lah ma? Ah-lah feh-jü ing-hyü gyi-lah, hao teng ah-lah dô-kô dengtong. <sup>24</sup> Væn-pah tseo-c'ih dzing-meng-go nying, tu t'ing Ha-meh teng gyi ng-ts Z-kyin-go shih-wô; ka-ni, keh-sing tseo-c'ih dzing-meng-go nen long-tsong ziu tsiu-keh-li.

<sup>20</sup> 哈抹等兒子<u>示劍</u>就走到城門口,等城裏個人商量,話: <sup>21</sup> 「箇星人等阿拉和睦,並且地方廣闊撥其拉庉勒過,何弗應許其庉來蕩頭做生意。阿拉就好抬其個囡做妻子,也把阿拉個囡許撥其。<sup>22</sup> 只有阿拉中央個男都受周割禮,像其拉受周割禮介,箇星人就肯等阿拉庉東做一族個百姓。」<sup>23</sup> 是介其拉牛羊、家計,等一切個牲口,豈弗都歸撥阿拉嗎?阿拉弗如應許其拉,好等阿拉大家庉東。」<sup>24</sup> 凡百走出城門個人,都聽<u>哈抹</u>等其兒子<u>示劍</u>個說話。介呢,箇星走出城門個男攏總受周割禮。

<sup>25</sup> Tao di-sæn-nyih, tsing-hao cong-nying sông-'eng t'ong-kw'u-go z-'eo, Yüô-koh liang-go ng-ts Si-min teng Li-vi, z Ti-nô-go ah-ko, koh-nying do-leh pao-kyin, fông-tæn tseo-tsing dzing-li, sah-diao long-tsong keh-sing nen. <sup>26</sup> Gyi-lah yüong tao-k'eo sah-diao Ha-meh teng gyi-go ng-ts Z-kyin, ling-leh Ti-nô dzong Z-kyin-go oh-li, tseo-c'ih-ky'i. <sup>27</sup> Yüô-koh-go ng-ts, ing-we u-we gyi ah-me-go yün-kwu, c'ông-tsing sah-diao cong-nying-go di-fông, ts'iang-deh keh-go dzing-li. <sup>28</sup> Pô yiang ngeo li-ts, teng dzing-li

din-li sô yiu-go tu ta-leh-ky'i. <sup>29</sup> Yi lo-liah gyi-go dzæ-veh, teng long-tsong siao-nying nyü-nying keh-sing; ts'iang-deh ih-ts'ih oh-lô li-hyiang-go tong-si. <sup>30</sup> Yüô-koh teng Simin Li-vi wô, Ng-lah z lin-le ngô, s-teh ngô læ dông-deo Kyüô-nen Pi-li-si pah-sing cong-nyiang ming-sing zah-ts'iu-go: ping-ts'ia ngô-go nying ky'üih, gyi-lah we jülong-læ teng ngô ti-dih sah-diao ngô: ka-ni ngô teng 'eh-kô tu we mih-diao. <sup>31</sup> Gyi-go ng-ts wô, Gyi-lah næn-dao hao dæ ah-lah ah-me ziang gyi-nyü ka ma?

25 到第三日,正好衆人傷痕痛苦個時候,<u>雅各</u>兩個兒子,西緬等利未,是底拿個阿哥,各人馱勒寶劍,放膽走進城裏,殺掉攏總箇星男。<sup>26</sup> 其拉用刀口殺掉哈抹等其個兒子<u>示劍</u>,領勒底拿從<u>示劍</u>個屋裏,走出去。<sup>27</sup> 雅各個兒子,因為污穢其阿妹個緣故,闖進殺掉衆人個地方,搶奪箇個城裏。<sup>28</sup> 把羊、牛、驢子,等城裏、田裏所有個都帶勒去。<sup>29</sup> 又擄掠其個財物,等攏總小人女人箇星,搶奪一切屋落裏向個東西。<sup>30</sup> 雅各等西緬、利未話:「爾拉是連累我,使得我來蕩頭<u>迦南、比利洗百姓中央名聲</u>賊臭個。

並且我個人缺,其拉會聚攏來等我抵敵殺掉我,介呢我等 闔家都會滅掉。」<sup>31</sup> 其個兒子話:「其拉難道好待阿拉阿 妹像妓女介嗎?」

### Ts. XXXV.

Jing-ming teng Yüô-koh wô, Ng yüong zông-ky'i, deng-læ Pah-deh-li, læ keh-deo zao dæn peh Jing-ming, ziu-z ng to-bi ah-ko Yi-sao min-zin z-'eo yin-c'ih peh ng k'en-go. <sup>2</sup> Yüô-koh ziu feng-fu oh-li-go nying lin keh-sing keng gyi-go nying, wô, Ng-lah cong-nyiang sô-yiu-go ngakoh Jing-ming long-tsong ky'i-diao gyi; zi yüong kyihkyih-zing-zing wun-leh i-zông. <sup>3</sup> Ah-lah ziu ky'i-læ, tseozông Pah-deh-li, ngô we læ keh-deo zao dæn peh Jingming, ziu-z ngô loh-næn-go nyih-ts tsih-ing ngô, tseo-lu z-'eo pao-yiu ngô-go. <sup>4</sup> Gyi-lah ziu do-leh siu-li sô-yiu-go nga-koh jing-ming, teng ng-to-li-go gwæn-ts, kao-fu Yüôkoh. Yüô-koh k'ông-læ Z-kyin-go ziang-jü ti-'ô. <sup>5</sup> Gyi-lah ziu dong-sing: Jing-ming-go we-nyin ling-djoh dön-ky'üngo dzing-li, s-teh gyi-lah feh tse-ken Yüô-koh-go ng-ts.

神明等雅各話:「爾用上去,底來<u>伯特利</u>,來箇頭造 擅撥神明,就是爾躲避阿哥<u>以掃</u>面前時候現出撥爾看個。」<sup>2</sup>雅各就吩咐屋裏個人連箇星跟其個人,話:「爾拉中央所有個外國神明攏總棄掉其,自用潔潔淨淨換勒衣裳。」<sup>3</sup>阿拉就起來,走上<u>伯特利</u>,我會來箇頭造壇撥神明,就是我落難個日子接應我,走路時候保佑我個。」<sup>4</sup>其拉就馱勒手裏所有個外國神明,等耳朵裏個環子,交付雅 各。雅各固來示劍個橡樹底下。<sup>5</sup>其拉就動身。神明個威嚴臨着團圈個城裏,使得其拉弗追趕雅各個兒子。

<sup>6</sup> Keh-tsao Yüô-koh teng keh-sing keng gyi-go nying tao Kyüô-nen di-fông-go Lu-s; ziu-z Pah-deh-li. <sup>7</sup> Læ keh-deo zao dæn, eo keh di-ming <sup>[1]</sup>Ih-pah-deh-li; ing-we Yüô-koh to-bi ah-ko min-zin z-'eo, Jing-ming læ keh-deo yin-c'ih peh gyi k'en. <sup>8</sup> Li-pah-kyüô-go ah-bu Ti-p'o-lah si-de, tsông-læ Pah-deh-li ziang-jü ti-'ô: keh-go di-ming ziu kyiao-leh <sup>[2]</sup>Üô-leng-pô-k'oh.

<sup>6</sup> 箇遭雅各等箇星跟其個人到<u>迦南</u>地方個<u>路斯</u>,就是<u>伯</u>特利。<sup>7</sup> 來箇頭造壇,謳箇地名<u>益伯特利</u><sup>[1]</sup>,因為雅各躲避阿哥面前時候,神明來箇頭現出撥其看。<sup>8</sup> 利百加個阿哺底 破拉死了,葬來<u>伯特利</u>橡樹底下。箇個地名就叫勒亞倫巴 哭<sup>[2]</sup>。

- [1] Ziu-z Pah-deh-li-go Jing-ming. 就是伯特利個神明。(原註)
- [2] Ziu-z Æ-k oh-go ziang-jü. 就是哀哭個橡樹。(原註)

<sup>9</sup> Yüô-koh dzong Pô-t'æn-üô-læn kyü-læ z-'eo, Jingming yi yin-c'ih, s foh peh gyi. <sup>10</sup> Jing-ming teng gyi wô, Ng su-djông ming-z z Yüô-koh; yi-'eo feh tsæ eo ng Yüôkoh, hao kæ ming Yi-seh-lih: ziu c'ü gyi ming-z Yi-seh-lih. <sup>11</sup> Jing-ming yi teng gyi wô, Ngô z Djün-neng-go Jingming; ng hao meo-meo-zing-zing to-ky'i-læ: ng we sangc'ih ih-koh feng tso hyü-to koh-veng; kyüing-wông kehsing yia we dzong ng iao-bo-li ka c'ih-læ. 12 Ngô sô s-peh Üô-pah-lah-hen teng Yi-sah-go di-fông, yia we s-peh ng: ping-ts'ia pô keh-go di-fông s-peh ng tsiang-læ-go 'eo-dæ. <sup>13</sup> Jing-ming teng gyi kông-hao, ziu dzong keh-deo singzông-ky'i. <sup>14</sup> Yüô-koh læ Jing-ming teng gyi kông-go difông lih ih-keng djü-ts, ziu-z zah-deo-go djü-ts, din tsiu kyiao yiu læ gyi zông-deo. <sup>15</sup> Yüô-koh ts'ing-hwu Jingming teng gyi kông-go di-fông kyiao-leh Pah-deh-li.

9<u>雅各從巴坦亞蘭</u>歸來時候,神明又現出,賜福撥其。
10神明等其話:「爾素常名字是<u>雅各</u>,以後弗再謳爾<u>雅</u>各,好改名<u>以色列</u>。」就取其名字<u>以色列</u>。<sup>11</sup>神明又等其話:「我是全能個神明,爾好茂茂盛盛多起來。爾會生出一國分做許多國份,君王箇星也會從爾腰縛裏介出來。<sup>12</sup>我所賜撥亞伯拉罕等以撒個地方,也會賜撥爾,並且把箇個地方賜撥爾將來個後代。」<sup>13</sup>神明等其講好,就從箇頭升上去。<sup>14</sup>雅各來神明等其講個地方立一根柱子,就是石頭個柱子,奠酒澆油來其上頭。<sup>15</sup>雅各稱呼神明等其講個地方叫勒伯特利。

<sup>16</sup> Gyi-lah dzong Pah-deh-li dong-sing, teng Yi-fah-da ts'ô yiu-'æn lu; Lah-kyih iao sang-ts'æn, sang-leh ting næn, t'ong-leh li-'æ. <sup>17</sup> Næn-sang-go z-'eo, siu-sang-go teng gyi wô, Hao-vong p'ô, Ng yin-dzæ yi yiu ih-go ng-ts-

de. <sup>18</sup> Lah-kyih kw'a dön-ky'i, (ing-we gyi si-de,) c'ü gyi ng-ts ming-z <sup>[1]</sup>Bin-o-nyi: dæn-z ah-tia c'ü gyi <sup>[2]</sup>Bi-yüô-ming. <sup>19</sup> Lah-kyih si-ts, tsông-læ tao Yi-feh-da ky'i-go lu pin-yin, ziu-z Pah-li-'eng. <sup>20</sup> Yüô-koh lih djü-ts læ Lah-kyih-go veng-deo: tao jü-kying wa eo gyi z Lah-kyih venggo djü-ts. <sup>21</sup> Yi-seh-lih yi dong-sing; læ Yi-deh keh-zo t'ah nga-pin tah tsiang-bong. <sup>22</sup> Yi-seh-lih deng-læ keh di-fông z-'eo Liu-bin teng ah-tia-go ah-yi Pih-lah dong-zông; Yi-seh-lih t'ing-meng-de.

16 其拉從伯特利動身,等<u>以法大</u>差有限路,拉結要生產,生勒頂難,痛勒厲害。<sup>17</sup> 難生個時候,收生個等其話:「好留怕,爾現在又有一個兒子了。」<sup>18</sup> 拉結快斷氣,(因為其死了,)取其兒子名字便阿尼<sup>[1]</sup>。但是阿爹取其便雅憫<sup>[2]</sup>。<sup>19</sup> 拉結死仔,葬來到以法大去個路邊沿,就是伯利恆。<sup>20</sup> 雅各立柱子來拉結個墳頭。到如今還謳其是拉結墳個柱子。<sup>21</sup> 以色列又動身,來以特箇座塔外邊搭帳篷。<sup>22</sup> 以色列 起來窗地方時候流便等阿爹個阿姨辟拉同牀,以色列聽聞了。

- [1] Ziu-z Ngô iu-meng-go ng-ts. 就是我憂悶個兒子。(原註)
- [2] Ziu-z Ngô jing-tsah-siu-go ng-ts. 就是我順隻手個兒子。(原註),原文此處或爲錯印,後文均爲 Bin-yüô-ming
- <sup>23</sup> Yüô-koh-go ng-ts yiu jih-nyi-go. Yüô-koh-go do ng-ts Liu-bin, wa-yiu Si-min, Li-vi, Yiu-da, Yi-sah-kyüô, Si-puleng, z Li-üô sô sang-go. <sup>24</sup> Iah-seh teng Bin-yüô-ming, z Lah-kyih sô sang-go. <sup>25</sup> Dæn teng Neh-da-li, z Lah-kyih-go ô-deo Pih-lah sô sang-go. <sup>26</sup> Kyüô-teh teng Üô-shih, z Li-üô-go ô-deo Sih-p'ô sô sang-go. Keh tu z Yüô-koh-go ng-ts læ Pô-t'æn-üô-læn sô sang-go.
- 23 雅各個兒子有十二個。雅各個大兒子流便,還有西緬、利未、猶大、以薩迦、西布倫,是利亞所生個。24 約瑟等便雅憫,是拉結所生個。25 但等納大利,是拉結個丫頭辟拉所生個。26 迦得等亞設,是利亞個丫頭悉怕所生個。箇都是雅各個兒子,來巴坦亞蘭所生個。
- <sup>27</sup> Yüô-koh læ kyin gyi ah-tia Yi-sah læ Mæn-li difông, Üô-pô dzing-li, ziu-z Hyi-pah-leng, Üô-pah-lah-hen

teng Yi-sah sô tæn-koh-go di-fông. <sup>28</sup> Yi-sah ziu-shü ih-pah pah-jih shü. <sup>29</sup> Yi-sah nyin-kyi lao, nyih-ts mun, dön-ky'i si-de, kyü-tao gyi-zi-go dzoh-cong: gyi liang-go ng-ts Yi-sao Yüô-koh tsông gyi.

<sup>27</sup> 雅各來見其阿爹<u>以撒</u>,來<u>幔利</u>地方,<u>亞巴</u>城裏,就是<u>希伯崙</u>,<u>亞伯拉罕等以撒</u>所耽擱個地方。<sup>28</sup> <u>以撒</u>壽歲一百八十歲。<sup>29</sup> <u>以撒</u>年紀老,日子滿,斷氣死了,歸到其自個族種。其兩個兒子以掃、雅各葬其。

## Ts. XXXVI.

Yi-sao ziu-z Yi-tong; gyi kô-pu læ 'ô-veng. <sup>2</sup> Yi-sao dæ Kyüô-nen nying-go nön tso ts'i-ts, ziu-z Üô-da, z Heh nying Yi-leng-go nön, teng Üô-'o-li-pô-mô, z Hyi-vi nying Tsi-bin-go nön Üô-nô, sô sang-go nön. <sup>3</sup> Yi dæ Pô-jih-meh, z Yi-jih-mô-li-go nön, Nyi-bæ-iah-go tsi-me. <sup>4</sup> Üô-da sang Yi-li-fah peh Yi-sao: Pô-jih-meh sang Liu-r. <sup>5</sup> Üô-'o-li-pô-

mô sang Yiæ-z, Yüô-læn, K'o-lah. Keh tu z Yi-sao-go ng-ts, læ Kyüô-nen di-fông sô sang-go. <sup>6</sup> Yi-sao ta-leh ts'i-ts ng-ts nön, teng oh-li-go nying, wa-yiu ngeo yiang, teng ih-ts'ih-go sang-k'eo, læ Kyüô-nen di-fông væn-pah sô teh-djoh-go kô-kyi, li-k'æ gyi ah-di Yüô-koh, tao bih-t'ah di-fông ky'i. <sup>7</sup> Ing-we gyi-lah dzæ-veh fu-tsoh, sô-yi dô-kô deng-feh-ko: wa-yiu gyi-lah sô tæn-koh-go di-fông, we-leh sang-k'eo to, feh-neng-keo yüong-ziu gyi. <sup>8</sup> Keh-tsao Yi-sao deng-læ Si-r sæn. Yi-sao ziu-z Yi-tong.

以掃就是以東,其家譜來下文。<sup>2</sup>以掃抬迦南人個囡做妻子,就是亞大,是赫人以倫個囡,等亞何利巴瑪,是希 未人祭便個囡亞拿,所生個囡。<sup>3</sup>又抬巴實抹,是以實瑪利 個囡,尼徘約個姊妹。<sup>4</sup>亞大生以利法撥以掃,巴實抹生流 珥。<sup>5</sup>亞何利巴瑪生耶是、雅蘭、可拉。箇都是以掃個兒 子,來迦南地方所生個。<sup>6</sup>以掃帶勒妻子、兒子、囡,等屋 裏個人,還有牛、羊,等一切個牲口,來迦南地方凡百所 得着個家計,離開其阿弟雅各,到別埭地方去。<sup>7</sup>因為其拉 財物富足,所以大家庉弗過,還有其拉所耽擱個地方,為 了牲口多,弗能夠容受其。<sup>8</sup> 箇遭<u>以掃</u>庵來<u>西珥</u>山。<u>以掃</u>就 是以東。

<sup>9</sup> Si-r sæn Yi-tong nying-go tsu-tsong Yi-sao, gyi-go kô-pu læ 'ô-veng. <sup>10</sup> Yi-sao keh-sing ng-ts-go ming-z, ziu-z, Yi-li-fah, z Yi-sao tsi-ts Üô-da sô sang-go, wa-yiu Liu-r, z Yi-sao ts'i-ts Pô-jih-meh sô sang-go. <sup>11</sup> Yi-li-fah-go ng-ts Di-mæn, O-meh, Si-po, Kyüô-dæn, Kyi-neh. <sup>12</sup> Yi-sao ng-ts Yi-li-fah-go ah-yi Ding-neh sang Üô-mô-lih peh Yi-li-fah: keh tu z Yi-sao ts'i-ts Üô-da-go ts-seng. <sup>13</sup> Liu-r-go ng-ts Nô-'eh, Si-lah, Sô-mô, Mi-sah: keh tu z Yi-sao ts'i-ts Pô-jih-meh-go ts-seng.

<sup>9</sup>西珥山以東人個祖宗以掃,其個家譜來下文。<sup>10</sup>以掃 箇星兒子個名字,就是:以利法,是以掃妻子亞大所生 個,還有流珥,是以掃妻子巴實抹所生個。<sup>11</sup>以利法個兒 子提幔、阿抹、洗玻、迦但、基納。<sup>12</sup>以掃兒子以利法個 阿姨亭訥生亞瑪力撥以利法。箇都是以掃妻子亞大個子 孫。<sup>13</sup>流珥個兒子拿轄、西拉、沙瑪、米撒。箇都是以掃 妻子巴實抹個子孫。

- <sup>14</sup> Yi-sao-go ts'i-ts Üô-'o-li-pô-mô, ziu-z Tsi-bin-go nön Üô-nô sô sang-go nön, gyi sang Yiæ-z, Yüô-læn, K'o-lah peh Yi-sao.
- 14<u>以掃個妻子亞何利巴瑪</u>,就是<u>祭便</u>個囡<u>亞拿</u>所生個 囡,其生耶是、雅蘭、可拉撥以掃。
- <sup>15</sup> Yi-sao ts-seng cong-nyiang tso væn-wông-go ziu-z; Yi-sao do ng-ts Yi-li-fah sô sang-go, yiu Di-mæn wông, O-meh wông, Si-po wông, Kyi-neh wông, <sup>16</sup> K'o-lah wông, Kyüô-dæn wông, Üô-mô-lih wông: keh z dzong Yi-li-fah c'ih-læ, tso væn-wông læ Yi-tong di-fông-go: tu z Üô-da-go ts-seng.
- 15 <u>以掃</u>子孫中央做藩王個就是: <u>以掃</u>大兒子<u>以利法</u>所生個,有<u>提幔</u>王、阿抹王、洗玻王、<u>基納</u>王、<sup>16</sup> 可拉王、 <u>迦但</u>王、<u>亞瑪力</u>王。箇是從<u>以利法</u>出來,做藩王來<u>以東</u>地 方個。都是亞大個子孫。
- <sup>17</sup> Yi-sao-go ng-ts Liu-r sô sang-go, yiu Nô-'eh wông, Si-lah wông, Sô-mô wông, Mi-sah wông: keh z dzong Liu-r

c'ih-læ tso væn-wông læ Yi-tong di-fông-go: tu z Yi-sao ts'i-ts Pô-jih-meh-go ts-seng. <sup>18</sup> Yi-sao ts'i-ts Üô-'o-li-pô-mô-go ng-ts ziu-z Yiæ-z wông, Yüô-læn wông, K'o-lah wông: keh tu z dzong Üô-nô-go nön, Yi-sao-go ts'i-ts Üô-'o-li-pô-mô c'ih-læ, tso væn-wông-go. <sup>19</sup> Keh-sing z Yi-sao ziu-z Yi-tong-go ts-seng, tso væn-wông-go.

17 以掃個兒子流珥所生個,有拿轄王、西拉王、沙瑪王、米撒王。箇是從流珥出來做藩王來以東地方個。都是以掃妻子巴實抹個子孫。18 以掃妻子亞何利巴瑪個兒子就是耶是王、雅蘭王、可拉王。箇都是從亞拿個囡,以掃個妻子亞何利巴瑪出來,做藩王個。19 箇星是以掃就是以東個子孫,做藩王個。

<sup>20</sup> 'O-li nying Si-r-go ts-seng su-djông deng-læ keh difông-go; ziu-z Lo-tæn, Shih-pah, Tsi-bin, Üô-nô, <sup>21</sup> Ti-jing, Yi-ts'ah, Ti-sæn: keh tu z 'O-li nying, Si-r-go ts-seng tso væn-wông læ Yi-tong di-fông-go. <sup>22</sup> Lo-tæn-go ng-ts 'O-li, Hyi-mæn: Lo-tæn-go tsi-me Ding-neh. <sup>23</sup> Shih-pah-go ngts Üô-leh-veng, Mô-nô-'eh, Yi-pah, Z-po, O-nen. <sup>24</sup> Tsi-bingo ng-ts Üô-yüô, teng Üô-nô: zin-deo læ kw'ông-iæ difông k'en ah-tia Tsi-bin-go li-ts, p'ong-djoh nyih-go shünyün, ziu-z keh Üô-nô. <sup>25</sup> Üô-nô-go ng-ts Ti-jing: Üô-nô-go nön Üô-'o-li-pô-mô. <sup>26</sup> Ti-jing-go ng-ts Hying-dæn, Ih-z-pæn, Ih-læn, Kyi-læn. <sup>27</sup> Yi-ts'ah-go ng-ts Pih-hen, Sah-fæn, Üô-ken. <sup>28</sup> Ti-sæn-go ng-ts U-z, Üô-læn. <sup>29</sup> 'O-li keh-dzoh tso væn-wông-go ziu-z Lo-tæn wông, Shih-pah wông, Tsi-bin wông, Üô-nô wông, <sup>30</sup> Ti-jing wông, Yi-ts'ah wông, Ti-sæn wông; keh tu z Si-r di-fông 'O-li nying dzæ gyi-zi-go koh-kô tso væn-wông.

20 何利人西珥個子孫素常庵來箇地方個。就是<u>羅單、</u> 說八、祭便、亞拿、<sup>21</sup> 底順、以察、底珊。箇都是何利 人,西珥個子孫做藩王來以東地方個。<sup>22</sup> 羅單個兒子何 利、希幔,羅單個姊妹亭訥。<sup>23</sup> 說八個兒子亞勒文、瑪拿 轄、以八、示玻、阿南。<sup>24</sup> 祭便個兒子亞雅,等亞拿。前 頭來曠野地方看阿參祭便個驢子,碰着熱個水源,就是箇 亞拿。<sup>25</sup> 亞拿個兒子底順,亞拿個囡亞何利巴瑪。<sup>26</sup> 底順 個兒子於但、一是班、益蘭、基蘭。<sup>27</sup> 以察個兒子辟罕、 撒番、亞干。<sup>28</sup> 底珊個兒子<u>烏士、亞蘭</u>。<sup>29</sup> 何利箇族做藩王個就是:羅單王、說八王、祭便王、亞拿王、<sup>30</sup> 底順王、以察王、底珊王。箇都是西珥地方,何利人在其自個國家做藩王。

<sup>31</sup> Yi-seh-lih nying feh-zing yiu koh-wông djü gyi-go z-'eo, sin yiu koh-wông djü Yi-tong-go di-fông, ziu-z, <sup>32</sup> Pi-rgo ng-ts Pi-lah tso Yi-tong-go koh-wông: gyi kying-dzing kyiao-leh Ding-ha-pô. <sup>33</sup> Pi-lah si-ts, P'o-s-lah nying Si-lahgo ng-ts Iah-pah tsih-we. <sup>34</sup> Iah-pah si-ts, Di-mæn nying Wu-sæn tsih-we. <sup>35</sup> Wu-sæn si-ts, Pi-t'ah-go ng-ts Ha-t'ah (ziu-z læ Mo-iah-go bing-yiang tang-ba Mi-din nying-go) tsih-we: gyi kying-dzing kyiao-leh Üô-vi-teh. <sup>36</sup> Ha-t'ah sits, Mô-z-li-kyüô nying Sæn-lah tsih-we. <sup>37</sup> Sæn-lah si-ts, 'o pin-yin-go Li-'o-pah nying Sao-lo tsih-we. <sup>38</sup> Sao-lo si-ts, Üô-keh-p'o-go ng-ts Pô-leh-ha-nen tsih-we. <sup>39</sup> Üô-keh-p'ogo ng-ts Pô-lah-ha-nen si-ts, Ha-dah tsih-we: gyi kyingdzing kyiao-leh Pao: gyi ts'i-ts ming-z Mi-hyi-da-bih, ziu-z Mi-seh-'eh-go nön, Mô-deh-lih sô sang-go nön. 40 Yi-sao keh-dzoh keh-sing væn-wông tsiao gyi-go ts-p'a, djü-kyü, ming-z z-ka-go; Ding-nô wông, Üô-leh-wô wông, Yiæ-t'iah wông, <sup>41</sup> Üô-'o-li-pô-mô wông, Yi-lah wông, Pi-neng wông, <sup>42</sup> Kyi-neh wông, Di-mæn wông, Mih-sah wông, <sup>43</sup> Mah-t'ih wông, Yi-læn wông: keh-sing tu z Yi-tong-go væn-wông, tsiao gyi-lah kyi-nyih-go di-fông deng-kæn. Yi-tong nying-go tsu-tsong ziu-z Yi-sao.

31 以色列人弗曾有國王治其個時候,先有國王治以東 個地方,就是: 32 比珥個兒子比拉做以東個國王。其京城 叫勒亭哈巴。<sup>33</sup> 比拉死仔, 破斯拉人西拉個兒子約八接 位。34 約八死仔,提幔人戶珊接位。35 戶珊死仔,比撻個 兒子哈撻(就是來摩押個平垟打敗米甸人個)接位,其京 城叫勒亞未得。<sup>36</sup> 哈撻死仔,瑪士利加人三拉接位。<sup>37</sup> 三 拉死仔,河邊沿個利河伯人掃羅接位。38 掃羅死仔,亞革 破個兒子巴勒哈南接位。39 亞革破個兒子巴勒哈南死仔, 哈達接位, 其京城叫勒保。其妻子名字米希大別, 就是米 色合個囡,瑪特列所生個囡。<sup>40</sup>以掃箇族箇星藩王照其個 支派、住居,名字是介個:亭拿王、亞勒華王、耶帖王、41

亞何利巴瑪王、<u>以拉</u>王、<u>比嫩</u>王、<sup>42</sup> 基納王、<u>提幔</u>王、蜜 <u>薩王、<sup>43</sup> 麥鐵王、以蘭</u>王。箇星都是<u>以東</u>個藩王,照其拉 基業個地方庉間。以東人個祖宗就是以掃。

# Ts. XXXVII.

Yüô-koh deng-læ Kyüô-nen di-fông, ziu-z gyi ah-tia tæn-koh-go di-fông. <sup>2</sup> Yüô-koh go shü-dæ læ 'ô-veng: Iah-seh jih-ts'ih shü z-'eo teng cong hyüong-di k'en-yiang: gyi wa-z siao-nying de, teng ah-tia-go ah-yi Pih-lah Sih-p'ô-go ng-ts dô-kô læ-kæn: gyi-lah yiu ts'o-c'ü, Iah-seh ziu ky'i kao-su ah-tia. <sup>3</sup> Yi-seh-lih sang Iah-seh z-'eo nyin-kyi yi-kying lao-de, keh-lah æ-sih gyi ko-jü bih-go ng-ts, teng gyi tso ih-gyin siu-hwô-go i-zông. <sup>4</sup> Cong hyüong-di k'en-kyin ah-tia æ-sih Iah-seh ko-jü gyi-lah, ziu 'eng gyi, feh neng-keo teng gyi kông 'o-moh-go shih-wô.

<sup>5</sup> Iah-seh tso ih-go mông, wô hyiang cong hyüong-di dao, sô-yi gyi-lah yü-kô 'eng gyi. <sup>6</sup> Iah-seh teng gyi-lah wô, Ts'ing ng t'ing ngô sô tso-go mông. <sup>7</sup> Ah-lah din-li læ-kæn shoh-dao; ngô keh ih-shoh bô-ky'i pih-dzih lih-tong; ng-lah sô shoh-go dön-ky'ün pa ngô keh shoh. <sup>8</sup> Cong hyüong-di teng gyi wô, Ng næn-dao we tso ah-lah kyüing-wông ma? wa-z we kwun-djü ah-lah ma? Ziu we-leh gyi-go mông teng gyi-go shih-wô keng-kô 'eng gyi.

<sup>5</sup> <u>約瑟</u>做一個夢,話向衆兄弟道,所以其拉愈加恨其。 <sup>6</sup> <u>約瑟</u>等其拉話:「請爾聽我所做個夢。<sup>7</sup> 阿拉田裏來間束 稻,我箇一束爬起筆直立東,爾拉所束個團圈拜我箇 東。」<sup>8</sup> 衆兄弟等其話:「爾難道會做阿拉君王嗎?還是會 管治阿拉嗎?」就為了其個夢等其個說話更加恨其。

<sup>9</sup> Iah-seh yi tso mông, wô hyiang cong hyüong-di dao, wô, Ngô yi yiu ih-go mông, k'en-kyin nyih-deo yüih-liang, teng jih-ih-lih sing tu pa ngô. <sup>10</sup> Gyi kao-su ah-tia teng ah-ko z-'eo, ah-tia tsah-vah gyi wô, Ng tso-go mông z dza-go? Næn-dao ngô teng ng ah-nyiang, teng ng hyüong-di, tu we boh-tao di-yiang-li pa ng ma? <sup>11</sup> Gyi hyüong-di ky'i gyi feh-ko; tsih-z keh-kyü shih-wô ah-tia sing-li dzeng-tih.

<sup>9</sup> <u>約瑟</u>又做夢,話向衆兄弟道,話:「我又有一個夢,看見日頭、月亮,等十一粒星都拜我。」<sup>10</sup> 其告訴阿爹等阿哥時候,阿爹責罰其話:「爾做個夢是咋個?難道我等爾阿孃,等爾兄弟,都會伏倒地垟裏拜爾嗎?」<sup>11</sup> 其兄弟氣其弗過,只是箇句說話阿爹心裏存的。

<sup>12</sup> 'Eo-deo gyi hyüong-di tao Z-kyin ky'i k'en ah-tia-go yiang-de. <sup>13</sup> Yi-seh-lih teng Iah-seh wô, Ng-go hyüong-di læ Z-kyin k'en yiang. Læ, ngô iao ts'a ng tao keh-deo ky'i. Iah-seh teng gyi wô, Ngô læ-tong. <sup>14</sup> Yi teng gyi wô, Ng

ky'i, k'en ng-go hyüong-di teng keh-sing yiang-de, tu haogo feh; læ wô hyiang ngô dao. Ziu ts'a gyi tseo-c'ih Hyipah-leng ao tao Z-kyin ky'i.

12 後頭其兄弟到<u>示劍</u>去看阿爹個羊隊。<sup>13</sup> <u>以色列等約</u> <u>瑟話</u>:「爾個兄弟來<u>示劍</u>看羊。來,我要差爾到箇頭去。」<u>約瑟</u>等其話:「我來東。」<sup>14</sup> 又等其話:「爾去,看爾個兄弟等箇星羊隊,都好個弗。來話向我道。」就差 其走出希伯崙嶴到示劍去。

15 Læ din-pæn-li tseo-læ tseo-ky'i z-'eo yiu ih-go nying p'ong-djoh gyi, meng gyi wô, Ng zing jü yia? 16 Iah-seh wô, Ngô zing zi-go hyüong-di; gyi-lah k'en yiang-go difông læ 'ah-li, ts'ing ng wô hyiang ngô dao. 17 Keh-go nying wô, Gyi-lah yi-kying ky'i-de: ngô t'ing-meng gyi-lah kông iao tao To-tæn ky'i. Iah-seh ziu ky'i zing hyüong-di, læ To-tæn p'ong-djoh gyi-lah. 18 Feh-zing tseo-tao z-'eo, hyüong-di yün-yün k'en-kyin gyi, ziu dô-kô iao meo-sah gyi. 19 Gyi-lah kông-læ kông-ky'i wô, Keh tso mông-go nying læ-de. 20 Læ, ah-lah sah gyi, tiu gyi læ ih-go di-

k'ang-li; tsih wô, gyi be ôh-ôh-go yia-siu t'a-ky'üoh-de: ts'ia-k'en gyi-go mông yiu soh-go ing-nyiæn. <sup>21</sup> Liu-bin t'ing-meng, iao kyiu gyi c'ih gyi-lah-go siu-li, wô, Ah-lah feh-k'o sông gyi sing-ming. <sup>22</sup> Liu-bin yi teng gyi-lah wô, M-nao liu gyi hyüih, yia m-nao 'ô siu 'æ gyi, neng-s tiu gyi læ kw'ông-iæ keh-go di-k'ang-li. Gyi i-s z iao fông gyi c'ih gyi-lah-go siu, ky'i kao-dæ peh ah-tia.

15 來田畈裏走來走去時候有一個人碰着其,問其話:「爾蕁離耶?」<sup>16</sup> 約瑟話:「我尋自個兄弟,其拉看羊個地方來何裏,請爾話向我道。」<sup>17</sup> 箇個人話:「其拉已經去了。我聽聞其拉講要到多單去。」約瑟就去尋兄弟,來多單碰着其拉。<sup>18</sup> 弗曾走到時候,兄弟遠遠看見其,就大家要謀殺其。<sup>19</sup> 其拉講來講去話:「箇做夢個人來了。<sup>20</sup> 來,阿拉殺其,丟其來一個地坑裏。只話,其被惡惡個野獸拖喫了。且看其個夢有啥個應驗。」<sup>21</sup> 流便聽聞,要救其出其拉個手裏,話:「阿拉弗可傷其性命。」<sup>22</sup> 流便又等其拉話:「嘸得好流其血,也嘸得好下手害其,能使丢

其來曠野箇個地坑裏。」其意思是要放其出其拉個手,去 交代撥阿爹。

<sup>23</sup> Iah-seh tseo-tao gyi hyüong-di di-fông, gyi-lah poh gyi i-zông, ziu-z gyi c'ün-tih-go siu-hwô-go i-zông. 24 Pô gyi tiu læ di-k'ang-li: keh di-k'ang z k'ong-go, m-neh shü læ-tih. <sup>25</sup> Gyi-lah zo-loh ky'üoh ping: ngæn-tsing dæ-ky'i k'eo-k'eo k'en-kyin lih-de Yi-jih-mô-li nying dzong Kyi-lih di-fông ka læ; loh-do pe-leh hyiang-liao, jü-hyiang, mehyiah: iao do-leh tao Yiæ-gyih koh ky'i. <sup>26</sup> Yiu-da teng hyüong-di wô, Ah-lah ziah-z sah-diao ah-di, k'ông-ko gyi hyüih, yiu soh-go ih-c'ü ni? 27 Læ, feh-jü ma gyi peh Yijih-mô-li nying, zi m-nao 'ô-siu 'æ gyi; ing-we gyi z ah-lahgo ah-di, ah-lah-go kweh-joh: cong hyüong-di ziu t'ing gyi shih-wô. <sup>28</sup> K'eo-k'eo yiu Mi-din-go k'ah-shông tseo-ko: keh-sing hyüong-di dzong di-k'ang-li la-c'ih Iah-seh; ma peh Yi-jih-mô-li nying, do-kyü nyiæn-kw'e nying-ts. Gyilah ziu ta Iah-seh tao Yiæ-gyih ky'i-de.

23 <u>約瑟</u>走到其兄弟地方,其拉剝其衣裳,就是其穿的個繡花個衣裳。<sup>24</sup> 把其丟來地坑裏。箇地坑是空個,嘸得水來的。<sup>25</sup> 其拉坐落喫餅。眼睛抬起扣扣看見列隊<u>以實瑪利人從基列</u>地方介來,駱駝揹勒香料、乳香、沒藥,要馱勒到<u>埃及</u>國去。<sup>26</sup> <u>猶大</u>等兄弟話:「阿拉若是殺掉阿弟,因過其血,有啥個益處呢?<sup>27</sup> 來,弗如賣其撥<u>以實瑪利</u>人,自嘸得好下手害其。因爲其是阿拉個阿弟,阿拉個骨肉。」衆兄弟就聽其說話。<sup>28</sup> 扣扣有<u>米甸</u>個客商走過,箇星兄弟從地坑裏拉出<u>約瑟</u>,賣撥<u>以實瑪利</u>人,馱歸廿塊銀子。其拉就帶約瑟到埃及去了。

<sup>29</sup> Liu-bin cün-læ tao di-k'ang pin-yin; ih-k'en, Iahseh m-neh læ di-k'ang-li, ziu c'ô-k'æ gyi i-zông. <sup>30</sup> Tseocün tao hyüong-di di-fông, wô, Keh-go siao-nying m-neh læ-tong; ngô dza-long, tao 'ah-li ky'i ni? <sup>31</sup> Cong hyüong-di sah ih-tsah yüong-sæn-yiang, do Iah-seh-go i-zông nyin-leh hyüih. <sup>32</sup> Pô keh siu-hwô i-zông ts'a nying ta-peh ah-tia, wô, Ah-lah p'ong-djoh keh-go: ts'ing k'en z ng-go ng-ts i-zông feh? <sup>33</sup> Ah-tia nying-teh-go, wô, Keh z ngô ng-

ts-go i-zông: yiu ôh-ôh-go yia-siu t'a gyi ky'üoh: Iah-seh ih-ding be ngao-sah-de. <sup>34</sup> Yüô-koh ziu c'ô-k'æ zi i-zông, do mô-pu soh iao, we-leh ng-ts sông-sing hyü-to nyih-ts. <sup>35</sup> Gyi-go ng-ts nön tu tseo-long-læ? en-we gyi; dæn-z ah-tia feh-k'eng ziu en-we, wô, Ngô pih-ding pe-shông tao ng-ts læ-kæn-go ing-s-li ky'i. Z-ka ah-tia we-leh gyi 'ao-li-da-k'oh. <sup>36</sup> Mi-din nying ta Iah-seh tao Yiæ-gyih, ma peh Po-di-veh, ziu-z Fah-lao-go dzing-ts, z-we-go deo-nao.

29 流便轉來到地坑邊沿,一看,<u>約瑟</u>嘸得來地坑裏, 就扯開其衣裳。<sup>30</sup> 走轉到兄弟地方,話:「箇個小人嘸得 來東,我咋弄,到何裏去呢?」<sup>31</sup> 衆兄弟殺一隻雄山羊, 馱<u>約瑟</u>個衣裳染勒血。<sup>32</sup> 把箇繡花衣裳差人帶撥阿爹, 話:「阿拉碰着箇個,請看是爾個兒子衣裳弗?」<sup>33</sup> 阿爹 認得個,話:「箇是我兒子個衣裳。有惡惡個野獸拖其 喫,<u>約瑟</u>一定被咬煞了。」<sup>34</sup> 雅各就扯開自衣裳,馱麻布 束腰,爲了兒子傷心許多日子。<sup>35</sup> 其個兒子囡都走攏來安 慰其,但是阿爹弗肯受安慰,話:「我必定悲傷到兒子來 間個陰司裏去。」是介阿爹爲了其號淚大哭。<sup>36</sup> 米甸人帶 <u>約瑟</u>到埃及,賣撥<u>波提乏</u>,就是<u>法老</u>個臣子,侍衛個頭腦。

## Ts. XXXVIII.

Ka z-'eo, Yiu-da li-k'æ gyi-go hyüong-di, tseo-tao ihgo Üô-t'u-læn nying, ming-z kyiao-leh Hyi-lah, di-fông ky'i. <sup>2</sup> Yiu-da læ keh-deo k'en-kyin ih-go Kyüô-nen nying, ming-z kyiao-leh Shü-üô-go nön, dæ gyi læ, teng gyi dongzông. <sup>3</sup> Gyi ziu-t'æ sang ng-ts, c'ü gyi ming-z R. <sup>4</sup> Gyi tsæ ziu-t'æ sang ng-ts, c'ü ming-z O-nen. <sup>5</sup> Yi sang ng-ts, c'ü ming-z Z-lah: sang gyi-go z-'eo, Yiu-da deng-læ Kyi-sih. 6 Yiu-da teng do ng-ts R dæ ts'i-ts, ming-z kyiao-leh Da-mô. <sup>7</sup> Yiu-da do ng-ts R læ Yiæ-'o-wô min-zin tsoh-ôh; keh-lah Yiæ-'o-wô djü gyi si. <sup>8</sup> Yiu-da teng O-nen wô, Ng hao dæ ah-sao, teng gyi dong-zông, teng ng ah-ko djün-cong tsihdæ. <sup>9</sup> O-nen hyiao-teh sô sang-go feh kwe peh zi, teng ahsao dong-zông-go z-'eo sih-læ di-yiang-li, sæn-leh teng ahko djün-cong tsih-dæ. <sup>10</sup> Yiæ-'o-wô feh-hwun-hyi gyi sô-tso, keh-lah yia djü gyi si. <sup>11</sup> Yiu-da, k'ong-p'ô siao ng-ts yia si ziang ah-ko ka, ziu teng sing-vu Da-mô wô, Ng hao kyü ng ah-tia oh-li ky'i siu kwu-sông nyü-nying, teng ng ng-ts Z-lah do-ky'i-læ. Da-mô ziu ky'i, deng-læ ah-tia oh-li.

介時候, 猶大離開其個兄弟, 走到一個亞土蘭人, 名 字叫勒希拉,地方去。2 猶大來箇頭看見一個迦南人,名字 叫勒書亞個囡, 抬其來, 等其同床。<sup>3</sup> 其受胎生兒子, 取其 名字珥。<sup>4</sup> 其再受胎生兒子,取名字阿南。<sup>5</sup> 又生兒子,取 名字示拉。生其個時候,猶大庉來基悉。<sup>6</sup> 猶大等大兒子珥 抬妻子,名字叫勒大瑪。<sup>7</sup> 猶大大兒子珥來耶和華面前作 惡,箇勒耶和華治其死。8 猶大等阿南話:「爾好抬阿嫂, 等其同床,等爾阿哥傳宗接代。」<sup>9</sup>阿南曉得所生個弗歸撥 自,等阿嫂同牀個時候泄來地垟裏,省勒等阿哥傳宗接 代。<sup>10</sup> 耶和華弗歡喜其所做, 箇勒也治其死。<sup>11</sup> 猶大, 恐 怕小兒子也死,像阿哥介,就等新婦大瑪話:「爾好歸爾

<sup>12</sup> Ko-leh kyi-z, Shü-üô-go nön Yiu-da ts'i-ts si-de: Yiuda ziu en-we, teng gyi beng-yiu Üô-t'u-læn nying Hyi-lah, dô-kô tao Ding-neh ky'i tsin yiang-mao. <sup>13</sup> Yiu nying teng Da-mô wô, ng ah-kong z tao Ding-neh tsin yiang-mao ky'ide. <sup>14</sup> Da-mô k'en-kyin Z-lah yi-kying dzing-nying tsiangda, zi wa feh-zing kô-peh gyi tso ts'i-ts, sô-yi t'eh-diao kwô-vu-go i-zông, do siu-p'ao kæ-leh min-k'ong, tsô-djü kyi-sing, zo-læ Ding-neh-go lu-pin-yin yiu liang-da shünyün di-fông. 15 Yiu-da k'en-kyin gyi kæ-leh min-k'ong, ts'eng gyi z gyi-nyü. <sup>16</sup> Gyi ziu læ lu-ka pin-yin tseo-longky'i, wô, Læ, ts'ing ng peh ngô teng ng dong-zông; ing-we feh hyiao-teh z zi-go sing-vu. <sup>17</sup> Gyi wô, Ng coh soh-si peh ngô, hao teng ngô dong-zông. Yiu-da wô, Ngô we pô yiang-de-li-go siao sæn-yiang song ng. Gyi yi wô, Ng k'eng peh ngô tông-deo teng ng do-læ feh? 18 Gyi wô, Ng iao soh-go tông-deo? Gyi wô, Ng-go ing, teng ta, lin siu-li-go kwa-dziang. Ziu peh gyi, teng gyi dong-zông; z-ka gyi ziut'æ-de. <sup>19</sup> Da-mô bô-ky'i-læ kyü-ky'i, t'eh-diao kæ mink'ong-go siu-p'ao, dzing-gyiu c'ün kwô-vu-go i-zông. <sup>20</sup> Yiu-da t'oh gyi beng-yiu Üô-t'u-læn nying, do siao sænyiang ky'i, iao dzong nyü-nying siu-li c'ü-wæn tông-deo; tsih-z zing gyi feh-djoh. <sup>21</sup> Meng-meng keh di-fông nying, wô, Lu-ka pin-yin liang-da shü-nyün di-fông, keh gyi-nyü læ 'ah-li? Gyi-lah wô, Dông-deo m-neh gyi-nyü. <sup>22</sup> Tseocün teng Yiu-da wô, Ngô zing gyi feh-djoh: ziu-z keh difông nying yia wô, Dông-deo m-neh gyi-nyü. <sup>23</sup> Yiu-da wô, Ze-gyi zi do-kæn z-de, k'ong-p'ô tao ngô-go me. Ng k'en, ngô yi-kying song gyi siao-yiang, tsih-z ng zing gyi fehdjoh.

12 過勒幾時,<u>書亞</u>個囡、<u>猶大</u>妻子死了。<u>猶大</u>就安慰,等其朋友<u>亞土蘭人希拉</u>,大家到<u>亭</u>訥去剪羊毛。<sup>13</sup> 有人等<u>大瑪</u>話:「爾阿公是到<u>亭</u>訥剪羊毛去了。」<sup>14</sup> 大瑪看見<u>示拉</u>已經成人長大,自還弗曾嫁撥其做妻子,所以脫掉寡婦個衣裳,馱手帕蓋勒面孔,遮住肌身,坐來亭訥個路

邊沿有兩埭水源地方。<sup>15</sup> 猶大看見其蓋勒面孔, 忖其是妓 女。16 其就來路街邊沿走攏去,話:「來,請爾撥我等爾 同床,因為弗曉得是自個新婦。」17 其話:「爾給啥西撥 我,好等我同床。」猶大話:「我會把羊隊裏個小山羊送 爾。」其又話:「爾肯撥我當頭等爾馱來弗?」18 其話: 「爾要啥個當頭?」其話:「爾個印,等帶,連手裏個拐 杖。」就撥其,等其同牀。是介其受胎了。<sup>19</sup> 大瑪爬起來 歸去, 脫掉蓋面孔個手帕, 仍舊穿寡婦個衣裳。<sup>20</sup> 猶大託 其朋友亞土蘭人, 馱小山羊去, 要從女人手裏取還當頭, 只是尋其弗着。21 問問箇地方人,話:「路街邊沿兩埭水 源地方, 箇妓女來何裏?」其拉話: 「蕩頭嘸得妓女。」22 走轉等猶大話:「我尋其弗着,就是箇地方人也話:『蕩 頭嘸得妓女。』」23 猶大話:「隨其自馱間是了,恐怕倒 我個楣。爾看,我已經送其小羊,只是爾尋其弗着。」

<sup>24</sup> Ko-leh sæn-ko yüih kwông-kying yiu nying teng Yiu-da wô, Ng sing-vu Da-mô yi-kying tso-leh gyi-nyü: næn-kæn we-leh kæn-ying, ziu-t'æ-de. Yiu-da wô, Yüong-Ĭa gyi c'ih-læ, me gyi sah. <sup>25</sup> Gyi be Ĭa-c'ih-go z-'eo ts'anying teng ah-kong wô, Keh-tong-si go kæ-cü, ngô dzong gyi ziu-t'æ; gyi yi wô, Ts'ing ng-zi k'en keh-go ing, teng ta, teng kwa-dziang, tu z jü-go? <sup>26</sup> Yiu-da nying-teh gyi wô, Keh nyü-nying pi ngô z tsing-dzih, ing-we ngô feh pô ng-ts Z-lah peh gyi. 'Eo-deo feh tsæ teng gyi dong-zông.

24 過勒三個月光景有人等<u>猶大</u>話:「爾新婦<u>大瑪</u>已經做了妓女,難問為了姦淫,受胎了。」<u>猶大</u>話:「用拉其出來,娓其煞。」<sup>25</sup> 其被拉出個時候差人等阿公話:「箇東西個居主,我從其受胎。」其又話:「請爾自看箇個印,等帶,等拐杖,都是誰個?」<sup>26</sup> <u>猶大</u>認得其話:「箇女人比我是正直,因為我弗把兒子<u>示拉</u>撥其。」後頭弗再等其同牀。

<sup>27</sup> Teng tso sang-m nyih-ts tao, gyi-go t'æ-li z shông-sang. <sup>28</sup> Ling sang-go z-'eo ih-go na-hwun sing-c'ih siu læ; siu-sang nying do 'ong-sin bo gyi, wô, Keh z sin sang-go. <sup>29</sup> K'eo-k'eo gyi-go siu geo-tsing, ah-di sang-c'ih-læ-de. Siu-sang-go wô, Ng dza zah-c'ih-læ-go? keh z ng-zi zah-c'ih-læ; ziu c'ü gyi ming-z <sup>[1]</sup>Fah-leh-z. <sup>30</sup> 'Eo-deo gyi ah-

ko sang-c'ih yiu 'ong-sin læ siu-li; ziu c'ü gyi ming-z Sahlah.

27 等做生姆日子到,其個胎裏是雙生。<sup>28</sup> 臨生個時候一個奶花伸出手來。收生人馱紅線縛其,話:「箇是先生個。」<sup>29</sup> 扣扣其個手跔進,阿弟生出來了。收生個話:「爾咋麺出來個?箇是爾自麺出來。」就取其名字<u>法勒</u>土。<sup>30</sup> 後頭其阿哥生出,有紅線來手裏,就取其名字<u>撒</u>拉。

[1] Ziu-z dza zah-c'ih-læ. 就是咋麺出來。(原註)

## Ts. XXXIX.

Iah-seh be ta-tao Yiæ-gyih: yiu Yiæ-gyih-go nying, Podi-veh, z Fah-lao-go kwun, z-we deo-nao, hyiang ta gyi lægo Yi-jih-mô-li nying, ma gyi. <sup>2</sup> Yiæ-'o-wô teng Iah-seh dô-kô læ-tong, s-teh gyi tso-nying jing-liu; gyi deng-læ cünying-kô Yiæ-gyih nying-go oh-li. <sup>3</sup> Gyi-go cü-nying-kô

k'en-kyin Yiæ-'o-wô teng gyi dô-kô læ-tong; yi k'en-kyin Yiæ-'o-wô s-teh gyi siu-li sô tso z-t'i yiang-yiang jing-liu. <sup>4</sup> Iah-seh voh-z cü-nying-kô, teh-djoh gyi-go eng-we, ziu peh gyi tso tsong-kwun: væn-pah sô yiu-go tu kao-fu gyi siu-li. <sup>5</sup> Z dzong gyi tso tsong-kwun, kwun long-tsong kô-kyi, Yiæ-'o-wô we-leh Iah-seh tô-hwô Yiæ-gyih nying oh-li: væn-pah læ oh-li, læ din-li sô-yiu go, tu teh-djoh Yiæ-'o-wô-go foh-ky'i. <sup>6</sup> Gyi væn-pah sô yiu-go tu kwe peh Iah-seh công-kwun; djü-leh gyi-zi ky'üoh-zih ts-nga, feh-hyiao-teh yiu soh-go tong-si.

<u>約瑟</u>被帶到<u>埃及</u>。有<u>埃及</u>個人,<u>波提乏</u>,是<u>法老</u>個官,侍衛頭腦,向帶其來個<u>以實瑪利</u>人,買其。<sup>2</sup>耶和華等 <u>約瑟</u>大家來東,使得其做人順流。其底來主人家<u>埃及</u>人個 屋裏。<sup>3</sup>其個主人家看見耶和華等其大家來東,又看見耶和 華使得其手裏所做事體樣樣順流。<sup>4</sup> <u>約瑟</u>服侍主人家,得着 其個恩惠,就撥其做總管,凡百所有個都交付其手裏。<sup>5</sup> 自 從其做總管,管攏總家計,耶和華爲了<u>約瑟</u>朵化埃及人屋 裏,凡百來屋裏,來田裏所有個,都得着耶和華個福氣。<sup>6</sup> 其凡百所有個都歸撥<u>約瑟</u>掌管,除了其自喫食之外,弗曉 得有啥個東西。

<sup>7</sup> Iah-seh siang-mao hao-k'en, min-k'ong ts'iao-li. 'Eo-deo gyi cü-nying-kô-go ts'i-ts k'en-k'en Iah-seh, wô, Ng teng ngô dong-zông. <sup>8</sup> Iah-seh feh-k'eng, teng cünying-kô-go ts'i-ts wô, Oh-li yiu soh-go tong-si læ ngô difông, cü-nying-kô tu feh-hyiao-teh; gyi yi-kying pô vænpah sô-yiu-go kao-fu ngô-go siu-li. <sup>9</sup> Oh-li-go nying m-yiu do-jü ngô-go: djü-leh ng ts-nga cü-nying-kô m-kao kyingdjü ngô; ing-we ng z gyi-go ts'i-ts: ngô dza ken tso ka do ôh z-ken, teh-ze Jing-ming ma? <sup>10</sup> Z-ka gyi nyih-nyih teng Iah-seh kông, Iah-seh feh-k'eng t'ing, feh teng gyi dongzông, yia feh teng gyi dô-kô læ-kæn. <sup>11</sup> Yiu ih-nyih Iah-seh tseo-tsing oh-li bæn z-ken, k'eo-k'eo kô-nying tu m-neh læ-tong; 12 keh nyü-nying Ĭa gyi i-zông, wô, Ng teng ngô dong-zông. Iah-seh ky'i-diao i-zông læ gyi siu-li, ziu dao c'ih-ky'i-de. <sup>13</sup> Keh nyü-nying k'en-kyin gyi dao-tseo, ky'idiao i-zông læ gyi siu-li, 14 ziu eo-long kô-nying, teng gyilah z-ka wô, Ng k'en, ng cü-nying-kô ta-læ-go Hyi-pah-læ nying tseo-tsing-læ diao-hyi ah-lah; gyi tao ngô di-fông iao dong-zông; ngô wæ-wæ-hyiang eo-ky'i-læ. <sup>15</sup> Gyi t'ingmeng ngô wæ-wæ eo-hyiang, ziu ky'i-diao i-zông læ ngô di-fông, zi dao-c'ih-ky'i-de. <sup>16</sup> Nyü-nying ziu liu gyi i-zông teng-tao cü-nying-kô kyü-læ; <sup>17</sup> kao-su gyi, z-ka wô, Ng sô ta-læ-go Hyi-pah-læ nu-boh tseo-tsing læ diao-hyi ngô. 18 Ngô wæ-wæ eo-hyiang, gyi ziu ky'i-diao i-zông læ ngô difông, dao-c'ih-ky'i-de. <sup>19</sup> Cü-nying-kô t'ing-meng ts'i-ts sô kông-go shih-wô, wô, Ng-go nu-boh z-ka dæ ngô, gyi ziu ho-ky'i dzih-c'ong. <sup>20</sup> Iah-seh-go cü-nying-kô k'ô gyi lohkæn, ziu-z wông-ti kwæn væn-nying di-fông: keh-tsao Iahseh læ lao-kæn-li-de.

<sup>7</sup> <u>約瑟</u>相貌好看,面孔俏麗。後頭其主人家個妻子看看 <u>約瑟</u>,話:「爾等我同牀。」<sup>8</sup> <u>約瑟</u>弗肯,等主人家個妻子 話:「屋裏有啥個東西來我地方,主人家都弗曉得。其已 經把凡百所有個交付我個手裏。<sup>9</sup> 屋裏個人嘸有大如我個, 除了爾之外主人家嘸告禁除我。因為爾是其個妻子,我咋 敢做介大惡事幹,得罪神明嗎?」10是介其日日等約瑟 講,約瑟弗肯聽,弗等其同牀,也弗等其大家來間。<sup>11</sup> 有 一日約瑟走進屋裏辦事幹,扣扣家人都嘸得來東,<sup>12</sup> 箇女 人拉其衣裳, 話:「爾等我同牀。」約瑟棄掉衣裳來其手 裏,就逃出去了。13 箇女人看見其逃走,棄掉衣裳來其手 裏, 14 就謳攏家人, 等其拉是介話: 「爾看, 爾主人家帶 來個希伯來人走進來調戲阿拉, 其到我地方要同床, 我懷 懷響謳起來。<sup>15</sup> 其聽聞我懷懷謳響,就棄掉衣裳來我地 方,自逃出去了。」16女人就留其衣裳等到主人家歸來, 17 告訴其,是介話:「爾所帶來個希伯來奴僕走進來調戲 我。18 我懷懷謳響,其就棄掉衣裳來我地方,逃出去 了。」19 主人家聽聞妻子所講個說話,話:「爾個奴僕是 介待我,其就火氣直衝。」20 約瑟個主人家抲其落監,就 是皇帝關犯人地方。箇遭約瑟來牢監裏了。

<sup>21</sup> Dæn-z Yiæ-'o-wô teng Iah-seh dô-kô læ-tong, æ-lin gyi, s-teh gyi teh-djoh s-nyüoh-s-go eng-we. <sup>22</sup> S-nyüoh-s pô lao-kæn-li-go væn-nying tu kao-fu Iah-seh siu-li: gyi-lah læ keh-deo sô tso-go z-ken tu z Iah-seh tso-go. <sup>23</sup> S-

nyüoh-s zi feh kwun gyi siu-'ô-go z-ken: ing-we Yiæ-'o-wô teng Iah-seh dô-kô læ-tong: væn-pah gyi sô-tso-go, Yiæ-'o-wô s-teh gyi jing-liu.

<sup>21</sup> 但是耶和華等<u>約瑟</u>大家來東,哀憐其,使得其得着司獄司個恩惠。<sup>22</sup> 司獄司把牢監裏個犯人都交付<u>約瑟</u>手裏:其拉來箇頭所做個事幹都是<u>約瑟</u>做個。<sup>23</sup> 司獄司自弗管其手下個事幹,因為耶和華等<u>約瑟</u>大家來東。凡百其所做個,耶和華使得其順流。

### Ts. XL.

Keh-sing z-ken 'eo-deo Yiæ-gyih wông-go tsiu-tsing teng jün-tsiang c'oh-væn gyi-lah cü, Yiæ-gyih wông. <sup>2</sup> Fah-lao ô-wông tsiu-tsing teng jün-tsiang keh liang-go kwun. <sup>3</sup> Ky'ih gyi loh-kæn, ziu-z Iah-seh kwæn-kæn-go difông, læ z-we deo-nao oh-li. <sup>4</sup> Z-we deo-nao pô gyi-lah

t'oh-fu Iah-seh: Iah-seh kong-ing gyi-lah: keh liang-go nying hao kyi-nyih kwæn læ lao-kæn-li.

<sup>5</sup> Yiæ-gyih wông-go tsiu-tsing jün-tsiang, keh liang-go nying be kwæn-læ lao-kæn-li, tso-yia teh ih-go mông, koh-nying tso yiu kông-kyiu-go mông. <sup>6</sup> Di-nyi t'in-nyiang lah-seh tseo-tsing ky'i k'en gyi; k'en-kyin gyi-lah yiu iumeng siang-mao. <sup>7</sup> Gyi ziu meng Fah-lao-go kwun, teng gyi dô-kô kwæn-læ cü-nying-kô oh-li-go, z-ka wô, Ng-lah kyih-mih dza-we yiu iu-meng siang-mao ni? <sup>8</sup> Gyi-lah teng gyi wô, Ah-lah tso mông, m-nying we ka-shih. Iah-seh teng gyi-lah wô, Ka-shih ky'i feh-z dzong Jing-ming læ-go ma? Ts'ing ng pô mông wô hyiang ngô dao.

<sup>5</sup> <u>埃及</u>王個酒政、膳長,箇兩個人被關來牢監裏,做夜得一個夢,各人做有講究個夢。<sup>6</sup> 第二天亮<u>約瑟</u>走進去看

其,看見其拉有憂悶相貌。<sup>7</sup> 其就問<u>法老</u>個官,等其大家關來主人家屋裏個,是介話:「爾拉今末咋會有憂悶相貌呢?」<sup>8</sup> 其拉等其話:「阿拉做夢,嘸人會解說。」<u>約瑟</u>等其拉話:「解說豈弗是從神明來個嗎?請爾把夢話向我道。」

<sup>9</sup> Tsiu-tsing pô gyi mông kao-su Iah-seh, z-ka wô, Ngô mông-li k'en-kyin bu-dao jü læ ngô min-zin. <sup>10</sup> Keh jü yiu sæn-p'ang ô-ts, tsing-ziang ts'iu-ngô, k'æ-hwô, kyih budao-ts, gyiu-tang-gyiu joh-de. <sup>11</sup> Fah-lao-go tsiu-pe læ ngôgo siu-li; ngô tsah bu-dao, tsô tsih-shü læ Fah-lao tsiu-peli, 'eo-deo p'ong-leh tsiu-pe song-peh Fah-lao siu-li. 12 Iah-seh teng gyi wô, Mông-go ka-shih z-ka; keh sæn-p'ang ô-ts z sæn-nyih. <sup>13</sup> Sæn-nyih li-hyiang Fah-lao pih-ding steh ng deo dæ-ky'i-læ, voh ng-go tsih-veng: ng yi we p'ong Fah-lao-go tsiu-pe song-peh gyi siu-li, ziang zin-deo tso gyi tsiu-tsing ka. <sup>14</sup> Ng teh-djoh eng-we z-'eo, ts'ing ng kyi-teh ngô, s eng-we peh ngô, teng ngô tseo-ming Fahlao, kyiu ngô c'ih keh-go oh-li. <sup>15</sup> Ngô zin-deo be lo-liah c'ih Hyi-pah-læ di-fông: ngô læ dông-deo yia m-neh tso soh-go ing-kæ loh-kæn-go z-ken.

<sup>9</sup>酒政把其夢告訴<u>約瑟</u>,是介話:「我夢裏看見葡萄樹來我面前。<sup>10</sup> 箇樹有三乓椏枝,正像抽芽,開花,結葡萄籽,球打球熟了。<sup>11</sup> 法老個酒杯來我個手裏。我摘葡萄,榨汁水來<u>法老</u>酒杯裏,後頭捧勒酒杯送撥<u>法老</u>手裏。<sup>12</sup> 約 瑟等其話:「夢個解說是介。箇三乓椏枝是三日。<sup>13</sup> 三日裏向<u>法老</u>必定使得爾頭抬起來,復爾個職份。爾又會捧<u>法</u> 老個酒杯送撥其手裏,像前頭做其酒政介。<sup>14</sup> 爾得着恩惠時候,請爾記得我,賜恩惠撥我,等我奏明<u>法老</u>,救我出 箇個屋裏。<sup>15</sup> 我前頭被擄掠出<u>希伯來</u>地方,我來蕩頭也嘸得做啥個應該落監個事幹。」

<sup>16</sup> Jün-tsiang k'en-kyin gyi ka-shih hao, ziu teng Iahseh wô, Ngô yia læ mông-li, k'en-kyin yiu sæn-tsah bahlæn læ ngô deo-teng: <sup>17</sup> zông-deo keh-tsah læn yiu djükong s-vu sô ts-peh Fah-lao ky'üoh-go ih-ts'ih 'ô-væn: yiu tiao læ ngô deo-teng læn-li teh gyi ky'üoh. <sup>18</sup> Iah-seh weteh, z-ka wô, Keh ka-shih z-ka-go: sæn-tsah læn z sæn-

nyih. <sup>19</sup> Sæn-nyih li-hyiang Fah-lao we dzong ng-go kyising dæ-ky'i ng-go deo, tiao ng læ jü-li, keh-sing tiao we teh ng-go nyüoh.

16 膳長看見其解說好,就等<u>約瑟</u>話:「我也來夢裏,看見有三隻白籃來我頭頂。<sup>17</sup> 上頭箇隻籃有廚工師父所煮撥<u>法老</u>喫個一切下飯。有鳥來我頭頂籃裏啄其喫。」<sup>18</sup> <u>約</u> 瑟回答,是介話:「箇解說是介個。三隻籃是三日。<sup>19</sup> 三日裏向<u>法老</u>會從爾個肌身抬起爾個頭,吊爾來樹裏,箇星鳥會啄爾個肉。」

<sup>20</sup> Tao di-sæn nyih, z Fah-lao sang-nyih, we-leh pah-kwun bæn-tsiu; læ pah-kwun cong-nyiang s-teh tsiu-tsing teng jün-tsiang deo dæ-ky'i-læ. <sup>21</sup> Wæn tsiu-tsing-go tsihveng: gyi ziu p'ong-leh tsiu-pe song-peh Fah-lao siu-li; <sup>22</sup> yia tiao-sah jün-tsiang; tsing-ziang Iah-seh ka-shih peh keh liang nying ka. <sup>23</sup> Tsih-z tsiu-tsing feh kyi-teh Iah-seh, mông-kyi gyi de.

<sup>20</sup> 到第三日,是<u>法老</u>生日,爲了百官辦酒,來百官中 央使得酒政等膳長頭抬起來。<sup>21</sup> 還酒政個職份。其就捧勒 酒杯送撥<u>法老</u>手裏。<sup>22</sup> 也吊煞膳長,正像<u>約瑟</u>解說撥箇兩人介。<sup>23</sup> 只是酒政弗記得約瑟,忘記其了。

# Ts. XLI.

Liang nyin 'eo-deo Fah-lao tso mông, lih-læ 'o pinyin. <sup>2</sup> K'en-kyin ts'ih-deo công-công hao-hao-go ngeo dzong 'o-li tseo-zông, di-li læ-tih ky'üoh-ts'ao. <sup>3</sup> Yi k'enkyin ts'ih-deo seo-seo p'ô-p'ô-go ngeo, yia dzong 'o-li tseo-zông, teng zin-deo-go ngeo bing-ba lih-læ 'o pin-yin. <sup>4</sup> Keh-sing seo-seo p'ô-p'ô-go ngeo, pô công-công haohao-go ts'ih-deo ngeo t'eng-ky'üoh-de. Fah-lao ziu diaokao. <sup>5</sup> Gyi yi kw'eng-joh, tsæ tso mông, k'en-kyin pao-pao mun-mun ts'ih-go mah-be sang-læ ih-kwang ken-ts-li. <sup>6</sup> Yi k'en-kyin 'eo-deo sang-c'ih ts'ih-go be z ih-ts, be tongfong c'ü-pih-liao-go. <sup>7</sup> Keh-sing ih-ts-go ts'ih-go be pô pao-pao mun-mun ts'ih-go be t'eng-ky'üoh-de. Fah-lao ziu diao-kao, keh-tsao teh-cü z-go mông.

兩年後頭<u>法老</u>做夢,立來河邊沿。<sup>2</sup> 看見七頭壯壯好好個牛從河裏走上,地裏來的喫草。<sup>3</sup> 又看見七頭瘦瘦怕怕個牛,也從河裏走上,等前頭個牛並排立來河邊沿。<sup>4</sup> 箇星瘦瘦怕怕個牛,把壯壯好好個七頭牛吞喫了。<u>法老</u>就調覺。<sup>5</sup> 其又睏熟,再做夢,看見飽飽滿滿七個麥佩生來一梗稈子裏。<sup>6</sup> 又看見後頭生出七個佩是一籽,被東風吹癟了個。<sup>7</sup> 箇星一籽個七個佩把飽飽滿滿七個佩吞喫了。<u>法老</u>就調覺,箇遭得知是個夢。

<sup>8</sup> Tao t'in-liang gyi sing-li iu-meng, ziu ts'a nying, eolong Yiæ-gyih keh-sing poh-lao teng ts'ong-ming nying. Fah-lao ziu pô mông kao-su gyi-lah, dæn-z m-nying nengkeo ka-shih peh Fah-lao. <sup>9</sup> Keh-tsao tsiu-tsing teng Fah-lao wô, Kyih-mih ngô kyi-teh zi-go ts'o-c'ü. <sup>10</sup> Zin-deo Fah-lao ô-wông dzing-ts, kwæn ngô teng jün-tsiang læ z-we-deogo oh-li. <sup>11</sup> Ngô teng gyi, liang-go nying, tso-yia teh mông: koh-nying tso yiu kông-kyiu go mông <sup>12</sup> Læ keh-deo teng ah-lah dong-de go yiu ih-go Hyi-pah-læ 'eo-sang, ziu-z z-we-deo-go nu-boh: ah-lah kao-su gyi: gyi ziu teng ah-lah

ka-shih mông, tsiao koh-nying sô tso-go mông ka-shih. <sup>13</sup> 'Eo-deo ko-jün ing-nyiæn tsiao gyi-go ka-shih, wæn ngô-go tsih-veng, s-teh gyi tiao-sah.

<sup>8</sup> 到天亮其心裏憂悶,就差人,謳攏<u>埃及</u>箇星博老等聰明人。<u>法老</u>就把夢告訴其拉,但是嘸人能夠解說撥<u>法老</u>。<sup>9</sup> 箇遭酒政等<u>法老</u>話:「今末我記得自個錯處。<sup>10</sup> 前頭<u>法老</u>啞喤臣子,關我等膳長來侍衛頭個屋裏。<sup>11</sup> 我等其,兩個人,做夜得夢。各人做有講究個夢。<sup>12</sup> 來箇頭等阿拉同隊個有一個<u>希伯來</u>後生,就是侍衛頭個奴僕。阿拉告訴其。其就等阿拉解說夢,照各人所做個夢解說。<sup>13</sup> 後頭果然應驗照其個解說,還我個職份,使得其吊煞。」

<sup>14</sup> Fah-lao ziu-ts'a nying ky'i eo Iah-seh: gyi-lah kw'a-kw'a ta gyi c'ih lao-kæn; gyi t'i-deo, wun i-zông, læ kyin Fah-lao. <sup>15</sup> Fah-lao teng Iah-seh wô, Ngô tso ih-go mông; m-nying neng-keo ka-shih: ngô t'ing-meng nying-kô wô, ng neng-keo hyiao-teh mông, we ka-shih. <sup>16</sup> Iah-seh we-teh Fah-lao wô, Feh-z ngô neng-keo; Jing-ming we s-peh Fah-lao t'a-bing-go ing-nyiæn. <sup>17</sup> Fah-lao teng Iah-seh wô,

Ngô mông-lih-læ 'o pin-yin, <sup>18</sup> k'en-kyin ts'ih-deo côngcông hao-hao-go ngeo dzong 'o-li tseo-zông, di-li læ-tih ky'üoh-ts'ao. 19 Yi k'en-kyin ts'ih-deo seo-seo ting-p'ô-go ngeo yia dzong 'o-li tseo-zông, ziu-z 'en Yiæ-gyih di-fông ng dzong m-neh k'en-kyin keh-cong-ka p'ô-fah-go: <sup>20</sup> kehsing seo-seo p'ô-p'ô-go ngeo, pô zin-deo công-công-go keh ts'ih-deo ngeo t'eng-ky'üoh-de: <sup>21</sup> t'eng-ky'üoh ts-'eo k'en-feh-c'ih gyi-lah yi-kying t'eng-ky'üoh, dzing-gyiu zka p'ô-p'ô-go. Ngô ziu diao-kao-de. <sup>22</sup> Ngô mông-li yi k'en-kyin pao-pao mun-mun ts'ih-go mah-be sang-læ ihkwang ken-ts-li. <sup>23</sup> Yi k'en-kyin 'eo-deo sang-c'ih ts'ih-go be, z boh-boh-go, ih-ts, be tong-fong c'ü-pih-liao-go. 24 Keh-sing ih-ih-go be, pô hao-hao keh ts'ih-go be t'engky'üoh-de. Ngô ziu pô keh z-ken kao-su poh-lao; dæn-z mnying neng-keo teng ngô ka-shih.

<sup>14</sup> <u>法老</u>就差人去謳<u>約瑟</u>。其拉快快帶其出牢監。其剃頭,換衣裳,來見<u>法老</u>。<sup>15</sup> <u>法老等約瑟</u>話:「我做一個夢,嘸人能夠解說,我聽聞人家話,爾能夠曉得夢,會解

說。」<sup>16</sup> 約瑟回答法老話:「弗是我能夠,神明會賜撥法 老太平個應驗。」17法老等約瑟話:「我夢立來河邊沿, 18 看見七頭壯壯好好個牛從河裏走上,地裏來的喫草。19 又看見七頭瘦瘦頂怕個牛也從河裏走上, 就是咸埃及地方 爾從嘸得看見箇種介怕法個。20 箇星瘦瘦怕怕個牛,把前 頭壯壯個箇七頭牛吞喫了。21吞喫之後看弗出其拉已經吞 喫,仍舊是介怕怕個。我就調覺了。<sup>22</sup> 我夢裏又看見飽飽 滿滿七個麥佩生來一梗稈子裏。23又看見後頭生出七個 佩,是薄薄個,一籽,被東風吹癟了個。<sup>24</sup> 箇星 穩個 佩,把好好箇七個佩吞喫了。我就把箇事幹告訴博老,但 是嘸人能夠等我解說。

<sup>25</sup> Iah-seh teng Fah-lao wô, Fah-lao-go mông z ih-yiang-go: Jing-ming z pô iao tso-go z-ken t'ong-cü Fah-lao.

<sup>26</sup> Ts'ih-deo hao-hao-go ngeo z ts'ih nyin: ts'ih-go hao-hao mah-be yia z ts'ih nyin: keh mông z ih-yiang-go.

<sup>27</sup> 'Eo-deo c'ih-læ seo-seo p'ô-p'ô-go ts'ih-deo ngeo yia z tsih nyin: wa-yiu ih-ih-go, be tong-fong c'ü-pih-liao ts'ih-go be, z tsiang-læ ts'ih-go hwông-nyin.

<sup>28</sup> Jing-ming pô gyi

iao tso-go z-ken sin t'ong-cü Fah-lao: ngô Fah-lao kông-go ziu-z ka. <sup>29</sup> 'En Yiæ-gyih di-fông tsiang-læ yiu ts'ih-nyin da-joh; 30 'eo-deo we yiu ts'ih-go do hwông-nyin: læ Yiægyih di-fông tu mông-kyi zin-deo-go da-joh; ping-ts'ia hwông-nyin we wæ-diao keh di-fông. <sup>31</sup> Ing-we 'eo-læ hwông-nyin ting li-'æ, keh-lah lin zin-deo da-joh tu feh teh-cü-de. <sup>32</sup> Keh-go z-ken Jing-ming z ding-kwe-liao, iao kw'a-kw'a tso-dzing; sô-yi s-teh Fah-lao tso-leh mông, tsæ tso mông. <sup>33</sup> Næn-kæn Fah-lao hao kæn ih-go ts'ong-ming cü-we-go nying shih-lih gyi djü Yiæ-gyih di-fông. 34 Fahlao hao ka tso-fah, yia shih-hyü-to kyin-toh læ keh difông, ts'ih-nyin da-joh-go z-'eo ky'i siu Yiæ-gyih di-fông ng-kwu ts-ih. <sup>35</sup> Siu-long keh-sing hao nyin-dzing-go liang-zih, tsih-jü koh læ Fah-lao-go siu-'ô: ping-ts'ia koh dzing-li tu dzeng-tsih liang-ts'ao. <sup>36</sup> Keh z yü-sin tsih-loh liang-ts'ao tso tsiang-læ Yiæ-gyih di-fông ts'ih-nyin dohwông-go yüong-dziang: s-teh keh di-fông feh we be hwông-nyin wæ-diao.

25 約瑟等法老話: 「法老個夢是一樣個。神明是把要 做個事幹通知法老。<sup>26</sup> 七頭好好個牛是七年。七個好好麥 佩也是七年。箇夢是一樣個。<sup>27</sup> 後頭出來瘦瘦怕怕個七頭 牛也是七年。還有穩穩個,被東風吹癟了七個佩,是將來 七個荒年。28神明把其要做個事幹先通知法老。我法老講 個就是介。<sup>29</sup> 咸埃及地方將來有七年大熟,<sup>30</sup> 後頭會有七 個大荒年。來埃及地方都忘記前頭個大熟,並且荒年會壞 掉箇地方。31因爲後來荒年頂厲害,箇勒連前頭大熟都弗 得知了。32 箇個事幹神明是定規了,要快快做成,所以使 得法老做勒夢,再做夢。33難間法老好揀一個聰明智慧個 人設立其治埃及地方。34法老好介做法,也設許多檢督來 箇地方,七年大熟個時候去收埃及地方五股之一。35 收攏 箇星好年成個糧食,積儲擱來法老個手下。並且各城裏都 存積糧草。36 箇是預先積落糧草做將來埃及地方七年大荒 個用場。使得箇地方弗會被荒年壞掉。」

<sup>37</sup> Fah-lao teng cong dzing-ts tu sön keh z-ken hao-go.
<sup>38</sup> Fah-lao teng dzing-ts wô, Keh-cong-ka yiu Jing-ming ling-ky'i-go nying, ah-lah dza neng-keo p'ong-djoh ih-go

ni? 39 Fah-lao teng Iah-seh wô, Jing-ming yi-kying peh ng hyiao-teh keh z-ken, keh-lah m nying ziang ng ka ts'ongming cü-we-go: 40 ng hao kwun-li ngô-go oh-li, ngô-go pah-sing tu pih-iao i ng-go 'ao-ling: tsih-yiu tsiah-we z ngô pi ng tseng-djong. <sup>41</sup> Fah-lao yi teng Iah-seh wô, Ng k'en, ngô kyü ng zông kwun-li 'en Yiæ-gyih di-fông. <sup>42</sup> Fah-lao ziu tsoh-loh gyi-zi siu-li-go ka-ts, ta læ Iah-seh-go siu-li, peh gyi c'ün ting-si mô-pu-go i-zông, yi pô kying lin-diao kwô-læ gyi deo-kying-li. 43 Peh gyi zo zi sô yiu-go di-nyi-'ao ts'ô-ts: læ gyi min-zin yiu nying eo-c'ih-læ, wô, Gyüloh. Z-ka shih-lih gyi kwun-li 'en Yiæ-gyih di-fông. <sup>44</sup> Fahlao teng Iah-seh wô, Ngô z Fah-lao, 'en Yiæ-gyih di-fông, ziah feh-z ng ing-hyü, m nying hao dong-siu dong-kyiah. <sup>45</sup> Fah-lao c'ü Iah-seh-go ming-z Seh-neh-pô-nyi: pingts'ia pô En-go di-fông tsi-s Po-di-fi-lah-go nön Üô-si-neh peh gyi tso ts'i-ts. Iah-seh tseo-c'ih jing-lo Yiæ-gyih difông.

37 法老等衆臣子都算箇事幹好個。38 法老等臣子話: 「箇種介有神明靈氣個人,阿拉咋能夠碰着一個呢?」39 法老等約瑟話: 「神明已經撥爾曉得箇事幹, 箇勒嘸人像 爾介聰明智慧個。40爾好管理我個屋裏,我個百姓都必要 依爾個號令,只有爵位是我比爾尊重。」<sup>41</sup> 法老又等約瑟 話:「爾看,我舉爾上管理咸埃及地方。」<sup>42</sup> 法老就摘落 其自手裏個戒指, 戴來約瑟個手裏, 撥其穿頂細麻布個衣 裳,又把金鏈條掛來其頭頸裏。<sup>43</sup> 撥其坐自所有個第二號 車子,來其面前有人謳出來,話:「跪落。」是介設立其 管理咸埃及地方。44 法老等約瑟話: 「我是法老,咸埃及 地方, 若弗是爾應許, 嘸人好動手動腳。」<sup>45</sup> 法老取約瑟 個名字撒納巴尼,並且把安個地方祭司波提非拉個囡亞西

<sup>46</sup> Iah-seh kyʻi kyin Yiæ-gyih wông Fah-lao z-ʻeo, nyin-kyi sæn-jih shü: Iah-seh dzong Fah-lao min-zin tseo-cʻih, jing-lo ʻen Yiæ-gyih di-fông. <sup>47</sup> Læ tsʻih nyin da-joh-go z-ʻeo, di-tʻu-go cʻih-tsʻæn meo-meo-zing-zing. <sup>48</sup> Gyi ziu siu-long Yiæ-gyih di-fông tsʻih nyin da-joh-go liang-

納撥其做妻子。約瑟走出巡邏埃及地方。

zih, tsih-jü læ dzing-li; ziu-z koh dzing-nga din-li-go liang-ts'ao tsih-jü læ gyi dzing-li. <sup>49</sup> Iah-seh siu-long-go koh ziang hæ-li sô-nyi ka to, teng-tao feh tsæ kyi liang gyi, ing-we liang tu liang-feh-læ-go.

46 <u>約瑟</u>去見<u>埃及</u>王<u>法老</u>時候,年紀三十歲。<u>約瑟</u>從<u>法</u> 老面前走出,巡邏咸<u>埃及</u>地方。<sup>47</sup> 來七年大熟個時候,地 土個出產茂茂盛盛。<sup>48</sup> 其就收攏<u>埃及</u>地方七年大熟個糧 食,積儲來城裏,就是各城外田裏個糧草積儲來其城裏。<sup>49</sup> <u>約瑟</u>收攏個穀像海裏沙泥介多,等到弗再計量其,因為量 都量弗來個。

<sup>50</sup> Hwông-nyin feh-zing tao, Iah-seh sang liang-go ngts, ziu-z En-go di-fông tsi-s Po-di-fi-lah-go nön Üô-si-neh sang-peh gyi-go. <sup>51</sup> Iah-seh c'ü do ng-ts-go ming-z <sup>[1]</sup>Mô-nô-si, wô, Jing-ming z s-teh ngô mông-kyi zi ih-ts'ih-go kw'u-ts'u, teng ah-tia oh-li. <sup>52</sup> C'ü di-nyi ng-ts ming-z <sup>[2]</sup>Yi-fah-lin, wô, Jing-ming z s-teh ngô læ ziu-kw'u-go di-fông yiu siu-dzing.

- 50 荒年弗曾到,<u>約瑟</u>生兩個兒子,就是<u>安</u>個地方祭司 <u>波提非拉</u>個囡<u>亞西納</u>生撥其個。<sup>51</sup> <u>約瑟</u>取大兒子個名字<u>瑪</u> 拿西<sup>[1]</sup>,話:「神明是使得我忘記自一切個苦楚,等阿爹 屋裏。」<sup>52</sup> 取第二兒子名字<u>以法蓮</u><sup>[2]</sup>,話:「神明是使得 我來受苦個地方有收成。」
  - [1] Ziu-z Peh-gyi mông-kyi. 就是撥其忘記。(原註)
  - [2] Ziu-z Yiu siu-ddzing. 就是有收成。(原註)
- ko-de. <sup>54</sup> Ts'ih-go hwông-nyin ky'i-deo tsih-zông, ziang Iah-seh sô wô-go: ping-ts'ia tao-c'ü tu z hwông-nyin: tæn-tsih 'en Yiæ-gyih di-fông yiu liang-zih. <sup>55</sup> Yiæ-gyih di-fông hwông-nyin, pah-sing hyiang Fah-lao t'ao liang-zih: Fah-lao teng Yiæ-gyih nying wô, Ng tao Iah-seh di-fông ky'i; gyi sô feng-fu ng-go hao tso. <sup>56</sup> Ka z-'eo pin t'in-'ô yiu hwông-nyin: Iah-seh k'æ-k'æ sô yiu-go koh-ts'ông t'iao-peh Yiæ-gyih nying; 'eo-deo Yiæ-gyih di-fông-go hwông-nyin yü-kô li-'æ. <sup>57</sup> Ping-ts'ia koh-koh-go nying tu tao Yiæ-

gyih læ, hyiang Iah-seh dih koh, ing-we tao-c'ü hwôngnyin tu z li-'æ.

53 後頭<u>埃及</u>地方七年大熟已經過了。54 七個荒年起頭接上,像<u>約瑟</u>所話個。並且到處都是荒年,單只咸<u>埃及</u>地方有糧食。55 <u>埃及</u>地方荒年,百姓向<u>法老</u>討糧食。<u>法老等埃及</u>人話:「爾到<u>約瑟</u>地方去,其所吩咐爾個好做。」56 介時候逼天下有荒年。<u>約瑟</u>開開所有個穀倉糶撥<u>埃及</u>人。後頭<u>埃及</u>地方個荒年愈加厲害。57 並且各國個人都到<u>埃及</u>來,向約瑟糴穀,因爲到處荒年都是厲害。

# Ts. XLII.

Yüô-koh teh-cü Yiæ-gyih di-fông yiu koh, ziu teng ng-ts wô, Ng-lah dza-we dô-kô k'en-tong. <sup>2</sup> Yi wô, Ngô t'ing-meng Yiæ-gyih yiu koh: ng-lah hao tseo-loh tao keh-deo, teng ngô ky'i dih gyi, s-teh ah-lah yiu sing-ming, feh-we si.

雅各得知<u>埃及</u>地方有穀,就等兒子話:「爾拉咋會大家看東?」<sup>2</sup>又話:「我聽聞<u>埃及</u>有穀,爾拉好走落到箇頭,等我去糴其,使得阿拉有性命,弗會死。」

<sup>3</sup> Iah-seh jih-go hyüong-di ziu tseo-loh Yiæ-gyih kyʻi dih koh. <sup>4</sup> Tsih-yiu Iah-seh-go ah-di Bin-yüô-ming, Yüôkoh feh ts'a gyi teng hyüong-di dô-kô ky'i, z-ka wô, K'ongp'ô gyi we ziu 'æ. <sup>5</sup> Keh-tsao Yi-seh-lih-go ng-ts teng kehsing dih-koh-go nying dô-kô læ: ing-we Kyüô-nen di-fông yia yiu hwông-nyin. <sup>6</sup> Ka z-'eo Iah-seh công-kwun koh-kô gyün-ping, t'iao koh peh long-tsong pah-sing; Iah-seh-go hyüong-di læ, dziao gyi min-zin boh-tao di-yiang-li. <sup>7</sup> Iahseh k'en-kyin hyüong-di, nying-teh gyi-lah, tsông-leh feh nying-teh, yi heng gyi-lah, z-ka wô, Ng dzong 'ah-li læ? Gyi-lah wô, Dzong Kyüô-nen di-fông læ ma liang-zih-go. <sup>8</sup> Iah-seh nying-teh hyüong-di, tsih-z hyüong-di feh nyingteh gyi. <sup>9</sup> Iah-seh kyi-teh zin-deo ts-tin gyi-lah-go mông, teng gyi-lah wô, Ng-lah z t'en-ts, deh-we læ k'en keh difông go p'o-dzæn. 10 Gyi-lah teng gyi wô, Cü, feh-z ka: nggo nu-boh z we-leh ma liang-zih læ-go. <sup>11</sup> Ah-lah tu z ih-go nying-go ng-ts; ah-lah z dzing-jih-go nying: ng-go nu-boh feh-z t'en-ts. 12 Iah-seh teng gyi-lah wô, Feh-z, ng z dehwe læ k'en keh di-fông p'o-dzæn-go. <sup>13</sup> Gyi-lah wô, Ng-go nu-boh z jih-nyi-go hyüong-di, Kyüô-nen di-fông ih-go nying-go ng-ts: kyih-mih ting-siao-go teng ah-lah ah-tia dô-kô læ-kæn, wa-yiu ih-go z m-neh-de. <sup>14</sup> Iah-seh teng gyi-lah wô, Keh z ngô yi-kying teng ng-lah wô-ko-de, nglah z-go t'en-ts. <sup>15</sup> Tsih-yiu ka tso-fah hao tso ng-go bingkyü: ngô ts-tin Fah-lao-go sing-ming vah-tsiu, ziah-z ng ting siao ah-di feh læ, pih-ding feh-hyü ng dzong dôngdeo c'ih-ky'i. <sup>16</sup> Hao ts'a ng-lah cong-nyiang ih-go, ky'i be ng-lah ah-di læ; yü-to pih-ding kwæn-læ dông-deo, hao tetsing ng-go shih-wô, ng z dzing-jih-go feh; feh z-ka, ngô tstin Fah-lao-go sing-ming vah-tsiu, ng z-go t'en-ts. Ziu pô gyi-lah cong-nying kwæn-leh sæn-nyih. <sup>18</sup> Tao di-sæn nyih Iah-seh teng gyi-lah wô, Ngô z p'ô-gyü Jing-ming-go: ng-lah ka tso-fah hao yiu sing-ming. <sup>19</sup> Ng ziah-z dzingjih-go, ka-ni ng-lah hyüong-di cong-nyiang hao liu ih-go nying kwæn-læ lao-kæn-li: yü-to tsæ-leh koh kyü-ky'i kyiu ng-lah oh-li-go kyih; <sup>20</sup> yia be ng-lah ting-siao ah-di læ kyin ngô: z-ka, ng-go shih-wô hao k'ao-jih, ng feh we si, Gyi-lah i gyi ka tso.

3 約瑟十個兄弟就走落埃及去糴穀。4 只有約瑟個阿弟 便雅憫,雅各弗差其等兄弟大家去,是介話:「恐怕其會 受害。」5 箇遭以色列個兒子等箇星糴穀個人大家來,因為 迦南地方也有荒年。6介時候約瑟掌管穀價權柄, 糶穀撥攏 總百姓。約瑟個兄弟來,朝其面前伏倒地垟裏。<sup>7</sup>約瑟看見 兄弟, 認得其拉, 裝勒弗認得, 又狠其拉, 是介話: 「爾 從何裏來?」其拉話:「從迦南地方來買糧食個。」8約瑟 認得兄弟,只是兄弟弗認得其。<sup>9</sup> 約瑟記得前頭指點其拉個 夢,等其拉話:「爾拉是探子,特為來看箇地方個破 綻。」<sup>10</sup> 其拉等其話:「主,弗是介。爾個奴僕是爲了買 糧食來個。11 阿拉都是一個人個兒子。阿拉是誠實個人。 爾個奴僕弗是探子。」12 約瑟等其拉話: 「弗是,爾是特 為來看箇地方破綻個。」<sup>13</sup> 其拉話: 「爾個奴僕是十二個

兄弟, 迦南地方一個人個兒子。今末頂小個等阿拉阿爹大 家來間,還有一個是嘸得了。」<sup>14</sup> 約瑟等其拉話:「箇是 我已經等爾拉話過了,爾拉是個探子。<sup>15</sup> 只有介做法好做 爾個憑據。我指點法老個性命罰咒,若是爾頂小阿弟弗 來,必定弗許爾從蕩頭出去。<sup>16</sup> 好差爾拉中央一個,去陪 爾拉阿弟來,餘多必定關來蕩頭,好對證爾個說話,爾是 誠實個弗。弗是介, 我指點法老個性命罰咒, 爾是個探 子。」就把其拉衆人關了三日。18 到第三日約瑟等其拉 「我是怕懼神明個。爾拉介做法好有性命。<sup>19</sup> 爾若是 誠實個,介呢爾拉兄弟中央好留一個人關來牢監裏。餘多 載勒穀歸去救爾拉屋裏個急。20 也陪爾拉頂小阿弟來見 我。是介,爾個說話好靠實,爾弗會死。」其拉依其介 做。

<sup>21</sup> Hyüong-di kông-læ-kông-ky'i wô, Ah-lah we-leh ah-di-go z-ken tsing-tsing z yiu-ze; k'en gyi kw'u-kw'u gyiu ah-lah, ah-lah feh t'ing: keh-lah tsao-djoh keh-go næn-deo. <sup>22</sup> Liu-bin we-teh gyi-lah wô, Ngô soh feh-z teng ng-lah wô, M-nao teh-ze keh-go siao-nying, tsih-z ng-lah

feh-k'eng t'ing: sô-yi gyi hyüih iao t'ao-wæn-de. <sup>23</sup> Gyi-lah feh-hyiao-teh Iah-seh t'ing-leh-c'ih gyi-go shih-wô; ing-we z k'ao t'ong-z djün-wô-go. <sup>24</sup> Iah-seh nyin-cün li-k'æ gyi-lah, ngæn-li-c'ih-de; yi cün-læ teng gyi-lah kông: læ hyüong-di min-zin pô Si-min bo-tong.

21 兄弟講來講去話:「阿拉為了阿弟個事幹眞眞是有罪。看其苦苦求阿拉,阿拉弗聽。箇勒遭着箇個難頭。」<sup>22</sup> <u>流便</u>回答其拉話:「我啥弗是等爾拉話,嘸得好得罪箇個小人,只是爾拉弗肯聽。所以其血要討還了。」<sup>23</sup> 其拉弗曉得<u>約瑟</u>聽勒出其個說話,因為是靠通事傳話個。<sup>24</sup> <u>約瑟</u>扭轉離開其拉,眼淚出了。又轉來等其拉講,來兄弟面前把西緬縛東。

<sup>25</sup> Iah-seh feng-fu nying do koh, tsi-mun gyi-lah-go dæ, wæn koh-nying nying-ts læ gyi dæ li-hyiang, yi peh gyi-lah lu-zông-go liang-ts'ao; ziu z-ka dæ gyi-lah. <sup>26</sup> Hyüong-di ziu peh li-ts pe-leh koh, dzong keh-deo kyü-ky'i. <sup>27</sup> Tao 'ô-c'ü-li yiu ih-go ka-k'æ gyi-go dæ iao do liang-ts'ao ü li-ts, k'en-kyin nying-ts læ dæ-k'eo-li; <sup>28</sup> ziu

teng cong hyüong-di wô, Ngô-go nying-ts wæn-de, læ ngô dæ li-hyiang: gyi-lah ky'ih-hoh ling-ling dong, dô-kô z-ka wô, Jing-ming z-ka tao ah-lah, dza kông-kyiu?

<sup>25</sup> <u>約瑟</u>吩咐人馱穀, 齒滿其拉個袋,還各人銀子來其袋裏向,又撥其拉路上個糧草。就是介待其拉。<sup>26</sup> 兄弟就撥驢子揹勒穀,從箇頭歸去。<sup>27</sup> 到下處裏有一個解開其個袋要馱糧草餵驢子,看見銀子來袋口裏,<sup>28</sup> 就等衆兄弟話:「我個銀子還了,來我袋裏向。」其拉喫惟懍動,大家是介話:「神明是介到阿拉,咋講究?」

<sup>29</sup> Tseo-cün Kyüô-nen di-fông, tao ah-tia Yüô-koh difông, ziu kao-su gyi sô p'ong-djoh-go z-ken, wô, <sup>30</sup> Keh difông cü-nying-kô heng ah-lah, sön ah-lah z t'en-ts. <sup>31</sup> Ahlah teng gyi wô, Ah-lah z dzing-jih-go nying, jih-dzæ feh-z t'en-ts: <sup>32</sup> peng-læ z yiu jih-nyi hyüong-di, tso ah-tia-go ng-ts: yiu ih-go m-neh-de: kyih-mih-ts ting siao-go læ Kyüô-nen di-fông teng ah-tia dô-kô læ-kæn. <sup>33</sup> Keh di-fông cü-nying-kô teng ah-lah wô, Ng-lah z dzing-jih-go feh, ngô z-ka hao hyiao-teh: liu ng-lah hyüong-di li-hyiang ih-go teng ngô dô-kô læ-tong; yü-to tsæ-leh liang-ts'ao ky'i kyiu ng oh-li-go kyih. <sup>34</sup> Ping-ts'ia be ng ting siao ah-di læ kyin ngô: ka-ni ngô hao hyiao-teh ng-lah feh-z t'en-ts, z dzing-jih-go: ngô ziu wæn ng-go hyüong-di, ng læ ts'-di yia hao tso sang-i.

<sup>29</sup> 走轉<u>迦南</u>地方,到阿爹<u>雅各</u>地方,就告訴其所碰着個事幹,話: <sup>30</sup> 「箇地方主人家狠阿拉,算阿拉是探子。 <sup>31</sup> 阿拉等其話: 『阿拉是誠實個人,實在弗是探子。 <sup>32</sup> 本來是有十二兄弟,做阿爹個兒子。有一個嘸得了。今末子頂小個來<u>迦南</u>地方等阿爹大家來間。』 <sup>33</sup> 箇地方主人家等阿拉話: 『爾拉是誠實個弗,我是介好曉得。留爾拉兄弟裏向一個等我大家來東,餘多載勒糧草去救爾屋裏個急。 <sup>34</sup> 並且陪爾頂小阿弟來見我。介呢我好曉得爾拉弗是探子,是誠實個。我就還爾個兄弟,爾來此地也好做生意。』」

<sup>35</sup> Teng-tao dæ tao-c'ih-go z-'eo, koh-nying-go nyingpao tu læ zi-go dæ-li: gyi-lah teng ah-tia k'en-kyin nyingpao ziu ky'ih-hoh-de. <sup>36</sup> Ah-tia Yüô-koh teng gyi-lah wô, Ng-lah 'æ-sah ngô-de: Iah-seh m-neh-de: Si-min yia mneh-de: yi iao do Bin-yüô-ming ky'i: keh-sing z-ken tu z 'æ ngô-go. <sup>37</sup> Liu-bin teng ah-tia z-ka wô, Ts'ing ng kao-fu ngô-go siu-li; ngô pih-ding ta-læ wæn ng: ziah-z feh ta-læ wæn ng, ng hao sah-diao ngô liang-go ng-ts. <sup>38</sup> Yüô-koh wô, Ngô-go ng-ts pih-ding feh teng ng dô-kô ky'i: ing-we gyi ah-ko yi-kying si-de, tsih-yiu gyi doh-zi læ-tong: gyi ziah læ lu-zông ziu 'æ, z ng s-teh ngô bah deo-fah kwu-kwu-ts'i-ts'i tao ing-s-li ky'i.

35 等到袋倒出個時候,各人個銀包都來自個袋裏。其 拉等阿爹看見銀包就喫惟了。36 阿爹雅各等其拉話:「爾 拉害煞我了。約瑟嘸得了,<u>西緬</u>也嘸得了,又要馱便雅憫 去,箇星事幹都是害我個。」<sup>37</sup> 流便等阿爹是介話:「請 爾交付我個手裏,我必定帶來還爾。若是弗帶來還爾,爾 好殺掉我兩個兒子。」<sup>38</sup> 雅各話:「我個兒子必定弗等爾 大家去,因為其阿哥已經死了,只有其獨自來東。其若來 路上受害,是爾使得我白頭髮孤孤悽悽到陰司裏去。」

#### Ts. XLIII.

Keh di-fông hwông-nyin li-'æ. <sup>2</sup> Dzong Yiæ-gyih dolæ-go koh yi-kying wun-de, ah-tia teng gyi-lah wô, Tsæ ky'i, teng ah-lah ma-tin liang-ts'ao læ. <sup>3</sup> Yiu-da we-teh gyi, wô, Keh-go nying kyih-kyih-jih teng ah-lah wô, Ziah-z ng-lah ah-di feh teng ng dô-kô læ, ng-lah m-neh hao kyin ngô-go min. 4 Næn-kæn ziah-z ts'a ah-di dô-kô ky'i, ahlah hao tseo-loh, teng ng ma liang-ts'ao. <sup>5</sup> Ng ziah fehk'eng ts'a gyi, ah-lah feh ky'i: ing-we keh-go nying teng ah-lah wô, Ziah-z ng-lah ah-di feh teng ng dô-kô læ, ng-lah m-neh hao kyin ngô-go min. <sup>6</sup> Yi-seh-lih wô, Dza-we z-ka 'æ ngô, teng keh-go nying wô, ng-lah wa-yiu ah-di ni?  $^7$ Gyi-lah wô, Keh-go nying si-si ti-ti bun-meng ah-lah-go lilih, teng ah-lah-go ts'ing-kyün, wô, Ng-lah ah-tia wa lækæn feh? ng-lah wa-yiu bih-go hyüong-di feh? Ah-lah tsiao gyi meng-go shih-wô we-teh gyi: dza hyiao-teh gyi we wô, Ta ng-lah ah-di læ ni? <sup>8</sup> Yiu-da teng gyi ah-tia Yi-seh-lih wô, Ts'a ah-di teng ngô dong-de, ah-lah ziu dong-sing ky'i; s-teh ng teng ah-lah, lin ah-lah siao-nying tu yiu singming, feh we si. <sup>9</sup> Ngô we teng gyi tso pao: ng hyiang ngôgo siu-li t'ao-wæn: ziah feh ta gyi kyü-læ en-læ ng-go minzin, ka-ni, ngô z üong-yün yiu ze. <sup>10</sup> Ah-lah ziah feh-z nganga-ts'i-ts'i, næn-kæn yi-kying hao ky'i-ts tsæ læ-de. 11 Ah-tia Yi-seh-lih teng gyi-lah wô, Ziah-z ka, hao ka tso-fah; do-leh ts'-di ting hao tong-si, fông-læ ky'i-ming li-hyiang, ziu-z ih-ngæn jü-hyiang, teng mih-dông; wa-yiu hyiangliao, meh-yiah, fi-ts, 'ang-nying keh-sing, ta-loh-ky'i songpeh keh-go nying tso li-veh. <sup>12</sup> Siu-li yi ta ih-be nying-ts, lin zin-deo dæ-li ta-kyü-læ-go nying-ts, yia siu-li ta-ky'i wæn gyi: k'ong-p'ô gyi 'ôh-tsia yiu c'ün-ts'oh. Wa-yiu be ng-lah ah-di, dong-sing, tsæ tao keh-go nying di-fông ky'i. <sup>14</sup> Dæn-nyün djün-neng-go Jing-ming peh ng-lah teh-djoh keh-go nying eng-we, ts'a ng-lah hyüong-di teng Bin-yüôming kyü-læ: ziah-z sông-diao ng-ts, yia tsih-hao sôngdiao-de.

箇地方荒年厲害。<sup>2</sup> 從埃及馱來個穀已經完了,阿爹等 其拉話:「再去,等阿拉買點糧草來。」3 猶大回答其, 話:「箇個人結結實實等阿拉話:『若是爾拉阿弟弗等爾 大家來,爾拉嘸得好見我個面。』4難間若是差阿弟大家 去,阿拉好走落,等爾買糧草。5爾若弗肯差其,阿拉弗 去。因為箇個人等阿拉話:『若是爾拉阿弟弗等爾大家 來,爾拉嘸得好見我個面。』」6以色列話:「咋會是介害 我,等箇個人話,爾拉還有阿弟呢?」<sup>7</sup> 其拉話: 「箇個人 細細底底盤問阿拉個履歷,等阿拉個親眷,話:『爾拉阿 参還來間弗?爾拉還有別個兄弟弗?』阿拉照其問個說話 回答其。咋曉得其會話: 『帶爾拉阿弟來』呢?」8 猶大等 其阿爹以色列話:「差阿弟等我同隊,阿拉就動身去。使 得爾等阿拉,連阿拉小人都有性命,弗會死。9 我會等其做 保,爾向我個手裏討還。若弗帶其歸來安來爾個面前,介 呢,我是永遠有罪。<sup>10</sup> 阿拉若弗是捱捱棲棲,難間已經好 去仔再來了。」11 阿爹以色列等其拉話:「若是介,好介 做法。馱勒此地頂好東西,放來器皿裏向,就是一眼乳 香,等蜜糖;還有香料、沒藥、榧子、杏仁箇星,帶落去 送撥箇個人做禮物。<sup>12</sup> 手裏又帶一倍銀子,連前頭袋裏帶歸來個銀子,也手裏帶去還其。恐怕其或者有舛錯。還有陪爾拉阿弟,動身,再到箇個人地方去。<sup>14</sup> 但願全能個神明撥爾拉得着箇個人恩惠,差爾拉兄弟等<u>便雅憫</u>歸來。若是喪掉兒子,也只好喪掉了。」

Gyi-lah ziu do keh-go li-veh, siu-li ta kô-be-go nying-ts, teng Bin-yüô-ming, dong-sing tseo-loh Yiæ-gyih, lih-læ Iah-seh min-zin. 16 Iah-seh k'en-kyin Bin-yüô-ming dô-kô læ, ziu teng oh-li-go tsong-kwun? wô, Ling keh-sing nying tao oh-li, sah sang-k'eo be-bæn, ing-we tsiu-ko kehsing nying iao teng ngô dô-kô ky'üoh-væn. <sup>17</sup> Keh-go nying i Iah-seh-go feng-fu, ling gyi-lah tseo-tsing Iah-seh oh-li. <sup>18</sup> Gyi-lah k'en-kyin ling tsing Iah-seh oh-li, ziu ky'ih-hoh, wô, We-leh deo-tsao dæ-li ta-kyü-go nying-ts, keh-lah ling ah-lah tsing dông-deo, iao zing pæn-deo, 'æ ah-lah, k'ô ah-lah tso nu-boh, deh ah-lah-go li-ts. 19 Gyilah ziu tseo-long Iah-seh oh-li-go tsong-kwun, læ mengk'eo-den teng gyi siang-liang, wô, Cü, ah-lah deo-tsao tseo-loh ma liang-ts'ao læ; <sup>21</sup> kyü-ky'i tao 'ô-c'ü-li, ka-k'æ dæ, k'en-kyin koh-nying nying-ts læ gyi dæ-k'eo-li, longtsong tsiao-su: næn-kæn ah-lah siu-li ta-læ wæn ng. <sup>22</sup> Wa-yiu siu-li ling-nga ta-leh nying-ts ma liang-ts'ao: jü fông ah-lah nying-ts læ dæ-li, ah-lah z feh teh-cü. <sup>23</sup> Gyi wô, Ng-lah fông-sing, hao-vong p'ô: ng-go Jing-ming teng ng ah-tia-go Jing-ming læ dæ-li s-peh ng dzæ-veh: ng-go nying-ts ngô yi-kying siu-tao-de. Ziu ling Si-min c'ih-læ peh gyi-lah kyin-min. <sup>24</sup> Keh-go nying ling gyi-lah tsing Iah-seh oh-li, do shu peh gyi-lah, gyi-lah gyiang-gyiang kyiah: ping-ts'ia ü gyi-lah li-ts. <sup>25</sup> Keh-go li-veh gyi-lah yüsin be-bæn teng Iah-seh tsiu-ko kyü-læ; ing-we t'ingmeng gyi-lah z iao læ keh-deo ky'üoh-væn.

15 其拉就馱箇個禮物,手裏帶加倍個銀子,等<u>便雅</u> 惯,動身走落<u>埃及</u>,立來<u>約瑟</u>面前。<sup>16</sup> 約瑟看見便雅憫大家來,就等屋裏個總管話:「領箇星人到屋裏,殺牲口備辦,因為畫過箇星人要等我大家喫飯。」<sup>17</sup> 箇個人依<u>約瑟</u> 個吩咐,領其拉走進約瑟屋裏。<sup>18</sup> 其拉看見領進約瑟屋

裏,就喫惟,話:「爲了頭遭袋裏帶歸個銀子,箇勒領阿 拉進蕩頭, 要尋扳頭, 害阿拉, 抲阿拉做奴僕, 奪阿拉個 驢子。」19 其拉就走攏約瑟屋裏個總管,來門口頭等其商 量,話:「主,阿拉頭遭走落買糧草來,<sup>21</sup>歸去到下處 裏,解開袋,看見各人銀子來其袋口裏,攏總照數。難問 阿拉手裏帶來還爾。22 還有手裏另外帶勒銀子買糧草。誰 放阿拉銀子來袋裏,阿拉是弗得知。」23 其話:「爾拉放 心,好甮怕。爾個神明等爾阿爹個神明來袋裏賜撥爾財 物。爾個銀子我已經收到了。」就領西緬出來撥其拉見 面。24 箇個人領其拉進約瑟屋裏,馱水撥其拉,其拉滰滰 腳,並且餵其拉驢子。<sup>25</sup> 箇個禮物其拉預先備辦等約瑟晝 過歸來, 因為聽聞其拉是要來箇頭喫飯。

<sup>26</sup> [1] Iah-sah kyü oh-li z-'eo, gyi-lah siu-li do-leh li-veh song gyi, tseo-tsing oh-li, dziao gyi boh-tao di-yiang-li. <sup>27</sup> Iah-seh meng-meng gyi en, wô, Ng zin-deo sô wô-go lao-dzing nying, ziu-z ng-lah ah-tia, gyin-go feh, wa læ-tong feh? <sup>28</sup> Gyi-lah we-teh wô, Ng-go nu-boh ah-lah ah-tia gyin-go, wa læ-kæn; ziu deo eo-tæn-tao pa gyi. <sup>29</sup> Iah-seh

ngæn-tsing dæ-ky'i, k'en-kyin dong-meo ng-ts ah-di Binyüô-ming, ziu wô, Ng-lah zin-deo teng ngô wô-go ting siao ah-di, z keh-go nying feh? Yi z-ka wô, Ngô ng-ts, dæn-nyün Jing-ming s eng-we peh ng. <sup>30</sup> Iah-seh kw'a-kw'a zing hao k'oh-go di-fông, tseo-tsing vông-li ky'i k'oh; ing-we æ-sih ah-di sing-li ziang ho me ka, <sup>31</sup> Gyiang-leh min tseo-c'ihlæ: zi tso-gyi, wô, Pa 'ô-væn. <sup>32</sup> Ziu pa-ky'i-læ, gyi-zi ihcoh, gyi hyüong-di ih-coh, Yiæ-gyih nying ih-coh: ing-we Yiæ-gyih nying feh teng Hyi-pah-læ nying dong-zih: teng gyi dong-zih z Yiæ-gyih nying u-su-go. <sup>33</sup> P'a gyi-lah zo-we læ Iah-seh min-zin, tu tsiao gyi-lah nyin-kyi do-siao-go ts'jü: keh-sing nying dô-kô hyi-gyi. <sup>34</sup> Iah-seh pô gyi-zi-go min-zin ts'æ-su feng peh keh-sing nying: tsih-z teng peh Bin-yüô-ming-go ts'æ-su, pi bih-nying to s-be: gyi-lah teng Iah-seh dô-kô ky'üoh-tsiu kw'a-loh.

<sup>26</sup> <u>約瑟</u><sup>[1]</sup>歸屋裏時候,其拉手裏馱勒禮物送其,走進屋裏,朝其伏倒地垟裏。<sup>27</sup> <u>約瑟</u>問問其安,話:「爾前頭所話個老成人,就是爾拉阿爹,健個弗,還來東弗?」<sup>28</sup>

其拉回答話:「爾個奴僕阿拉阿爹健個,還來間。」就頭 個帶倒拜其。<sup>29</sup> 約瑟眼睛抬起,看見同母兒子阿弟便雅 惯,就話:「爾拉前頭等我話個頂小阿弟,是箇個人 弗?」又是介話:「我兒子,但願神明賜恩惠撥爾。」30 約瑟快快尋好哭個地方, 走進房裏去哭。因爲愛惜阿弟心 裏像火梶介, 31 滰了面走出來, 自做其, 話: 「擺下 飯。」<sup>32</sup> 就擺起來,其自一桌,其兄弟一桌,埃及人一 桌。因爲埃及人弗等希伯來人同食,等其同食是埃及人惡 愫個。<sup>33</sup>派其拉坐位來約瑟面前,都照其拉年紀大小個次 序。箇星人大家稀奇。34 約瑟把其自個面前菜蔬分撥箇星 人,只是等撥便雅憫個菜蔬,比別人多四倍。其拉等約瑟 大家喫酒快樂。

[1] 原文此處錯印為 Iah-sah, 前後文均為 Iah-seh

#### Ts. XLIV.

Iah-seh feng-fu oh-li-go tsong-kwun, wô, Do liang-zih tsi-mun keh-sing nying-go dæ-li, tsiao gyi-lah sô pe-leh-dong-go, yia fông koh-nying-go nying-ts læ gyi dæ-k'eo-li.

<sup>2</sup> Wa-yiu do ngô-go tsiah-pe, ziu-z nying-ts tsiah-pe, teng gyi dih-koh-go nying-ts, fông-læ ting siao-go nying dæ-k'eo-li: gyi ziu i Iah-seh sô-wô ka tso.

<u>約瑟</u>吩咐屋裏個總管,話:「馱糧食齒滿箇星人個袋裏,照其拉所揹勒動個,也放各人個銀子來其袋口裏。2還有馱我個爵杯,就是銀子爵杯,等其糴穀個銀子,放來頂小個人袋口裏。其就依約瑟所話介做。」

<sup>3</sup> T'in kông-kông liang ts'a keh-sing nying teng li-ts ky'i. <sup>4</sup> C'ih-dzing wa feh-yün, Iah-seh teng tsong-kwun wô, Ky'i tse keh-sing nying; tse-djoh-ts, hao teng gyi-lah wô, Ng dza-we jün tsiang oh pao ni? <sup>5</sup> Keh ky'i-feh-z ngô cü-nying-kô sô ky'üoh-go tsiah-pe ma? Ky'i feh-z yüong gyi ky'i-k'o-go ma? Ng ka tso z tsoh-ôh. <sup>6</sup> Ziu tse-djoh gyi-lah, pô keh-go shih-wô teng gyi-lah kông. <sup>7</sup> Gyi-lah teng gyi wô, Cü, dza-we z-ka wô? ng-go nu-boh tön feh ka tso. <sup>8</sup>

Zin-deo læ dæ-k'eo-li teh-djoh-go nying-ts, ah-lah dzong Kyüô-nen di-fông ta-læ wæn ng: dza-we dzong ng cünying-kô oh-li t'eo kying-ts nying-ts ni? <sup>9</sup> Ng nu-boh congnyiang feh-leng læ jü di-fông zing-djoh, gyi pih-ding si; ah-lah yia tso ng cü-go nu-boh. <sup>10</sup> Gyi wô, Næn-kæn tsiao ng shih-wô ka tso: læ jü-go di-fông zing-djoh, gyi we tso ngô-go nu-boh; yü-to tu sön m-ze. <sup>11</sup> Cong-nying ziu kw'a-kw'a pô dæ fông-loh di-yiang-li; tu ka-k'æ gyi-go dæ. <sup>12</sup> Tsong-kwun seo gyi-lah, dzong do-go ky'i-deo, tao siao-go we-ts, zing-djoh tsiah-pe læ Bin-yüô-ming dæ-li.

<sup>3</sup>天剛剛亮差箇星人等驢子去。<sup>4</sup> 出城還弗遠,<u>約瑟</u>等總管話:「去追箇星人。追着仔,好等其拉話:『爾咋會善將惡報呢?<sup>5</sup> 箇豈弗是我主人家所喫個爵杯嗎?豈弗是用其起課個嗎?爾介做是作惡。』」<sup>6</sup> 就追着其拉,把箇個說話等其拉講。<sup>7</sup> 其拉等其話:「主,咋會是介話?爾個奴僕斷弗介做。<sup>8</sup> 前頭來袋口裹得着個銀子,阿拉從<u>迦南</u>地方帶來還爾。咋會從爾主人家屋裏偷金子銀子呢?<sup>9</sup> 爾奴僕中央弗論來誰地方尋着,其必定死,阿拉也做爾主個奴僕。」<sup>10</sup>

其話:「難問照爾說話介做,來誰個地方尋着,其會做我個奴僕,餘多都算嘸罪。」<sup>11</sup> 衆人就快快把袋放落地垟裏,都解開其個袋。<sup>12</sup> 總管搜其拉,從大個起頭,到小個為止,尋着虧杯來便雅憫袋裏。

 $^{13}$  Cong-nying ziu c'ô-k'æ i-zông, tu pô gyi-lah sô pego fông-læ li-ts zông-teng, tseo-cün dzing-li. 14 Yiu-da teng hyüong-di tseo-tao Iah-seh oh-li: Iah-seh wa læ-kæn: gyilah dziao gyi p'oh-tao di-yiang-li. <sup>15</sup> Iah-seh teng gyi-lah wô, Ng sô-tso z dza-go? Næn-dao feh hyiao-teh ziang ngô ka nying jih-dzæ z we ky'i-k'o-go ma? <sup>16</sup> Yiu-da wô, Ah-lah teng ng cü yiu soh-go hao kông? yiu soh-go hao bin? yiu soh-go hao feng-p'eo? Jing-ming z yi-kying dzô-ts'ah ng nu-boh-go ze-ming: næn-kæn ah-lah teng læ gyi di-fông zing-djoh tsiah-pe-go nying, tu tso ng cü-go nu-boh. <sup>17</sup> Iah-seh wô, Ngô tön feh ka tso: tæn-tsih læ gyi siu-li zingdjoh tsiah-pe-go we tso ngô-go nu-boh: ng-lah hao en-enweng-weng kyü ah-tia di-fông ky'i.

13 衆人就扯開衣裳,都把其拉所揹個放來驢子上頂, 走轉城裏。<sup>14</sup> 猶大等兄弟走到<u>約瑟</u>屋裏。<u>約瑟</u>還來間。其 拉朝其撲倒地垟裏。<sup>15</sup> <u>約瑟</u>等其拉話:「爾所做是咋個? 難道弗曉得像我介人實在是會起課個嗎?」<sup>16</sup> 猶大話: 「阿拉等爾主有啥個好講?有啥個好辯?有啥個好分剖? 神明是已經查察爾奴僕個罪名。難間阿拉等來其地方尋着 舒杯個人,都做爾主個奴僕。」<sup>17</sup> <u>約瑟</u>話:「我斷弗介 做。單只來其手裏尋着爵杯個會做我個奴僕。爾拉好安安 穩穩歸阿爹地方去。」

<sup>18</sup> Yiu-da tseo-long, z-ka wô, Cü, ng teng Fah-lao ih-yiang-go; gyiu ng cing nu-boh kao-su ih-kyü shih-wô, peh ng cü t'ing: m-nao sang-ho ô-wông ng-go nu-boh. <sup>19</sup> Zin-deo ng cü meng nu-boh, wô, Ng-lah yiu ah-tia teng hyüong-di feh? <sup>20</sup> Ah-lah we-teh cü wô, Ah-lah yiu ah-tia, z lao-dzing nying, wa-yiu lao-nyin sô sang-go siao ng-ts; gyi ah-ko yi-kying si-de; gyi ah-nyiang doh-doh dzing-loh keh ih-go: ah-tia ting dzih-din gyi. <sup>21</sup> Ng teng nu-boh wô, Ta gyi loh tao ngô di-fông læ, s-teh ngô ts'ing-ngæn moh-tu.

<sup>22</sup> Ah-lah teng cü wô, Siao-nying feh-neng-keo li-k'æ ahtia: ziah-z li-k'æ gyi, ah-tia pih-ding we si. <sup>23</sup> Ng teng nuboh wô, Ziah-z ng-lah ting siao ah-di feh teng ng dô-kô læ, ng-lah m-neh hao tsæ kyin ngô-go min. 24 Ka-ni, ah-lah tseo-cün tao ng nu-boh ngô ah-tia di-fông, pô ng cü-go shih-wô kao-su gyi. <sup>25</sup> 'Eo-deo ah-tia z-ka wô, Ng-lah tsæ ky'i, teng ah-lah ma-tin liang-zih. <sup>26</sup> Ah-lah wô, Ky'i-fehlæ-go: ziah-z ting siao ah-di teng ah-lah dong-de, z hao loh-ky'i: ziah ting siao ah-di feh teng ah-lah dong-de, ahlah m-neh hao teng keh-go nying kyin-min. <sup>27</sup> Ng-go nuboh ngô ah-tia teng ah-lah wô, Ng-lah hyiao-teh ngô ts'i-ts teng ngô sang liang-go ng-ts. <sup>28</sup> Ih-go li-k'æ ngô ky'i: ngô z-ka wô, gyi pih-ding z be ngao-sah: tao jü-kying m-neh k'en-kyin gyi. <sup>29</sup> Ziah-z ng-lah yi ta-leh keh ih-go li-k'æ ngô ky'i, gyi 'oh-tsia ziu 'æ, z s-teh ngô bah deo-fah kwukwu ts'i-ts'i tao ing-s-li ky'i. <sup>30</sup> Z-ka ah-tia-go sing-ming teng keh siao-nying-go sing-ming lin-long-liao-go, nænkæn ngô kyü-tao ng nu-boh ngô ah-tia di-fông, keh siaonying feh teng ah-lah dô-kô ky'i; <sup>31</sup> gyi k'en-kyin keh siaonying feh teng ah-lah dong-de, pih-ding we si, z ah-lah steh ng-go nu-boh ah-lah ah-tia bah deo-fah kwu-kwu ts'its'i tao ing-s-li ky'i. <sup>32</sup> Ping-ts'ia ng-go nu-boh læ ah-tia min-zin pao keh siao-nying wô, Ngô ziah-z feh ta gyi kyülæ, ka-ni ngô z üong-yün teh-ze ah-tia. <sup>33</sup> Næn-kæn gyiu ng, cing ngô dæ-teng siao-nying tso ngô cü-go nu-boh: peh keh siao-nying teng hyüong-di kyü-ky'i. <sup>34</sup> Ing-we gyi ziah feh dong-de ky'i, ngô dza hao tseo-cün teng ah-tia kyin-min: k'ong-p'ô k'en-kyin ah-tia tsao-djoh 'o-se.

18 <u>猶大</u>走攏,是介話:「主,爾等<u>法老</u>一樣個。求爾 准奴僕告訴一句說話,撥爾主聽。嘸得好生火啞喤爾個奴 僕。<sup>19</sup> 前頭爾主問奴僕,話:『爾拉有阿爹等兄弟弗?』 <sup>20</sup> 阿拉回答主話:『阿拉有阿爹,是老成人,還有老年所 生個小兒子,其阿哥已經死了,其阿孃獨獨剩落箇一個, 阿爹頂值鈿其。<sup>21</sup> 爾等奴僕話:『帶其落到我地方來,使 得我親眼目睹。』<sup>22</sup> 阿拉等主話:『小人弗能夠離開阿 爹。若是離開其,阿爹必定會死。』<sup>23</sup> 爾等奴僕話:『若 是爾拉頂小阿弟弗等爾大家來, 爾拉嘸得好再見我個 面。』24介呢,阿拉走轉到爾奴僕我阿爹地方,把爾主個 說話告訴其。<sup>25</sup> 後頭阿爹是介話: 『爾拉再去,等阿拉買 點糧食。』<sup>26</sup> 阿拉話: 『去弗來個。若是頂小阿弟等阿拉 同隊, 是好落去。若頂小阿弟弗等阿拉同隊, 阿拉嘸得好 等箇個人見面。』27爾個奴僕我阿爹等阿拉話:『爾拉曉 得我妻子等我生兩個兒子。28一個離開我去,我是介話, 其必定是被咬煞,到如今嘸得看見其。<sup>29</sup> 若是爾拉又帶勒 箇一個離開我去,其或者受害,是使得我白頭髮孤孤悽悽 到陰司裏去。』30是介阿爹個性命等箇小人個性命連攏掉 個,難間我歸到爾奴僕我阿爹地方, 箇小人弗等阿拉大家 去。31 其看見箇小人弗等阿拉同隊,必定會死,是阿拉使 得爾個奴僕阿拉阿爹白頭髮孤孤悽悽到陰司裏去。32 並且 爾個奴僕來阿爹面前保箇小人話:『我若是弗帶其歸來, 介呢我是永遠得罪阿爹。』<sup>33</sup> 難間求爾, 准我代等小人做 我主個奴僕。撥箇小人等兄弟歸去。34因爲其若弗同隊 去, 我咋好走轉等阿爹見面。恐怕看見阿爹遭着禍祟。」

### Ts. XLV.

Iah-seh læ keh-sing bông-pin lih-tong nying-go minzin tso-gyi feh-læ, ziu wô, Keh-sing nying tu hao li-k'æ ngô tseo-c'ih-ky'i. Iah-seh s-teh hyüong-di nying-teh gyigo z-'eo, m-nying teng gyi dô-kô lih-tong. <sup>2</sup> Iah-seh 'ao-lida-k'oh: Yiæ-gyih nying teng Fah-lao oh-li tu t'ing-menggo. <sup>3</sup> Iah-seh teng hyüong-di wô, Ngô z Iah-seh. Ngô ah-tia wa weh-tong feh? Hyüong-di we-teh feh-c'ih: ing-we læ gyi min-zin ling-ling-dong. <sup>4</sup> Iah-seh teng hyüong-di wô, Ts'ing ng-lah tseo-long-læ: gyi-lah ziu tseo-long-ky'i: gyi wô, Ngô z ng-lah ah-di Iah-seh, ziu-z ng-lah ma-peh Yiægyih nying-go. <sup>5</sup> Næn-kæn hao-vong we-leh ma ngô tao dông-deo iu-meng, zi 'eng zi; keh z Jing-ming ts'a ngô pi ng-lah zông-zin læ hao pao-djün sing-ming. <sup>6</sup> Ing-we taoc'ü yi-kying yiu liang-nyin hwông-nyin, wa-yiu ng-nyin mneh kang-cong, m-neh siu-keh. <sup>7</sup> Jing-ming ts'a ngô pi nglah zông-zin læ, hao pao-djün ng-lah 'eo-dæ læ shü-kænzông, yi do-nyiang kyiu ng-lah sing-ming. <sup>8</sup> Ka-ni ts'a ngô tao dông-deo feh-z ng-lah, z Jing-ming: Gyi z s-teh ngô tông Fah-lao ah-tia, teng gyi 'eh-kô-go cü, wa-yiu pin Yiægyih-go tsong-toh. <sup>9</sup> Ng-lah soh-soh zông-ky'i tao ngô ahtia di-fông, teng gyi wô, Ng-go ng-ts Iah-seh z-ka wô, Jingming yi-kying shih-lih ngô tso pin Yiæ-gyih-go cü: ts'ing tseo-loh tao ngô di-fông læ: m-nao nga-nga ts'i-ts'i. 10 Ng teng ts-seng, ngeo-yiang, væn-pah sô yiu-go, hao deng-læ Ko-sæn di-fông, teng ng siang-gying. <sup>11</sup> Læ keh-deo ngô we iang ng: (ing-we wa-yiu ng-nyin hwông-nyin:) sæn-leh ng teng ng-go kô-kyün, lin væn-pah sô yiu-go ky'üih-siaodziang-tön. 12 Ng-lah ts'ing-ngæn moh-tu, ngô ah-di Binyüô-ming yia ts'ing-ngæn moh-tu, z ngô ts'ing-k'eo teng ng-lah kông-go. 13 Ng-lah pih-ding pô ngô læ Yiæ-gyih-go yüong-wô, teng ng-lah sô k'en-kyin-go, tu wô hyiang ahtia dao: soh-soh be ngô ah-tia tao dông-deo læ. <sup>14</sup> Ziu baoleh ah-di Bin-yüô-ming deo-kying k'oh-de; Bin-yüô-ming yia læ gyi deo-kying-yin di-k'oh. <sup>15</sup> Yi teng cong hyüong-di ts'ing-ts'ing cü, k'oh-de, 'eo-deo hyüong-di teng gyi kôngkông.

約瑟來箇星旁邊立東人個面前做忌弗來,就話:「箇 星人都好離開我走出去。」約瑟使得兄弟認得其個時候, 嘸人等其大家立東。<sup>2</sup> 約瑟號淚大哭,埃及人等法老屋裏都 聽聞個。3約瑟等兄弟話:「我是約瑟。我阿爹還活東 弗?」兄弟回答弗出,因爲來其面前懍懍動。4約瑟等兄弟 話:「請爾拉走攏來。」其拉就走攏去。其話:「我是爾 拉阿弟約瑟,就是爾拉賣撥埃及人個。5難間好甮爲了賣我 到蕩頭憂悶, 自恨自。箇是神明差我比爾拉上前來好保全 性命。6因為到處已經有兩年荒年,還有五年嘸得耕種,嘸 得收割。<sup>7</sup> 神明差我比爾拉上前來,好保全爾拉後代來世間 上,又大樣救爾拉性命。8介呢差我到蕩頭弗是爾拉,是神 明。其是使得我當法老阿爹,等其合家個主,還有逼埃及 個總督。9爾拉速速上去到我阿爹地方,等其話:『爾個兒 子約瑟是介話:神明已經設立我做逼埃及個主。請走落到 我地方來。 嘸得好捱捱棲棲。 <sup>10</sup> 爾等子孫、牛羊、凡百所 有個,好底來歌珊地方,等爾相近。<sup>11</sup>來箇頭我會養爾

(因為還有五年荒年)。省勒爾等爾個家眷,連凡百所有個缺少長短。』<sup>12</sup> 爾拉親眼目睹,我阿弟<u>便雅憫</u>也親眼目睹,是我親口等爾拉講個。<sup>13</sup> 爾拉必定把我來<u>埃及</u>個榮華,等爾拉所看見個,都話向阿爹道。速速陪我阿爹到蕩頭來。」<sup>14</sup> 就抱勒阿弟<u>便雅憫</u>頭頸哭了。<u>便雅憫</u>也來其頭頸沿啼哭。<sup>15</sup> 又等衆兄弟親親嘴,哭了,後頭兄弟等其講講。

<sup>16</sup> Yiu nying djün peh Fah-lao oh-li t'ing-go wô, Iahseh-go hyüong-di læ-tong: Fah-lao teng gyi dzing-ts tu hwun-hyi. <sup>17</sup> Fah-lao teng Iah-seh wô, Ng hao wô hyiang hyüong-di dao, Z-ka tso-fah; peh sang-k'eo pe-leh tong-si, tao Kyüô-nen di-fông ky'i; <sup>18</sup> tsih ng-lah ah-tia, teng nglah oh-li-go nying, tao ngô di-fông læ: ngô pô Yiæ-gyih difông hao-go tong-si s-peh ng: ng ziu hao ky'üoh keh dit'u-go 'eo-jih. <sup>19</sup> Næn-kæn ng i ngô-go feng-fu ka tso, ziuz, dzong Yiæ-gyih di-fông do ts'ô-ts, tsæ ng-lah-go kô-siao, tsih ng ah-tia læ. <sup>20</sup> Yia m-nao feh-sô-teh oh-li-go tong-si; ing-we 'en Yiæ-gyih di-fông-go hao-c'ü tu joh-ü ng.

16 有人傳撥法老屋裏聽個話:「約瑟個兄弟來東。」 法老等其臣子都歡喜。<sup>17</sup> 法老等約瑟話:「爾好話向兄弟 道,是介做法,撥牲口揹勒東西,到<u>迦南</u>地方去。<sup>18</sup> 接爾 拉阿爹,等爾拉屋裏個人,到我地方來。我把<u>埃及</u>地方好 個東西賜撥爾。爾就好喫箇地土個厚實。」<sup>19</sup> 難間爾依我 個吩咐介做,就是,從<u>埃及</u>地方馱車子,再爾拉個家小, 接爾阿爹來。<sup>20</sup> 也嘸得好弗捨得屋裏個東西,因為咸<u>埃及</u> 地方個好處都屬於爾。」

<sup>21</sup> Yi-seh-lih ng-ts ziu-z ka tso: Iah-seh tsiao Fah-laogo feng-fu, be ts'ô-ts peh gyi-lah, teng lu-zông ing-yüonggo liang-ts'ao. <sup>22</sup> Ping-ts'ia song gyi-lah koh-nying i-zông kyi-t'ao; tsih-yiu song Bin-yüô-ming-go, nying-ts sæn-pah kw'e, i-zông ng-t'ao. <sup>23</sup> Gyi ta-peh ah-tia-go ziu-z; yüong lits jih-tsah, pe Yiæ-gyih di-fông hao-go tong-si; ts' li-ts jih-tsah pe koh teng ping teng 'ô-væn, be-bæn ah-tia lu-zông ing-yüong. <sup>24</sup> Ziu ts'a gyi hyüong-di kyü-ky'i. Ling dong-sing, Iah-seh teng gyi-lah wô, Ng-lah lu-zông ts'ih feh-k'o tsang-zao.

<sup>21</sup> <u>以色列</u>兒子就是介做。<u>約瑟照法老</u>個吩咐,備車子 撥其拉,等路上應用個糧草。<sup>22</sup> 並且送其拉各人衣裳幾 套。只有送<u>便雅憫</u>個,銀子三百塊,衣裳五套。<sup>23</sup> 其帶撥 阿爹個就是,雄驢子十隻,揹<u>埃及</u>地方好個東西,雌驢子 十隻,揹穀等餅等下飯,備辦阿爹路上應用。<sup>24</sup> 就差其兄 弟歸去。臨動身,<u>約瑟</u>等其拉話:「爾拉路上切弗可爭 造。」

<sup>25</sup> Gyi-lah ziu dzong Yiæ-gyih zông-ky'i. tao Kyüô-nen di-fông kyin ah-tia Yüô-koh; <sup>26</sup> teng gyi wô, Iah-seh wa weh-kæn, tso djün Yiæ-gyih di-go tsong-toh. Yüô-koh sing-hwe i-læn, feh siang-sing gyi-lah. <sup>27</sup> Gyi-lah pô Iah-seh teng gyi kông-go shih-wô wô hyiang gyi dao: ah-tia Yüô-koh k'en-kyin Iah-seh ts'a-læ tsih gyi-go ts'ô-ts, sing ziu weh-dong-de: <sup>28</sup> Yi-seh-lih z-ka wô, Keo-de, ngô ng-ts Iah-seh wa weh-tong: ts'ing ngô feh-zing si pih-ding ky'i k'en gyi.

<sup>25</sup> 其拉就從<u>埃及</u>上去。到<u>迦南</u>地方見阿爹<u>雅各</u>, <sup>26</sup> 等 其話:「約瑟還活間,做全埃及地個總督。」雅各心灰意 懶,弗相信其拉。<sup>27</sup> 其拉把<u>約瑟</u>等其講個說話話向其道。 阿<u>多雅各</u>看見<u>約瑟</u>差來接其個車子,心就活動了。<sup>28</sup> <u>以色</u> 列是介話:「夠了,我兒子<u>約瑟</u>還活東,請我弗曾死必定 去看其。」

#### Ts. XLVI.

Yi-seh-lih ta-leh væn-pah sô-yiu-go dong-sing tao Bih-z-pô, hyin-tsi peh ah-tia Yi-sah-go Jing-ming. <sup>2</sup> Yia-tao Jing-ming hyin-c'ih peh Yi-seh-lih k'en, teng gyi wô, Yüô-koh, Yüô-koh! Gyi wô, Ngô læ-tong. <sup>3</sup> Yi wô, Ngô z Jing-ming, ziu-z ng ah-tia-go Jing-ming: ng tseo-loh tao Yiæ-gyih ky'i feh fông-teh; læ keh-deo Ngô we s-teh ng dzing-we ih-go do koh. <sup>4</sup> Ngô we teng ng dô-kô tseo-loh Yiæ-gyih: Ngô pih-ding ling ng kyü-læ: Iah-seh we ts'ing-siu en ng ngæn-tsing.

以色列帶勒凡百所有個動身到別是巴,獻祭撥阿爹<u>以</u> 撒個神明。<sup>2</sup> 夜到神明顯出撥<u>以色列</u>看,等其話:「雅各, 雅各!」其話:「我來東。」<sup>3</sup> 又話:「我是神明,就是爾 阿爹個神明。爾走落到<u>埃及</u>去弗妨得。來箇頭我會使得爾 成爲一個大國。<sup>4</sup> 我會等爾大家走落<u>埃及</u>。我必定領爾歸 來。約瑟會親手安爾眼睛。」

<sup>5</sup> Yüô-koh dzong Bih-z-pô dong-sing: Yi-seh-lih ng-ts pô Fah-lao ts'a-læ tsih gyi-go ts'ô-ts, tsæ ah-tia Yüô-koh, teng gyi-lah kô-siao. <sup>6</sup> Yüô-koh teng gyi long-tsong 'eo-dæ ta-leh Kyüô-nen di-fông sô teh-djoh-go sang-k'eo ho-veh tao Yiæ-gyih ky'i; <sup>7</sup> ziu-z gyi-go ng-ts, seng-ts, gyi-go nön, teng seng-nyü, long-tsong 'eo-dæ tu teng gyi dong-de tao Yiæ-gyih ky'i.

<sup>5</sup> 雅各從別是巴動身。以色列兒子把法老差來接其個車子,載阿爹雅各,等其拉家小。<sup>6</sup> 雅各等其攏總後代帶勒迦南地方所得着個牲口貨物到埃及去。<sup>7</sup> 就是其個兒子、孫子、其個囡,等孫女,攏總後代都等其同隊到埃及去。

<sup>8</sup> Yi-seh-lih go ts-seng, ziu-z tao Yiæ-gyih ky'i-go, Yüôkoh teng gyi ng-ts, ming-z læ 'ô-veng; Yüô-koh do ng-ts Liu-bin. <sup>9</sup> Liu-bin-go ng-ts, Ha-noh, Fah-lu, Hyi-s-leng, Kyüô-mi. 10 Si-min-go ng-ts, Yiæ-meo-li, Yüô-ming, O-'eh, Yüô-kying, So-'eh, teng Kyüô-nen nyü-nying sang-go Siaolo. <sup>11</sup> Li-vi-go ng-ts, Keh-jing, Ko-'eh, Mi-lah-li. <sup>12</sup> Yiu-dago ng-ts, R, O-nen, Z-lah, Feh-leh-z, Sah-lah. Tsih-yiu R teng O-nen z si-læ Kyüô-nen di-fông-de. Fah-leh-z-go ng-ts Hyi-s-leng, Ha-meo-leh. <sup>13</sup> Yi-seh-kyüô-go ng-ts, Do-lah, Fu-üô, Iah-pah, Sing-leng. <sup>14</sup> Si-pu-leng-go ng-ts, Si-lih, Yileng, Yüô-li. <sup>15</sup> Keh-sing z Li-üô læ Pô-t'æn-üô-læn, sangpeh Yüô-koh-go ng-ts, wa-yiu gyi nön Ti-nô: t'ong-gong ng-ts nön sæn-jih-sæn nying.

8 以色列個子孫,就是到埃及去個,雅各等其兒子,名字來下文。雅各大兒子流便。9 流便個兒子,哈諾、法路、希斯崙、迦米。10 西緬個兒子,耶母利、雅憫、阿轄、雅斤、瑣轄,等迦南女人生個少羅。11 利未個兒子,革順、哥轄、米拉利。12 猶大個兒子,珥、阿南、示拉、法勒

土、撒拉。只有珥等阿南是死來迦南地方了。法勒士個兒子希斯崙、哈母勒。<sup>13</sup> 以薩迦個兒子,陀拉、孚亞、約伯、伸崙。<sup>14</sup> 西布倫個兒子,西烈、以倫、雅利。<sup>15</sup> 箇星是利亞來巴坦亞蘭,生撥雅各個兒子,還有其囡底拿。統共兒子囡三十三人。

<sup>16</sup> Kyüô-teh-go ng-ts, Si-fi-ong, Ha-kyi, Jü-nyi, Yi-z-peng, Yi-li, Üô-lo-ti, Üô-li-li. <sup>17</sup> Üô-shih-go ng-ts, Ing-nô, Yi-shü-üô, Yi-shü-yi, Pi-li-üô, teng ah-me Si-lah. Pi-li-üô-go ng-ts, Hyi-pah, Mah-kyih. <sup>18</sup> Keh-sing z Sih-p'ô-go ng-ts, ziu-z Lah-pæn s-peh gyi nön Li-üô-go: gyi sô sang-peh Yüô-koh-go t'ong-gong jih-loh-go nying.

16 <u>迦得個兒子,洗非翁、哈基、如尼、以士本、以</u>利、亞羅底、亞利利。<sup>17</sup> 亞設個兒子,音拿、以書亞、以 書以、比利亞,等阿妹西拉。比利亞個兒子,希百、麥 結。<sup>18</sup> 箇星是悉怕個兒子,就是拉班賜撥其囡利亞個。其 所生撥雅各個統共十六個人。

<sup>19</sup> Yüô-koh ts'i-ts Lah-kyih-go ng-ts, Iah-seh, Bin-yüô-ming. <sup>20</sup> Iah-seh læ Yiæ-gyih z-'eo, En-go tsi-s Po-di-fi-lah-

go nön Üô-si-neh sang-peh gyi-go ng-ts, Mô-nô-si, Yi-fah-lin. <sup>21</sup> Bin-üô-ming-go ng-ts, Pi-lah, Pi-kyih, Üô-jih-bih, Gyi-lah, Næ-mæn, Yi-hyi, Lo-jih, Meo-bing, Wu-bing, Üô-leh. <sup>22</sup> Keh-sing z Lah-kyih sang-peh Yüô-koh-go ng-ts; t'ong-gong jih-s-go nying.

19 雅各妻子拉結個兒子,約瑟、便雅憫。20 約瑟來埃 及時候,安個祭司波提非拉個囡亞西納生撥其個兒子,瑪 拿西、以法蓮。21 便雅憫個兒子,比拉、比結、亞實別、 其刺、乃幔、以希、羅實、母平、戶平、亞勒。22 箇星是 拉結生撥雅各個兒子,統共十四個人。

<sup>23</sup> Dæn-go ng-ts, Wu-sing. <sup>24</sup> Neh-da-li-go ng-ts, Yüô-sih, Kwu-nyi, Yiæ-seh, Z-lin. <sup>25</sup> Keh-sing z Pih-lah-go ng-ts, ziu-z Lah-pæn s-peh gyi nön Lah-kyih-go: gyi sô sang-peh Yüô-koh-go t'ong-gong ts'ih-go nying.

23 但個兒子, 戶伸。24 納大利個兒子, 雅薛、沾尼、 耶色、示臉。25 箇星是辟拉個兒子, 就是拉班賜撥其囡拉 結個。其所生撥雅各個統共七個人。 <sup>26</sup> Z-ka teng Yüô-koh dong-de tao Yiæ-gyih læ-go, djü-leh Yüô-koh sing-vu ts-nga, dzong gyi iao-bo-li sang-loh-læ-go, t'ong-gong loh-jih-loh-go nying. <sup>27</sup> Wa-yiu Iah-seh læ Yiæ-gyih sang liang-go ng-ts: ka-ni Yüô-koh ih-kô læ Yiæ-gyih go, t'ong-gong ts'ih-jih-go nying.

26 是介等<u>雅各</u>同隊到<u>埃及</u>來個,除了<u>雅各</u>新婦之外, 從其腰縛裏生落來個,統共六十六個人。<sup>27</sup>還有<u>約瑟來埃</u> 及生兩個兒子。介呢<u>雅各</u>一家來<u>埃及</u>個,統共七十個人。

<sup>28</sup> Yüô-koh ts'a Yiu-da sin tao Iah-seh di-fông, ling-leh gyi hyiang Ko-sæn ka ky'i: cong-nying ziu tseo-tao Ko-sæn di-fông. <sup>29</sup> Iah-seh be-leh ts'ô-ts, zông-ky'i tao Ko-sæn, nying-tsih ah-tia Yi-seh-lih, k'en-kyin-leh gyi; ziu bao-leh deo-kying, læ gyi deo-kying-yin k'oh-leh dziang-kyiu. <sup>30</sup> Yi-seh-lih teng Iah-seh wô, Næn-kæn ngô si yia en-sing, ing-we ng wa læ-tong, ngô teng ng kyin-min-de. <sup>31</sup> Iah-seh teng hyüong-di teng ah-tia ih-kô wô, Ngô ky'i tseo-ming Fah-lao; teng gyi wô, Ngô hyüong-di teng ngô ah-tia ih-kô, zin-deo læ Kyüô-nen di-fông-go, næn-kæn tao ngô di-fông

læ-de. <sup>32</sup> Keh-sing nying tu z k'en-yiang-go, ü sang-k'eo we-nyih; z ta-leh ngeo-yiang, teng væn-pah sô yiu-go læ-de. <sup>33</sup> T'ông-jün Fah-lao dziao ng-lah, meng, Ng-lah sohgo z-nyih? <sup>34</sup> ng-lah ziu k'o-yi wô, Ng-go nu-boh dzong siao-læ tao jü-kying lin zi teng tsu-tsong tu z k'en sang-k'eo we-nyih: ka hao s-teh ng-lah deng-læ Ko-sæn di-fông: ing-we væn-pah k'en yiang nying z Yiæ-gyih nying sô u-su-go.

28 雅各差猶大先到約瑟地方,領勒其向歌珊介去。衆人就走到歌珊地方。29 約瑟備勒車子,上去到歌珊,迎接阿爹<u>以色列</u>,看見了其,就抱勒頭頸,來其頭頸沿哭了長久。30 <u>以色列等約瑟</u>話:「難問我死也安心,因為爾還來東,我等爾見面了。」31 約瑟等兄弟等阿爹一家話:「我去奏明<u>法老</u>,等其話:『我兄弟等我阿爹一家,前頭來迦南地方個,難問到我地方來了。32 箇星人都是看羊個,餵牲口為業。是帶勒牛羊,等凡百所有個來了。33 倘然法老朝爾拉,問:『爾拉啥個事業?』34 爾拉就可以話:『爾個奴僕從小來到如今連自等祖宗都是看牲口為業。介好使

## Ts. XLVII.

Iah-seh tseo-ming Fah-lao wô, Ngô ah-tia teng ngô hyüong-di, lin gyi ngeo yiang, væn-pah sô yiu-go, dzong Kyüô-nen di-fông læ: næn-kæn z læ Ko-sæn di-fông. <sup>2</sup> Iahseh læ hyüong-di cong-nyiang ling ng-go nying ky'i kyin Fah-lao. <sup>3</sup> Fah-lao teng gyi hyüong-di wô, Ng-lah tso sohgo z-nyih yia? Gyi-lah we-teh Fah-lao wô, Ng-go nu-boh, lin zi teng tsu-tsong tu z k'en-yiang-go. <sup>4</sup> Yi teng Fah-lao wô, Ah-lah læ tæn-koh ts'-di; ing-we Kyüô-nen di-fông do hwông-nyin, ng-go nu-boh m-neh ts'ao-liao hao ü sangk'eo: næn-kæn ts'ing ng, cing ng-go nu-boh deng-læ Kosæn di-fông. <sup>5</sup> Fah-lao teng Iah-seh wô, Ng ah-tia teng hyüong-di tao ng-go di-fông læ: 6 Yiæ-gyih di-fông læ ng min-zin: hao kæn 'eo-jih-go di-t'u peh ng ah-tia hyüong-di deng; ziu-z hao djü-læ Ko-sæn di-fông: ping-ts'ia ng hyiao-teh gyi-lah cong-nyiang yiu dzæ-neng-go nying, hao kyü-tsin gyi-lah công-kwun ngô-go sang-k'eo. <sup>7</sup> Iah-seh ling-leh ah-tia Yüô-koh tsing ky'i, lih-læ Fah-lao min-zin: Yüô-koh coh-foh Fah-lao. <sup>8</sup> Fah-lao teng Yüô-koh wô, Ng to-siao kwe-kang? <sup>9</sup> Yüô-koh teng Fah-lao wô, Ngô tæn-koh læ shü-kæn-zông nyih-ts ih-pah sæn-jih shü: ngô tso-nying nyih-ts m-neh to, m-neh hao, yia feh gyih-jü ngô tsu-tsong tso c'ih-meng nying-go nyih-ts. <sup>10</sup> Yüô-koh yi coh-foh Fah-lao, dzong Fah-lao min-zin tseo-c'ih.

<u>約瑟</u>奏明<u>法老</u>話:「我阿爹等我兄弟,連其牛羊,凡百所有個,從<u>迦</u>南地方來。難問是來歌珊地方。」<sup>2</sup> <u>約瑟</u>來兄弟中央領五個人去見<u>法老</u>。 <sup>3</sup> <u>法老</u>等其兄弟話:「爾拉做啥個事業耶?」其拉回答<u>法老</u>話:「爾個奴僕,連自等祖宗都是看羊個。」<sup>4</sup> 又等<u>法老</u>話:「阿拉來耽擱此地,因為<u>迪</u>南地方大荒年,爾個奴僕嘸得草料好餵牲口。難問請爾,准爾個奴僕庵來歌珊地方。」 <sup>5</sup> <u>法老</u>等約瑟話:「爾阿爹等兄弟到爾個地方來。 <sup>6</sup> 埃及地方來爾面前。好揀厚實個

地土撥爾阿爹兄弟底,就是好住來<u>歌珊</u>地方。並且爾曉得 其拉中央有才能個人,好舉薦其拉掌管我個牲口。」<sup>7</sup><u>約瑟</u> 領勒阿爹<u>雅各</u>進去,立來<u>法老</u>面前。<u>雅各</u>祝福<u>法老。<sup>8</sup> 法老</u> 等雅各話:「爾多少貴庚?」<sup>9</sup> 雅各等法老話:「我耽擱來 世間上日子一百三十歲。我做人日子嘸得多,嘸得好,也 弗及如我祖宗做出門人個日子。」<sup>10</sup> 雅各又祝福<u>法老</u>,從 法老面前走出。

<sup>11</sup> Iah-seh tsiao Fah-lao-go feng-fu, kæn Yiæ-gyih koh 'eo-jih di-t'u, ziu-z Læn-seh di-fông, peh gyi ah-tia hyüong-di deng-loh tso ts'æn-nyih. <sup>12</sup> Iah-seh iang gyi ah-tia hyüong-di, teng ah-tia 'o-kô lao-siao; tsiao gyi-lah kô-tang-kô, kong-ing gyi-lah liang-zih.

11 <u>約瑟照法老</u>個吩咐,揀<u>埃及</u>國厚實地土,就是<u>蘭塞</u>地方,撥其阿爹兄弟庵落做產業。<sup>12</sup> <u>約瑟</u>養其阿爹兄弟,等阿爹和家老小。照其拉家打家,供應其拉糧食。

<sup>13</sup> Ka z-'eo hwông-nyin yü-kô li-'æ, tao-c'ü m-neh liang-zih: Yiæ-gyih teng Kyüô-nen di-fông we-leh hwông-nyin kw'eng-kw'u. <sup>14</sup> Iah-seh t'iao koh peh cong-nying,

siu-long 'en Yiæ-gyih teng Kyüô-nen di-fông sô yiu-go nying-ts. Iah-seh pô keh-go nying-ts do-tsing Fah-lao wông-kong-li. <sup>15</sup> Yiæ-gyih teng Kyüô-nen di-fông nying-ts wun-de, Yiæ-gyih nying tu tseo-tao Iah-seh di-fông, wô, Ts'ing ng peh ah-lah liang-zih: dza-we iao ah-lah si læ nggo min-zin? ing-we nying-ts yi-kying wun-de. <sup>16</sup> Iah-seh wô, Hao do sang-k'eo peh ngô; ziah-z nying-ts wun-de, ngô we-leh sang-k'eo k'eng peh ng-lah. <sup>17</sup> Koh-nying ziu ky'in sang-k'eo tao Iah-seh di-fông: Iah-seh we-leh gyi-lah mô ngeo yiang li-ts keh-sing diao liang-zih peh gyi-lah: keh-nyin we-leh keh-sing sang-k'eo pô liang-zih iang gyilah. <sup>18</sup> Keh-nyin ko-de, di-nyi nyin cong-nying yi læ, teng Iah-seh wô, Ah-lah feh-ken ing-mun ng cü, nying-ts yikying wun-de; sang-k'eo tu kwe-peh ng cü-de; læ ng cü-go min-zin, m-kao bih-yiang tong-si dzing-loh, tsih-yiu ahlah kyi-sing teng din-di z-de. <sup>19</sup> Dza-we iao ah-lah teng din-di tu hwe-diao læ ng-go min-zin ni? Ts'ing ng pô liang-zih ma ah-lah teng ah-lah din-di: ka-ni ah-lah teng

ah-lah din-di tu kwe-peh Fah lao yüong: ping-ts'ia pô iang-ts peh ah-lah, s-teh ah-lah hao yiu sing-ming, feh we si, din-di yia feh we hwông-ko. <sup>20</sup> Iah-seh dæ Fah-lao ma pin Yiæ-gyih-go din-di: ing-we Yiæ-gyih nying be hwôngnyin tse-loh-læ, koh-nying ma-diao gyi-go din-di: sô-yi din-di tu kwe-peh Fah-lao-de. <sup>21</sup> Yi s-teh Yiæ-gyih dôngpin ts-ka tao keh-pin ts-ka-go pah-sing tu pun-tsing dzingli. <sup>22</sup> Tsih-yiu tsi-s-go din-di feh ma, ing-we Fah-lao s-peh tsi-s yiu ih-ding-go ngah-ts: gyi-lah hao ky'üoh Fah-lao sô s-peh gyi-go fong-loh: keh-lah feh ma-diao gyi-lah din-di. <sup>23</sup> Iah-seh teng pah-sing wô, Kyih-mih ngô ma ng-lah teng ng-go din-di kwe-peh Fah-lao: dông-deo yiu iang-ts lætong peh ng-lah hao ky'i cong-din. 24 Gyi c'ih-ts'æn pihding kwe ng-kwu teh-ih peh Fah-lao: keh s-kwu hao kwepeh ng-lah zi, tso ng-lah din-li-go iang-ts, wa-yiu ng-lah lin oh-li ng-nô keh-sing-go k'eo-liang. <sup>25</sup> Pah-sing wô, Ng yikying kyiu ah-lah-go sing-ming; dæn-nyün ah-lah tehdjoh eng-we læ ng cü-go min-zin; ah-lah dzing-nyün tso Fah-lao-go nu-boh. <sup>26</sup> Iah-seh ziu shih-lih lih-fah pin Yiæ-gyih-go din-di tu iao kwe ng-kwu teh-ih peh Fah-lao, ih-dzih tao næn-kæn z-ka; tsih-yiu tsi-s-go din-di feh kwe-peh Fah-lao.

13 介時候荒年愈加厲害,到處嘸得糧食。埃及等迦南 地方為了荒年困苦。14 約瑟糶穀撥衆人,收攏咸埃及等迦 南地方所有個銀子。約瑟把箇個銀子馱進法老王宮裏。15 埃及等迦南地方銀子換了,埃及人都走到約瑟地方,話: 「請爾撥阿拉糧食。咋會要阿拉死來爾個面前?因爲銀子 已經換了。」16 約瑟話: 「好馱牲口撥我。若是銀子換 了,我爲了牲口肯撥爾拉。」<sup>17</sup> 各人就牽牲口到約瑟地 方: 約瑟爲了其拉馬牛羊驢子箇星調糧食撥其拉。箇年爲 了箇星牲口把糧食養其拉。<sup>18</sup> 箇年過了,第二年衆人又 來,等約瑟話:「阿拉弗敢隱瞞爾主,銀子已經換了,牲 口都歸撥爾主了,來爾主個面前,嘸告別樣東西剩落,只 有阿拉肌身等田地是了。」19 咋會要阿拉等田地都毀掉來 爾個面前呢?請爾把糧食買阿拉等阿拉田地。介呢阿拉等 阿拉田地都歸撥法老用。並且把秧子撥阿拉, 使得阿拉好 有性命,弗會死,田地也弗會荒過。20 約瑟待法老買逼埃 及個田地: 因為埃及人被荒年追落來, 各人賣掉其個田 地,所以田地都歸撥法老了。<sup>21</sup> 又使得埃及蕩邊址界到箇 邊址界個百姓都搬進城裏。<sup>22</sup> 只有祭司個田地弗賣,因為 法老賜撥祭司有一定個額子。其拉好喫法老所賜撥其個俸 祿。箇勒弗賣掉其拉田地。<sup>23</sup> 約瑟等百姓話:「今末我買 爾拉等爾個田地歸撥法老。蕩頭有秧子來東撥爾拉好去種 田。」24 其出產必定歸五股得一撥法老。箇四股好歸撥爾 拉自, 做爾拉田裏個秧子, 還有爾拉連屋裏兒囡箇星個口 糧。」25百姓話:「爾已經救阿拉個性命。但願阿拉得着 恩惠來爾主個面前。阿拉情願做法老個奴僕。」26 約瑟就 設立律法逼埃及個田地都要歸五股得一撥法老, 一直到難 間是介。只有祭司個田地弗歸撥法老。

<sup>27</sup> Yi-seh-lih deng-læ Yiæ-gyih-go Ko-sæn di-fông: læ keh-deo teh-djoh ts'æn-nyih; gyi-lah sang-loh-læ, do-nyiang hying-wông. <sup>28</sup> Yüô-koh læ Yiæ-gyih deng-leh jih-ts'ih nyin: z-ka Yüô-koh ziu-shü long-tsong ih-pah s-jih-ts'ih shü. <sup>29</sup> Yi-seh-lih si-go nyih-ts kw'a-tao, eo ng-ts Iah-

seh, teng gyi wô, Ngô ziah-z teh-djoh eng-we læ ng-go min-zin, ka-ni ng-go siu en-læ ngô do-t'e-'ô, ng yiu hao-i dzing-sing dæ ngô, m-nao tsông ngô læ Yiæ-gyih. <sup>30</sup> Dæn-z ngô iao teng tsu-tsong tso-t'ah kw'eng: ng yüong ta ngô c'ih Yiæ-gyih, tsông ngô læ gyi-lah tsông-kæn-go di-fông. Iah-seh wô, Ngô pih-ding i ng-go shih-wô ka tso. <sup>31</sup> Gyi wô, Ng hao vah-tsiu peh ngô: Iah-seh ziu teng gyi vah-tsiu. Yi-seh-lih k'ao-leh min-zông go bing-fong, deo eo-tæn-tao.

27 以色列底來埃及個歌珊地方。來箇頭得着產業。其 拉生落來,大樣興旺。<sup>28</sup> 雅各來埃及底勒十七年。是介雅 各壽歲攏總一百四十七歲。<sup>29</sup> 以色列死個日子快到,謳兒 子<u>約瑟</u>,等其話:「我若是得着恩惠來爾個面前,介呢爾 個手安來我大腿下,爾有好意誠心待我,嘸得好葬我來埃 及。」<sup>30</sup> 但是我要等祖宗做墳睏。爾用帶我出埃及,葬我 來其拉葬間個地方。」<u>約瑟</u>話:「我必定依爾個說話介 做。」<sup>31</sup> 其話:「爾好罰咒撥我。」<u>約瑟</u>就等其罰咒。<u>以</u> 色列靠勒眠牀個屛風,頭傴帶倒。

## Ts. XLVIII.

Keh-sing z-ken 'eo-deo yiu nying teng Iah-seh wô, Ng ah-tia yiu bing; Iah-seh ziu ta-leh liang-go ng-ts, Mô-nô-si, Yi-fah-lin, dô-kô ky'i. <sup>2</sup> Yiu nying t'ong-cü Yüô-koh wô, Ng k'en, ng-go ng-ts Iah-seh tao ng di-fông læ-de: Yi-seh-lih ziu ts'ang-tæn-ky'i, zo-læ min-zông-li. <sup>3</sup> Yüô-koh teng Iahseh wô, Zin-deo læ Kyüô-nen di-fông-go Lu-s djün-nenggo Jing-ming hyin-c'ih peh ngô k'en, s-foh peh ngô; <sup>4</sup> teng ngô wô, Ngô we s-teh ng meo-meo zing-zing to-ky'i-læ, yia we s-teh ng dzing-we ih-do-dziao pah-sing: ping-ts'ia pô keh-go di-fông s-peh ng tsiang-læ-go 'eo-dæ tso üong-yüngo ts'æn-nyih. <sup>5</sup> Næn-kæn ng liang-go ng-ts Yi-fah-lin, Mô-nô-si, ziu-z ngô feh-zing tao Yiæ-gyih læ-go z-'eo ng læ Yiæ-gyih di-fông sô sang-go, hao kwe-peh ngô, tsingziang Liu-bin, Si-min, kwe-peh ngô ka. 6 'Eo-deo ng sô sang-go ng-ts kwe-peh ng; læ gyi ah-ko go ming-'ô tehdjoh ts'æn-nyih. <sup>7</sup> Kông-tao ngô, ngô dzong Pô-t'æn læ-go z-'eo, læ Kyüô-nen di-fông-go lu-zông, teng Yi-fah-da siang-gying, Lah-kyih si-læ ngô-go sing-pin; ngô tsông gyi læ tao Yi-fah-da ky'i-go keh-da lu-li, (Yi-fah-da ziu-z Pah-li-'eng.)

箇星事幹後頭有人等約瑟話:「爾阿爹有病。」約瑟 就帶勒兩個兒子,瑪拿西、以法蓮,大家去。2有人通知雅 各話:「爾看,爾個兒子約瑟到爾地方來了。」以色列就 撐帶起,坐來眠牀裏。3雅各等約瑟話:「前頭來迦南地方 個路斯全能個神明顯出撥我看,賜福撥我。4等我話:『我 會使得爾茂茂盛盛多起來, 也會使得爾成為一大潮百姓。 並且把箇個地方賜撥爾將來個後代做永遠個產業。』5 難間 爾兩個兒子以法蓮、瑪拿西,就是我弗曾到埃及來個時候 爾來埃及地方所生個,好歸撥我,正像流便、西緬,歸撥 我介。6後頭爾所生個兒子歸撥爾,來其阿哥個名下得着產 業。<sup>7</sup>講到我,我從巴坦來個時候,來迦南地方個路上,等 以法大相近, 拉結死來我個身邊。我葬其來到以法大去個 箇埭路裏(以法大就是伯利恆)。」

<sup>8</sup> Yi-seh-lih k'en-k'en Iah-seh-go ng-ts, wô, Keh-sing z jü? <sup>9</sup> Iah-seh teng ah-tia wô, Z ngô-go ng-ts, Jing-ming læ dông-deo s-peh ngô-go. Gyi wô, Ling gyi-lah long ngô-go di-fông læ, ngô ziu coh-foh gyi-lah. 10 Yi-seh-lih ngæntsing lao-hwô, m-neh k'en-kyin: Iah-seh lin; ng-ts long-læ: gyi ziu ts'ing gyi-lah cü, bao-leh gyi-lah. <sup>11</sup> Yi-seh-lih teng Iah-seh wô, Ngô feh-siang tsæ teng ng kyin-min: nænkæn Jing-ming wa we peh ngô k'en-kyin ng-go ng-ts. 12 Iah-seh ling gyi-lah li-k'æ gyi-go kyiah-k'o-deo; zi boh-tao di-yiang-li. <sup>13</sup> Iah-seh ta keh liang ng-ts, jing-siu nyiah-leh Yi-fah-lin dziao-leh Yi-seh-lih-go tsia-siu, tsia-siu nyiahleh Mô-nô-si dziao-leh Yi-seh-lih-go jing-siu: z-ka ling gyilah long-ky'i. <sup>14</sup> Yi-seh-lih sing-c'ih jing-tsah siu, en-læ dinyi ng-ts Yi-fah-lin-go deo-zông, tsia-tsah siu en-læ Mônô-si-go deo-zông; gyi deh-we z-ka diao-ts'o gyi-go siu, ing-we Mô-nô-si z do ng-ts. <sup>15</sup> Ping-ts'ia teng Iah-seh cohfoh, wô, Ngô tsu-tsong Üô-pah-lah-hen, Yi-sah læ gyi minzin tseo-lu-go Jing-ming, dzong ngô sang-c'ih tao jü-kying iang ngô-go Jing-ming, <sup>16</sup> kyiu ngô c'ih ih-ts'ih næn-deogo T'in-s, dæn-nyün Gyi s-foh peh keh-sing siao-nying: wa-yiu pô ngô-go ming-z, teng ngô tsu-tsong Üô-pah-lahhen, Yi-sah-go ming-z, kwe-peh gyi-lah; s-teh gyi-lah læ shü-kæn-zông to-ky'i-læ, dzing-we ih-do-dziao pah-sing. <sup>17</sup> Iah-seh k'en-kyin ah-tia en jing-tsah siu læ Yi-fah-lin deo-zông, sing-li feh hwun-hyi; ziu tông-leh ah-tia-go siu iao dzong Yi-fah-lin-go deo-zông tsæn-ko tao Mô-nô-si-go deo-zông. <sup>18</sup> Iah-seh teng ah-tia wô, Ah-tia, feh-z ka-go; keh z do-go: ts'ing ng, en jing-tsah siu læ gyi-go deo-zông. <sup>19</sup> Ah-tia feh-k'eng, z-ka wô, Ngô ng-ts, ngô hyiao-teh-go, ngô hyiao-teh-go; gyi yia we tso ih-go dzoh-veng; yia we hying-wông: dæn-z gyi ah-di jih-dzæ we pi gyi yü-kô do; ping-ts'ia gyi-go 'eo-dæ we tso hyü-to koh-veng. <sup>20</sup> Tôngnyih coh-foh gyi-lah; wô, Tsiang-læ Yi-seh-lih pah-sing coh-foh nying-kô we ts-tin ng, wô, Jing-ming s-teh ng ziang Yi-fah-lin, Mô-nô-si ka: keh-tsao kyü-zông Yi-fah-lin læ Mô-nô-si-go zin-deo.

8以色列看看約瑟個兒子,話:「箇星是誰?」9約瑟 等阿爹話:「是我個兒子,神明來蕩頭賜撥我個。」其 話:「領其拉攏我個地方來,我就祝福其拉。」<sup>10</sup> 以色列 眼睛老花, 嘸得看見。約瑟連兒子攏來。其就親其拉嘴, 抱勒其拉。11以色列等約瑟話:「我弗想再等爾見面。難 間神明還會撥我看見爾個兒子。」<sup>12</sup> 約瑟領其拉離開其個 腳嗣頭,自伏倒地垟裏。<sup>13</sup> 約瑟帶箇兩兒子,順手捏勒以 法蓮朝勒以色列個借手, 借手捏勒瑪拿西朝勒以色列個順 手。是介領其拉攏去。14以色列伸出順隻手,安來第二兒 子以法蓮個頭上, 借隻手安來瑪拿西個頭上。其特為是介 調錯其個手,因為瑪拿西是大兒子。<sup>15</sup> 並且等約瑟祝福, 話:「我祖宗亞伯拉罕、以撒來其面前走路個神明,從我 生出到如今養我個神明, 16 救我出一切難頭個天使, 但願 其賜福撥箇星小人。還有把我個名字, 等我祖宗亞伯拉 罕、以撒個名字,歸撥其拉。使得其拉來世間上多起來, 成為一大潮百姓。」17約瑟看見阿爹安順隻手來以法蓮頭 上,心裏弗歡喜,就擋勒阿爹個手要從以法蓮個頭上趲過 到瑪拿西個頭上。18 約瑟等阿爹話: 「阿爹, 弗是介個,

箇是大個。請爾,安順隻手來其個頭上。」<sup>19</sup> 阿爹弗肯, 是介話:「我兒子,我曉得個,我曉得個。其也會做一個 族份,也會興旺。但是其阿弟實在會比其愈加大,並且其 個後代會做許多國份。」<sup>20</sup> 當日祝福其拉,話:「將來<u>以</u> 色列百姓祝福人家會指點爾,話:『神明使得爾像<u>以法</u> <u>蓮、瑪拿西</u>介。』箇遭舉上<u>以法蓮來瑪拿西</u>個前頭。」

<sup>21</sup> Yi-seh-lih teng Iah-seh wô, Ngô kw'a si-de: dæn-z Jing-ming we teng ng dô-kô læ-tong, ling ng kyü-ky'i tao ng tsu-tsong-go di-fông. <sup>22</sup> Zin-deo ngô yüong kong teng tao dzong Üô-mo-li nying siu-li deh-læ-go di-fông, ngô peh ng, s-teh ng pi hyüong-di to ih-be.

21 <u>以色列等約瑟</u>話:「我快死了。但是神明會等爾大家來東,領爾歸去到爾祖宗個地方。<sup>22</sup> 前頭我用弓等刀從 <u>亞摩利</u>人手裏奪來個地方,我撥爾,使得爾比兄弟多一倍。」

#### Ts. XLIX.

Yüô-koh eo-long ng-ts, wô, Ng-lah jü-long-læ, s-teh ngô hao wô hyiang ng-lah dao 'eo-deo nyih-ts sô p'ong-djoh z-ken. <sup>2</sup> Yüô-koh-go ng-ts, hao jü-long-læ t'ing, liu-sing t'ing ng-lah ah-tia Yi-seh-lih-go shih-wô.

雅各<u></u>謳攏兒子,話:「爾拉聚攏來,使得我好話向爾 拉道後頭日子所碰着事幹。<sup>2</sup> 雅各個兒子,好聚攏來聽,留 心聽爾拉阿爹以色列個說話。」

<sup>3</sup> Liu-bin 'ô! ng z ngô do ng-ts, ngô shü-dao, ngô ky'i-lih-go ky'i-deo, yiu ting do we-fong, yiu ting do neng-ken.

<sup>4</sup> Ng ziang shü ka feh-ding, feh-neng-keo hao-jü nying-kô, ing-we ng tseo-zông ah-tia-go min-zông u-wæ gyi: gyi tseo-zông ngô-go min-zông-de.

<sup>3</sup> 流便嗄!爾是我大兒子,我势道,我氣力個起頭,有 頂大威風,有頂大能幹。<sup>4</sup> 爾像水介弗定,弗能夠好聚人 家,因為爾走上阿爹個眠牀污壞其。其走上我個眠牀了。

<sup>5</sup> Si-min Li-vi z-go hyüong-di: gyi-lah pao-kyin z hyüong-ky'i. <sup>6</sup> Ngô-go sing, m-nao teng gyi-lah dong-de siang-liang, ngô-go yüong-wô, m-nao teng gyi-lah dong-de jü we; ing-we gyi-lah fah-ông sah nying, 'eo zi-go sing-siang keh-dön ngeo-go kyiah-kying. <sup>7</sup> Gyi-lah dong-nu z kæ tsiu-mô-go, ing-we z-ka mang; gyi-lah 'eng-sing z kæ tsiu-mô-go, ing-we z-ka hyüong: ngô we læ Yüô-koh congnyiang feng-gyi-c'ih, læ Yi-seh-lih cong-nyiang sæn-gyi-k'æ.

<sup>8</sup> Yiu-da 'ô! ng-go hyüong-di we tsæn-me ng: ng-go siu we k'ô-djü dziu-dih-go deo-kying: ng ah-tia-go ng-ts we læ ng-go min-zin pa ng. <sup>9</sup> Yiu-da z siao s-ts: ngô ng-ts, ng li-k'æ-leh sô lo-liah-go tseo-zông-ky'i: gyi boh-kæn, gyi gwu-kæn, ziang s-ts, ziang ts'-go s-ts: jü ken dong gyi. <sup>10</sup>

Kwe-pih feh li-k'æ Yiu-da, shih-lih lih-fah-go nying feh li-k'æ gyi-go kyiah-'ô, teng-tao <sup>[1]</sup>S bing-en go læ; cong pahsing tu kwe-voh Gyi. <sup>11</sup> Bo gyi-go li-ts læ bu-dao-jü-li, yia bo gyi-go siao li-ts læ ting hao bu-dao-jü-li, gyi yüong tsiu gyiang gyi-go i-zông, yüong bu-dao tsih-shü gyiang gyi-go bao-ts. <sup>12</sup> Gyi ngæn-tsing we-leh tsiu 'ong-'ong-go, gyi ngô-ts' we-leh na bah-bah-go.

<sup>8</sup> <u>猶大</u>嗄!爾個兄弟會讚美爾。爾個手會抲住仇敵個頭 頸。爾阿爹個兒子會來爾個面前拜爾。<sup>9</sup> <u>猶大</u>是小獅子。我 兒子,爾離開勒所擄掠個走上去。其伏間,其跍間,像獅 子,像雌個獅子。誰敢動其。<sup>10</sup> 圭必弗離開<u>猶大</u>,設立律 法個人弗離開其個腳下,等到賜平安個<sup>[1]</sup>來。衆百姓都歸 服其。<sup>11</sup> 縛其個驢子來葡萄樹裏,也縛其個小驢子來頂好 葡萄樹裏,其用酒滰其個衣裳,用葡萄汁水滰其個袍子。<sup>12</sup> 其眼睛爲了酒紅紅個,其牙齒爲了奶白白個。

[1] Ziu-z Z-lo. 就是士羅。(原註)

<sup>13</sup> Si-pu-leng we deng læ hæ-pin-yin, boh jün-go difông; gyi ts-ka ih-dzih tao Si-teng.

- <sup>14</sup> Yi-sah-kyüô z yiu gying-dao-go li-ts, læ yiang-gyin cong-nyiang boh-tih. <sup>15</sup> Gyi teh-cü en-tæn z hao, di-t'u 'eo-jih, ziu eo-tao kyin-kah-deo pe-ts, ky'i tsing-kong tông ts'a-s.
- 14 <u>以薩迦</u>是有勁道個驢子,來羊圈中央伏的。<sup>15</sup> 其得知安耽是好,地土厚實,就傴倒肩胛頭背仔,去進貢當差使。
- <sup>16</sup> Dæn we p'un-tön gyi-go pah-sing, ziang Yi-seh-lih cong-nyiang ih-go ts-p'a. <sup>17</sup> Dæn we tso do-ka-li-go dzô, lu-zông-go doh-dzô, ngao-sông mô-go kyiah-'eo-keng, s-teh gyi-tih-go nying we tih-loh 'eo-pe. <sup>18</sup> Yiæ-'o-wô! ngô z siang-vông Ng-go kyiu-fah!
- <sup>16</sup>但會判斷其個百姓,像<u>以色列</u>中央一個支派。<sup>17</sup>但 會做大街裏個蛇,路上個毒蛇,咬傷馬個腳後跟,使得騎 的個人會跌落後背。<sup>18</sup>耶和華!我是相望爾個救法!

- <sup>19</sup> Kyüô-teh we be ping-tsiang tang-ba, dæn-z 'eo-deo fæn-cün we teh-sing.
  - 19 迦得會被兵將打敗,但是後頭反轉會得勝。
- <sup>20</sup> Dzong Üô-shih c'ih-læ-go liang-zih fu-tsoh, yia we c'ih-ts'æn wông-go ky'üoh-zih.
  - 20 從亞設出來個糧食富足,也會出產王個喫食。
- <sup>21</sup> Neh-da-li z fông-c'ih-læ-go ts'-loh; gyi kông-c'ih hao-hao-go shih-wô.
  - 21 納大利是放出來個雌鹿。其講出好好個說話。
- <sup>22</sup> Iah-seh z meo-zing ô-ts; meo-zing ô-ts læ tsing pin-yin; ô-ts ts'ô-c'ih ziang nga ky'i. <sup>23</sup> Zih-tsin-go kw'eng-kw'u gyi, zih gyi, 'eng gyi, <sup>24</sup> dæn-z k'ao-djoh Yüô-koh Djün-neng Cü-go siu-li, gyi kong wa ngang go, gyi siu-kwang wa gyin go. (Dzong gyi ka c'ih-læ tso Yi-seh-lih-go Moh-s teng Bun-zah.) <sup>25</sup> K'ao-djoh Ng ah-tia-go Jing-ming we pông-dzu ng; Djün-neng-go Cü we s-foh peh ng; pô

zông-deo t'in-li-go foh-ky'i, 'ô-deo shü-li-go foh-ky'i, gwali teng t'æ-li-go foh-ky'i s-peh ng.

22 <u>約瑟</u>是茂盛椏枝。茂盛椏枝來井邊沿。椏枝岔出牆外去。<sup>23</sup> 射箭個困苦其,射其,恨其,<sup>24</sup> 但是靠着<u>雅各</u>全能主個手裏,其弓還硬個,其手梗還健個(從其介出來做 以色列個牧師等磐石)。<sup>25</sup> 靠着爾阿爹個神明會幫助爾。 全能個主會賜福撥爾。把上頭天裏個福氣,下頭水裏個福氣,懷裏等胎裏個福氣賜撥爾。

<sup>26</sup> Ng ah-tia sô coh-go foh we ko-jü ngô tsu-tsong sô coh-go foh, ih-dzih tao üong-yün sæn gyih yün-go di-fông; tu we kwe-tao Iah-seh-go deo-teng; ziu-z teng gyi hyüong-di li-yün-go deo-ting-zông.

<sup>26</sup> 爾阿爹所祝個福會過如我祖宗所祝個福,一直到永 遠山極遠個地方,都會歸到<u>約瑟</u>個頭頂,就是等其兄弟離 遠個頭頂上。

<sup>27</sup> Bin-yüô-ming ziang za-lông ting we ngao; t'in-liang we ky'üoh gyi sô k'ô-læ-go; yia-tao we feng gyi sô t'a-læ-

27 <u>便雅憫</u>像豺狼頂會咬。天亮會喫其所抲來個,夜到 會分其所拖來個。

<sup>28</sup> Keh-sing tu z Yi-seh-lih jih-nyi-go ts-p'a: keh z gyilah ah-tia teng gyi-lah kông-go shih-wô, coh-foh gyi-lah: koh-nying tsiao gyi-lah zi-go foh-ky'i coh-foh peh gyi. <sup>29</sup> Yi feng-fu gyi-lah, wô, Ngô kw'a-iao kyü zi-go dzoh-cong: yüong tsông ngô teng tsu-tsong tso-t'ah, læ Heh nying Yifeh-leng din-li-go yüih. <sup>30</sup> Ziu-z Kyüô-nen di-fông Mæn-ligo te-min, Mah-pi-lah din-li-go yüih; Üô-pah-lah-hen hyiang Heh nying Yi-feh-leng ma-læ tso veng-di-go. <sup>31</sup> Læ keh-deo Üô-pah-lah-hen teng gyi ts'i-ts Sah-lah tsôngkæn; Yi-sah teng gyi ts'i-ts Li-pah-kyüô yia tsông-kæn; ngô yia pô Li-üô tsông-kæn. <sup>32</sup> Keh-go din teng gyi-go yüih z dzong Heh nying ma-læ-go. <sup>33</sup> Yüô-koh feng-fu gyi ng-ts wun-de, kyiah shoh-long min-zông-li, ky'i dön-de, kyü zigo dzoh-cong ky'i.

28 箇星都是<u>以色列</u>十二個支派。箇是其拉阿爹等其拉 講個說話,祝福其拉。各人照其拉自個福氣祝福撥其。<sup>29</sup> 又吩咐其拉,話:「我快要歸自個族種。用葬我等祖宗做 墳,來<u>赫人以弗崙</u>田裏個穴。<sup>30</sup> 就是<u>迦南地方幔利</u>個對 面,<u>麥比拉田裏個穴。亞伯拉罕向赫人以弗崙</u>買來做墳地 個。<sup>31</sup> 來箇頭<u>亞伯拉罕</u>等其妻子<u>撒拉</u>葬間,以撒等其妻子 利百加也葬間,我也把利亞葬間。<sup>32</sup> 箇個田等其個穴是從 赫人買來個。」<sup>33</sup> 雅各吩咐其兒子完了,腳縮攏眠牀裏, 氣斷了,歸自個族種去。

# Ts. L.

Iah-seh boh-tao læ ah-tia min-k'ong-li, ngæn-li c'ih, ts'ing gyi-go cü. <sup>2</sup> Iah-seh feng-fu gyi joh-'ô-go i-sang do hyiang-liao yin gyi ah-tia; keh-sing i-sang ziu yin Yi-seh-lih. <sup>3</sup> Ping-ts'ia teng gyi mun-tsoh s-jih nyih kong-fu: ing-we yin nying z iao ka-go nyih-su hao mun-tsoh. Yiæ-gyih nying we-leh gyi k'oh ts'ih-jih nyih.

<u>約瑟</u>伏倒來阿爹面孔裏,眼淚出,親其個嘴。<sup>2</sup> <u>約瑟</u>吩咐其屬下個醫生馱香料鹽其阿爹。箇星醫生就鹽<u>以色列</u>。<sup>3</sup>並且等其滿足四十日工夫。因為鹽人是要介個日數好滿足。埃及人為了其哭七十日。

<sup>5</sup> Gyi k'oh-go nyih-ts mun-de, Iah-seh teng Fah-lao-go dzing-ts wô, Ngô ziah-z teh-djoh eng-we læ ng-lah ngænzin, ts'ing ng-lah teng ngô tseo-ming Fah-lao, wô, <sup>5</sup> Ngô ah-tia eo ngô vah-tsiu, wô, Ngô kw'a si-de; ng pih-ding tsông ngô læ Kyüô-nen di-fông, ngô-zi sô gyüih-c'ih-go veng-mo. Næn-kæn, ts'ing ng, peh ngô zông-ky'i, tsông ngô ah-tia; 'eo-deo ngô kyü-læ. <sup>6</sup> Fah-lao wô, Hao zông-ky'i, tsông ng ah-tia; tsiao gyi sô eo ng vah-tsiu-go shih-wô.

<sup>5</sup> 其哭個日子滿了,<u>約瑟等法老</u>個臣子話:「我若是得 着恩惠來爾拉眼前,請爾拉等我奏明<u>法老</u>,話: <sup>5</sup> 我阿爹謳 我罰咒,話:『我快死了。爾必定葬我來<u>迦南</u>地方,我自 所掘出個墳墓。』難間,請爾,撥我上去,葬我阿爹,後 頭我歸來。」<sup>6</sup> <u>法老</u>話:「好上去,葬爾阿爹,照其所謳爾 罰咒個說話。」

<sup>7</sup> Iah-seh ziu zông-ky'i tsông gyi ah-tia: yiu Fah-lao-go dzing-ts, teng gyi oh-li-go tsiang-lao, lin Yiæ-gyih di-fônggo tsiang-lao, tu teng gyi dô-kô zông-ky'i. <sup>8</sup> Iah-seh-go ihkô, teng gyi hyüong-di, teng gyi ah-tia ih-kô, long-tsong zông-ky'i: tsih-yiu gyi-lah siao-nying ngeo-yiang keh-sing dzing-loh læ Ko-sæn di-fông. <sup>9</sup> Wa-yiu ts'ô-ts teng gyi-môgo dô-kô ky'i: keng-dzong go nying ih-do-dziao. <sup>10</sup> Tao Iah-dæn 'o-nga, Üô-dah-go sa-dziang; gyi-lah læ keh-deo ting pe-shông 'ao-li-da-k'oh: Iah-seh we-leh ah-tia peshông ts'ih nyih. <sup>11</sup> Keh Kyüô-nen di-fông-go pah-sing, k'en-kyin Üô-dah sa-dziang-li-go pe-shông, z-ka wô, Keh z Yiæ-gyih nying-go 'ao-li-da-k'oh: keh-lah eo keh di-ming [1]Üô-pah-mah-si; ziu-z læ Iah-dæn 'o nga. 12 Gyi-go ng-ts tsiao ah-tia sô feng-fu-go ka tso. <sup>13</sup> Dæ gyi tao Kyüô-nen di-fông, tsông-læ Mæn-li-go te-min Mah-pi-lah din-li-go yüih: gyi yüih teng din z Üô-pah-lah-hen hyiang Heh nying Yi-feh-leng ma-læ tso veng-di-go.

7 約瑟就上去葬其阿爹。有法老個臣子,等其屋裏個長 老,連埃及地方個長老,都等其大家上去。8約瑟個一家, 等其兄弟, 等其阿爹一家, 攏總上去。只有其拉小人、牛 羊箇星剩落來歌珊地方。<sup>9</sup> 還有車子等騎馬個大家去。跟從 個人一大潮。10到約但河外,亞達個曬場。其拉來箇頭頂 悲傷, 號淚大哭。約瑟爲了阿爹悲傷七日。<sup>11</sup> 箇迦南地方 個百姓,看見亞達曬場裏個悲傷,是介話:「箇是埃及人 個號淚大哭。」箇勒謳箇地名亞伯麥西[1],就是來約但河 外。12 其個兒子照阿爹所吩咐個介做。13 抬其到迦南地 方, 葬來幔利個對面麥比拉田裏個穴。其穴等田是亞伯拉 罕向赫人以弗崙買來做墳地個。

[1]Ziu-z Yiæ-gyih nying-go di-k'oh. 就是埃及人個啼哭。(原註)

<sup>14</sup> Iah-seh tsông ah-tia ts-'eo, teng gyi-go hyüong-di, lin væn-pah dong-de zông-ky'i tsông gyi ah-tia go, tu kyü-tao Yiæ-gyih.

<sup>14</sup> <u>約瑟</u>葬阿爹之後,等其個兄弟,連凡百同隊上去葬 其阿爹個,都歸到埃及。

<sup>15</sup> Iah-seh-go hyüong-di k'en-kyin ah-tia yi-kying side, z-ka wô, Iah-seh 'ôh-tsia we 'eng ah-lah; we-leh ah-lah zin-deo tao gyi-go wa-c'ü iao wæn-pao. 16 Ziu ts'a ih-go nying tao Iah-seh di-fông ky'i, wô, Ng ah-tia feh-zing si-go z-'eo z-ka coh-t'oh, wô, <sup>17</sup> Ng-lah hao ky'i teng Iah-seh wô, Zin-deo ng-go hyüong-di tao ng-go wa-c'ü, ts'ing ng nyiao-sô gyi-lah ze-ôh. Næn-kæn ah-lah ts'ing ng, kw'unshü ng ah-tia Jing-ming-go nu-boh keh-go ts'o-c'ü. Hyüong-di teng gyi kông-go z-'eo, Iah-seh ziu k'oh-de. <sup>18</sup> Cong hyüong-di yia tseo-tao gyi min-zin, boh-tao wô, Ng k'en, ah-lah z ng-go nu-boh. 19 Iah-seh teng gyi-lah wô, Ng-lah fông-sing, ngô næn-dao hao dæ Jing-ming ka tso ma? 20 Kông-tao ng-lah, ng-lah z iao 'æ ngô: dæn-z Jingming i-s z hao-go, s-teh pao-djün-hyü-to nying-go singming, ziang kyih-mih-ts ka. <sup>21</sup> Næn-kæn ng-lah hao-vong p'ô: ngô we iang ng-lah, teng ng-lah siao-nying. Gyi ziu kông hao-hao shih-wô en-we gyi-lah.

15 約瑟個兄弟看見阿爹已經死了,是介話:「約瑟或 者會恨阿拉,為了阿拉前頭到其個壞處要還報。」16 就差 一個人到約瑟地方去,話:「爾阿爹弗曾死個時候是介囑 託,話:『<sup>17</sup> 爾拉好去等約瑟話:「前頭爾個兄弟到爾個 壞處,請爾饒恕其拉罪惡。」』難間阿拉請爾,寬恕爾阿 爹神明個奴僕箇個錯處。」 兄弟等其講個時候, 約瑟就哭 了。<sup>18</sup> 衆兄弟也走到其面前,伏倒話:「爾看,阿拉是爾 個奴僕。」<sup>19</sup> 約瑟等其拉話:「爾拉放心,我難道好代神 明介做嗎?20講到爾拉,爾拉是要害我,但是神明意思是 好個, 使得保全許多人個性命, 像今末仔介。21 難間爾拉 好甮怕,我會養爾拉,等爾拉小人。」 其就講好好說話安 慰其拉。

<sup>22</sup> Iah-seh teng ah-tia keh-kô deng-læ Yiæ-gyih. Iah-seh ziu-shü ih-pah-ling-jih shü. <sup>23</sup> Iah-seh k'en-kyin Yi-fah-lin-go ts-seng tao di-sæn dæ: Mô-nô-si-go ng-ts Mô-kyih, gyi-go ng-nô yia bao-læ Iah-seh-go kyiah-k'o-deo. <sup>24</sup>

Iah-seh teng gyi hyüong-di wô, Ngô kw'a si-de: Jing-ming pih-ding we tsiao-kwu ng-lah, ling ng-lah tseo-c'ih ts'-di, tao Gyi sô vah-tsiu s-peh Üô-pah-lah-hen, Yi-sah, Yüô-kohgo di-fông. <sup>25</sup> Iah-seh eo Yi-seh-lih-go ng-ts vah-tsiu wô, Jing-ming pih-ding tsiao-kwu ng-lah; ng-lah iao dzong ts'-di ta-leh ngô kweh-deo c'ih-ky'i. <sup>26</sup> Ka-ni Iah-seh si-de, nyin-kyi ih-pah ling jih shü: gyi-lah do hyiang-liao yin gyi; læ Yiæ-gyih di-fông loh-lin.

22 <u>約瑟</u>等阿爹箇家庉來<u>埃及</u>。<u>約瑟</u>壽歲一百零十歲。 23 <u>約瑟</u>看見<u>以法蓮</u>個子孫到第三代。<u>瑪拿西</u>個兒子<u>瑪吉</u>, 其個兒囡也抱來<u>約瑟</u>個腳嗣頭。<sup>24</sup> <u>約瑟</u>等其兄弟話:「我 快死了。神明必定會照顧爾拉,領爾拉走出此地,到其所 罰咒賜撥<u>亞伯拉罕、以撒、雅各</u>個地方。」<sup>25</sup> <u>約瑟謳以色</u> 列個兒子罰咒話:「神明必定照顧爾拉,爾拉要從此地帶 勒我骨頭出去。」<sup>26</sup> 介呢<u>約瑟</u>死了,年紀一百零十歲。其 拉馱香料鹽其,來埃及地方落殮。